



X

E a 16.

Solima V
de Hinoan
Dea. Di
Dea. T

Don

Jacoby. Jansons.


ANDR.
PATRICII
NIDECICI
ARCHID. VILNAE.

De ecclesia vera & falsa

LIBRI V.


- I. De fundamentis ecclesiæ.
- II. De parietibus, seu columnis.
- III. De tecto.
- IV. De opere intestino.
- V. De fastigio.

Ex Libris Congregationis Missionum Domus Samborien.



Reli. Melani Luns
man

CRACOVIAE in officina Lazari. M. D. XXCIII.
Cum gratia & privilegio Regis.



Cantic. I.

INDICA MIHI, DILECTE ANIMAE MEAE,
VBI PASCAS, VBI CVBES IN MERIDIE,
NE VAGARI INCIPIAM POST GREGES
SODALIVM TVORVM.

P. XVI. 107



MAX. POLONIAE REGI,
ET
MAGN. LITVANIAE DVCI
ac domino.

D. STEPHANO BATHORIO
HEROI INCOMPARABILI.

ANDR. PATRICIVS NIDECICVS
Fidem & subiectionem.



*U*M MVLT A HIS TEMPORI-
bus, Stephane Rex, ambigi soleant ab
hominibus eruditiss, de rebus ad summi
Dei religionem pertinentibus, animis
quidem ferè, quod teterrimum est, non
tam piis quàm curiosis, & quod dicen-
dum est, tantum non sceleratis, tum illa
sanè omnium, etiam non pessimo consilio de diuinis rebus in-
quirentium, communis & peruulgata quæstio est, quæ est de
ecclesia. Cùm enim constet inter omnes, sedem ac domicilium
religionis ecclesiam esse, admodum sanè consequenter, secun-
dum religionem quæritur, ea ecclesia, quæ hospitium religi-
onis esset, ubinam ipsa locorum haberet, & quibus quasi re-
gionum finibus circumscribatur: hoc autem est, sedes ac do-
micihum religionis, ubinam gentium sedem ipsam & quasi
domicilium suum fixisse videatur. Sicut enim ignorato eccle-
siæ ipsius domicilio, quæ est religionis domicilium, mancã ne-

EPISTOLA.

scio quomodo ac debilem esse necesse est notitiam religionis; ita contra, sedibus ecclesiæ cognitis semel ac inuentis, facile deinde, iisdem illis vestigiis, cum cætera, tum nidus quoque ipse, & ut sic dicam, castissimum illud sanctissimæ religionis ipsius cubile, ex quo ad reliquam eius cognitionem certa munitur via, poterit depræhendi. Quærentibus enim profectò nobis, Ubínamest verus ille, quem quærimus, & castus cultus Dei, quæ est religio? Respondebitur, In ecclesia esse. Ecclesia autem hæc ipsa ubi est? Hic si quis, intento ad sedem ac domicilium ecclesiæ digito, monstrare id nobis, & solenne illud, HIC EST, HIC EST, certò usurpare ac respondere poterit, næ haud multum iam erit, opinor, reliqui, quod in hoc genere, ad summam ipsam veræ religionis cognitionem delibandam, desiderari à quoquam posse videatur. Iure igitur, ut diximus, optimo, in veræ religionis sede indaganda, statim de ecclesiæ ipsius domicilio inquiritur; in cuius quasi sinu ipso repositam esse religionem ipsam, certissimè persuasum habeamus. Verùm quoniam ad hanc eiusmodi quæstionem, illud ferè miseris his nostris temporibus solet à multis responderi, quod fuit tantò antè à Christo ipso domino, ad nos cõmonendos prænunciatum, & mendacibus ipsis magistris, ad fallendos incautos homines attributum; ut scilicet in demonstrando domicilio ecclesiæ, modò respondeant, ECCE HIC EST CHRISTVS, ET SPONSA EIVS ECCLESIA; modò item, ECCE ILLIC, ECCE ILLIC: quo quidem ex eiusmodi responso hominum inconstantium, vario ipso & inconstanti, nulla certa ecclesiæ notitia hauriri, incerta potius & confusa quædam cognitionis perturbatio nasci in animis hominũ & fieri videtur; meritò elaboratum est iamdudum à plerisq; doctrina & pietate præstantibus viris, ut nobis in hoc genere, eorum ingenijs succurreretur; & quærentibus de ecclesiæ domicilio, non, ECCE HIC, & ECCE ILLIC, sed merum, ECCE HIC, ita responderetur, ut simul & locus ipse ædificij ecclesiastici certò ab omnibus notari, & non adumbrata vlla, sed quam maximè fieri posset, ad

EPISTOLA.

set, ad vinum, ut sic dicam, expressa eius effigies possit in uniuersum apparere: qua effigie semel agnita, eodem ipso momento, religionis domicilium agnoscamus, nec amplius, inquirenda religione, hâc illâc temerè mentibus nostris diuagari necesse habeamus. Atque hæc quidem viri illi. Quos ipsos imitati nos quoque ipsi, tentare his libris volumus, possétne eadem illa de re, quæ esset ab illis ante nos doctissimè explicata, aliquid etiam à nobis sic dici, ut saltem in vulgus probaretur. In quo quidem proposito institutoque nostro, fixa semel cogitatione nostra; cum diligentius expendereamus, idem hoc quod dicimus, ecclesiam ipsam domicilium passim religionis haberi, meminissimus etiam à Paulo Apostolo ipso, domum Dei uiuentis appellari; fecimus non grauatè, ut extensa porrò eadem illa cogitatione nostra, paulatim deinde à totius ædificii illius consideratione, ad partes ipsas lustrandas delaberemur; & singulas earû subtilius, uti à tanto artifice perfectas undiq; & perpolitas, perscrutantes, quæ in qualibet eiusmodi structuræ parte depræhenderentur, ea studiosè notaremus, scriptisque & litteris nostris consignaremus sic, ut descriptione ipsa nostra, non speluncam ullam latronum effingere (quæ imaginem aduersariorum penè synagogæ referre videntur) sed verissimam ipsam domus domini faciem omnibus adamussim repræsentare voluisse videamur. Itaq; in fundamentis primùm ipsis, saxa quatuor insignia, ipsi summo angulari lapidi Christo Iesu inædificata, notauimus, quæ ecclesiam, Dei domum, cum à cæteris profanis domibus omnibus egregiè secernerent, tum ipsam illam suis coloribus depingerent, ad unam, sanctam, catholicam, Apostolicam ecclesiam exhiberent. Quæ quidem eiusmodi esse, in ipso libro nostro ostenduntur, ut nulli, quod dico, adulterinæ ecclesiæ communicari possint videantur. Deinde in quatuor ipsis eiusdem ædificii ecclesiastici parietibus, totidem notas depræhendimus, easq; in biblia, patres, concilia, traditiones, partiti sumus. Quæ notæ ipsæ, etsi in ipsis assimularum ecclesiarum istarum parietibus, inscribi etiam aliqua

EPISTOLA.

ex parte nonnunquam videantur, in uniuersum tamen eius sunt generis, ut quædam tantum earum, idque per speciem modo, parietibus istis fortè accommodari queant; omnes omnino congruere illis non queant. Nam biblia quidem vendicari fortassis ab aduersariis, per quandam simulationem, & primo parieti ipsi ecclesiarum suarum utcumq; prætexi posse videntur; patres tamen, qui est ad hunc primum parietem, alter adiunctus paries, ab istis eo honore vix dignantur; concilia etiam, qui est tertius paries, leuius æstimantur; traditiones verò, quæ est quarti nota parietis, planissimè ab ijs repudiantur. Quæ singula fusius in libro ipso persequimur. Quid dicam de tecto sacramentorum & sacrificiorum sanctorum? Quid de ordine, qui est in illo ædificio ecclesiastico quasi opus quoddam intestinum? Quid de fastigio ipso, quod secundissimis in Dei domo successibus illustratum ac nobilitatum est? Quæ nos quidem omnia cum aduersariarum domorum fundamentis, tectis, parietibus, fastigiis, opere intestino, diligenter conferentes, omnia apud ipsos inferiora esse ostendimus, singula autem ita ad captum popularem attemperare studuimus, ut & facilius, ea quæ volumus, aspectabilibus his quasi propoendis notis docere, & hoc ipso etiam popularia illa ingenia magis delectare, & quod caput est, hoc isto ipso efficacius denique mouere videremur. Quod ipsum consecuti simus necne, tuum iudicium, Rex, esto. In quo tu ne illud quidem aduersariorum præiudicium, quæ tua est modestia, excludas, opinor, aut prætermittes, ut, si eos fortè hæc legentes malefice fremere, & aut leuiter saltem carpere, aut strictim contaxat vellicare conari hæc nostra audieris, tum existimas; nonnihil fortassis in his esse, quod aliqua saltem moueri vi non prorsus destitutum esse appareat. De re ipsa, quæ a nobis totis libris ipsis pertractatur, facile, pro tua prudentia intelligis, singularum, quas nominauimus, partium usum in ecclesia maximè necessarium videri. Nam & fundamentis fulciri eam ac sustineri necesse est, ne corruat; & parietibus contineri, ne dilabatur; & tecto pro-

EPISTOLA.

cto protegi, atque à tempestatum iniuria defendi, ne perfluat; & opere intestino distingui ac perpoliri, ne vasta, ne inanis, ne incondita appareat; & denique fastigio ipso perfici atque exornari, ne aut sine dignitate, aut sine perfectione, remansisse videatur. Confer mihi modò hæreticos, videbis, & fundamenta illa omnia sic ab eis euerti, ut nulla prorsus relinquantur; & parietes sic concuti, ut conquassati ecclesiam planè hiantem & nutantē efficiant; & tectum ipsum sic conuelli, ut undique pertusum remaneat: & operis intestini usque adeò curam non haberi, ut aedes ipsæ synagogarum illarū non nisi vacuæ, & totæ intus squalidæ conspiciantur; fastigium verò ipsum ita vel casu apud eos omissum, vel studiosè conspurcatum depræhendes, ut non solum necessariarum rerum copia priuet ecclesiam eorum, sed etiam nudatam ac spoliatam relinquat omni venustate dignitatis. Ex quo patet, ecclesiam quidem nostram, harum, quas diximus, partium beneficio, & stare ipsam per Dei gratiā, & bene compactam ac tectam sartamq. manere, & omninò omni ex parte, tam intus quàm foris, præclarè se habere: contrà, hæreticorum synagogas, aut fundamento planè carere, aut certè pro multiplici ipso fundamento, & eo tantum, eoq. ipso nimium eheu perforato bibliorum pariete, male nixas esse: reliquos verò parietes aut aspernari prorsus, aut certè in locum eorum, aliquid ferè de tecto ipso detractum, pro pariete ostentare; tecti autem ac operis intestini & fastigij simul, nullam omninò rationē habere. Quæ omnia legendis planè his nostris liquidius cognoscentur. Atq. hoc ego sanè dum mecum diligentius aliquantò reputo, equidem statum omnem conditionemq. veræ ecclesiæ his tribus contineri imperio: stabilitate primum, ut æternam; deinde dignitate, ut illustrem; postremò utilitate, ut fructuosam ecclesiam habeamus. Stabilitate, inquam. Accepit enim profectò à Christo ecclesia, primum ut sit. Super hanc petram, inquit Christus dominus, ædificabo ecclesiam meam; & quidem ædificabo, cunctis Erebi portis aduersus eam semper frementibus, sed præualituris nunquam.

EPISTOLA.

quam. Quod ipsum ecclesiae ipsi, mea quidem sententia, unitate potissimum, & sanctitate, & catholicitate, ut sic dicam, atq. Apostolicitate, quae nos hoc libro profundamētis ecclesiae ponimus, stabilitur. Deinde accepit etiam à Christo ecclesia, ut praesit; quae est summa quaedam ipsius dignitas. Est enim ea sponsa Christi, & mater familiars illa, cuius Christus caput est, & quam, secundum se, in familiari re sua, maxime voluit dominari. Super cathedram Moysis, inquit ipse, sedent scribae & Pharisei. Quicquid dixerint vobis, facite. Qui enim ecclesiam non audierit, is nunc iam, mea quidem sententia, inquit Christus dominus, profanus omnibus & publicanus esto. Sicut enim qui vos audit, me audit, loquitur ad ecclesiae praesides; ita qui vos spernit, me ipsum spernit. ait idem. Vult igitur & esse ecclesiam, quod iam docui, & praeesse; quod nunc docebo. Tribus autem illa rationibus, hanc ipsam, quam dico, praecellentiam, vel consequitur, vel conservat; tum docendo ea, quae bibliis, patribus, conciliis, traditionibus continentur; tum doctrinam hanc suam sacramentis & sacrificiis sanciendo; tum ~~omne~~ hanc ipsam sanctionem doctrinae suae, vi & potestate ordinis cuiusdam admirabilis tuendo inter mortales ~~et~~ fovendo. Quae nos tria in hoc ecclesiastico aedificio nostro, & parietum, & tecti, & operis intestini appellatione honestamus, aduersariae verò quotquot sunt synagoga, ne in comparisonem quidem cum nostris audent adducere. Postremò eadem illa ecclesia, quae accepit à Christo domino, ut ~~et~~ praesit, accepit etiam ab eodem illo, ut ~~et~~ pro sit. Sic enim ~~de~~ in quodam Evangelij loco. Vos, inquit, qui me invitastis, secuti, intra ecclesiae septa constitistis, ne, quaeso, solici sitis, quid aut edatis, aut bibatis, aut induatis. In hoc enim regno meo, quod est ecclesia, omnia affatim suppeditabunt vobis; & quidem sic, ut centies multiplicata ad vos in hac vita perveniant, & praeterea vita illa sempiterna lucro deniq. vobis apponatur. Haec sunt emolumenta illa, quae pro virtute fideq. nostra, à benignissimo parente Deo, intra sinum matris nostrae ecclesiae, quae se semper

in omnes

EPISTOLA.

in omnes utilitates nostras libentissimè solet effundere, debemus expectare. Quæ quo illustriora in vera ecclesia apparent, quàm in falsa, hoc etiam veram præ falsa ecclesia illustriorem & fructuosiorē videri faciunt. Qua de re extremo ipso libro nostro, ubi de fastigio successuum utriusque ecclesiæ in utramque partem, disputauimus, satis actum esse existimo. De libri ipsius editione, illud dicere necesse habeo. Sub ipsa statim, ô Rex, regni tui initia, in publicum primum prodiiſſe; idq̃ ita forte fortuna accidisse, quasi liber ipse iamtum videlicet auspiciâ ipsa tua tacitus mente & cogitatione sequeretur; & quasi iamtum, quod tanto post erat euenturum, sagaciter admodum præsentiret. Sed prodiiſſe, multò quàm nunc est, contractiorem, Hosio nostro, Cardinali Varmienſi viro amplissimo, dedicatum. Ex eo tempore ita modicus, & ita modica illa forma excusus, sic iactabatur, ut in sermonem etiã Italicum conuerteretur, & ad te quidem Latinus, ad tuam autem coniugem Serenissimam Italicus, uterque in membrana pecorina descriptus, Roma non ita pridem a viro optimo & tui domini studiosissimo mitteretur. Nunc auctiori libro ipsi quantulamcunque accessionem factam esse videas, non vereor ne ita ab omnibus rebus propriis nudam & inanem esse depræhendas, ut quicquid habet, de aliis id nos accepisse, nihil domo ipsos attulisse, nihil per nos ipsos inuenisse, indices. Aliquid enim, opinor, legens inuenies, cuius ego testimonium à tuo potius iudicio, ubi hæc legeris, expectare, quàm hoc tempore in hac mea epistola ponere debeo. Quicquid est, tibi saluò ô Rex, præ aliis inscribere hæc volumus; vel nostra voluntate, qui, cum omnia in Polonia, alicubi etiam extra Poloniam, diligentissimè lustrauimus, nihil te uno maius potuimus reperire: vel tua ipsius, qui nobis per amplissimum virum, supremum regni tui Cancellarium, Ioan. Zamoscium, hominem immortalitate dignissimum, illustrem admodum significationem dedisti, te hæc esse animo benignissimo à nobis suscepturum: vel quodam etiam libri ipsius quasi genio; qui liber iam inde ab initio, cum primum

**

lucem

EPISTOLA.

lucem illam hominum, rudis & informis cœpisset afficere, i-
 psis iam tum regni tui auspiciis, quod modò dixi, animo fa-
 nere, & tua, ut sic dicam, castra sponte sequi iam tum vide-
 batur: vel deniq. aliorum consilio. Sic enim iis, quibus hæc
 imprimis deberi videbantur, religionis & sacrorum in Polo-
 nia Antistitibus, ad quos hæc pro officio meo referebam, vi-
 sum fuit. Quod si quando, Rex, fuerunt tempora, cum per-
 tenui orationi meæ aures tuas regias benignè admodum, pro
 tua clementia, non semel patère voluisti, nunc certè tempus
 eiusmodi est, ut mihi, in hoc non paulò grauiori scripto meo,
 iisdem illis benignissimis tuis auribus, oculis, mente, sensu, au-
 ctoritate deniq. & gratia tua omni magnopere opus esse vi-
 deatur. Desigenda enim mihi sunt in oculis auribusque tuis,
 ea, quibus salu is, salua stetit hæc respub. mater tua pariter
 ac nostra; quibus deinde ipsis concussis & conuulsis, qualem
 eam acceperis, vides; qualem teneas, sentis; qualem reli-
 cturus sis, profectò, si bene te noui, perhorrescis. Decidat
 igitur quæso, Maiestas tua partem aliquã temporis à maxi-
 mis reipub. negociis suis, & hæc nibilo illis inferiora legens in-
 terim recognosce, tecumq. ipse pressim perpende; & uti hæc,
 te auctore, remediis quàm lenissimis, in suum statum reduci
 possint, etiam atq. etiam cogita. Hoc te liber ipse rogat, no-
 mini tuo dedicatus: hoc libri auctor, totus laudis & gloriæ
 tuæ cupiditate inflammatus, tibi supplicat: hoc Antistites sa-
 crorum tuorum abs te flagitant; hoc summus ille Hierarcha
 Romanus, Christi Dei nostri vicarius, cui tu, maiorum mo-
 re, statim ut gubernacula huius regni præhendisses, fasces
 imperii tui libens ac volens, remisisti, abs te, pro sua erga o-
 mnes omnium Christianorum regnorum ecclesias, maximè
 propria cura atque sollicitudine, magnopere postulat: hoc ne-
 mo bonorum est & reipub. ciuium amantium, quin desideret:
 hoc status ipse felicissimi olim regni huius, quod se nunc in fi-
 dem tuam contulit, assiduè admonet; hoc tu ipse adeò, præcla-
 ræ debes naturæ ingenioque tuo, ad omnes regiarum virtu-
 tum laudes exhauriendas prompto imprimis atque expedito.

Hoc

EPISTOLA.

*Hoc denique Deus ipse Opt. & Max. abs te requirit; quate-
in in misericordia & miserationibus coronavit, eiusque divini
& immortalis sui beneficii hanc gratiam à te reposcit, ut hæc
sanctissima Pergama regni tui, incensa iam & suffossa, hanc,
dico, arcem religionis sacrosanctæ ambustam magna ex par-
te in regno tuo & direptam, auctoritate tua, ex incendio eri-
pias, ereptam communias, communitam tueare.*

*Sic te diua potens poli; &
Patroni imperii, lucida sydera,
Functum munere bellico,
Exoluant reliquis usque periculis.*

*Vive, Vale Rex optime. Deus te Max. & immortalis no-
bis, ecclesiæ, reipub. quàm florentissimum conseruet. Hoc
Sereniss. eademq; religiosissima coniux tua, hoc nos indigni
sacerdotes tui, in hoc collegio ecclesiæ Cracouiensis, quibus
proximè hinc abiens maximum tui desiderium reliquisti, assi-
duè precamur.*

REVERENDO DOMINO

ANDRAE PATRICIO NIDECKI,
Praeposito Varsouienſi, Archidiacono Vilnenſi, &c.
Amico tanquam fratri chariſſimo & honorando.

Reuerende domine, Amice
tanquam frater chariſſime.



Est magnos pro Ecclesia Dei, qui nos hoc anno in
uſitatione Archidioceſeos exceperunt & defatigaue-
runt, exantlatos labores, maximum nobis ſolatium le-
uamentumq; attulit, tuus de uera & falſa Eccleſia li-
ber: quem ubi magna (ut tua ſoleo) cum diligentia uoluptateq; legimus,
ſublatis in coelum manibus egimus Deo immortalis gratias, qui turbu-
lentisſimis hiſce Eccleſiae ſuae temporibus, tales nobis uiros ſubmini-
ſtrat, quorum ſtudio & labore, diuina nominis illius gloria magis ma-
gisq; propagatur. Unde etſi aequè ad omnes maxima uoluptas lati-
tinaq; perueniat: ego tamen tanto maiori gaudio afficior, quanto maio-
ri ad clarum Eccleſiae in hac Provincia diuina uoluntate conſtitutus,
ope, auxilioq; indigeo. Et ut dolui ſemper, cum tot homines noſtros flo-
rentes atate & ingenio, ocioſos, aliorum eorumq; paucorum conatus ſu-
doreſq; ſpec tantos tantum, & ne digito quidem diuinum opus attin-
gentes uiderem; ita uiciſſim laetor, excitari iam aliquorum ingenium &
indus triam, cum maxime Eccleſiae Chriſti ab haereticis oppugna-
tur. Quod ego & illi ipſi gratulor, & mihi gaudeo: Cui ut te olim pri-
ſca illa noſtra ſtudia coniungunt, ita nunc conſtans & perpetua in-
uanda apud nos Eccleſiae Dei uoluntas conatusq; conſociant. Genus
quidem argumenti, quod tractas, magnopere probo: Varii uaria
tractant, quibus nihil detractum uolo. Sed quod argumentum ma-
gis ſit

gis sit ad hæc nos trā tempora accommodatum, quàm hoc de uera & fal-
sa Ecclesia, prorsus non uideo: nullumq̃, mea sententia, efficacius
esse potest, uel ad Orthodoxos in prisca & Apostolica fide retinen-
dos, uel ad hæreticos ad agnitionem ueritatis adducendos. Inuento enim &
cognito domicilio, sedeq̃ ueritatis, facile ipsa ueritas inuenitur atq̃ a-
gnoskitur. Nihil mihi adscribo, sed hoc certò affirmare audeo, ha-
buisse me frequentes cum hæreticis de uariis fidei nos trā articulis di-
sputationes: in nonnullis quidem ualuisse aliquid uidebantur, in hoc nulli
semper & planè muti. Possem hac in re uideri disertus, longioremq̃
texere sermonem, sed breuitatis causa multa prætereo. Excellit sanè in
eo genere Stanislaus Hosius Cardinalis S. E. R. & Episcopus
Varmiensis, uir, ut dignitate, ita doctrina, uitæq̃ sanctitate magnus &
incomparabilis, dum ueræ Ecclesiæ notas elegantissimè pertrahat.
Scripsit eadem de re Martinus Cromerus, cui ego propter ingenii
acumen, doct̃rinam singularem, acq̃ iudicium tribuo plurimum sem-
per. Edidit nunc quoq̃ recens Socolonijs nos ter de Ecclesia li-
brum. Omnes hi habent magnam ingenii, doct̃rinæ, & eloquentiæ lau-
dem. Sed in hac tua tractatione quiddam ego singulare magis magisq̃ re-
conditum animaduerto: quod quidem lectorem et orationis elegantia &
uulgati quodam modo argumenti noua quadam & orata tractandi
ratione retinet, mirificèq̃ delectat. Fruere itaq̃ tu isto tuo bono ad lau-
dem & gloriam nominis diuini. Et quando tantopere in munienda &
ornanda hac domo Domini desudas, opto tibi digna tuis uirtutibus me-
ritisq̃ præmia, euenire; quibus auctus, maiores nobis ingenii indu-
striæq̃ fructus feras. Qua de re scribo diligenter ad optimum sapien-
tissimumq̃ Regem nos trum, magnū tui similitum amatorem atq̃ pro-
motorem, ut cum se occasio obtulerit, tuorum & de Repub. & de Ec-
clesia

clesia Dei meritorum uelit habere rationem. Quod Mti. illius cordi
futurum non dubito. Commodum autem prodit hic tuus liber, sub hoc ip-
sum tempus, quo nos Archidioecesanam Synodum ex praescripto sa-
crorum canonum Louicii quarto nonas Octobris habituri sumus.
Eapropter abs te petimus, ut ad illud ipsum tempus aliquot nobis eius
operis exemplaria mittas. Ut enim ipsi eius lectione delectamur, ita ad
communem populorum utilitatem uehementer cupimus, ut in manibus
cleri nos tri uersetur. Vale. Dat. Lyskonicus Kal. Septemb.
M. D. LXXXIII.

D. V. R.

Amantiss. Frater.

Stanislaus Carnconius

Archiepiscopus Gnesnensis.

Manu sua.

ELENCHVS EORVM QVAE SINGVLIS
libris continentur.

L I B. I.

QVI EST DE FVNDAMENTIS
ædificii ecclesiastici.

Præfatio.

GRatia Dei aduersus laqueos Diaboli.	Cap. I.
Discordia & inconstantia hæreticorum.	Cap. II.
Concordia Catholicorum & vnitas ecclesiæ.	Cap. III.
Sanctitas ecclesiæ Catholicæ.	Cap. IV.
Prauitas hæreticorum.	Cap. V.
Nouitas & factiones hæreticorum.	Cap. VI.
Ecclesiæ Catholicæ consideratio.	Cap. VII.
Ecclesiæ Apostolicæ cōsideratio, quæ est in successione.	Ca. VIII.
Successio Episcoporum nulla apud hæreticos, ac ne missio quidem. ex quo inuisibilis ecclesia.	Cap. IX.

L I B. II.

QVI EST DE PARIETIBVS ET COLUMNIS
ædificii ecclesiastici.

Biblia Catholica LXX. interpretum.	Cap. I.
Biblia ab hæreticis aut contempta, aut pessimè tractata.	Cap. II.
	Hæretico-

Hæreticorum contra patres & Doctores SS, indignatio.	Cap. III.
Sanctorum patrum honos in ecclesia Catholica.	Cap. IV.
Conciliorum auctoritas in ecclesia Catholica.	Cap. V.
Conciliorum metus atque odium apud hæreticos.	Cap. VI.
Traditiones Apostolicas repudiant hæretici.	Cap. VII.
Traditionum sanctarum domicilium ecclesia Catholica.	Ca. VIII.
Digressio. Cur Biblia, patres, concilia malè tractentur ab hæreticis.	Cap. IX.

L I B. III.

QVI EST DE TECTIS AEDIFICII ecclesiastici.

Sacramenta ecclesiæ Catholicæ.	Cap. I.
Sacramenta hæreticorum.	Cap. II.
Sacrificium hæreticorum nullum.	Cap. III.
Sacrificium Catholicorum.	Cap. IV.

L I B. IV.

QVI EST DE OPERE INTESTINO ædificii ecclesiastici.

O Rdo proprius ecclesiæ Catholicæ, Confusio synagogarum hæreticarum.	Cap. I.
Contiones, missæ, cantus, hæc Catholicorum.	Cap. II.
Templa, cerimonias, festa Catholicorum.	Cap. III.
Hæretici cerimonias omnes aut tollunt, aut solo auditus sensu definiunt.	Cap. IV.
Hæreticorum templa, festa, cerimonias mutæ.	Cap. V.
	L I B.

LIB. V.

QVI EST DE FASTIGIO AEDIFICII ecclesiastici.

Catholici religionem inter ethnicos etiam propagant.

Hæretici inter ethnicos nullam,

inter Christianos tantum impiam ferunt.

Cap. I.

Successus hæreticorum.

Cap. II.

Successus Catholicorum.

Cap. III.

Epilogus.

AD

A D
L E C T O R E M.

TO T vexata feris, infinitasq; procellas
Errorum perpeſſa diu ſacra vinea Chriſti,
Vix inter ſpinas & pernicioſa vepreta
Agnoscenda fuit: tantis Sathan improbus illam
Exercere odiis, tanta auſus mergere labe.
Nunc duce P A T R I C I O propriis inſignibus exit
Notior, hic tribulos procul ac inamabile tollens
Zizanium, veris monſtrat cultoribus omni
Purgatas lolio ſegetes & ſentibus vuas.
Ingenio dignus tanto labor. ante ſucuit
Abdita naturæ ſcrutari arcana, Monarchis
Egregiam præbere operam, quæ lata ſub Arcto
Regna patent, totum patriæ officium dare, quando
Flos æui fuit, atque penu depromere mentis
Plurima Mercurio miranda ſtupendâq; Phœbo.
Iam ſenio grauior longè ſeſe altius idem
Erigit, atque animo cœlum ſedesq; ſuatur
Aternas, vnde afflatus ſpiraminis Diuinum,
Sancta aperit ſanctis myſteria nota Prophetis.
Hic venerandorum monumentis eruta patrum
Lector habes omni victura oraculo ſæclo.
Quæ viuos ſponſæ Chriſti effingentia vultus,
Ut germana queat cognosci E C C L E S I A monſtrant.
Non opus vtilius potuit proficiſci per vllum
Ingenio à tali. Cupidos hinc dirige grefſus
Docta cohors, feret hæc duplicem tibi lectio fructum:
Hinc fieriq; pios dabitur fieriq; diſertos.



A N D R.

PATRICII NIDECICI

DE ECCLESIA VERA ET FALSA.

LIBER I.

Qui est de fundamentis ædificii
Ecclesiastici.

PRAEFATIO.

*Non minor laus est, conuerti ad dominum, quàm non discedere ab eo.
Variis rationibus Deus nos ad se conuertit.*

MAXIME OPTANDVM ES-
set, vt in quã semel vocati sumus Ie-
su Christi Dei nostri fidem & religio-
nem, ea sicuti omnibus omnium gē-
tium superstitionibus, & omnibus
omnium hæreticorum impiis frau-
dibus longè antecellit; ita semel à
nobis suscepta, constanter possit ad extremum retineri.
Castitas enim religionis, quæ est cultus quidam Dei in-
corruptus, nec vllò nãuo inquinatus, non solum in veri-
tate religionis sita est, sed etiam in perpetuitate, atq. con-
stantia ipsius veritatis. Neque enim satis castum in religio-
ne est, quod modò purum est, modò maculosum; sed il-
lud demum verè hoc nomine dignum est, quod nulla est
vnquam commutatæ veritatis nota vsquam vitium: ita
A planè,

planè, vt quantum maximè fieri potest, fama quoque ipsa in hoc genere mentiri de nobis vereatur. Atque ea quidem castitas, quam constanter profitenda Dei Opt. & Max. religione consecramur, quoniam nec in consilio impiorum proponitur, nec in via scelestorum ac seditiosorum hominum inuenitur, nec verò vlla ratione, in cathedra contagiosa doctrinæ, vt Dauid appellat, pestilentis locata conspicitur; sed tota propria est, non magis vsu quàm possessione, ecclesiæ catholicæ sponsæ Christi, quam solam Deus esse in his terris voluit columnam, & sedem, ac stabilitamentum inter homines; eius, quam quærimus, veritatis: iccirco optandum sanè esset, ita nos complexu matris huius, vnius, sanctæ, catholicæ, & Apostolicæ ecclesiæ contineri, in cuius solius gremio fideli ac benigno, omnia Deus deposuit, quæ filijs suis appromisit; vt ne ad alias vnquam nouercas conuolemus, cassas primùm & inanes omnis felicitatis, deinde inuisas Deo, & Christo sponso, postremoque adeò & vitæ nostræ ac naturæ inimicas, & saluti. Verùm quando ea est perturbatio infelicitum istorum temporum, in quæ incidimus; vt filiorum desertorum magna vbique sit copia; præclare sanè cum iis agi videtur, qui cognita secessione aut aberratione sua à materno ipso latere Ecclesiæ sanctæ, regredi malunt, quàm progredi in hoc tam periculoso cursu. Etsi enim primam illam laudē tenere non potuerunt illibatæ religionis, propter multas vel hostium insidias, vel opinionum peruersitates, vel deniq. temporum ipsorum corruptelas, quibus adeò res reddit, vt ipsi etiam illi perfecti homines, quorum hactenus nulla in religione notata est varietas, de constantiæ suæ gradu deiici ferè ac deurbari videantur; in secundis tamen constiterunt, & errorem quidem ac lapsum suū principio per Dei gratiam agnouerunt, mox etiā repudiauerunt, postremò deniq. id quod caput est, ad Ecclesiæ veritatē reuocarunt. Est igitur, quod iterum atque iterū repetendum est, per-

est, perpetua illa veræ religionis castitas, res quædam rara atq. singularis, quæ etiam iccirco maioribus nobis est votis à Deo expetenda. Verùm ne multò quidē minor illorum etiam hominū semper fuit in Ecclesia Dei dignitas, qui cū aliquantisper, à castitatis illius puritate, vel suo, vel cōmuni hominum ac temporū vitio aberrarent, in viam tamē postea redierunt, & de qua paulò antè deflexisse videbantur, religionis castitate, eā deinceps tantò arctius & ardentius sunt amplexi. Satis id, quod dico, iam inde ab initio nascentis ipsius Ecclesiæ, tum in Simone illo Bariona, tum in Saulo denique Tharsensi ipso, duobus religionis nostræ columnibus, apparuit; quorū hunc si spectemus, vt olim fuit, hostem sanè comperiemus fuisse, & ex professo inimicum Christi Iesu, blasphemum, vt scribit ipse Timotheo discipulo suo, & persecutorem, & contumeliosum: sin spectemus, vt postea factus est, reperiemus, ab hoc eodem Iesu Christo, viuentem etiamtum in tertium cœlum subuectum, & ibidem factum ac designatum esse, vt ipse idem eidem illi discipulo suo alibi scribit, prædicatorem, Apostolum, & magistrum gentium, & vt Lucas sectator eius in actis Apostolorum testatum reliquit, electum esse vas & receptaculum singulare: vas quidem, deportando eiusdem Iesu Christi nomini destinatum, cuius nominis auspicio saluari, gentes profanæ ac barbaræ, ab imminente impietatis exitio, vitæ ipsi æternæ seruarentur: receptaculum verò, inæstimabilibus illis cœlestium thesaurorum donis conseruandis idoneum, quous deinde in perpetuum mundus collocupletaretur vniuersus. Atque hæc quidem Paulus. Petrus autem hoc etiam præ Paulo amplius, quòd, cum semel atque iterum, fœditimo adhibito execrationis genere, eum abnegasset, quem ipsum paulò antè, solenni quadam verborum contestatione, Christum Dei viui filium, admirando quodam, & ante illud tempus nunquam de mortali, mortali ore vsurpato, elogio appellasset; ab

set; ab eo tamen ipso, toties, tam fœdè abnegato domino, princeps est postea Apostolorum relictus ac constitutus, & petra eiusmodi, super quam ædificaretur Respub. & ecclesia Christiana. Vterque, quod videmus, non modò ex errore portum adeptus & salutem, sed etiam ex scelere sanctitatem: nec salutem & sanctitatem modò ipsam, verum etiam & sanctitatis & salutis huius, tum ferendæ inter homines, tum distribuendæ facultatem: inter homines, dico, eiusdem penè illius generis vitiis, quod mirè, inquinatos. Nimirum summus ille rerum omnium opifex Deus noster, in ratione exhibendæ gratiæ mortalibus, ita semper fuit sibi similis; vt indigentibus nunquam non benigne facere velle videretur. Sic enim olim per prophetā, Virum maritum, inquit, qui coniugem adulteram semel dimissam, iterum in communionem thori recipiat, non facile quis reperiatur. At verò tu Ierusalem, inquit, fornicata es cum amatoribus multis. Et tamen, & tamen reuerrere ad me: & ego recipiam te, & ego recipiam te. Sic pater Deus. Quid eius filius Iesus Christus? Hic verò optimus & clementissimus pastor, nō modò ouem deuiam benignissime reuocat; sed etiam ipsas nonaginta nouem de grege suo oues, ipsum, dico, gregem suum vniuersum, libenter, illius vnius causa relinquit, & vtrò quæsitum it errantem ouem vnā. Quam ipsam vbi repererit, equidem non agit præ se, non pedibus domum redire cogit, sed gaudii magnitudine exultans, tollit eam in humeros ipse suos, & sic ad ouile reportat; & conuiuium solenne instruit, & apud amicos singularem hilaritatem testificatur ex oue recuperata: ouem autem ipsam illam, multò deinceps, vt videtur, reliquis omnibus ouibus habet etiam chariorem. Semper igitur quantumuis fœdè errantibus, non solum ad veniam, sed etiam ad gratiam, nec reditus solum, sed etiam gloriosus admodum reditus, videtur in ecclesia patuisse, iam inde ab initio. Sed & posterioribus ipsis ecclesiæ temporibus

poribus, nihilo fuisse veterem illam & vſitatam rationem commutatam, vel vnus ille Aurelius Auguſtinus luculenter nobis demonſtrauit: qui ex inexplicabilibus Manichæorum laqueis, quibus implicatus erat, ſemel eluctatus, grauiffimus poſtea, diuino beneficio, eccleſiæ ſanctæ patronus, & defenſor, hæreticorum autem aduerſarius, & quaſi malleus ad eos, quod ſcimus, tundendus eſt factus. Ita ſanè, vt illis quidem ſuperioribus, qui veritatem religionis, iam inde ab initio ad extremum conſtanter tenuerunt, ceu bonis ac fortibus, his contrà, qui ſe ab errore reuocarunt, vt promptioribus iam & alacrioribus militibus, ad omne eccleſiæ obſequiũ rectiſſimè vti poſſe videamur. Atq. vtrumque id ſanè non eſt paſſim quorumuĩs, imò etiam, ſi verè loqui volumus, ne hominis quidem cuiuſquam. Nam fides omninò ſingulare quoddam Dei donũ eſt: nec, vt errare ipſum hominis eſt, ita etiam aut ab errore reuocari, aut in veritate perſiſtere, ſolius hominis exiſtimandũ eſt. Diuino ſcilicet maximè præſidio niti neceſſe eſt, cùm in vtroque, tũ in altero etiam magis. Scitum nanq. eſt, quod alibi vberius, magna Theologorum aſſeueratione diſſeritur: Conuerſionem hominis impii, à ſtudijs eius prauis & peruerſis, ad vitam Deo dignam, maius omninò & multò operoſius Dei præpotentis opus eſſe, ipſa vniuerſi huius de nihilo facta ſtructura & compoſitione.

Facilis deſcenſus Auerni.

Sed reuocare gradum ſuperàsque euadere ad auras,

Hoc opus hic labor eſt. Pauci quos æquus amauit

Iupiter, aut ardens euexit ad æthera virtus,

Diis geniti potuère.

inquit ethnicus pòeta. Noſtro quidem prophetæ illi non abſimiliter; qui exiti interitionisque cauſam omnem iis ipſis tribuit, qui ſe in eam ſua ſponte præcipitauerunt; præſidii verò laudem in rebus perditis & afflictis, Deo ipſi vni ſolidam ac integram relinquit. Qui quidem De-

us Opt. & Max. etsi multa assidue nobiscum tacite & latenter agere soleat, dum ad ostium animorum nostrorum stat & pulsat, dum aurem mentis nostræ vellicat, dum ad cor loquitur, & quasi intus canit, ea quidem via, quæ sensibus, atque adeo rationi ipsi nostræ penitus est ignota; tamē ne cætera quidem ferè solet prætermittere officia, in oculos & sensus incurrentia, & rationi inprimis nostræ consentanea, quibus ad frugem meliorem, ex medio errorum & offensionum humanarum cursu, volentes retrahamur. Qui præsumunt in Ecclesia eiusmodi rebus, obseruarunt pleraque, ex confessione ipsa, tam illorum, qui per hæc tempora à factionibus hæreticorum, ad Ecclesiæ societatem, infiniti per Dei gratiam redierunt, quàm eorum quoque, qui eandem porro hanc redeundi viam indies magis ac magis & ingredi, & tenere pergunt. Eorum quædam nobiscum communicauerunt, nobisque ipsis hac ratione viam quasi quandam præiuerunt, ad similia multò plura ingenio industriæque nostra inuestiganda, & publicè denique proponenda, ad communem omnium vtilitatem atque vsum: si fortè, vt medicina olim corporis, priuatis & paucis ab initio, tum ab hoc obseruatis, tum ab alio propositis, morborum remediis colligendis, tandem est vniuersa constituta, & ad artem etiam quandam redacta; ita hæc quoque maximè necessaria animi medicina, singulis istis remediis obseruandis ac proponendis, possit aliquando perfecta acquiri, & modis omnibus absoluta. Sed nos, qui de propositis vtrisque istis, diuinis scilicet & humanis, nostræ ad Deum conuersionis rationibus, hoc libro, quantum cum Domino poterimus, dicturi sumus, aliquid interea dicamus de prioribus, & obiter nunc iam ostendamus, quoniam ex fonte potissimum manare arbitremur, inæstimabile illud Dei donum, fidei aut conseruandæ, aut reparandæ nostræ; vt cum in genere fontem ipsum & originem tantorum bonorum tenuerimus, quo sine cætera
in hoc

in hoc genere nihil admodum sint profutura, etiam ad reliqua sigillatim persequenda, quæ quidem sunt huius loci maxime propria, aditum nobis tantò faciliorem patefaciamus: vnde rursus ad fontem ipsum identidem, quoties necesse fuerit, tantò expeditius cōmeare posse videamur.

CAP. I.

Gratia Dei aduersus laqueos diaboli.

Conuersionis nostræ prima & vniuersalis causa est gratia Dei.

Cetera petuntur ex comparatione Ecclesiæ veræ & falsæ.

Comparatio hæc quinque partibus absoluitur.

Fundamentis, parietibus, tectis, opere intestino, fastigio denique Ecclesiæ vtriusque considerandis.

Quæ est diuisio totius operis

Fundamenti saxa sunt quatuor.

Parietes sunt quatuor.

Tecti partes sunt duæ.

Opus intestinum est ordo.

Fastigium est exitus ipse in utramque partem.



Mninò igitur eorum hominum, quos vnquam suscepti erroris, hæresumq. in animum semel admissarum pœnituit, quos sanè, vt diximus, nec paucos per hæc tempora fuisse, nec obscuros constat, cum alii aliis causis adducti, ad officium se suum dicant recepisse, tum omnibus vnum illud commune esse in hoc genere videtur, quòd se ex æquo omnes, singulari illa, de qua paulò antè diximus, Dei benignitate, & afflatu, ac instinctu spiritus eius sancti, à falsis de religione opinionibus, vno ore affirmant recessisse. Et sanè, quemadmodum malum illud hæreticorum opinionum, inimico illi homini, qui bonis seminibus

minibus superfeminare solet zizania, diabolo, inquam, auctori tribuendum est, qui posteaquàm semel ab initio decepit calliditate sua Euam nostram, nō cessat porrò hodièque insidias tendere calcaneo illius, & assiduè tanquam leo circuire, quærens quem deuoret; ita contrà, bonum hoc, de quo loquimur, ad relictam semel salutis viam rursus reuertendi, non aliū meritò acceptum ferendū est, quàm Deo Opt. & Max. qui solus à laqueis illis diaboli, in quos se ipsa impietas solet induere, vt custodire, ne in eos incidamus, ita etiam, si fortè inciderimus, eripere nos ac liberare potest; quiq. intus, ablato à nobis lapideo, & in eius vicem carneo corde substituto, non solum docere, sed etiā omninò inducere nos potest, vt visis ac somnijs hæreticorū inanibus relictis, viuæ voci eius, in sola Catholica Ecclesia personanti, obediamus, & eam vitæ viā ineamus, quæ sola dux est, ad puras illas, æthereas, & cœlestes regiones. Quo quidē in loco maximè illud meminisse oportet, quod etiā superiùs quodammodo attigimus, hāc ipsam Dei benignissimi erga nos gratiam atque clementiam, omnibus esse in vniuersum expositam, qui modò exaudita saltem hodierno die, vt David inquit, illa saluari inprimis voce eius, corda sua, quæ ille dum intus alloquitur, emollire profectò modis omnibus conatur, durare obstinatè, & de industria ad stuporem quasi quendam adducere noluerint, sed benignè vocanti & inuitanti, & fores adeò animorum nostrorum etiam atque etiam pulsanti, illud comiter, vel potius suppliciter ac demissè responderint. Paratum cor meum, Deus, paratum cor meum. Loquere, loquere, quoniam audit seruus tuus. Conuerte me obsecro, & conuertar. Iam iam nulla mora est, sequor, & quā ducis, ego adsum. Quanquam hoc quoq. ipsum vt ita respondeamus, eiusdem illius benignissimi parentis nostri Dei donum est, cuius sunt reliqua quæ habemus, quibusque & vtimur, & fruimur, omnia. Quid est enim, ô homo, quod non acciperis?

CE

B

se quandam bonorum & malorū. Adducemus igitur hoc libro nostro nonnulla in comparisonem: & quidem sic, ut principio ea proponamus, quæ penitus quodammodo, in ipsa quasi ecclesiæ vi ac ratione intima continentur; ut sunt primum, notæ illæ quatuor interiores ecclesiæ, cum in ipsis fidei ac pietatis nostræ rudimentis hauriendis, in primo ipso, dico, christianæ religionis nostræ symbolo profitendo, illis quatuor illustribus admodum quasi indicis, veram ecclesiam esse inuestigandā, docemur & admone-mur, ut sit Vna primum, deinde Sancta, tum Catholica, postremò denique Apostolica. Quæ mihi, ut sic dicam, tesseræ ecclesiæ, quasi saxa quædam quatuor insignia, ad fundamentum structuræ eius iacta, atque in quadrum posita esse sic videntur; ut quæ ecclesia his fundamentis nitatur, ea vera sit; quæ non nitatur, eam falsam & adumbratam esse ecclesiam, reputare debeamus. Hoc primum. Ut sunt deinde scripturæ ipsæ, tam bibliorum, quàm patrum, & conciliorum etiam sanctorum; quibus quarto loco libenter addo illas quoque non scriptas traditiones ipsas; quibus quidem quasi quatuor parietibus firmissimis, in totidem saxis illis interioribus excitatis, quæ societas careat, ea vera ecclesia esse non possit, quæ non careat, ea nomen veræ ecclesiæ & honorem iure optimo sibi possit vindicare. Hoc secundum. Ut sunt postremò sacramenta & sacrificia ipsa, quæ mihi sanè in hac eiusmodi structura nostra, tecti cuiusdam instar videntur obtinere; tecti, dico, in ecclesia quidem ipsa benè promissi & compacti, in Synagoga, planè perfluentis. Hoc tertium, atq. adeò postremum eorū, quæ ex ipsa interiore ecclesiæ ipsius vi atque ratione deprompta, ad ipsum veræ ecclesiæ ædificium, siue excitandum, siue firmandum, siue adeò illustrandum, adducturos nos esse hoc libro constituimus. Quibus quidem ipsis illa etiam præterea libenter subiungemus, quæ ad aliquā illa quidem ædificii ecclesiastici rationem referri posse, nec ta-

nec tamen interiore ipsa ædificii ipsius vi ac ratione contineri, intra ædificium modò, aut certè supra ædificium ipsum, quod molimur, sita ac locata esse videantur. Cuius generis sunt, intra ædificium quidem & quasi intra cõplexum ecclesiæ sanctæ, Ordo ipse, sine quo nihil planè agitur in ecclesia, nihil non in synagoga. Suprà autem, in pinna quasi, & apice ipso, successus ipse & exitus religionis: qui mihi maximè omnium in vtramq. partem ita eminare videtur, vt facilè ex eo coniectura fieri possit, quid aut boni sit, siue in ædificio, siue intra ædificium ipsum ecclesiæ catholicæ, aut etiam mali, tam in ædificio, quàm intra ædificium ecclesiarum hæreticarum. Ita sanè, vt totum opus non incommode in quinq. libros distribui posse videatur: quorum primus, de fundamentis sit huius ædificii diuini, alter, de parietibus, tertius, de tectis, quartus, de opere intestino, quintus de fastigio. Atque iis quidem rebus omnibus, diligentius in partem vtramque perpendendis, solent animi hominum, ad complectendam religionis veritatem, vel omninò, vel certè maxima ex parte permoueri. Dic enim odes. Si quis tibi hoc tempore, ab hac quidem parte, ecclesiam proponat, vnam & constantem, sanctitate præditam, amplitudine omnia complexã, ferie continuationum perennem, sacramentis integram & augustam, sacrificio sublimem, scripturis sacris, bibliorũ, patrum, conciliorum, instructam, traditionibus etiam antiquissimis subnixam, ordine præterea ipso perpolitam & distinctam, successibus denique prosperis diuinitus auctã. Et hæc quidem ab vna parte. Ex aduerso autem ecclesiam tibi statuatur, totam laceram, & dissectam, totam spurcam, totam in angulum retrusam, nuper natam, sacramentis mutilam, sacrificio cassam, sanctarum scripturarum dubiam amicam, traditionum autem apertè hostem; eandem præterea omnibus in rebus mirificè confusam ac perturbatam, & nihil denique aliud, quàm certum ac proximũ

interitum spectantem. Has, inquam, tibi duas ecclesias, si quis hodie sub aspectum ponat, dic quæso, ex animi tui sententia, vtram malis? Ego verò etiam tacente te, non valde dubitem quid sis responsurus. Atque hæc sunt quidem, quæ nos hoc libro nostro, non proponere solum, sed etiam, si poterimus, vtrinque ostendere decreuimus. Faxit Deus Opt. & immortalis, ut quo nos consilio adducti, ad ea litteris his nostris mandanda accessimus, eodem ab omnibus excipi hæc ipsa ac legi videamus. Quo enim paucioribus datum est, ut vtram vitæ viam ingressuri sint, prius secum deliberent, quàm eam ingrediantur (cùm plurimi nostrum vel casu ipso delati, vel amicorum ac patronorum suasu inducti, vel docentium auctoritate impulsī, vel deniq. multitudinis certatim ad malum currentis, contagione ac furore, quasi quodam impetu fluminis correpti, ad ea ferè quæ cuique quoquo modo collibuerint, non ratione, sed opinionibus feramur, eaque sola pro veris amplectamur) hoc equidem magis adnitendum nobis est, ut exemplo illius Herculis, de quo est in libris ethnicorum, in solitudinem quasi mentis cogitationisque nostræ progressi, ibique sedentes, & diu multumque dubitantes, etiam atque etiam, & iterum atque iterum diligenter cogitemus, (neque enim leuia, aut ludicra petuntur; ait ille) cogitemus, inquam, duabus propositis, virtutis, & voluptatis, id autem est, religionis & hæreseos, seu, quod idem est, salutis & interitus viis, vtram nos inire præstet; &, si fortè, per aliquem siue errorem animi, siue inductionem, illam viam, quæ ducit ad interitum, ingressi iam sumus, hoc magis demus operam, ut statim pedem referamus, & aliam inquiramus, inuentamque scilicet carpamus primo quoque tempore, & persequamur. Iamque adeò non tam Herculem, quàm Dauidem ipsum nostrum exprimamus, qui Herculem illum, quasi alterum Goliam, longè in eo quoque superauit, quòd non solum cogitauerit, ut inquit ipse, vias

ipse, vias suas, sed etiam conuerterit pedes suos in testimonia domini. Non erit autem profectò difficile hanc viam, quam dicimus, inuenire, si ad ea seriò animum attenderimus, quæ permulta, in vtramque propositæ comparationis partem, omnibus suppeditare possunt; ex quibus nos quidem hoc loco pauca quædam, ad gustum videlicet tantum non etiam ad satietatem, decerpemus.

CAP. II.

Discordia & inconstantia
hæreticorum.

Ex quatuor saxis fundamenti ecclesiastici, primum est Unitas.

Cui contraria est Discordia & Inconstantia

DISCORDIAM in hæreticis magna varietas doctrinæ eorum commonstrat.

Ex hac varietate, orta est apud hæreticos confusio, incertitudo, discessio ab ecclesia, & à seipsis, in ipso etiam doctrinæ fundamento. Res turpissimæ & periculosissimæ.

Hic de quodam Discordia, primo Ministro Euangelicorum in Polonia, & de dissensione in comitiis interregni.

INCONSTANTIA hæreticorum semper vergit in peius.

1. à contemptu cæremoniarum, ad contemptum rerum maximarum.

2. à doctrina rerum subtilium, ad ea quæ palam sunt contra rationem.

Hanc pœnam hæretici meritò sustinent:

quia mente & ratione, quam à Deo acceperunt, aduersus Deum ipsum abutuntur.

Non sunt igitur sequendi. Nisi fortè in illo, ut ecclesiam catholicam, cui ipsi secundas tribuunt, os, ob hoc ipsum, primam habeamus.



Vuat autem in hoc genere ante omnia breuiter excutere primam illā ecclesiæ notam interiorem, quæ est nota Vnitatis; vt cū ecclesia nō possit esse nisi Vna, nos, comparatione facta, inquiramus hoc loco, nostrāne catholicorum ecclesia propius accedat ad eam formam & speciem ecclesiæ vnius, an verò synagoga hæreticorum. De qua quidem principio loquamur; atque in eo etiam, sumamus, si videatur, hoc exordium. Ecclesia vera vna est. Sexaginta sunt reginæ, & octoginta sunt concubinæ, inquit ille: vna est tamen columba mea, vna est matri suæ. Ita, vna est, quod dicimus, ecclesia vera. Atqui hæreticorum multæ sunt & magnæ ab ea vnitatis discessiones. non igitur eorum factiones, ad ecclesiam veram possunt vlllo modo videri pertinere. Videamus enim, quam tandem, & quantam illam ipsorum inter ipsos dissensionem atque discordiam esse oporteat, quæ non solum tot sectas orbi terrarum peperit, quot homines se ad illarum factionum varietatem atque inconstantiam contulerunt, vt falsam quot essent capita, totidem de religione sensus extare viderentur, verūmetiam, (vt est malarum omnium herbarum admiranda quædam fecunditas) cū singuli eorum, in illa variarum opinionum peruersitate diutius elaborare cœpissent, & cū tot diuersarum inter se doctrinarum quasi aquarum diuortia fecissent, illud effecit, vt numerus quoq. opinionum ipsarum, non multò post, cum numero, non dicam annorum, sed propemodum dierum, quibus eæ fabricabantur, fuerit adæquatus. Magnum est per se id quod dico, sed ex hoc ipso quoque quid porro secutum sit, videamus. Nimirum ex eo videntur esse tria quædam maxima consequuta. Vnum, vt numerus ipse falsarum illarum opinionum, multiplicatis inter se, tum hominum, tum dierum ipsorum numeris,

meris, mirum in modum augeretur; atque eo ipso tanta quotidie in doctrinam eorum confusio induceretur, ut opiniones postremò ipsas non modò pernoscere, sed etiam pernumerare, admodum difficile fuerit. Quod ipsum ne sic sine teste abeat, ecce tibi interea Zuinglium, testem satis locupletē; qui vnus, de vno eucharistiæ negotio, quadragies sententiam mutasse dicitur. Quid igitur dicemus, si & reliquorum omnium eius generis hominum, & omnium præterea, quæ inter ipsos intercedunt, controuersiarum, exacta ratio subducatur? Alterum etiam inde sequebatur, ut omnes illi, qui rerum suarum, & salutis incerti, ad istos fortè magistros veniebant, incertiores multò dimitterentur, & ex stultis insani prorsus redderentur, cum summo animorum suorum periculo & iactura. Quod sane si antea fuit ignotum, ex illo quidem tempore aliqua ex parte cognosci potuit, cum esset, qui dicere non dubitaret, illustri princeps prognatus genere atque familia, scire se utique quid in annum, Vitebergenses vicini sui, pro religione sequerentur; deinceps autem, quas porrò exacto anno religiones essent suscepturi, id verò planè se nescire. Tu verò, ô bone, annum frustra opertus ne fies. Dies enim crastina, ipsum etiam illud quod scire te putasti, totum in animo tuo sic conuellet, atq. labefactabit, ut non genus modò annuæ eorum religionis, ignotum tibi esse, planè fateri te oporteat; sed etiam, ut vllane tandem vnquam, an verò nulla potius religione tangerentur, homines tam incerta sententia, valde dubites. Hærent enim, hærent profectò semper, tanquam in salebra, sic in dogmatibus ipsis suis suspensi hæretici; ut, si Latinum nomen obtinerent, non incommodè ab hærendo viderentur esse appellati. Mirum igitur videri non debet, si, cum incerti ipsi & essent & fuissent semper, ipsos quoque suos consultores incertos planè dimittebant, quod erat in proposita distributione nostra alterum. Tertium autem præterea, ex illa, quam

quam dixi, innumerabili opinionum hæreticarum multitudinem, illud necessario sequebatur, ut ipsi illi earum fraudum architecti, non magis ab ecclesia ipsa, à qua secesserant, dissentirent, quam ipsi mutuo inter se alter ab altero diffiderent, (quæ enim alter alteri congrueret, in tanta quiduis opinandi licentia atque impunitate?) Planè ut cò tandem deuentum esset, quod scribunt quidam proprii prophetæ ipsorum, ut non tantum ecclesiæ ipsorum inter se non conuenirent, sed ut etiam à pastore suo diaconus dissentiret, custos dissentiret, ludimagister dissentiret; omnino autem ut nec vicino cum vicino conueniret, nec ciui cum ciue, nec patrifamiliàs cum suis domesticis. Ita factum est, ut alter ab altero, usque adeò ciuili quasi quodam bello, animis dirimerentur, ut nunc etiam duos opinionibus religionum inter se congruentes vix in vniuerso hæresum illarum regno reperiatis. Maledicè hæc & contumeliosè à nobis opponi sibi aiunt. Operis enim duntaxat ipsis & conatibus fortassis inter se nonnihil dissentire, fundamentum certè quidem, & illud ipsum in religione primum atque summum, constanter omnes & vno animo retinere. Ego autem dico, nec maledicè nec contumeliosè opponi; sed verè ac modicè, vel etiam intra modum; nec à nobis etiam magis, quam ab ipsis illis opponi, propriis, ut dixi, prophetis eorum. Quod autem addunt de fundamento, id eiusmodi est, ut aut nullum planè sit religionis atque ecclesiæ fundamentum, aut certè à nobis pariter atq. ab illis ignorari videatur. In quo enim, quæso, fundamento inter se conueniunt, qui neque in vnius dei & Christi confessione, neque in vnius ecclesiæ sponsæ eius agnitione, neq. in vna scripturarum interpretatione, neque in vlla tot & tantarum rerum aliarum consensione, secum conueniunt? Et, si in radice, quod iactant, conueniunt, quid est per Deum, cur alii alios, leuium scilicet foliorum causa, extra synagogas suas eiiciunt? Parum dico, quid est, cur alii alios non solum

solum de ciuitate, sed etiam de vita tollunt? Egregiam vero mihi narras in fundamento doctrinae consensionem, quae ab ipsis inter ipsos consentientibus, ferro est, & igni non semel in alteris vindicata. Hoccine autem solum factum est? ut alius ab alio, sine causa, maxima animorum acerbitate, per summam imprudentiam dissentiret? Imò etiam factum est, quod maius est. Factum est enim id, quod omnem amentiam superat, ut singuli eorum planè secum ipsi singulariter pugnarent; ut secum, inquam, unusquisque eorum bellum intestinum atque nefarium gereret. At qua tandem in re? Omnium, ut puto, maxima. In fundamento, dixeris; aut in eo certè, quod sit fundamento ipsi proximum. Quas enim ipse paulò antè opiniones, pro solis, primis, perpetuis, veris, necessariis, in religione sententiis reputauit, quasque etiam pro istiusmodi, orbi ipsi terrarum vniuerso, maxima contentione non ita pridem venditauit, has deinde, successu temporis, ita ad extremum repudiavit, ut eas aut planè in vniuersum negando, ex rerum quasi natura tolleretur, aut saltem limatius, ut sibi videbatur, discerendo, falsi omnino argueretur. O foedam, Christiani, discordiam, & minimè ferendam. O mirabilem quandam & indignissimè comparatam, ac ne comparatam iam quidem monomachiam, non vnius hominis cum vno, non mentis cum lingua, aut cum calamo, in vno eodemque homine; sed planè hominis vnius secum, & mentis vnius secum, & linguae vnius secum, & calami vnius secum; ut idem, modò efflaret, modò sorberet idem: eadem mens, modò diceret, modò negaret idem; eadem lingua, modò affirmaret, modò inficiaretur idem, idem calamus, modò scriberet, modò expungeret idem. Quae res sanè si in vita hac nostra communi, de rebus nunc sic, nunc alio modo se habentibus, ægerrimè ferri posset, in coelesti quidem, & illa, illa omnium certissima salutis doctrina tradenda, post tot praesertim à fundatione christianismi exactas aetates, &

C

post tot

post tot secula consecuta, ferri ab hominibus christianis non debet; inest enim in eo, præter cætera incommoda, insignis quædam turpitudine, non modò theologorum, sed etiam virorum quorumlibet, nec eorum tantum qui dicunt, sed eorum etiam qui audiunt, grauitate prorsus indigna. Meritò igitur summum hoc illorum, ob doctrinam inconstantissimam, probrum atque dedecus, non modò intus in animis eorum & pugnæ, & anxietates, vti necesse erat, sed etiam foris, quod vidimus, & verborum acerbitates, & maledicta scurrilia, & anathemata aliorum in alios, &, quod peius est, prælia cruenta, terroresque gladiatorum ipsorum, tum inter magistros, tum inter discipulos, sunt consecuti. Nam & Anabaptistæ contra Luteranos, & Luterani contra Caluinistas, & Caluinistæ vicissim aduersus Luteranos & Anabaptistas, multis in locis, hostiliter exarserunt, & ad arma denique cucurrerunt. Quid dicam de Luteranis inter se ipsis? qui cum iam in XII. factiones diuisi sint, vndecim quæ sunt, omnes sunt à duodecima publicè condemnatæ, & tanquam securi in foro, ita in eorum synagoga, anathemate percussæ. Ecceam Christiani, duodecim Luteri Apostolorum concordiam; ecceam iunctis scilicet dextris societatem eorum. Dies me deficiat, si coner vnus saltem confessionis Augustanæ, crambes videlicet istius toties repetitæ, & toties recoctæ, mutationes ac vicissitudines percensere; cum modò ait, modò negat, puerili sententia, vt quod modò dictum erat, indictum sit, quod ratum, irritum sit. Quid dicam de riuulis, cum fons ipse integritatem, atque adeò vnitatem suam tueri nō possit? aut quomodo riuos confectè numerando, cum fontem ipsum, ex vno tam multiplicem fieri videam, vt neque manibus ad præhendendum teneri, neque oculis ad peruidendum notari satis queat? Quid dicam de varietate prolis ac numero, cum parentes ipsos tam varios esse cernam, vt vnos eosdemque esse interdum magnopere dubitem? aut quid

aut quid quærar de liberorum factionibus ac tumultu, cum parentes ipsos nunquam sanctam societatem seruare, assidue potius inter se belligerare, videam? Iamuerò quid iis faciant alieni, cum ipsi sese mordere inuicem, & tanquam ad necem condemnare non dubitent? Hæccine autem est, quæso, pax illa, quam sibi primum ipsis stabilire, deinde nobis etiam prædicare debuerunt, si Christi discipuli videri voluerunt? Pax vobis, pax vobis. In quam-
cumque domum intraueritis, dicite, Pax huic domui. Sic
quidem Christus. Atqui aliter Antichristus. Quotquot enim, eo duce, ab ecclesia sese præciderunt, ii omnes vtut verbum Dei, & pacis euangelium, verbo præ se ferant, vtut interdum siue diuini numinis gloriam & honorem, siue adeò commodum rerumpub. nefariis suis consiliis per speciem prætexere videantur, quantum tamen ex rebus ipsis passim, & in Heluetia, & in Germania, & in Anglia, & in Scotia, & in Gallia, & nouissimè in Belgica consecutis, iudicari potest, reuera nihil aliud sunt, quàm flabella quædam seditionis domesticæ, & funestæ faces incendiorum, ac bellorum ciuiliū, & quidem bellorum, tam illorum in ecclesia, & in repub. perniciosissimorum, quàm etiam istorum fœdissimorum, inter ipsos eorum dogmatum duces, & auctores commissorum, mirabili quodam, & imperuestigabili Dei iudicio, quo fit, vt per inimicos ipse suos, vindictamumat de inimicis suis. Externis libentius quàm nostris exemplis in re eiusmodi vtimur. Sed tamen si quis nostra etiam attentius consideret, reperiet hic quoque in Polonia, (quod verè quidem, sed admodum dolenter dicere liceat) iam inde initio facto ab illo ipso Discordia nostro, quem tunc ministrum scilicet, & præcursorem atque emissarium, ad discindendam apud nos auitæ illius & pacatæ religionis nostræ concordiam, cū omine quodā male fausto, si benè animaduertere voluissemus, totius discindendæ paulo post ac euertendæ reip. Satanaspse maxime

ximè idoneum, non re minus, quàm verbo atque appella-
tione, designarat; quanta derepente rerum nostrarum cõ-
uersio facta fuerit, & ex illa miserè discordi doctrinarum
discordia, quas tunc videlicet doctrinas Discordia ille, ve-
teri ipsi atque perpetuæ catholicæ doctrinæ superfemina-
re cæperat, quanta se subitò in ipsas etiam reliquas, tum
priuatas, tum publicas res nostras, seditio infuderit; quàm
vir viro infestus fuerit, quàm ætas aduersus ætatem, ordo
etiam aduersus ordinem, & omninò pars ciuium aduersus
ciuium partem alteram exarserit, eamque accisis fortunis,
imminuta dignitate, eleuata auctoritate, omni que at-
tenuata existimatione circumscripserit; ita vt nisi naturalis
ingeniorum nostrorum bonitas, labentibus illis reipub.
fundamentis successisset, ipsam hanc rempub. quam vix
tenemus, ne vix iam quidem teneremus. Tam est venena-
ta res religionis discordia. Misericordia tamen domini,
quòd non essemus consumpti. Quanquam, si dicendum
est quod sentio, ne nunc quidem admodum est, cur exul-
tare iam potius quàm timere etiam debeamus. Vno enim,
qui solus adhuc nobis ex vetere reipub. nostrorum proge-
nie supererat, non ita pridem extincto rege nostro, altero
autem quoque, quem nos aliunde accitum, in locū mor-
tui paulò antè sublegeramus, & in huius regni possessionē
immiseramus, à nobis rursus, ad paternum, fraterna mor-
te vacuum factum, gerendum regnum, digresso rege, no-
bis autem ipsis, sic sine rectore, in medio relictis populis,
magnopere sanè verendum esse censeo, ne illud, quicquid
erat hactenus tectioris discordiæ nostræ, nunc altero hoc
interregno in neruum erumpat denique. Si enim tenuia il-
la & tempore ipso debilitata, varietatis in religione vesti-
gia, quæ semel erant ab vno illo Discordia, in paucis qui-
busdam nostris domibus atque familiis posita & impressa;
si illud, inquam, occultæ superstitionis venenum lentissi-
mum, temerè olim à paucis duntaxat & priuatis haustum,
tantum

tantum momenti habuit, ad interturbandam, ita vti vidimus, proximæ electionis regiæ concordiam & consensum, quantum tandem virium habiturum esse existimamus hoc tempore, cum omnis omnium superstitionum licentia, publico sit multorum fœdere & pactione iniquissima, sancita in republica ac confirmata? Itaque, vt cætera omnia cadant ex animi nostri sententia, illud certè in hoc tanto religionis dissidio, vix vitauerimus, quin duos, quod omen procul abesse cupio, inuicem oppositos, & sibi, per summam contentionem nostram obiectos, in hoc regnum inducamus reges; quorum ipsorum vel neutri quidem, quod in procliui est, nos vtrique pareamus, vel, dum suum quisque vix sustinemus, alterum profectò armis vicissim persequamur, nec satis opportunis, & certè patriæ ipsi inprimis exitiosis; quod quidem auertat Deus. Hæc sunt, quæ nos etiam ipsi, in his malis, quorum tamen apud nos, in comparatione cæterarum gentium, leuiter esse videntur impressa vestigia, experti sumus; & hæc sunt, quæ timere porro necesse habemus. Viderunt alii, in hac ipsa, de qua loquimur, hæreticorum discordia, tantam opinionum varietatem, viderunt in his opinionibus, tantam populorum fluctuationem, viderunt tantam aduersariorum inter ipsos dissensionem, viderunt tantam cuiusque eorum & tam mirabilem pugnam secum, viderunt tantam execrationum, excommunicationum, anathematum, proscriptionum, ignium etiam & armorum, aliorum aduersus alios licentiam. Hæc, vt dixi, viderunt alii. apud nos certè quidem, ea quæ vidimus & sensimus, etsi initia tantum quasi quædam malorum fuerunt, maxima ipsa mala non fuerunt, tamen, si benè attendamus, eiusmodi fuerunt, quæ sufficere debere viderentur ad suscipiendam cogitationem, de prouidendo omni ratione, quò hæc ipsa, quæ propriè ex eadem hac causa, nostræ huic impendent ciuitati, auertere posse videamur. Sed satis de nostris, ad communia redeamus, &

C iij quid

quid porrò mali varietatem illarum doctrinarum hæreticarum fuerit passim cōsecutum, vti cœpimus, exponamus; sed paucis. nam omninò haud libet. In quo quidem genere illud vtique prætermittendum non videtur, in quo fatalis iam quædam atque perpetua nouatorum istorum vefania luculenter perspicitur, quòd nouandis indies ac mutantis suis istis opinionibus, non ferè vnquam, nec casu, nec studio, ad meliora contendant, sed semper in deterius, vt diuus Paulus ait, prolabantur; & quidem vsq. adeò deterius, vt ab eiusmodi leuissimarum opinionum initio atque basi, ad tantam tantarum confusionum molem, atque fastigium perueniri aliquando potuisse, vix quisquam existimauerit. Quis enim fore credidisset vnquam, vt ab aqua lustrali, & cereis benedictis, quæ isti principiò sola arrodere cœperūt, gradus aliquando fieret, ad oppugnandum Christum primum, deinde etiam deum ipsum? Quis existimaret, quæso, aqua illa ex ecclesia deducenda, & cereis tollendis illis, tum Christo strui insidias, tum deo ipsi? Quis conatus illos, tam in speciem exiles ac remissos, arcum esse intentum putauisset, ad Christi ipsius, siue præsentia corporis in eucharistiæ sacramento, exinaniendam, siue fidem diuinitatis, in ipsius illius persona conuellendam? Quis modicum illud fermentum aquæ, vt dixi, & cerei, talem ac tantam massam ita inficere potuisse sperauisset, vt diuina ipsa vis & maiestas, quam tribus personis, vnica essentia, vniuersa antiquitas definiuit olim, nunc homuncionum istorū ingeniolis, aut deleretur planè ex animis hominum, aut certè secus, quàm summa ipsius dignitas postulat, attrectaretur? Atqui omnia hæc, ætas nostra vidit & audiuit; & cùm eiusmodi furias aduersus omne id, quod est Deus, rabiosissimè concitatas intuetur, haud ferè liquidò affirmare potest, esse iam tādem extremum petulantia istī constitutum modum, quominus in posterum, ex his eiusmodi præiudiciis, grauiora etiam in deum ipsum decreta,

decreta & conuitia, pertimescenda esse videantur. Sic enim hætenus quoque actum est. Negabat olim forte fortuna nescio quis, vel scio potius, nam interfui, apostolorum sanctitatem, singulos eorum, ut solent isti, in ordinem redigens, (Hæc enim tum sola scilicet in circulis & conuiujs iactabantur) excepit confestim alius, peruersi genus dogmatis serio refugiens, orationisque insolentiam ad maius etiam incommodum adducens. Quid? si, inquit, eodem hoc modo, quo negas apostolorum sanctitatem, eius quoque ipsius diuinitatem neges, qui apostolorum fuit dominus & magister? Quid factum est? Equidem ad eam tunc vocem, aures omnium qui aderant, atque adeo eius quoque ipsius, qui se apostolis iam ipsis iniquum iudicem ferebat, ita inhorruerant, ut quin vestes ad illam tantam tamq. inauditam sermonis impietatem ab omnibus scinderentur, nihil admodum deesse videretur. Nondum videlicet tum assueueramus os in cælum ponere, & cum gigantibus, impia aduersus Deum bella moliri, armis plusquam paricidalibus. Perfractis autem semel religiosi pudoris repagulis, & meta transgressa verecundiæ, Deo & diuinis mysterijs omnibus debitæ, eadem illæ aures, quæ tunc de re tam impia ac detestabili, optimo etiam & christianissimo animo, vel quæri saltem non sustinebant, aliquot modò postea interiectis annis, insano eiusmodi, atque nefario dogmati hauriendo, æquissimas se prorsus præbuerunt, haustumque eius doctrinæ venenum dirissimum, in præcordia etiam ipsa, proh dolor, transdiderunt. Sic enim profectò se res habet, ut cuneus, à tenuissima fissura tentato initio, crassissimas etiam arbores, nouis identidem ingeminandis ictibus, valeat diffindere. Horribilia sunt hæc, quæ dico, impietatis generane an supplicia, an vtrumque horum, atque haud scio, an horribiliora nulla fingi possint. Quæ enim sic dicuntur aut sentiuntur, ea, quantum in ipsis est, euertunt planè id, per quod stant hæc omnia, quæ vide-

quæ videmus, quæque etiam non videmus. Qua vna re, sicuti fraus nulla capitalior cōcipi, ita vix vlla sceleris pœna excogitari posse videtur atrocior. Sed profectò plura etiam sunt & maiora cōsceleratis mentibus flagella à Deo destinata. Quo enim quis magis peccat, hoc ipso magis etiam plectitur. Quod autem est, aut quod fingi saltem potest cōscelerato ipsi animo supplicium acerbius, quàm si quis assiduè, & in noua ipsa peccata ruat, & pro iis, in nouarum simul pœnarum ac cruciatuum genera incurrat? vt ita quidem assiduitate illa peccandi, & noua illi quotidie quasi quædam peccandi via muniatur, & his ipsis nouis atque recentibus peccatorum accessionibus, noua etiam indies contra eum vindicta diuinitus prouocetur. Atque hic iam quidem obiter videamus, in hac ipsa, quam interrim animo contemplamur, hæreticorum varietate atque inconstantia, qui gradus, & quàm ad ruinam præcipites facti fuisse videantur. Etenim cùm tanta quædam in hominibus exorta esset auiditas doctrinarum nouarum atque variarum, vt omnes omninò, sicut loquitur Apostolus, tanquam prurire auribus viderentur, in hoc tum profectò primum peccatum fuit, quòd sic prurirent; quòd ipsum peccatum, est etiam deinde alterum statim consecutum, peccatum simul & peccati pœna, quòd cupiditatem illā, & vt dico, pruritum illum noua ac varia audiendi, tanta deinceps excepit, diuersarum sectarum, imò insectorum quasi ac vermium quorundam, ad perniciem nostram cōiuratorum multitudo & copia, quanta vix vnquam aliàs simul fuisse perhibetur. Iamuerò hoc ipsum, quòd dico, & peccatum & supplicium secundum, tertium est etiam & peccatum simul, & supplicium consecutum, quòd in tanta diuersarum doctrinarum copia, tanta, quòd mirum est, mentis ac rationis extitit inopia, vt homines ipsi magis ac magis in præceptis amentiae cuiusdam extremæ ruere, atque de fartagine, quòd aiunt, in prunas pestilentissimarum de Deo, deq.

Deo, de quæ diuinis rebus opinionum, assiduè prolabi viderentur. In quo ipso peccato, peccati quæ pœna, tantum etiam porrò processum est, quod modo dicendum est, ut iidem illi homines, non iam solum, ut vidimus, à pietate & religione, quæ est recta ratio, desciscere, sed planè in ipsis stultis stultæ atque amentis mentis suæ ratiocinationibus evanescentes, ab ipsa postremò, quæ dicitur, ratione naturali, hoc autem est, à communi hominum mente & intelligentia, palàm deficere, atque ita se ipsos prorsus fugere, & à seipsis exulare viderentur, exemplo propemodum inaudito. Quis enim, obsecro, ante istos, usque adeò mente captus fuit, ut diceret, quod isti dicunt; ut quenque esse optimum, ita in optima quaque actione peccare: id autem est, bene agendo, male agere? Quis hominum ita insaniuit, ut tetra ac nefanda sceleratissimorum quorumque nebulonum facinora, Deo Opt. atque sanctissimo auctori ascriberet? quod isti facere non dubitant. Quis denique mortalium ita à seipso discessit, ut quicquid ab homine in omni vita fieret, aut gereretur, id seruiliter, tanquam à non domino actionum earum. (sed hoc interim largiamur) Id coactè, ceu ab inerti pecude. (sed hoc quoque mittamus) Id sine sensu propemodum ac motu omni, non secus quàm à trunco & stipite, geri aut fieri, & diceret & existimaret? quod isti magistri non ferendi & existimant, & affirmant. Planè ut mihi præter omnem rationem, quæ omninò videtur amisisse, nihil aliud quàm vaticinari modò & insanire videantur. Ac mea quidem sententia, magno sanè suo merito, videntur hanc pœnam, amissæ & ereptæ mentis atque rationis sustinere. Si enim iurè multari illos dono accepto dicimus, qui dono ipso aduersus doni ipsius auctorem & datorem abutuntur, profectò omnes istos, iure optimo rationem, & cogitationem, & mentem, & intelligentiam omnem, quasi excellentem quandam status atq. conditionis humanæ prærogatiuam

D

amisisse,

amifisse, existimare debemus, qui diuinum illud donum rationis, diuinitus sibi tributum, à Dei & Christi auctoris obsequio atque seruitute, cui potissimum destinatum ab initio fuit, abreptum atque auersum, quasi signum quoddam superbiæ atque contumaciæ, aduersus Deum ipsum & Christum eius sustulerunt, atque eo ad inducendam in orbem terrarum, ab ipso orbis fabricatore & rectore secessionem, & deinde ad ferendas immortales inter mortales, aduersus immortalem ipsum, & mentis, & rationis, & pacis atque concordiae, auctorem ac præbitorem Deum, rixas & contentiones & dimicationes, ingratè, impiè, crudeliter, abuti non dubitauerunt. Iure igitur, vt dixi, optimo, ratione & mente multati sunt. Quod ipsum, illud etiam consequebatur necessariò, vt amissa ratione, ne insanire iam quidem cum ratione posse viderentur. Cùm igitur ad eum modum nihil prorsus cum ratione agerēt, magna fanè cum ratione, ab hac eorum inaudita ferè mentis cæcitæte, & non solum ab aliis, sed etiam à seipsis, & quod caput est, ab ipsa natura hominum digressionem & abscessu, cùm aliàs alii multi prudentes viri alienos se esse ostenderunt, tum non ita pridem maximè vir nominis & existimationis, planè refugit; cùm aliquanto iam antè, illud de ipsis sæpe in suis sermonibus consueffet vsurpare. Quem fugiam, inquit, habeo; quem vestrum sequar, non habeo. Nimirum enim omnes isti, vt erratici (libenter enim interea, quantum possum, abstineo hæreticorum nomine) fugiendi sunt; quem autem ex eis potissimum sequare, ne vnum quidem omnes quotquot sunt, ex omni suo numero poterunt demonstrare. Sed quid? Luteranus nimirum, si aliter fieri non poterit, Luterum edet suum; Zuinglianus Zuinglium suum; Calvinum Calvinianus. Quid tu igitur facias? Non eas? cur igitur ducem quæris? Eas verò? ad quem autem eorum potissimum, quæso? Aequè igitur cōtemnas omnes? id verò est, quod, mea quidem sententia, omnium

omnium tutissimè feceris. Quid enim melius in rebus dubiis? Atque hoc loco quidem, dum exitum iam huius partis spectare videretur oratio hæc mea, venit adeò in mentem mihi insigne exemplum quoddam, atque haud scio, an rebus hisce, de quibus agimus, conuenientissimum, quod de veterum olim philosophorum sectis inter se dissidentibus, nonnusquam scriptum esse memini; quorum omnium suo quisque studio delectatus, ita vni suæ factioni primas vindicare solebant, vt reliquas omnes sectas non modò præ sua contemnerent & aspernarentur, sed etiam à philosophia ipsa vniuersa arcerent planè atque abigerent; Academici modò, cum bona ceterorum venia, locum vtiq; aliquem in philosophia tuerentur, suo quidem iudicio, item vt ceteri omnes, primum, reliquorum autem omnium concessu, secundum. Quid tum postea? Equidè illud deinceps ex iis eorum disceptationibus, ab ipsorum prudentum, & nulli sectæ addictorum hominum ingeniis, acutè simul & verè intellectum fuit, rectè Academicos suo sibi iudicio primos & potissimos visos esse, qui ceterorum omnium iudicio secundi pronunciarentur. Atq; hæc quidem philosophi. Quid est igitur in re proposita, quod ad ecclesiæ catholicæ cōmendationem, hæreticarum autem synagogarum odium atque inuidiam, non incommode trahi posse videatur? illud equidem primum, vt opinor, quòd quemadmodum concertationes philosophorū, ipsis quidem eorum sectis ruinam adferunt, philosophiæ autè & veritati robur atque firmamentum; ita bellum hæreticorum inter ipsos, ipsis quidem hæreticis illis, aut mors est, aut infamia, ecclesiæ autem aut pax, (quod vulgari etiam prouerbio celebratur) aut victoria. Dum enim ecclesia contrariis quasi simul hæreticorum ventis atq; fluctibus illis appetitur, tum maximè ridet partium minas distractarum; quæ partes mutuis inter se cædibus debilitatæ & consumptæ, ecclesiam ipsam in medio tutam ac securam,

curam, addo etiam, vnam & vnitam, atque hoc ipso maxime inuictam relinquunt, ab ipsis etiam, vt Christus ipse proficitur, portis inferorum. Deinde illud quoq. alterum, quod ipsa demum catholica ecclesia, rectè, suo iudicio, & fit, & à ceteris haberi vera ecclesia debeat, quæ ab omnibus hæreticis de veritate inter se contendentibus, secunda habeatur. Etsi enim ipsam veritatis prærogatiuam, nulla hæreticorum secta, præ se, catholicæ ecclesiæ, nihilo sanè magis, quàm ceteris hæreticorum sectis omnibus, aperte concefferit, tamen si quis primas cuique earum concedat, & de secundis, ex singulis ipsarum percunctetur, non valde dubitem, secundas ipsas partes, facile omnium concessu delatum iri ad catholicam ecclesiam nostram. Ex quo ipso rectissime concludi potest, verè catholicam ecclesiam esse primam, cui à sectis omnibus, quæ modò aliquem sobriæ ac moderatæ cogitationi locum dare videantur, secundæ concedantur. Concedi autem secundas, satis profectò indicant voces illæ, sæpe in multis eorum notatæ, & à multis exauditæ, frementium atque dicentium, Papiſtas (sic enim appellant catholicos) in illo quidem genere, de quo cum alterius generis hæreticis controuertatur, tolerabiliores videri. Itaque istos ipsos catholicos, quos ad eum modum in secundis consistere faciunt, in suis etiam hæreticis vrbibus, impunè ferè versari patiuntur, hæreticos autem diuersi generis non modò non patiuntur, sed etiam eiiciunt & exturbant, interdum autem vitam quoque iis eripiunt iudicio constituto.

CAP. III.

Concordia catholicorum
& vnitas ecclesiæ.

Unitas ecclesiæ catholicæ, tum in consensione doctrinæ, tum maxime in vno supremo magistratu eluceſcit.

*Unitatis symbolum ita proprium est ecclesiæ catholicæ, vt solum
sufficiat ad hæreticos dignoscendos.*

*Hic de fructibus hæreticorum, locus ille euangelii, Attendite à
falsis prophetis. &c. expenditur.*

*Unitatem ipsam, eadem tradenda omnibus ætatibus doctrina, sem-
per conseruauit ecclesiæ catholica.*

Hanc igitur ecclesiam sequamur, alias detestemur.



ED mittamus iudicia hæreticorum,
& rem ipsam putemus. Digladiantur
inter se hæretici, & quidem sic, vt quo-
tidie per summam suam inconstanti-
am & mobilitatem animorum, imò
per singularem peruersitatē, de malis
rebus præsentibus ad pessimas quasq.
magis ac magis delabantur; quis est igitur illorum, quem
sequare? imouero quid est illorum, quod sequare? Nunc
mihi, quæso, conuerte oculos, & exaduerso, miram quan-
dam ecclesiæ ipsius catholicæ concordiam & consensum
confidera. quis erit, obsecro, ex omnibus catholicis, quem
aspernere? quorum quidem omnium tanta est consensio,
& tam coniunctæ in eiusdem religionis negocio operæ,
vt vnum si cognoris, omnes nosse videaris. Iam uero in
ipsis eorum religionis capitibus, quotquot sunt, quid est,
quæso, quod reiicias? cum æquè omnia, magna & perpe-
tua quadam omnium constantia & amore, sint pietati ho-
minum & immortalitati ipsi consecrata? Sed hoc interim
omittamus, & de consensu tantum eorum, quod est præ-
sentis instituti, aliquid in medium adferamus. Nimirum
ecclesiæ nostra catholica, vt semel dicam omnia, eam o-
mnibus omnium temporum interuallis constantiæ laudē
per Dei gratiam tenuit, vt omnium eorum, qui gremio
ipsius continerentur, & doctrina vna, &, quod etiam ma-
ius est, cor vnū, & anima vna, & quod penè est mirabilius,
labium planè vnum esse videretur. Fuit autem id semper

vsque adeò ecclesiæ nostræ proprium, vt non modò in iis
 apparet, qui, aut iisdem ex locis orti essent, aut iisdem
 temporibus vixissent, (quod quidem ipsum hæretici si ha-
 berent, orbis ipse terrarum iactantiam illorum vix ferre
 posse videretur) sed etiam multo magis in illis, quorum
 & origines, & ætates, magnopere distinctas esse videmus;
 à quibus tamen omnibus, magna omnium consensione,
 vnus Deus coli, vna fides prædicari, vnum baptisma vsur-
 pari, vna ecclesia teneri, & quod ferè horum omnium v-
 nica causa est, vnum, vnum semper in terris aspectabile i-
 psius ecclesiæ caput agnosci simul & perhiberi videbatur.
 Qua quidem ex tot & tatarum rerum tam arcta commu-
 nione & consensu, ipsa etiam ecclesia VNA est facta; &
 quidem, vt dixi, ex eo maximè vna, quòd vnum semper
 inter pontifices principem, ex hominibus ipsis hominem
 delectum, & hominum causa in ipso Pontificatus summi
 fastigio positum ac constitutum haberet, quo, cum in ce-
 teris suis ad Deum negociis, pro sequestre veluti quodam,
 tum etiam in sopiendis de religione cōtrouersis, pro sum-
 mo quasi quodam arbitro ac disceptatore vteretur. Ali-
 oqui enim contentiones eiusmodi, neque deesse profectò
 vnquam possent, non vno aliquo earum moderatore &
 rectore constituto, neque, dum vigeant, ecclesiam vlla ra-
 tione vnā esse patiantur. Sicut enim vnā, quam sic po-
 pulariter appellamus ciuitatē, nulla res ex omnibus, æquē
 ac vnus aliquis supremus, proprius quidem ipsi ac peculi-
 aris magistratus constituit; qui, si modò statum ac con-
 ditionem ciuitatis illius vtiliter conseruare ac tueri debe-
 at, cum eiusmodi sanè potestate in ea versetur oportet, vt
 legis loquentis vicem sustineat, & quæ velit, non modò
 facilè apud ciues, sed etiam necessariò obtineat; alioqui
 omnem illam multitudinem breui dissipari ac dilabi ne-
 cesse sit; ita nisi ecclesia vnum semper cum summa pote-
 state, aspectabilem, & ob ipsos oculos positum ducem ha-
 beat, cu-

Eccl. Lib. I. Cap. III.

31. *UNITAS
ecclesie.*

beat, cuius interim supremo arbitrio, diuersa illa & planè infinita hominum studia moderetur, vna quidem esse ciuitas, vna respub. vna denique ecclesia non poterit. Atque hoc ita esse, abunde, vt puto, declarant tot & tam variæ hæreticorum synagogæ; quæ vt primùm vni huic Duci ac moderatori ecclesiæ, & parère ipsæ desierunt, & alios ab eius obedientia auocarunt, subito & pacem ac tranquillitatem orbis terrarum mirificè perturbarūt, & deinde perturbatis ac permistis rebus omnibus, ipsæ quoq. magis etiam quàm si Babylonis alicuius ædificatrices extitissent, & mēte & voce cōfusæ sunt. Verè enim dixit Augustinus. In cathedra vnitatis doctrinā positam esse veritatis. Atq. hic quidē disertus planè esse possem, si in hoc genere omnia & sanctorū patrū, & sanctarū scripturarum loca recitare vellē. Sed ad alia properat oratio. Est igitur veræ ecclesiæ nota prima atq. verissima, symbolū ipsum vnitatis. Vsq. adeo sanè, vt ego quidē omnes quotquot sunt hæretici, hoc vno indicio satis teneri existimem, si modò scindere arguantur eam, quam dico, ecclesiæ vnitatem. **EX FRUCTIBVS EORVM COGNOSCEtis EOS**, ait magister noster. Non ex foliis videlicet, quæ prætendunt. sunt enim bonis quoque arboribus communia. Non ex radice: quæ etsi eorum propria, penitus tamen abdita, & in ipsis consceleratis eorum mentibus est defixa, vt non tam facilè animaduerti possit. sed **EX FRUCTIBVS** ipsis: qui neq. latère omnino quenquam possunt, propalàm positi, neq. fallere, cū malis tantum arboribus conuenire videātur. Cū enim dominus mendaces prophetas ipsos, id autem est, hæreticos, incedere, inquit, opertos vestimentis ouium, quid aliud, obsecro, quàm folia quasi quædam videtur designare, quibus arbores istæ infelices vestiuntur? Cū autem ait, intus esse rapaces lupos, nonne satis stirpem ac radicem eorū significat, odio quodam humani generis imbutam acerbissimo? Vt ita radice eorum descripta ac fo-

lis, com-

liis, commodius deinde ad fructus ipsos eorum exponendos accedere videatur, cum inquit: EX FRUCTIBVS EORVM COGNOSCETIS EOS. Teneo, dicis; sed agè, inquires, iterà dum illud idem mihi. Quænam sunt tandem illa folia? Ouium, respondet dominus, vestimenta. VENIUNT AD VOS, inquit, IN VESTIMENTIS OVIVM. Perge porrò, dicis. Quæ sunt hæc ouium tegmina? Atque hoc quidem in loco, ei, qui vim ac rationem eorum vestimentorum penitus cognoscere cupiat, ego dico, non dominus, tale quippiam esse inquirendum, quale utique prophetarum ipsorum muneri, prima fronte congruere videatur. Prophetas enim, ut dixi, eo loco dominus hæreticos appellat, cum inquit: ATTENDITE A FALSIS PROPHETIS. Est autem, quod constat, scriptura ipsa, quasi materies quædam subiecta prophetis, quam tractent, & in qua versentur. Eam igitur ipsam, scripturam inquam, amictum esse falsorum istorum prophetarum, tanquam quoddam ex ouium vellere contextum integumentum, non absurdè, ut opinor, dixero; quo se quidem integumento hæretici ipsi venditant, & pro ouibus Christi, quæ vocem eius inprimis obseruent, videri faciunt. Nec verò prorsus ego ipse tantum, ad eum modum intelligendū esse, id quod dico, censeo, sed ipse etiam dominus, si bene attendamus, non fert planè obscurè; dum nobis paulo post eosdem istos, quos modò Græco verbo mendaces magistros appellauit, vellere hoc ouili cōtectos, ex propinquiore iam quasi loco spectandos proponit & cognoscendos, his verbis. NON OMNIS, inquit, QVI DICIT MIHI DOMINE DOMINE, INTRABIT IN REGNVM COELORVM. Id est. Non quilibet eorum, qui se existimant scire & nosse me, cœli simul ac terrarum dominum, quiq. passim, tanquam vellus quoddam ouium, ita præ se ferunt, priuatam scilicet quandam ex lege & euangelio cognitionem mei, aditum habebunt, fuit hic, ad ecclesiæ communionem

nionem fruendam, siue alibi, ad cernendam æternæ vitæ hæreditatem. Et ibidem paulo post. IN ILLA DIE, inquit, *MULTI DICENT MIHI.* Iam hoc primum animaduertendum est, quod dicit saluator: *MULTI.* non vnos videlicet innuens, sed multos esse asserens & diuersos. Deinde quod addit, *DICENT,* inquit. Hoc autem est, different tantum & disputabunt, non etiam vita ipsa exprimet, aut repræsentabunt. Postremò autem, quod ita subnectit, *DICENT MIHI.* Mihi, inquit, dicent; sic scilicet, vt, si possent, me quoque ferè ipsum, eodem illo prætenso ouium tegmine fallere, & in errorem inducere gestiant. Quid igitur dicent? *DOMINE, DOMINE,* inquierent, *NONNE IN NOMINE TVO PROPHETAVIMVS?* Hoc autem est, nonne verbum tuum prædicauimus? nonne euangelium scilicet atq. legem tuam puram putam mortalibus nunciuimus? Videtúrne tibi, quæso, ouilia ista hæreticorum vestimenta, quasi cuiusdam arboris infelicitis folia, satis ob oculos nostros ponere dominus his verbis voluisse? Quid radicem? Ille verò etiam radicem eorum, verbis designat insequentibus, cum inquit: *INTVS AVTEM SVNT LUPI RAPACES.* Quasi si dicat. Penitus, inquit, in ipsis venis & visceribus, vel potius in ipsa stirpe ac radice sua, instar sunt rapacium luporum. Nimirum intimis suis cogitationibus hoc agunt atque moliuntur, vt ipsi quoque, ceu lupi, rapiant & dispergant gregem; hoc studium eorum est, hæc radix, vt sic dicam, & stirps hæreticorum. Cuius vos tamen radicis, inquit, vim & rationem, horribilem fanè ac naturis vestris inimicam & aduersam, sed penitus absconditam, & omninò benè celatam ac dissimulatam, ex nulla alia re melius & liquidius, quàm *EX IPSIS EORVM FRVCTIBVS* perspicietis. Cum enim ipsi & tribuli sint, & spinæ, vuas profectò & ficus non ferunt; spinarum tantum & tribulorū fructus ferunt. *NVNQVID LEGVNTVR,* inquit, *EX SPINIS VVÆ, AVT EX TRIBVLIS*
E FICVS?

FIGVS? Atque hæc quidem dominus. Quid est autem, ficus & vuæ? quid item tribuli & spinæ? Equidem, ut puto, verbis his dominus ipse noster, ab vna quidem parte, rationem religionis & doctrinæ suæ, vuīs & ficubus comparat, idque ipsum vel ob gustus suauitatem, vel, ob alendi ac nutriendi facultatem, vel denique ob illam, in vuīs quidem acinorum, & ficubus granorum, in ipsius autem sacrosancta religione, gentium ac populorum congeriem, in vnus & fidei, & spei, & charitatis, &, quod caput est, ecclesiæ vnitatem. Ab altera autem parte, hæreticorum siue adeò pseudoprophetarum doctrinam, planè confimilem esse significat spinarum & tribulorum. Primum, quòd uti baccæ illæ spinarum, exteriore quidem specie proximè ad vuas quodammodo accedunt, nec sunt vuæ tamen; & uti fructus ipsi tribulorum, erranti quidem oculo videntur ex longinquo nonnullam ficuum similitudinem repræsentare, re autem vera à ficubus magno distant interuallo; ita hæreticorum genus omne, speciem ac similitudinem quādam affectare videntur doctrinæ Christi, à vi tamen & potentia euangelii, quæ est in salutem omni credenti, absunt quāmlongissimè. Per dulces enī sermones, ceu ficus quasdam, & per benedictiones, tanquam vuas, non ad salutem dirigunt, non; sed ad interitum deducunt, quicquid est vsquam mentium bonarum atque innocentium. Hoc primum. Deinde verò, quod mihi planè magis etiam rem ipsam continere videtur, quòd quemadmodum & spinæ & tribuli, frutices aculeati sunt, configendis ac lacerandis corporibus apti atque idonei, ita hæretici ad hanc vnam rationem nati ac facti esse videntur, configendæ ac lacerandæ ecclesiæ dei. Quisquis igitur, ut extrema cum primis & mediis contexamus, obtentu scripturarum sanctarum, odio autem penitus insito doctrinæ euangelicæ, vnitatem ecclesiarum dissipet, & quod integrū in iis erat, id quasi aculeo immisso punctim feriat, omninoque configat, la-

figat, laceret, & discindat, is mihi quidem & folium ac speciem ouilis velleris prætere, & fructum spinarum ac tribulorum edere, & radice ipsa ac medulla sua, quasi quendam rapacem lupum in ecclesia repræsentare, & omnino nomen hæretici ac pseudoprophetæ merito obtinere videbitur. Illud enim demum evidentissimum pseudoprophetarum *τεκμήριον* est, fuitque semper, illud etiam verissimum indicium hæreticorum, si assidue & illum quidem mirificum doctrinæ Christianæ consensum, diuersitate doctrinarum suarum, quasi quibusdam aculeis, dirimant, & mutuam hominum inter ipsos cōsociationem concerant atque dilacerent. O spinas & tribulos execratos. O ipsam quoque, quæ execratos frutices hos fundat, terram, diris ac execrationibus omnibus diuinitus deuinctam. Maledicta terra, inquit dominus ad Adam, in opere tuo, spinas & tribulos profundet tibi. Quos tribulos, aut quas spinas? Nunquid de sentibus, & non potius de hominibus cura est deo? Ego autem spinas & tribulos, hæreticos istos dico, terræ, & quidem execratæ filios; qui ex abditis & tenebricosis terræ caernis atque latibulis emerfi, occultè quidem, sed planè miserabiliter, corpus ecclesiæ sanctæ aculeis suis pungunt ac fodiunt, & veneni præterea ipsius sui diritate, periculosè admodum lacerant ac cruentant. Quid ita? quia non vulgaris equidem soli cuiuspiam, sed, vt Apostolus ait, & abiectæ, & omnino diuinitus execratæ, atque combustioni destinatæ telluris, quasi venenatus quidam frutex est spinarum & tribulorum istorum. Si sagitta veneno tingatur, aut si magico carmine incantetur, scimus quos dolores & quantos, & quàm penè immedicabiles soleat excitare in vulneratis; quid dicemus, si plaga infligatur, non illorum telorum interuentu, quæ aut vulgari veneno imbuta, aut ore tantum magico incantata sint, sed horum ipsorum, quæ os diuinum ipsum omni imbuit execratione? Vulgaris cuneus, vt modò dixi, nullo

nec veneno infectus, nec carmine incantatus, vt primùm corpori alicui impactus est, statim & soluit quod erat continuum, & viam facit, ad totum illud quidquid est, penitus diffindendū; quid dicemus de his spinis & tribulis execratis doctrinarum peruersarum, & inimicarum? quæ vbi semel animos nostros pungendo perforarunt, viam faciunt diabolo, lupo illi omnium rapacissimo, vel potius luporum ipforum domino & magistro, ad nos totos, vbi libuerit, facillimè discindendos. Vbi igitur spinas & tribulos eiusmodi hominum viderimus, qui sub specie ficus & vuarum, id autem est, sub velamento verbi dei, pungant atque concerpant corpus illud compactum & connexum ecclesiæ Dei, ibi fructus manifestos pseudoprophetarum, ibi dolos & fraudes proprias hæreticorum, nobiscum recognoscamus, ab iisque eiusmodi hominibus omni attentione animi caueamus. Quod quidem ipsum vsque adeò mentibus nostris infixum esse dominus voluit, vt non modò vi & significatione verborum illorum, sed etiam ipsa, vt sic dicam, figura eorum & collocatione, idem illud animis nostris imprimere quodammodo voluisse videatur. Nam cum dixisset, ex fructibus eorum cognoscendos esse, infert continuò id, quod fructus illos, quos dixi, ad quandam rerum omnium dissolutionem ac dissipationem pertinere quodammodo innuit. Inquit enim, μή τε συλλέγουσι. **NUNQVID COLLIGVNT;** hoc autem est, Non colligunt certè quidem. Qui autem non colligit, is profectò, vt idem ipse alibi ait, dispergit; & qui dispergit, vt porrò alibi etiam dixit, is lupo est rapiens & dissipans gregem; atqui pseudoprophetæ omnes, vti hoc loco inquit, lupi sunt rapaces. quid igitur præterea expectamus? Atq. hæc quidem prophetæ falsi. Veri autem quid? Vultis vno verbo dicam. Veri prophetæ piscatores sunt. qui fagenam assiduè in mare mittant, ex omni piscium genere congregantem. Est igitur verorum prophetarum congregare.

Dicam

Dicam hoc idem iterum, sed alio modo. Falsi prophetae lupi sunt rapaces, qui dispergunt oves; ergo veri prophetae pastores sunt, qui eas congregant. Est enim munus pastorum, cogere oves & congregare. Dispersæ sunt, inquit Dominus, oves meæ, eò quòd non esset pastor. Itaq. adeò princeps ipse pastorum Christus Iesus, ob id & venisse in mundum, & mortuus esse dicitur, vt filios dei qui erant dispersi, congregaret in vnum. Quoties volui, inquit, congregare filios tuos? Et alibi. Adhuc alias oves habeo, & eas oportet me adducere, vt fiat vnum ouile, & vnus pastor. Quid autem ait in eodem illo euangelii loco, vbi depingit notas falsorum prophetarum? NON OMNIS, inquit, QUID DICIT MIHI, DOMINE DOMINE, INTRABIT IN REGNUM COELORVM, SED QVI FACIT VOLVNTATEM PATRIS MEI QVI IN COELIS EST. Hoc enim ferè dicit verbis illis. Non statim, inquit, vt quisque quocumq. modo per speciem defungitur munere docendi & prædicandi legem & euangelium, dignus est veri prophetae nomine & appellatione; sed is demum verus propheta esse ac dici poterit, qui se ad illam diuinam exequendam, & inter mortales ferendam, voluntatem componet, non vt ædificata diruat, aut plantata euellat, aut congregata dissipet, sed potius vt dissipatis, euulsis ac euersis operibus diaboli, ædificet, & plantet, & congreget ecclesiam dei; quæ ipsa etiam ex congregando nomen est adeptæ. Aedificans, ædificans Hierusalem dominus, ait rex ille prophetarum in psalmis suis, dispersiones, inquit, Israël congregabit. Dispersiones congregabit; non contrà, congregationes dissipabit ac disperget. Et Christus ipse in euangelio. Hæc est, inquit, voluntas eius qui misit me, metere regiones quæ albæ sint ad messem. Tantumne autem metere? Non: verum etiam fructum hunc demessum, in vitam æternam, quasi in quoddam horreum domini congregare. Et ibidem addit statim ad discipulos. Ego vos, inquit,

inquit, nisi metere. Nimirum intelligit etiam & congregare; quod in ipsa quoque metendi significatione & actione, non obscure videtur contineri. Ita sanè, ut qui diuinum hoc eius, metendi & congregandi studium, inter mortales æmulentur, ii soli sint veri discipuli eius, ii soli veri pastores & prophetæ eius, ii soli denique veri vicarii, &, quod dicendum est, veri hæredes & filii eius. Pacifici enim profectò filii dei vocabuntur. Et hæc quidem hætenus. Nunc, unde digressi fuimus, redeamus; & quoniam superiore sermone nostro abundè ostendimus, primum, ecclesiā ipsam vnam esse oportere, deinde, apud hæreticos, nihil vnum in religione apparere, sed omnia in illo genere, confusionis & perturbationis cuiusdam incredibilis esse apud eos plenissima, concludamus iam hoc loco quàm breuissimè poterimus, id quod in ipso huius capitis initio ostendere cœperamus, vnum illud, quod est veræ ecclesiæ proprium, nostræ esse catholicæ ecclesiæ proprium. Non vagabor autem in eo demonstrando, per omnium gentium catholicarum historias, in quibus idem illud, quod de nostra dicturus sum, facile comperias: nostrā domestica experientia contentus ero. Septingenti ferè anni sunt à suscepta per nos in Polonia, religione christiana, id autem est paulo minus quàm dimidium, ab ea per orbem terrarum vniuersum fundata & propagata. Excutiamus igitur omnem temporum istorum, non omninò breuissimorum memoriam. Estne quæso, ut dicere possimus, iota vnum, apicem vnū immutatum interea fuisse, ab eo quod semel, ab Apostolicis viris traditum, à nostris ecclesiis susceptum extitit? Certè nihil. Inuocatio ad vota precesque nostras, sanctorum hominum qui in domino obdormierunt, eadem tunc fuit apud maiores illos nostros, quæ nunc est apud nos. Preces pro mortuis, eadē quæ nunc sunt. Missæ sacrificiū, idem planè quod nunc est. Sacra Latina, eadē quæ nunc etiam manent; Celebs vita sacerdotum, eadem hæc quæ

hæc quæ nunc viget. Veritas corporis & sanguinis domini in sacramento eucharistiæ, eadem quæ hoc tempore à nostris prædicatur. Vna eius species in communione populari, eadem quæ nunc per nostros distribuitur. Reliqua instituta omnia, planè vti in ecclesiis nostris hodieque & fiunt & geruntur. Nimirum vna est ecclesia hæc, cùm illa quæ fuit, quam ipsam, ita vt est, vnâ & eandem, omnes vna eademque mente, & vnius atque eiusdem doctrinæ genere, & vnīs iisdemque ecclesiasticis ritibus ac ceremoniis conseruandis hætenus tenemus & tuemur; nihil inconstans, nihil varium, nihil ab aliis catholicis diuersum, nihil à prima conditione sua discrepans aut immutatum; nulla cuiusquā ab illa vnitæte discessio, nulla inter omnes dissensio visitur; vsque adeò quidem, vt nunc etiam quisquis secum istam ecclesiarum nostrarum per tot secula, in ritibus ecclesiasticis æquabilitatem ac perpetuitatem diligentius consideret, is eosdem planè veteres illos Adalbertos & Stanislaos, Episcopos ac patres in Christo nostros, viuere adhuc existimet. Non quidem, vt in hoc tanto temporum decursu plusculum progressum esse negem, sicut alibi post alios, ita in Polonia post Stanislaum & Adalbertum nostros, (Semper enim profectò sanctis hominibus de virtute in virtutem progrediendū est, & gradus assidue eiusmodi faciendi sunt, vt non tam ad ea respiciamus, quæ retrò sunt, & quæ iam contentissimis maiorum nostrorum gressibus superata ac relictæ esse cernimus: quàm vt ad ea semper contendamus, quæ ad augmentum scz̃t eiusdem illius fidei & religionis nostræ pertinere videantur. Alioqui quænam hæc esset, quæso, tanta & tam deploranda nostra ignauia, nulla ad veterem maiorū nostrorum pietatem ac religionis feruorem accessione faciendâ?) Sed ideò Stanislaos & Adalbertos dicas nūc etiā viuere, quòd quæ olim per ipsos illos bene cœpta sunt, eadem nunc quoque illa apud nos facta & tecta vigeant, & si quid amplius vrigas, eti-

geas, etiam aliquanto sczt auctiora & ornatiora appareant. Cùm igitur nos quidem catholici, siue hi, qui pater-
nis istis Polonici regni nostri finibus continemur, siue illi,
ad quos etiam ante nos verbum ipsum dei peruenit, &
cùm quibus nos in ecclesiam catholicam conseuit, vnum
semper atque idem in religione professi simus, & vnum su-
preum Pontificem Rom. caput Episcoporum omnium
catholicorum habuerimus, & reliquos etiam, qui ab vno
illo, quàm plurimi ad nos quotidie mittuntur, præsbyteros
& pastores nostros, sui semper similes esse, re ipsa experti
simus; non qui aliud scilicet atque aliud docuerint, non
qui, modò hoc, modò illud arripuerint, sed qui semper
idem illud vnum atque simplex, quod semel, iam inde à
suscepta christiana religione, in singulis orbis imperiis po-
situm fuit, ac constitutum, hucusque custodierint, & ad
nos transmiserint. Cùm hæc, inquam, omnia ita se habeant,
est sanè quod nobis, omnes in vniuersum, de veritate ista
ecclesiæ gratulemur, & statu atque conditione nostra præ
cæteris omnibus contenti, à nouis quasi quærendis assidue
sedibus abstineamus. Contrà autē, cùm hæreticos omnes,
ab eiusmodi vnitatem non solum exulare & abesse, sed etiam
refugere, & omninò abhorrere videamus, cùm eos, inquā,
in eodem vitæ ac doctrinæ statu nunquam permanere, sed
indies ad alia atque alia, & quidem semper deteriora, cō-
migrare assidue cernamus, est profectò cur eorum sectas
omnes, omni interposita execratione detestari, est, cur eo-
rum crudelitatem tantam, equis, quod dicitur, & velis a-
uersari debeamus; qui, dum corpus Christi mysticū, quod
ipse vnum esse voluit, secare per summum scelus ac lace-
rare non verentur, quid dicam? barbarum mihi sanè ipsum
& immanem Pilati militem videntur prorsus immanitate
ipsa sua superare; qui miles nō solum Christi mortui cru-
ra ipse non fregit, sed etiam d. vna illa inconsutili ipsius
tunica fortiri maluit, quàm eam in multas partes discin-
dendo,

dendo, reddere ad vsum inhabilem planè & ineptam. Et erit quisquam, qui se tantæ ipsorum crudelitati aut socium adiungere, aut administrum præbere sustineat? Sed mittamus crudelitatem, incertitudinem ipsam expendamus, quæ varietatem illam doctrinarum necessariò semper consequitur. Eritné quisquam, quæso, qui dubitet, vnum potius tutò consecrari, quod semper certum est, quàm multa anxie hinc inde aucupetur, quæ sæpenumero omnia sunt incerta, nec habent ferè quicquam, quod nostrum animum in constanti aliqua ac definita veritatis ratione possit collocare? Nimirum ipsæ etiam cænæ lautæ atque opiparæ, dubiæ ex eo sunt appellatæ, quòd in iis necessariò dubitare oporteat, quid sumas potissimum. Nota & peruulgata loquimur. Quid illud in comœdia? Dic Crito, inquit. Dic Hegio, Dic Cratine. Quasi tu dicas. Dic Zuingli, Dic Lutere, Dic Caluine. Quid tum postea? Incertior, inquit, multo sum quàm dudum. Sed relinquamus comœdias quoq. & ad seria veniamus. Martha Martha, inquit seruator noster, sollicita es, & multitudine ipsa negotiorum obrueris. Vnum, vnum est necessarium, inquit, non tibi Martha solùm, sed etiã meis omnibus. Quòdnam autem, ô domine, vnum? Vnum, inquit Dauid, petii à domino, id ipsum requiram. Quid illud? Vt habitem, ait, omnibus diebus vitæ meæ in domo domini: quæ est illa, de qua loquimur, ecclesiæ vna. O vocem, omnibus Christianis vsurpandam, nec sermone magis quàm factorum imitatione.

CAP. III.

Sanctitas ecclesiæ catholicæ.

Alterum saxum fundamenti ecclesiastici est Sanctitas.

Ea in ecclesiæ catholica est sexcuplex.

I. *Cum in filios dei adoptamur.*

F

2. *Cum à*

2. *Cum à sceleribus nos abstinemus.*
3. *Cum mores sanctos sanctorum maiorum nostrorum imitamus.*
- Quod quidem nunc in nobis minus conspicitur, culpa hæreticorum.*
4. *Cum si quid contra bonos mores deliquimus, pœnitentia eluimus.*
5. *Cum publico ecclesiæ suffragio in sanctorum numerum referimur.*
6. *Cum nos à tot hæresibus & tantis strenuè vindicamus.*



Erùm eadem hæc ipsa vna ecclesia, illam etiam habet alteram interiorem notam, quòd non solum vna est, vt diximus, sed, quod modò dicturi pariter & ostensuri sumus, SANCTA etiam & est, & ita dicitur. Ex quo sanè est illud Pauli. Christus dilexit ecclesiam, inquit, & tradidit semetipsum pro ea, vt illam sanctificaret, mundans eam lauacro aquæ in verbo vitæ, & exhiberet sibi gloriosam ecclesiam, non habentem maculam, aut rugã, aut aliquid eiusmodi, sed vt sit SANCTA & immaculata. Sancta, dico: non ita quidem, vt nos qui in ea versamur, non quotidie, dum hic sumus, Deo dicere necesse habeamus, Dimitte nobis debita nostra; cum natura ipsa omnes ad vnum deprauati simus; sed ita potius, vt primùm, singulari Dei Opt. benignitate præoccupati, & ex illis, in quibus antea fuimus, naturæ prauitatibus erepti, ac in gratiam adoptionis filiorum dei admissi ac recepti, & ipsi quidem filii dei nominemur ac simus, & Deum quoq. ipsum patrem nostrum appellare minimè dubitemus. Quæ res, fons veluti quidam est totius sanctitatis nostræ, atq. adeò prima sanctitas ipsa nostra: quando ex radice sancta, non nisi rami sancti, & omninò ex sancto ipso, nihil nisi sanctum proficisci posse videatur. Atque ea sanè sanctitas, quemadmodum superioribus verbis Diuus Paulus innuit, ad baptismi sancti fontem sanctissimum, & conferri in nos, & quasi imago quædam diuina mentibus nostris insculpi solet. Quam deinde cœlestem imaginem, sic mentibus no-

bus nostris impressam, quoniam noua quotidie labe, ac vitio nostro, in nobis deformamus, noua item sanctitate nostra, quasi recentibus quibusdam coloribus, euanescentem, quotidie renouare necesse habemus. Qua sanctitate? ut videlicet, quantum maximè fieri potest, aut à flagitiis nos prorsus abstineamus, aut verò remissionem eorum assidue flagitemus, & vetus illud carmen nostrum quàm sapissimè usurpemus. O cœli pater, ô deus ætheris, remitte nobis tuis liberis commissa nostra, sicut & nos fratribus vicissim nostris omnia condonare solemus, quæ in nos commiserunt. Ut ita liberati à peccato, in ea sanctitate viuamus, quæ est immunitas quædam scelerum ac vitiorum, nil conscire sibi, nulla pallescere culpa. In hoc enim propemodum vno, omnis sanctitatis illius, quam in hac vita consecramur, perfectio, videtur esse interdum constituta; ut quemadmodum stultitia caruisse, vel præcipuum sapientiæ caput est, ita vitio vacare, animumque nulla sceleris foeditate deformatum gerere, principis cuiusdam virtutis ac integritatis instar obtineat. Quæ est iam secunda quasi sanctitas nostra. De qua est Dauidicum illud. Pro hac, inquit, peccatorum suorum remissione, orabit ad te omnis sanctus in tempore opportuno. Atque ab hoc quidem vitioq. sanctitatis genere procul abesse necesse est, primum ethnicorum & infidelium genus omne; neque enim dedit, neque dedit Deus eam potestatem, ut filii dei fieri possint, infidelium cuiquam; qui scilicet, cum insitas illas naturæ suæ sordes atq. prauitates, & quæ inde proficiscuntur peccata, aduersus legis ipsius diuinæ ordinem atque rationem non agnoscant, profectò non modò remitti sibi peccata nō postulant, sed illud etiam intra se audent dicere. Mundum est cor meum, purus sum à peccato. Quod cum faciunt, ut se nullis esse flagitiis immersos existiment, fit, ut nec emergere sanè magnopere studeant ex illa voragine vitiorum, & nouo præterea mendacii atque arrogantiae

scelere se obstringant. Si enim dixerimus peccato nos vacuos esse, mendaces sumus, ait ille. Deinde autem si id faciamus, tum verò non modò vlla sanctitas in nobis non est, sed ne veritas ipsa quidem. ait idem iste. Absunt item ab hoc utroque sanctitatis genere, vita ipsa improbi Christiani illi, qui cùm non dimittant ipsi fratribus ex animo, noxas atque offensiones contractas, certè & filii Dei esse non possunt, (Diligendi enim sunt etiam inimici, iis qui filii patris coelestis esse cupiunt) & sibi ipsis ad eundem illum modum dimitti, ad quem malè dimittant ipsi, postulare à Deo non audent: idque, ne sibi ipsis mulctam vltro irrogare videantur. Non audent autem, ergo ne postulant quidem. Gratia autem profectò huius sanctitatis, non est ferè ex eo genere, quod sic gratuitò concedi soleat: sed si inuenitur, non inuenitur nisi à quærente: si patet, non patet nisi pulsanti: si datur, non datur nisi supplicanti. Longissimè autem omnium abesse ab iis duabus sanctitatibus videntur hæretici, qui nec Deum habere patrem possunt, cùm ecclesiam matrem non habeant, & ut maximè eodē illo utantur deprecationis genere, quod est de debitis nostris remittendis, nihil tamen planè ex eo utilitatis referunt, homines speciem quidem pietatis habentes, et blandis sermonibus tum seipso fallentes, tum animos hominum innocentium seducentes: fructu autem ac utilitate veræ pietatis prorsus destituti. Hi enim cùm ecclesiæ sanctitatem verbo duntaxat fateantur, animo fideli nunquam amplectantur, fit, ut neque vllam cum sanctis communionem habere, neque vllam planè à nexibus suorum peccatorum solutionem, quæ duo egregia munera extra fidem & amplexum ecclesiæ sanctæ, neque dantur, neque accipiuntur, possint vnquam obtinere. Ut non immeritò quidem, in ipso quoque illo, fidei ac religionis nostræ symbolo, non nisi post sanctæ demum ecclesiæ catholicæ professionem, professio ipsa & sanctorum communionis, & remissionis
ipsius

ipsius scelerum ac flagitiorum nostrorum fieri videatur. Et hæc quidem illi, infideles, improbi, factiosi homines. Nos verò contrà, qui ecclesiam sanctam credimus, quique studio illi & amore adhærescimus, laudem profectò nostram in ecclesia sanctorum obtinemus; & beati quidem sumus, peccatis vacui ac soluti. Beatos enim scriptura pronunciat, quorum remissæ sunt iniquitates. & hoc ipso sancti etiam sumus; sic, ut cum Davide tutò possimus dicere. Custodi me domine quoniam sanctus sum. Et illud. Particeps ego sum omnium timentium te, & custodientium mandata tua. Ita duas iam esse ostendimus sanctitates catholicorum præ hæreticis; vnā quidem illam, quòd eius, qui solus verè sanctus est, dei filii simus, in Christo Iesu ita adoptati, ut semen quasi quoddam ac genus ipsum diuinū facti esse videamur; alteram autem, quòd fide & communione ecclesiæ ipsius sanctæ, quæ mater nostra est, tum à vitio immunes, tum eorum quoque bonorum, quæ sunt virorum sanctorum propria, consortes simus. Sic quidem, ut prior illa nostra sanctitas, quæ est filiorum dei, paternæ quasi hæreditatis sit, hæc posterior, quæ est scelerum immunitatis, sit maternæ. (cuius tamen vtriusque ea est ratio, ut quemadmodum patrem Deum sine matre ecclesia, habere non possumus, ita priorem quoque hæreditatem illam, citra posteriorem istam, tenere non posse videamur) Ex quibus vtrisque sanctitatibus istis, tertia porrò sanctitas, de qua mox dicturi sumus, efflorescit, omnibus iis reapse inhærens, qui ex semine illo dei immortalis concepti, in sanctæ matris ecclesiæ utero efformantur: & quorum vita moresque casti atque integri, non solum eos ornant, in quibus sunt, sed etiam ecclesiam illam, in qua ipsi versantur. Quod quidem iam est apertum atq. populare sanctitatis genus. In hac igitur veræ & adulterinæ ecclesiæ comparatione, conferamus vtrinque hoc ipsum tertium genus sanctitatis, & quidem modo atque ratione popula-

ei, & videamus vtra vtri ecclesia antecellat, morum ipso-
rum sanctorum castitate; vt ita facilius cognoscamus, ab
vtra potius stare debeamus. Ac primùm quidem nostra
hæc, de qua loquimur, ecclesia, sanctos habuit & aucto-
res, & propagatores doctrinæ suæ, sanctum Iesum Chri-
stum, Deum & Dei vnigenā filium, sanctos apostolos, san-
ctos euangelistas, sanctos pastores, & doctores, sanctos
martyres, sanctos confessores, sanctas virgines & viduas,
sanctos. Atque hic me porrò pergere cupientem, morosu-
lus nescio quis ex istis, in ipso huius sermonis mei initio,
protinus interpellat, nec vlterius progredi patitur. Heus tu,
inquit. Quid ais? Nostrine tibi quoque alios edere viden-
tur doctrinarum suarum & propagatores & auctores?
Quid? nōne ab eisdem profectos se esse dicunt? Dicunt,
dicunt; & quidem ipsis mirificè commentum id placet;
at mihi quidem, inquam, nescio quomodo non fit verifi-
mile. Agè enim, quænam fuit doctrina nostrorū illorum?
eadem profectò quæ vita. Quæ vita autem? eadem nimi-
rum quæ doctrina. Quæ autem & vita & doctrina simul?
Quid verbis opus est? Ea sanè illorum & vita fuit & do-
ctrina, quæ hæreticorum istorum tuorum nec fuit vnquā,
nec deinceps est futura. Nam & aliter profectò illi viue-
bant, ac viuunt isti; & aliud planè doctrinæ genus secum
afferebant, quàm isti obtrudunt auditoribus suis. Quod
quidem ita hoc tempore positum, paulò pòst erit manife-
stum. Cuius igitur frontis est, eos velle perhiberi auctores
tuos, à quibus tu omni ratione dissentias? & quos tu nec
vita exprimas, nec ipso doctrinæ genere referas aut repræ-
sentes, eos velle videri & vita & doctrina sua præluxisse ti-
bi? Parum dico. illud igitur potius. Quorum tu vitæ ac
doctrinæ, vitam planè afferas & doctrinam contrariam,
iis acceptam ferre velle vitam & doctrinam tuam, quæ est
ista diuis iratæ frontis tanta impudentia? Dicet idem ille
mihi. Vos autem quos esse vos dicitis? Dicam paulò pòst.
Sed vos

Sed vos ante omnia cum illis ecclesiæ nostræ sanctis hominibus comparabo. Equidem sunt in manibus hominū, vitæ sanctorum illorum nostrorum, ab eruditibus conscriptæ, & deinde in aliquot etiam linguas alienas de aliis transfusæ. Cedò, quid vitam illorum fuisse existimas? Num insaniam? Sic quidem censent vāsani illi, qui eos quondam, dum hanc vitam viuerent, oppressos tenebant, & labores scilicet eorum, vt scriptura loquitur, auferiebant. Sed vos, qui istis sanctiores videri vultis, quid illam eorum vitam fuisse censetis? quam illi in assiduis precibus, in vigiliis perpetuis, in ieiuniis quotidianis obeundis, in eremo, & locis solitariis ac desertis incolendis, in paupertate, in rebus duris & asperis, in ipsa nō tantum voluptatum extraordinariarum, sed etiam in cibi & somni legitimi atque quotidiani abstinentia summa, in castitate, in sobrietate, in mansuetudine, in humilitate, in patientia, corpori planè ipsi non tantum non indulgendo, sed etiam illud cinere, cilicio coërcendo, flagro, humicubatione castigando, & ad summam maciem adducendo, posuerunt? cum ea quidem, quæ vulgus maximè vel odisset, vel reformidaret, maximè appeterent: quæ contrà amaret ille & miraretur, ea summopere fugerent ac vitarent? Quid censetis, quid censetis? Hei mihi, qui frustra quærendo tempus tero. Quid est in his vestri simile? aut contrà, quid est in vobis omnibus, quod huic aliqua ex parte simile videri queat? Dicite, dicite, si potestis. Sed non potestis. Itaque vos quoque, item vt cæteri, vitam hanc eorum insaniam non vocare non potestis. ego contrà, nihil aliud hoc tempore quàm vestræ dissimilem dicere necesse habeo. Cuius autem similem? nescio. Illud scio, multos me, nec obscuri quidem nominis cognouisse viros, qui his ipsis sanctorum legendis vitis, non se omninò ad vos à nobis, non, inquam, à nobis ad vos, sed contrà, à vobis ad nos; ad nos, ad nos, dico, à vobis contulerunt; vt eandem scilicet vitam il-

tam illam, quam olim inter nostros, à viris illis grauissimis sanctissimè actam, & legissent, & adamassent, & cuius inter vos ne vestigium quidem reperiabant vllum, possent ad aliquem vtique modum inter nos æmulari. Qui mihi sanè soli, hoc ipso facto suo, grauissimum contra vos testimonium ferre, maximumque adeò causæ vestræ præiudiciū facere videntur, frustra vos his vitæ ac doctrinæ vestræ auctoribus gloriari, cum quibus non vitam, non doctrinam, non, quod pace vestra dixerim, oris saltem aut vultus habitum ipsum, communem habeatis. Quin & illud affirmare ausim, tam diuersum vitæ genus propositum habuisse sanctos illos, ab isto vitæ genere, quod vos sectari videmini, vt, si vos modò aliquando illas eorum vitas, vel per speciem tantum & simulationem legere, easque cum vestris istis moribus aliqua saltem ex parte conferre contingat, nimirum vestræ vos ecclesiæ, vestræ vitæ, vestræ doctrinæ, vestrorum istorum morum alienissimorum, vehementer pudere, vt leuissimè dicam, ac pigere necesse sit; si quis modò pudori locus apud eos relictus videri potest, qui non solum re ipsa vitam sequuntur profligatam, (quod etiam interdum nonnulla ex parte faciunt ii, qui nihilominus tamen permanent in ecclesia vera) sed etiam ipso doctrinæ suæ genere, eam vitam, quæ esset aliqua ex parte cum honestate coniuncta, iam pridem in vniuersum & voce & scripto ipso profligarunt. Quod si quis tamen vestrum aliusmodi est, quàm vt frontem planè perdidisse videatur, is sanè legens illa, quæ de vitis sanctorum conscripta sunt, & rem ipsam secum penitus considerans, non dubito, quin, vbi eum prioris vitæ poenitere inceperit, omnem morum ac studiorum suorum emendationem, atque ad vitam illam sanctorum illorum, de quibus diximus, conformationem, ab ipsa statim auspicaturus sit reditione sua ad ecclesiam nostram. Quod quidem ipsum, omnium eorum quæ dico, magnum abunde indicium est:

in sola

in sola videlicet ecclesia nostra sanctos esse, eos autem ad vos nihil omninò pertinere. Non est igitur, non est, quod vestris impiis ac nefariis factionibus, nomina virorū sanctissimorum frustra prætexatis. Nostræ enim huius ecclesiæ catholicæ, sine controuersia, non vestrarum priuatarum synagogarum, sancti illi viri fuerunt proculdubio & auctores, & fundatores. Quos etiam ipsos qui deinde posterioribus temporibus in eadē ecclesia nostra secuti sunt, pastores & doctores, etsi tanta fortassis sanctitatis, operumque illorum admirandorum opinione non claruerunt, non minus tamen quàm primi illi, sanctitatis & pietatis eiusdem præcones atq. internuncii fuerunt: nec minus populum, primū ad superioris, per scelus & flagitium actæ vitæ, tum detestationem ac pœnitentiam, tum etiam oratione, eleemosyna, ieiunio, cinere, cilicio, expiationem vocauerunt; deinde verò in posterum, ad sanctioris vitæ studium, quod est in ipsa temperantia, obedientia, iustitia, charitate, liberalitate, diuini numinis inuocatione, malorum tolerantia, rerum denique humanarum contemptione, & breuiter in insigni quadam atque præcipua erga deum & homines pietate, constitutum, pellexerunt; seipsos etiam ad eandem vitæ regulam, quantum maximè potuerunt, componere studuerunt; aut si quid ab ea, in hac carnis infirmitate, & temporum corruptela, aberrauerant, vt non tam facilè interdum quàm optarent, à corporis consuetudine abducere se potuerint, tum seipsos sanè & accusauerunt, & errorum eiusmodi pœnitere ostenderunt, quæ omnia ne nunc quidem facere pro parte sua virili destiterunt. De magistris loquor. Quid porrò eorum auditores? Non repetam vetera illa & meliora tempora, quorū exemplis etiam de scripto recitandis, ætas me propemodū deficeret. Illud dico, qui proximè Luteri tempora præcesserunt, maiores nostros ex omni gente & natione, quæ sub cœlo est, tantam erga superiores reuerentiam præ se tulisse,

tulisse, tanta clementia & humanitate erga inferiores vfos esse, ita fidem, veritatem, dictorum factorumque constantiam, ita iustitiam, liberalitatem, continentiam, modestiam, & reliquas eiusmodi virtutes, ex sacris illorum temporum contionibus haustas, cum æqualibus coluisse, ut nos, qui à nouis scilicet magistris istis, nouum quoddam sanctioris pietatis & religionis genus nuper haurire cœpimus, ne conferre quidem ipsis audeamus. Dicite enim populares, prò diuū atque hominum fidem. Et certè aut dicendum tandem aliquando liberè, aut saltem verè & ex animo inquirendum est. Quid inquiremus, aut quid dicemus? Dicite prò diuū atque hominum fidem, vbi nunc est prisca illa maiorum nostrorum integritas, pietas, innocentia, veritas, & quam iam etiam in vitio scilicet ponimus, simplicitas? Fontes mihi mehercule ipsi earum rerum cum religione vnâ, non tam exaruisse, quàm in contrarios liquores degenerauisse videntur. Vestram hic patrum auorumque nostrorum memoriam appello. Si fallo, venite, & quantum libet vanitatem orationis huius meæ impunè redarguite. Vestram etiam, ô optimorum illorum virorum non pessimi filii & nepotes, conscientiam obtestor, ut si ea quæ dico, verissima esse agnoscitis, tum & orationem quidem meam adiuuetis, & maiorum præterea vestrorum virtuti debitum testimonium reddatis, & quod maximum est, vos ipsos primū, deinde etiam nos vobiscum, qui omnes sumus eorum posteri, ex periculosissimo isto nequitiae itinere, quod simul cum impia ac scelerata religione, iam pridem videmur esse ingressi, aliquando pro officio naturaque & ingenio vestro, ad priscam illam & auitam maiorum nostrorum catholicorum hominum pietatem, & vitæ sanctimoniam reuocetis. Quam nos quidem sanctimoniam si factis ipsis nostris exprimere fatis nō poterimus, in sæculo hoc tam corrupto, & moribus antiquis tam obsoletis, at id ipsum tamē dolore primū nostro, quan-

Atro, quantum maximè poterimus, prosequemur, deinde confessione etiam ipsa deformatæ, & cum à diuinis ipsis præceptis nō leuiter deflexæ, tum à vita maiorum nostrorum, planè degeneris vitæ nostræ, sponte apud tribunal sacerdotis edita, sarcire vtcumque studebimus. Quæ est quarta quasi quædam species nostræ sanctitatis. Papisticū esse, inquires. Metuebam, ne hæreticum aut lenonium diceres. Ego verò inter cætera, hoc quoq. esse statuo discrimen catholicæ pietatis ab hæretica simulatione, plenum coniecturæ in optimam partem non obscuræ, primū de sanctitate, deinde etiam de veritate ecclesiæ nostræ præ hæreticorum synagoga. Quodnam illud quæso? Hoc planè, quod aut aliqua ex parte dixi iam, aut etiam planius nunc dicam, quòd, etsi vtrique sanè nostrum, tam catholici quàm hæretici, in multis quotidie offendamus, alteri tamen errata ipsa nostra, verbis quàmmaximè efficacibus, ex summo doloris & acerbitalis sensu depromptis, ipsoq. adeò verecundiæ bono exornatis, per singula erratorum nostrorum nomina diuagantes, non apud deum tantum, sed etiam apud hominem sacerdotem, & illum quidem nō minus interdum, quàm nos ipsos, per eadem illa omnia tētatū, volentes profiteremur; hæretici autem in hoc toto genere, principiò aut nullum, aut perquam frigidum adhibent orationis genus, (aut enim scelera sua nunquam apud sacerdotem cōmemorant, aut verò generalitate modò ipsorum commemoranda, per speciem duntaxat defunguntur, formas singulas & peristases delictorum nullas persequuntur) deinde autem, quod grauius est, & ab omni sanctitatis genere quàmmaximè alienum, mala sua, bona ferè vulgo videri faciunt; & quæ vel maximè omnium tegere, ac summo prosequi dolore debuerunt, ea & palàm præ se ferre, & in summa denique sua laude ponere, præposterii homines non verentur. Exaudire enim passim licet illas sanctissimorum scilicet istorum virorum glorio-

fas nequitias, vel potius ex nequitia gloriationes, ipsis etiā profanissimis atque adeò perditissimis hominibus, vix, ac ne vix quidem concessas; dum se sacra de templis signa, magno animo sustulisse, dum sacramenta & mysteria religionis nostræ, tum numero imminuisse, tum dignitate ipsa spoliauisse, dum ieiunia, cilicia, scelerum confessiones simul & expiationes, in malam rem abire iussisse, dum vota castitatis & continentiae, de suis contuberniis proscripsisse, dum veritatem corporis Christi in pane & vino sacramentali, penitus abnegasse, dum sanctos dei homines, ipsumque adeò sanctum sanctorum Iesum Christum, non tam in ordinem, quàm infra omnem ordinem còegisse, audacissimè gloriantur. O mores, ô tempora. Bonarū mentium esse aiunt, ibi timere culpam, vbi nulla etiam subsit culpa: qualium igitur mentium esse dicemus, ibi nullam timere, vbi vigeat maxima? Acute & subtiliter conclusum esse aiunt. Quid igitur si ἀμαρτήσεων aliquid κίσαφέςεσθαι afferamus, & sanctam apud nos esse ecclesiam, rudius sed planius ostendamus? Certum est igitur, quotquot vnquam in omni ætatum ac temporum decursu, sancti facti, & in diuorum numerum, ad hominum opinionem relati sunt & consecrati, in hac sola ecclesia nostra sanctos factos, & in diuorum numerum relatos ac consecratos esse; quod planè in hæreticorum synagogis, non modò nulli hominum factum per hæc tempora, sed ne tentatum quidem esse sci-
mus. An enim existimamus Hyacinthos nostros, Simones nostros, Cantios nostros, Casimiros nostros, Adalbertos nostros, ipsum, ipsum illū custodem & patronum huius imperii Stanislauum Scepanæum, ex hæreticorum istorum potius synagoga, quàm ex nostra catholica Romana disciplina, ad sanctitatis istius opinionem profluxisse? vt eorū sanctissima memoria, tanta hominum veneratione in ecclesia vigeat & celebretur? vt eorum sepulchra ac monumenta gloriosissima, ab vniuerso Septentrione, summa cū deuotione

deuotione & pietate visitentur? vt ossa ac reliquiæ eorum
 beatissimæ, maxima populi religione, & teneantur & co-
 lantur? Equidem facit hoc ecclesiæ sanctæ nostræ iudici-
 um, vt illis, qui cum pietate singulari hic vixerunt, quique
 se, vel sanctis, vel admirandis editis operibus, sanctos &
 deo amicos, dum viuerent, probauerunt, diuorum & san-
 ctorum appellationem tribuat, memoriasque eorum, tum
 festis diebus institutis, tum templis Deo ipsi, sub inuoca-
 tione nominis eorum, extructis & exædificatis, celebrari
 iubeat. Quod ipsum etiam pro quinta sanctitatis specie,
 non abstrusa aut recondita, sed planè visibili iam & ocu-
 lis subiecta, potest in ecclesia nostra numerari. Et quoni-
 am longiusculè in his sanctitatibus persequendis progressi
 sumus, agè addamus quàm breuissime sextam illam, si lu-
 bet, ecclesiæ sanctitatem, quæ iam non tam ad vitæ inte-
 gritatem atque innocentiam, quàm ad maiorem nescio
 quam dignitatem atque maiestatem pertinet: quòd vczq;
 ecclesia hæc nostra maximè se stabilem atq. firmam præ-
 stet ad omnem posteritatem, sic vt & specie quidem ipsa
 sua hæreticorum omnium oculos præstinguat, & maiesta-
 te ipsa, ab ipsis etiam, si dicere fas est, inferorum portis, na-
 uiter se tueatur. Quo quidem loco repetenda sanè nobis
 esset memoria, tot & tam diuersarum acierum aduersus
 eam instructarum, dolis, minis, suppliciis, cædibus, inge-
 niis, simulationibus, technis, artibus, disputationibus:
 quas tamen illa omnes acies tam horribiles, & tam sibi
 infestas, facilè perrupit & prostrauit, illa ipsa, quam du-
 dum dixi, vitæ sanctimonia, & quam nunc dico, quadam
 veneranda maiestate: qua se in hunc vsque diem ita susti-
 net, æternumque sustinebit, vt non modò deleri, sed ne læ-
 di quidem à quoquam posse videatur. Sed de hoc, alio lo-
 co fusius loquemur. Cùm igitur tot tantarum sanctitatu
 genera in nostra ecclesia vigere per dei gratiam videamus,
 partim, quæ ad adoptionem filiorum dei pertineant, par-
 tim, quæ

tim, quæ aut in immunitate quadam, vel saltem in liberatione ipsa à peccatis, aut in honestissimarum ipsarum actionum studio, aut in ipso denique pœnitentiæ sanctæ usu, posita sint & constituta, partim autem quæ ex publica illa & solenni virorum præstantium consecratione dependeant, quæue ad singularem quandam stabilitatem atq. firmitatem ipsius referantur: liquet sanè, vt opinor, ecclesiam nostram, quæ vna tot in se sanctitates verissimas cõplexa sit, sanctam ipsam iure optimo & esse, & dici oportere. Hactenus de nobis.

CAP. V.

Prauitas hæreticorum.

Sanctitas omnis apud hæreticos, cum catholicorum cõcionibus est proscripta.

Neq. igitur auditores hæreticorũ in diuorũ numerum referuntur.

Neq. magistri ipsi, non multò spurciorem & vitam præferunt, & doctrinam profitentur.

Lutheri & aliorum, de euangelicorum vita profligatissima, testimonium.

An verum sit, à catholicis æque peccari atque ab hæreticis.

Hæretici ob vitam moresq. nostros, nullam discessionis à nobis causam habuerunt.

*Hæreticorum vitam, nostram esse multò laxiorem, ostenditur: tum in sacerdotum ipsorum coniugio, tum in calice populari, tum in vulgari-
bus sacris.*

Hæreticorum ferè culpa fieri, si quid in moribus catholicorum desideretur.

Hæreticos, quia charitate carent, ne vitæ quidem honestatem rectè tueri posse.

Ecclesiam, quæ est charitatis domicilium, cum oderunt hæretici, ne charitatem quidem habere posse videntur.

Ecclesiæ igitur sanctitatem amplectamur, hæreticorum prauitatem fugiamus.

Cæterum



Æterum quod ad hæreticos attinet, illud iam ne ipsi quidem inficias iuerint, quòd in summis illis clamoribus ipsorum, qui assidue fidem veram, qui religionem puram, qui expressum verbum domini, qui denique certam Dei gratiam atque solidam iactare non desistunt, nec maiorem, vt leuissimè dicam, tum obedientiam inferiorum erga superiores, tum clementiam superiorum erga inferiores, quàm olim fuerit: nec maiorem passim omnium cōtinentiam, castitatem, sobrietatem, pudorem, officium, nec maiorem planè vitiorum fugam, nec crebriorem percipiendorum sacramentorum frequentationem, nec omninò ampliorem aut vberiore, tum harum, tum reliquarum virtutum prouentum, liceat apud eos inuenire, præut paulò antè inter nos inueniebantur. Fatendum enim est, virtutes illas, quæ pridem inter nos egregiè viguerunt, simul vt nouorum istorum dogmatum, veluti quidam licentiæ discus increpuit, omnes propemodum, quod dolenter quidem, sed tamen verè dicimus, ex ipso quasi terrarum orbe emigrasse, & simul cum catholicorum cōcionatorum voce, esse consepultas. Nam, vt interim dicere omittam, de iis, quæ in eorum locum successerunt, & de iis incipiam, quæ doceant & ostendant, nomen etiã ipsum sanctitatis, de qua loquimur, verbo fortassis interdum ab istis, quasi per ludum vsurpari, re nunquam ne affectari quidem. Agè, quotusquisque obsecro, per totum hoc noui euangelii tempus, in vniuerso illo grege inuentus est, qui ob vitam honestè, & cum pietate actam, in diuorum numerum sit relatus, & ad hominum opinionem sit consecratus? imò quotusquisque inter eos est, qui hoc ipsum sic, sanctè, vt opinor, & religiosè effatum, non effusissimo statim risu & cachinno excipiat atque prosequatur? Vsq. adeò omnis cœlo digna vita, ab istorum cōtuberniis exultat, vt etiam ludibriis ipsorum subiecta tota atque obnoxia sit

xia fit facta. De communi hominum genere loquor. Quid dicam de magistris ipsis? Equidem si eorum sanctimoni-
am paulisper scrutari voluerimus, comperiemus magnam
eorum partem à rapina, à cæde, à periurio; maximam à
crapula, à lustris, à vino, à venere, ab ocio, ab alea; breui-
ter ab omni carnis lasciuia, ad eiusdemmodi porrò vitam
consectandam, & tum sibi, tum aliis propemodum com-
mendandam prorepisse. Nimirum illi, qui magna ex par-
te fidem omni virtute spoliant, & solam absque vlllo san-
ctarum actionum comitatu, in vitam hominum, tanquã
in scenam introducunt, quique adeò nullam in seipsis soli-
dæ aut expressæ virtutis effigiem, sed imaginem duntaxat
fictæ & adumbratæ, &, vt ipsi loquuntur, imputatæ cu-
iusdam iustitiæ agnoscunt; eam demum magnam scili-
cet voluptatem esse ducunt, æqualem ac parem verbis vi-
tam agere, moribusque vicissim ipsis orationem tanquam
cothurnum accommodare; nec ferè quicquam in vita sua
tam dissolutum putare, quod non ex intimis ipsis professi-
onis suæ visceribus ac medullis deprompta doctrina tue-
antur. Videlicet nec qui ita viuunt, aliter loqui possunt, nec
qui sermone vtuntur tam illoto, vita honestiores sunt. Ita-
que ergo eius vitæ quam sequuntur, non solum eos aut
pudere, aut poenitere non potest; sed, si modò sibi consen-
tanei esse velint, ne debet quidem; gloriandum iis potius
fuerit, vti quidem gloriari verè possunt, quòd & doctrinæ
suæ conuenienter viuant, & vitæ ipsi ac moribus suis aptè
admodum ac congruenter doceant; cùm pro castitate in-
cestas nuptias, pro contemptu diuitiarum, sacrilegia & ra-
pinas, luxum pro ieiunio profitentur; cùm pro obedientia
& subiectione aduersus magistratus, populum ad tumultum
& perduellionem concitant, cùm classicum passim
belli ciuilis canunt, cùm omnes honestas & laudabiles a-
ctiones eleuant, & tantum non ex vita hominum exterminant,
& proscribunt, cùm ad omnem nequitiam & impu-
dentiam

dentiam fenestram aperiunt, non solum præcisa, & ultra
ferè medium resecta honestæ vitæ prædicatione, quæ a-
pud eos, remota & eiecta meriti ratione, necessariò fri-
get, verumetiam, sublata prorsus è medio, ut diximus, vi-
tæ intemperantis poenitentia, atque adeò confessione
saltem ipsa, quæ vel sola, dum in ecclesia publicè observa-
ta est, multos à scelere & flagitio potuit cohibere; breui-
ter, cum non virtutes colere, sed, ut dixit quidam, vitia co-
lorare, non ecclesiam Christi regere, sed Sathanæ synago-
gam instituere, atque adeò non religionem aut pietatem
docere, sed ipsum terrarum orbem, quemadmodum vide-
mus, stupro, nequitia, crapula, periurio, fraude, flagitio,
imbuere videri possunt. Homines arrogantia inflati, su-
percilio tumidi, dolo instructi, maledicentia armati, libi-
dine incensi, ambitione cæci, invidia enecti, auaritia infame-
s, amentia præcipites; omninò autem qui optimi eo-
rum sunt, aut Gnathones, aut certè Thraones meri. Atqui
initio quidem, cum primum ad hanc suam, verbo religi-
onem, re ipsa omnis nequitie officinam accederent, eccle-
siam se ipsam vomicis istis perpurgaturos profitebantur;
ubi accesserunt, omnia tetrioribus etiam quàm antea &
multò periculosioribus vomicis atque vlceribus, scientes
ac volentes pròh dolor compleuerunt; hancque adeò, &
non aliam, magnificorum illorum promissorum suorum
fidem, deoque, ecclesieque, nobisque ipsis datam, homi-
nes fraudulentè exoluerunt. Verum ex his malis quæ po-
stea consecuta sunt, facile quid iam tum cum animis suis
meditari videbantur, perspicere ac cognosci potest; nimirum
ne tunc quidem aliud eos quicquam cogitasse palàm est,
quàm ut virtutis quidem nervos omnes eliderent, pro vir-
tutibus autem, regnum quasi quoddam scelerum ac vitio-
rum in orbe terrarum erigerent. O mores virorum. O do-
ctrinam philosophorum. Atqui ad eam tamen eiusmodi
magistrorum, vel, ut ipsi appellari amant, Ministrorum do-
ctrinam,

ctrinam, video plerosque etiam Ministraſtros ipſos, dociliores ſe, penè plus quàm ſat erat, præbuiſſe. Quis enim vnquam eorum, (qui tamen omnes, vniuerſis ipſis Miniſtris ſuis meliores, pudentiores, virtutis amantiores ſunt) quis, inquam, illorum, non dico, vt dicere caperam, aliquam inter homines ſancti viri opinionem eſt conſecutus? illud tantum quæro, quis illorum interim fortior, iuſtior, piensior, liberalior, continentior, veracior, ſimplicior, ab ea doctrina eſt factus? quis non potius iniuſtior, impudentior, rapacior, diſſolutior, mendacior, verſutior? & omninò, quid quidã vir litteratiſſimus ſcripto ipſo ſuo teſtatum iam pridem facere ad perpetuitatem non dubitauit, non ſeipſo deterior? Quod quidem vſque adeò notum ac peruulgatum, primis etiam illis temporibus extitit, vt ipſe quoque ille Luterus, ne quid nos fingere videamur, qui primus eum nequitia ludum aperire, vel, vt modò dixi, regnum vitiorum ſtabilire cæperat, non multò poſt, ipſa exorientium iam tum flagitiorum copia atque magnitudine commotus, & tanquam victus veritate, queri alicubi in ſuis ſcriptis non dubitaret, ex illa eius rigida, ſi diis placet, regula atque diſciplina, tanquam ex equo ſcilicet Troiano, homines multò quàm fuerint in Papatu, (ſic enim loquitur) nequiores, id autem eſt, ſi ad eius opinionem referas, latrones meros, ad communem hominum vitam profluxiſſe. Hæc Luterus, nihilo etiam ipſe diſcipulis magiſter ſanctior, de ſuis gregalibus. His autem quoq. multò etiam atrociora ferunt teſtimonia, ii qui Luterum ipſum aliquanto poſt, in eadem ſunt ſchola conſecuti. Qui ſanè Euangelicorum ſcilicet iſtorum vitam, minimè ad euangelii normam, ſed potius ad maleſana Epicuri lutulenti hominis dogmata compositam, non Euangelicam illam, ſed Epicuream appellant; nec illam homine dignam, ſed proiectæ potius beluarum immanitati propriam, ſcriptis publicè editis aſſerere non dubitant; ita mehercule, vt ſi quis ſit, qui

fit, qui quàm maximam nebulonum, impostorum, vsur-
riorum, & omninò temulentorum, ac cœlo diuisque o-
mnibus inuisorum hominum turbam atque colluuiem si-
mul cupiat intueri, hunc eas potissimum perlustrare ciui-
tates aiant oportere, in quibus doctrina noui istius euan-
gelii vigeat atque propagetur. Tales enim profectò in his
vrbibus homines, ipsorum quidem sententia, depræhen-
dat, apud quos, virtute ac honestate omni extincta pror-
sus & profligata, nec metus peccati sit vllus, nec appella-
tio vlla. Breuiter, eiusmodi portenta hominū inueniat, qui-
bus sceleratiores ac flagitiosiores, ne inter Ethnicos quidē,
aut Iudæos, aut Turcas etiam ipsos, (verba hæc sunt testi-
um ipsorum) possint reperiri: homines ita planè fœdos ac
infames, vt à diabolo tantum non obsessi esse, Lutero ipsi
suo videantur. Sed ego eos quidem hoc loco nimium pu-
gnaciter non vrgebo, vt tantis sceleribus, quantorum, cum
à cæteris, paribus æqualibusque suis, tum vel à magistro
saltem ipso arguantur, vtrò se ipsi alligent; illud modò
bona cum venia ab eis petam, ecquid se ipsi maioribus
ipsis suis Papistis sanctiores esse existiment; vt, si aiant, prò
diuū hominumque fidem exclamem, & magistri ac so-
ciorum ipsorum aduersus eos testimonium proferam; sin
negent, occasum cum ipsis eius religionis deplem, quæ
earum virtutum, à quibus se ipsi longissimè abesse confi-
tentur, altrix in eorum parentibus atque educatrix extitit.
Quid tamen illi hæc contra? Quid? Ociosi homines; vix
fatis magistrum ipsum suum, vix etiam suos, quid dicant
exaudiunt; nos autem ipsos ne vix quidem. Verùm vbi
vehementius aliquanto quærere institimus, in promptu fe-
rè habent versum Homericum, quem videmus etiā à pœ-
ta Latino esse postea vsurpatum.

Flacos, inquit, intra muros peccatur, & extra.

Quo quidem illi versu, crimen ipsum, aduersum se inten-
tatum, non tam à se remouere, quàm nobiscum commu-

nicare velle videntur; magistri autem ipsius, & ipsorum illorum suorum gregalium os, leuitatis conuicio verberare non dubitant. Sit enim ita sanè, ô amici, de muris ipsis Iliacis, vt voluit Homerus. Atqui de vobis, viuus scilicet synagogæ suæ muris atque lapidibus, diuersum respondet, non dico Homerus Græcus, sed Helias ipse vester Germanicus: qui planissimè & apertissimè, vt audistis, non Græca illa leuitate, sed Germanica scilicet vestra fide atque veritate, affirmare non dubitat, vos in comparatione Papistarum, quibus apud ipsum tamen vix quicquam fingi potuit profligatius, multo esse sceleratiores. Sentitisne, amici, non versum aduersum vos Homericum ab aduersario contortum, sed plagam hoc verbo vobis à magistro vestro esse impositam prorsus insanabilem? Verùm demus, quod velle videmini: & in eo quoque, quando ita vobis videtur, Heliam istum vestrum vanitatis coarguamus; vt dicamus, æquè peccari ab vtrisque nobis. Quid igitur? Sequitur nimirum primùm, vos non esse meliores nobis: vestra enim ipsorum confessione peccatur profectò à vobis, non minus quàm à nobis. Quod si est, sequitur iam illud quoque alterum, nihil causæ nobis esse, cur vos, sectamque istam vestram, veteri nostra ecclesia relicta, sequi debeamus. Quid deinde sequitur? Sequitur etiam illud tertium, nos nihilo esse deteriores vobis. Si enim æquè peccatur ab vtrisque, fieri non potest, vt alteri alteris deteriores simus. Quod si est, dicite iam vos, quæso, per summam istam & planè incomparabilem constantiam sapientiamque vestram, quid causæ fuit, vt propter nouos mores vestros, nihilo nostris meliores, veteres nostros, vestris nihilo deteriores relinqueretis, & Roma Veios, ne dicam Babylonem, commigraretis? Quod ipsum quidem, ne vos item possitis in nos aliquando retorquere, ab eo sanè vel ipsa illa, quam præ vobis obtinemus, antiquitas nostra, facile nos vindicabit; non nos esse videlicet, qui exiuerimus
ex vobis,

ex vobis, sed vos potius esse, qui ex nobis exiuiſtis. Vos autem dicite obsecro, quam rationem potissimum secuti, nos esse relinquendos existimauistis? Equidem sunt apud nos sodalitatum certa quædam genera, ad exercēdos homines in pietate, & in euangelicis tum præceptis, tum institutis, ab optimis illis, & excellenti quadam ac planè diuina virtute præditis viris auctoribus pridem adinuenta. (Non puto quicquam eiusmodi extare inter vos. sunt enim mandata scilicet ac reperta hominum; & quædam quasi rudimenta ad exercitium, vt dixi, pietatis comparata. Vos autem domini Euangelici, qui in ipsa arce totius perfectionis constituisse iam vobis videmini, incunabulis videlicet eiusmodi non egetis, nec crepundia vlla virtutis aut pietatis desideratis; & omninò, quod olim per iocū dixit quidā de quibusdam, malos scilicet eiusmodi mores nō amatis. Non modò igitur eiusmodi sodalitia constituta non habetis, sed etiam is, qui in eiusmodi sodalitiis, dum apud vos extarent, specie ac nomine aliquandiu versabatur, Luterus vester, homo professione Augustinianus, postquàm semel & exiuiſset ipse ex illis, cū tamen non esset ex eis, & indidem, ad consceleratas, nouo in ecclesia exemplo coniungendas monachales nuptias, Nonnam illam suam abduxisset, euestigiò ne vestigium quidem eorum sodalitorum apud vos reliquit.) In his igitur eiusmodi apud nos vitæ generibus, gradus veluti quosdā esse videas laxioris aut asperioris vitæ christianæ. In quibus quidem gradibus, ex remissiore & solutiore vita, ad astrictiorem cōmigrare, ius fasque est; & faciunt sæpè multi, non modò sine crimine, sed etiam cum laude summa; contrà ex astrictiore ad laxiorem, sine magistratus superioris venia, temerè se conferre haud licet, neque adeò probro caret. Agite igitur, vtrum horum secuti estis? Nam si ad liberiores vestram, ab rigidiore vita nostra, conferre vos voluistis, vbi est maiorum petita aut obtenta venia? aut

verò potius, vbi est, vbi est solenne illud promissum vestrum, quo vno, has, quas paucas etiamnum dolosè tenetis, orbis terrarum partes, astutè ab initio, per fraudem & dolum conciliaistis vobis? Vbi est, inquam, nobile illud & magnificum promissum vestrum, vos, morum veterum in ecclesia restaurandorum, ac vitæ illius antiquæ, à rebus duris, ad omnem victus ac cultus molliciem prolapsæ, vita rursus ac doctrina vestra seueriore restituendæ, munus suscepisse? At enim si neque venia quæsitæ aut tributa est vobis, & vos tamen seueritatem veteris disciplinæ solutæ, &, vt dixi, inclinatæ, quam instaurare velle videbamini, nō magnopere, vt leuissimè dicam, moribus vestris astrinxistis, videte quæso, ne licentiam magis quàm id quod liceat, vestra illa secessione secuti esse videamini. Sin contrà, ad vestram asperiores, à vita nostra laxiore, transire cogitastis, vnam, quæso, saltem proferte vestram actionem, vnum exemplum ex omnibus, per hæc tempora rebus vestris gestis depromite, quod testimonio sit huius austerioris scilicet vitæ vestræ; & vincite. Equidem tria sunt vel præcipue, quæ Pandora ista vestra, orbi terrarum videtur attulisse, ex iis dico, quæ ciuilibus interdum viris minus vtiq; videntur posse improbari. coniugium sacerdotum, vel, vt vos vultis, Ministrorum vestrorum, communionē vtriusque speciei in eucharistia, & linguam illam popularem in sacris faciendis. Excutiamus igitur hoc loco obiter, in his tribus, rigidam scilicet istam vitam vestram; vt si eam vsquam apud vos reperiamus, Veios & ipsi continuò migremus Quirites, dextrasque vobiscum societatis coniungamus; sin in iis rebus, quæ probari tamen quibusdam videntur, reperiamus nullam, vt tunc eam scilicet multò minus in reliquis reperiri apud vos posse, vosque adeò sine causa secessionem à nobis fecisse, scire intelligereque possimus. Primùm igitur. Sacerdotes vestri. Hei mihi, semper hic error. Non sacerdotes, sed ii, qui nihil cum sacris commune vn-

mune vnquam habuerūt, seu cerdones, seu Ministri isti vestri, vxores duxerunt. Quid exhorruistis? an metuebatis videlicet, ne, aut vestras, adderem; aut ipsos, Eremitas potius siue Anachoritas factos esse dicerem? ad quorum profectò alterum expalluisse vos, ad alterum erubuisse conspicio. Ego verò, nec vestras duxisse, nec Eremitas factos esse, sed præcisè, vt dixi, vxores duxisse aio. Atqui nos, ecclesiæ scilicet Romanæ præbyteri, consuetudinem eiusmodi non habemus. Vtri igitur viuimus laxius aut durius? Recita decretum Pauli, **QVI SINE VXORE EST**, inquit, **SOLICITVS EST QVÆ SVNT DOMINI, QVOMODO PLACEAT DOMINO. QVI AVTEM CVM VXORE EST, SOLICITVS EST QVÆ SVNT MVNDI, QVOMODO PLACEAT VXORI.** O austeram, amici, vitam vestram. Et scio quidem, quid huic loco opponere ferè soleatis, de nostrorum celibum vita sacerdotum, non satis in celibatu ipso, nec casta, nec pudica. Verùm quid dicetis de aliorum quoq. extra sacerdotium, in ipso, quod tantopere dilaudatis, matrimonio, inter vos ipsos degentium, vita nihilo castiore? Nostra id fortasse nihil interesse, excipietis, vt soletis. Sed quid dicetis rursus, de multorum sacerdotum nostrorum, in ipso celibatu, & castissimè acta vita, & pudicissimè? Paucos esse eiusmodi, inquietis. Nos verò quod datis accipimus: apud vos autem, omnes quotquot sunt Ministri vestri coniugati, scelestissimis esse dicimus nuptiis illigatos. Sed hæc mittamus. Illud constat. Eum quidem, qui iungit matrimonio, benè facere; eum autem qui non iungit, melius facere. Hæc sunt enim verba Pauli. Ex quibus etiam liquet, eum planè qui iungit, sed non matrimonio, perperam omninò facere. Vestræ autem istæ, quas creditis, non sunt profectò neque veræ, neque legitimæ nuptiæ. Et si sint, certè qui non iungit, melius facit. Atqui meliora omnia sunt etiã difficiliora. Difficilius igitur in carne præter carnem, quàm secundū carnem vi-

nem viuere. Vestri autem cùm eiusmodi vitam, quæ in carne præter carnem uiuitur, non exemplis tantum, sed etiam sermonibus ac scriptis ipsis suis planè aspernentur, videte quæso, vtrum à laxiore ad rigidiorē, an contrà, collimare atque adeò contendere videantur. Choragus quidem ille & præfultor eorum Luterus, ab austera illa, vti tunc ferebant tempora, Augustinensium vita, planè abiit ad laxissimam. Nam claustra illa monasterii sui, quæ arcebant vtcumque, si non animum, at corpus certè quidē hominis minimè omnium continentis, ea effugit homo transfuga, corporis autem claustra alieni, à quibus voto ac religione vtrinque suscepta arcebatur, ea homo petulantissimus, per summum sacrilegium perfregit; vt ne quid videlicet vspiam clausum esse posset intemperantiæ suæ. Eratnè tunc autem ex vestris quispiam, aut verò estnè nūc etiam, qui saltem, factum male, exclamasset? Nemo. Qui igitur tacuerunt, consentire planè videbantur. Omnes igitur, quod in ipsis fuit, assensum disciplinæ laxiori præbuerunt, omnes etiam frænum austerioris & horridioris vitæ momorderunt. Vin' autem scire, quid illis celebs ille maritus pro ea re gratiæ retulerit? Primùm, quod solent boni focii, idem illud, quod sibi aliorum concessu licuit, illis etiam ipsis symmystis vel potius fatellitibus suis omnibus, licitum esse voluit: id autem est, vxores omnibus promiscuè, non modò concessit, sed etiam inuitis nonnullis adiunxit; in eoque primùm disciplinam ecclesiasticam seueriore lege deuinctam, tum in seipso, tum in aliis, soluit & laxauit, atque adeò constuprauit. Quid autem deinde? Iam enim venio ad optatum illum calicem, & ad vulgaria sacra vestra. Ille verò ministrorum animis conciliatis sibi, ipsorum etiam dominorum, id autem est, plebis ipsius animos conciliandos esse existimauit; & conuersa ad eos oratione. Eia, inquit, boni viri, vos quidem, quod vestrū esse proprium oportuit, vxores, non inuiti communica-
 stis no-

stis nobiscum; haud æquum est, vt quod nostrum item est, inuideamus vobis. Ite igitur omnes, & prædicate euangelium omni creaturæ; omnes enim profectò estis regale sacerdotium. Parum est. Deinde igitur. accipite, inquit, hunc calicem, & ex eo, seu mauultis etiam ex quibuscumque, & ex quocumque tandem calicibus aliis, bibite, bibite omnes. Et quidem omnes, omnes. Tantum non addidit, oues & boues vniuersæ, insuper & pecora campi. Atque hic iam quoque iterum, de pristina ecclesiæ consuetudine laxauit permultum. Vulgus enim nostrum hætenus nec prædicando euangelio vacabant, nec calici adhibebantur; sorte & conditione sua vltro contenti, de pane domini participabant, calicem clero concedebant; & tamen verissimo Christi corpore & sanguine, non minus saginabantur. Quid autem præterea ille? Etiam. Quos hætenus singulos, suauitate illius cantus, vel potius hinnitus fui, de quo diximus, satis permulserat, rursus apud vtrosque eorum communiter gratiam inire voluit, & mysteria sacrorum, quæ antea solis latinis patuerunt, in vulgus protulit. In quo ipso soluissè eum quoque, vt in aliis, veteris habenas disciplinæ, quis non videt? Nam & Ministro profectò ipsi laxius est atque solutius, non tot linguis ad sacra ipsa obeunda opus habere, & plebi deniq. ipsi, ea quæ hætenus in archanis mysteriis numerabantur, nec archana deinceps ducere, nec mysteria deputare, est profectò ad omnem licentiam solutius. Ita ille, cum antea & sacerdotes domini vita ipsa celibe, & populus acquisitionis vna eucharistiæ specie, & vtrique illorum, latinis ac Romanis sacris, in ecclesia contenti essent, vtrosque vtrinque quasi patentibus quibusdam portis foras eduxit, & in summa vitæ, religionis, cerimoniarum, morum denique laxitate atque licentia collocauit. Hoscine vos igitur mores, in deferendis nostris moribus sequebaminis? hancine vitam segregatione vestra à vita nostra quærebatis? Ignoscite;
I ignoscite.

ignoscite. Non sanè nimis magnam, neque, vt leuissimè dicam, nimium iustam causam, vestræ à nobis discessionis cepistis. Quid? doctrinamné nostram refugistis potius quàm vitam? Sed de doctrina paulò pòst viderimus, nunc de vita & moribus catholicis nostris, illud respondemus. Ante vestrum hoc quidem recens à vobis promulgatum euangelium, multò, vt diximus, commodiores, nominiq. christiano congruentiores mores nostrorum fuisse; nunc cum vestris vnà, moribúsne dicam an institutis nouis, de vetere veteris probitatis atque integritatis orbita, non leuiter fortassis deflexisse; nec tamen vsque adeò corruptos esse, quin in omni virtutis excellentia, vestro etiam Censore iudice, vobis ipsis (quod sine arrogantia dictum esto) superiores esse videamur. Deflexisse aliquid si quis miratus fuerit, is multò verius miratus fuerit, in tanta quidem omnium vitiorum licentia, impunitate, impudentia, quantum vos incircumcisis sermonibus vestris, exemplis etiam nō satis castigatis, in orbem terrarum inuexistis, nō ipsum etiam virtutis semen extinctum vbique interisse; à quo quidem paululum admodum abfuit. Nunc, vt in malis, semen fortassis virtutis & probitatis, apparet vsquam inter nostros, virtus quidem illa prisca, quæ maiorum nostrorū temporibus in ecclesia nostra vixit, nunc vestra culpa *διχτοί*, sic, vt ex omni propemodum vita mortalium videatur exulare. Nisi fortè illos, ex vestris Picardorum & Anabaptistarum scētis tectioribus, & fraudulentioribus homines, existimatis aliquid habere virtutis veræ & expressæ; qui ad mentum vsque adducto supercilio, sanctitatē mentiuntur, & vultu illo suo tætrico, orbi ipsi terrarum non tantum imponere, sed etiam imperare cogitant, atq. moliuntur; dum tristi quadam & seuera non tam assumpta, quàm assimulata persona, non alios ad ecclesiæ communionem pertinere censent, quàm eiusmodi quadam prædito perfecta & numeris omnibus absoluta vitæ sanctitate,

ctitate, quæ in terris istis, in ista, dico, ecclesia mortalium, vel, vt passim loquimur, militantium, multò autem minus in cœtibus & cōuenticulis ipforum, reperiatur nunquam. Stulti homines, ne quid dicam aliud, qui hoc ipso dogmate suo inciuli, palàm testimonium ipsi contra se ferre videntur; vt, cùm vita sua longe absint, ab illa, quàm mente & cogitatione sua finxerunt, necessaria, & vt ipsi iudicant, maximè propria ecclesiæ puritate, extra ecclesiam quidem esse manifestissimè conuincantur. Sed quid agimus? Demus sanè tam his, quàm cæteris omnibus hæreticis, sanctitatem non modò nostra maiorem, (qui in vitio nos esse, à perfectione autem non solùm sanctitatis, sed etiam morum ipforum antiquorum, longe abesse, vltro agnoscimus) verumetiam illorum hæreticorum antiquorum sanctitati parem, quos à vitæ eorum puritate, antiquitas Catharos appellarat: quid tum postea? si omnis eorum sanctimonia fucata est, & nullo charitatis ac beneuolentiæ Christianæ amictu conuestita? in qua vna charitate, vniuersum bonarum actionum decus, adeoque vita ipsa earū, posita est & constituta. Quam quidem isti charitatem & beneuolentiam christianam vsq. adeò oderunt, vsque adeò persequuntur, vt eam simul cum ecclesia ipsa, quæ est nidus, vt sic dicam, & domicilium ipsum, ac cubile veræ charitatis, proscriptam & extinctam, vi etiam, si aliter non possint, tollere è medio gestiant. Quæ mihi sanè vna eorum improbitas, omnes omnium hominum impietates facilè videtur vincere ac superare. Quid ita? Dicam. & quidem ita dicam, vt sentio. Facinus est, hominē vnum lædere; scelus est, parentem violare; maius paricidio est, Christum deum hominem in crucem tollere; quid dicam, ecclesiæ ipsi, vi vitam euitare? Etenim ecclesia, ita vna est, vt hominum tamen multitudinem compræhendant; ita parentis vicem obtinet, vt omnes tamen omnium propinquorum charitates complexa esse videatur; ita est

coniuncta Christo Deo, ut omnia inter ipsos, foedere planè coniugali, imò etiam plusquàm coniugali, facta esse communia videantur. Coniugali quidem, quòd Christus ipse dominus vnum cū ea corpus fieri voluerit; plusquàm coniugali autem, quòd pro ea, suum ipse corpus ad crucē figi permiserit, & denique ob eius amorem quendam singularem, vitam quoque ipsam suam profundere, ac mortem acerbissimam, & ignominia plenissimam oppetere nō dubitauit. Qui igitur aut separet, quod ita coniunxit Deus, aut contemnat, quod ita honestauit, aut persequatur, quod ita adamauit, is etiamsi cæteroqui vir bonus esse videatur, hoc tamen ipso, & omne quidem bonitatis decus ac gloriam amittat, & se præterea teterrimo atque grauissimo omnium flagitio contamineat. Ita fanè ut omnibus intra gremium ecclesiæ versantibus, & amore atque charitate Christiana deuinctis, peccare quodammodò, quàm cæteris extra ecclesiā constitutis, rectè & ex ratione viuere, tutius propemodum esse videatur. Sentitisné amici, quæso, ecquonā progressus sit furor vester? principio quidē ad Papistarum tantū ludibriū, deinde ad Christi & ecclesiæ contumeliam, postremò ad vestrā ipsorū ignominia summā aptus & intentus. Sed hæc omnia, quæ de catholicorū & sectariorum sanctitate vtrinque, quantum præsentī loco satis est, dicta sunt, quæue aliàs ab aliis dici etiam possunt copiosius, re ipsa quàm verbis notiora sunt. Vtros igitur malumus? Equidem quorum vita tam impudenter flagitiosa est, eorum doctrina quoque turpis atque scelerata debet deputari, & vel despici ac contemni antequàm suscipiatur, vel certè malè suscepta, benè tandem deferri ac relinquī. Quis consurget pro me, inquit psalmographus, aduersus malignantes? & quis stabit mecum aduersus operantes iniquitatem? Odiui, odiui, inquit ipse, ecclesiam malignantium, & cum impiis non sedebo. Quid autem porrò facies, ô regie propheta, ubi satis impios istos auer-

fatus fu-

fatus fueris, & sedes eorum impiger reliqueris? Primùm inquit ipse ibidem, lauabo inter innocentes manus meas, ex iis videlicet sordibus eas eluens, quas interim, dum verfarer inter malignantes, contraxerunt. Deinde autem manibus illis puris, & lotis iam atque absterfis, altare tuum domine, altare tuum, quod est in medio templi tui, in ipsa ecclesia tua sancta, id circumdabo & amplectar. Hæc ille. Quem nos quoque, quantum maximè poterimus, imitari contendemus; & hos quidem, qui sunt ex malignantium ecclesia, omni studio vitabimus, ecclesiam porrò, eam potius quæ sancta est, quàm illam quæ est scelerata, & corporibus & animis nostris semper requiremus.

CAP. VI.

Nouitas & factiones hæreticorum.

Tertium saxū fundamenti ecclesiastici est, catholicam ecclesiā esse.

Ei rei opponitur nouitas & factiones hæreticorum.

Quod utrumque suspectissimum habere debemus.

NOUITAS hæreticorum ostenditur: quæ millies etiam renascendo, deteri & antiquum obtinere nunquam potest.

FACTIONES hæreticorum demonstrantur.

Quia cum nulla veteri ecclesia consentiunt.

Ac ne cum recenti quidem, siue Græca, siue nostra, siue barbaræ.

Locus Ioan. Apostoli, de discessione hæreticorū ex nobis, explicatur.



VID aliud? etiam illud nobiscum expendemus, quod quidem est, in hac instituta notarum interiorum, & quasi fundamentorum ecclesiæ comparatione, tertium; quòd hi ipsi Ministri, de quibus loquimur, præter suam illam omnibus notissimam discordiam, de

qua superius, & nequitiam, de qua modò locuti sumus, vel ob ipsam saltem, de qua deinceps dicturi sumus, novitatem, & à veteri ecclesia ipsa discessionem, non possunt non in gravissimam suspicionem venire, ne parum catholici, imò etiam, ne parum christiani, (ineft enim in nomine ipso catholici, nota quædā melior christianitatis) imo- uerò ne parum boni ciues esse videantur. Quemadmodū enim antiquissimam quanque ciuium inter ipsos consociationem ac consensum, maximè laudare, & ad cœlum ferre, & firmissimum quasi quoddam vitæ fortunarumque nostrarum, in rebus aduersis perfugium ac receptaculum ducere ac deputare solemus, ita contrà, factionis & novitatis ipsam etiam suspicionem studiosissimè non minus in ecclesia, quàm in repub. deuitamus; quòd qui sunt eiusmodi, iis nūquam vita nostra tutò, sine metu ac sollicitudine committi posse videatur. Cedò, quī vestram rempub. tantam amisistis tam citò? quæritur apud Nævium veterem pœtam. Sed sic, vt apud omnem posteritatem valere debeat eiusmodi interrogatio. Cedò, quī vestrā rempub. tantam amisistis tam citò? Respondetur autem, id quod omnium item animis maximè ad perpetuitatem infixum esse debet. Proueniebant, inquit, oratores noui, stulti, adolescentuli. Consideremus igitur nos quoque hoc loco, & inquiramus. Quando obsecro, Ministri isti orti sunt? Equidem maiorum nostrorum temporibus, quod scimus, non fuerunt; quibus quidem temporibus, vti meminimus, vnum erat, vnum illud erat vbique labium totius orbis christiani; quo ipso labio loquuntur nunc etiam, ita vti semel cæperunt, ecclesiæ nostræ. Præter hanc, quæ in præsentiarū viget, & quæ iam inde à primis temporibus hucusque continuata decurrit, religionis & pietatis doctrina, nullam tunc aliam doctrinam, nec Græci, nec Latini, nec barbari, pro Christi doctrina agnoscebant; discessionem ab ea doctrina, discessionem à Christi doctrina esse existimabant;

mabant; vel minimum autem eius doctrinæ apicem velle conuellere, planè non ducebant esse christianum. Itaque idipsum sapiebant, idipsum loquebantur, idipsum æquè colebant omnes. Agitabantur fortassis & vigeabant interdum inter Græcos & Latinos, leues quædam dissensiones de rebus paucis, quæ ipsæ non fidem sanè aut religionem euertebant, quæ vna ferè erat omnium, sed mutui tantummodo, qui ex coniuncta omnium fide ac religione expectabatur, amoris cursum nonnihil retardabant; in reliquis pietatem quidem certè christianam fartam & tectam cōferuabant. Quando igitur belua hæc immanis, quæ se admirabili, & maximè constanti eorum consensu opponit, caput hoc inuisum, & ecclesiæ infestum, coepit primùm attollere? quando, inquam, nefanda ista cornua capitis execrandi, ministri, dico, isti; isti, inquam, omnis domesticæ seditionis, atque publicæ nequitiae administri, coeperunt in hanc lucem prorepere? Quando, censes? Equidè Mescislaus eos noster, ante sexcentos annos in Polonia, Jagello etiam, ante ducentos, in Lituania, fundanda religione christiana, prorsus ignorarunt. Nam si non ignorarunt, cur recenti tum illi christianæ inter suos instituendæ religioni, non hos in vniuersum magistros quæsuerunt? cur non aliquid saltem ab iis acceptum, reliquis admiscuerunt? hoc magis, quo eos propius, in cœnæ scilicet dominicæ cerimonia, sub vtraque symbolorum specie vulgo ipsi repræsentanda, videbant ferè ad Rutenorū vicinorum suorum, qui suos ipsi religionis ritus, ad Græcarum ecclesiarum auctoritatem conferunt, similitudinem accedere. Verùm hi quidem eiusmodi magistri, an ministri potius, tum temporis profectò non extabant, & neque nostro Mescislao, neque adeò Mescislao ipso posteriori Jagello-ni Litvano, vel ex nomine saltem noti erant. Qui si christiani doctores erant & magistri, diuersa præsertim in ea religione instituta sequentes, latère certè eos, qui Christo domino

domino colonias in ditionibus suis constituere moliebantur, minimè potuerunt, quominus de ipsis, siue ab utroque eorum, siue ab altero, quorum ætas inuicem quadringentis totis distabat annis, aliqua vel tenuissima saltem fama atque auditio acciperetur. Sin autem in toto tum terrarum orbe, ut ostendimus, non extabant, quid est, cur dogma eorum, ab omnium christianorum dogmate diuersum, pro christiano, nostris demum temporibus deputari debeat; quod non nisi post mille quingentos à Christo nato annos, coepit nonnusquā apparere? Sed dices, fuisse fortassis iamdudum vsquam; verum pusillum illum gregem, obscuram tum admodum in tenebris vitam egisse. Quod si est, laudo equidem Mescislaum, & Jagellonem nostros, qui nec ad plantandam in regnis suis, illustrem iam tum Iesu Christi religionem, obscuros villicos quæsiuerunt, nec ad publicæ fidei ædificationem, priuatæ & modicæ fidei architectos ipsos adhibendos sibi esse existimauerunt. Sed quid aut Mescislaos & Jagellones mortuos, aut villos omninò testes, in re tam clara & aperta, cieo? Isti ipsi nouarum apud nos doctrinarum auctores atque administri, cum primum aut ederentur in hanc lucem, aut vsuram saltem eius lucis sentire per ætatem atq. intelligere inciperent, dicant per Deum, dicant, ecquemnam in hoc totius, siue Poloniæ, siue Lituaniæ, quàm longissimè patet, ambitu latissimo, viderint, audiuerint, senserint, qui se tunc istarum eiusmodi doctrinarum auctorem perhiberet? Dicant, dicant, si possunt, se eas doctrinas, patrum saltem suorum morientium testamento relictas accepisse, aut nascentes ipsos ex matris utero, tanquam cœlitus in has terras secum deportasse, aut verò ubi iam nati essent, cum ipso nutricum lacte suxisse, aut denique adultos, tanquam tradita aliquando à maioribus, in orbem terrarum reuocasse. Nihil horum, nihil horum. Non enim accepto tradere, sed ficta & excogitata, multò etiam post, quàm & nati & adulti essent, nuper ad-

per admodum nostra memoria vltro procudere cæperunt; atque hoc ipso, seipso recentissimos, & vt sic dicam, omnium nouissimos homines, religione ipsa sua antiquiores esse demonstrarunt. Quod tamen, si ex vera commendatione pendi res deberet, contrà esse decuit, vt religio ipsa, abortiua ista prole vtique esset antiquior. Antiquissimam se profiteri aiunt. Vtinam quod dicunt, etiam docerent; atq. adeò vtinam saltem id dicerent; hoc enim ipso aliquid se saltem antiquitati tribuere ostenderent. Verum nec docerunt sanè vnquam, cum eorum doctrinam, nostris demum in Polonia & Lituania temporibus natam esse, nos qui quinquagenarii sumus, memoria teneamus; nec dicere profectò cupient, cum maxima eorum pars, omnem antiquitatis opinionem tanto studio refugiant, vt se ipsos recentissimos homines, cæco ipsi, sic enim loquuntur, terrarum orbi, & diuturnis atque perantiquis superstitionibus immerso, primos recentis huius, & nuper adeò à se inuentæ, doctrinæ lumen, post annos demum à Christo nato mille quingentos & amplius, prætulisse gloriantur. Quid enim sibi vult illa inscriptio Confessionis eorum, in conuētu Augustano propositæ, vt eam, anno demum Christi domini M. D. XXX. fuisse Q. Carolo Cæsari exhibitam profiterentur? Nouitatis videlicet isti, quod dixi, gloriam, magis ferè quàm antiquitatis, videntur semper aucupari; quam quidem, me etiam adstipulatore, teneant licet. Quod si qui tamen sint inter eos, magis sobrii, qui aliquam antiquitatis laudem affectare, & propter paucula quædam capita, ex illa, rudis etiam tum antiquitatis christianæ memoria, repetita, sed perperam in recentibus suis synagogis vsurpata, omnium repertorum suorum decus & gloriam, ad illa ipsa nascentis ecclesiæ primordia referre non dubitent, his ego quidem ita respondeo; vel nihil esse apud eos, quod ex antiquitate rectè vsurpatum videri queat; vel, si quid est, vnius profectò hirundinis aduentu, volatu, cantu,

tu, cantu, ver effici non posse; vel denique, longè aliam esse oportuisse nascentis ecclesiæ conditionem, & aliam ecclesiæ iam constitutæ esse oportere; sicut ortus fluminum aliam esse faciem videmus, quàm progressus eorundem. Tum verò etiam illud addo. Nec malæ fidei possessorem vnquam in rebus ciuilibus præscribere, nec hæreticum, vllò antiquitatis vsurpatæ prætextu, nouitatis in religione appellationem posse euitare; vt pote qui & mala fide semper ea possederit, quæ aliquandiu possedisse videbatur, & cui præterea, cœpta quondam possessionis eius continuatio, semper sit, cum vigilantia & studio catholicorum hominum, tum verò multò etiam magis, iure ipso, & singulari Dei Opt. Max. prouidentia, ita interrupta, vt planè fuerit abolita. Condemnatis enim, verbi gratia, ante etiam annos mille, nouis illis, & nouiter tum obortis hæresibus quibuscumque, & pace ac quiete veteris & constantis religionis, ecclesiæ ipsi cito post restituta, equidem hæreses illæ, continuò, cum ipso vestigio sublata interierunt, & ipsum esse ac viuere, ita amiserunt, vt eadem illæ millies extinctæ, si millies deinceps renascantur, millies semper nouæ esse necessariò dici atq. existimari debeant. Quid ita? primum quia antea extinctæ iam fuerunt. Sicut enim tumultus novos, & coniurationes nouas dicimus, iterum, post priores deletas coniurationes, ab iisdem etiam illis sicariis, & iisdem illis de rebus fortè excitatas, eò, quòd, quæ ante eas, aliæ eiusdemmodi fuerunt, eæ sopitæ iam ac oppressæ fuerunt; ita hæreses omnes, etiam ex aliqua specie antiquitatis, tanquam ab orco reuocatas, nouas ex eadem hac causa rectè atque legitimè appellamus. Quid porrò ex alia etiam causa? Ego verò etiam ex alia, dixerim; nec scio, an multo magis. Cùm enim collatio sit hæresum ad verbum ipsum & effatum Dei immortalis, quod quidem à primis temporum initiis exortum, manet in æternum, cogens ac moderans æquabiliter ecclesiam sanctam,

etiam, planè constat, hæreses omnes præ eo nouas videri oportere, cum & discedant quidem assidue à norma eius, & denique ita & mutantur ipsæ quotidie, & religionem vnà immutent, vt eandem esse non credas; vsque adeò sanè, vt vigentibus iis, gentes ipsæ profanæ ac barbaræ religionem christianam, in media christianitate vix reperiunt, & vix agnoscant. Igitur & hæretici ipsi planè noui sunt, & doctrinâ eorum perspicuè noua. Quid autem? num habent saltem communionem aut societatem vllam cum vna aliqua veteri christianorum ecclesia, ex omnibus ecclesiis, quas oriens, occidens, meridies, septentrio iamdudum est complexus? vt si ab hac discesserunt, ad aliam se saltem, quando in omnibus vno eodemque tempore lumen veritatis extinguere nulla ratione potuerit, contulisse videantur? Nihil profectò minus. Cum nulla enim planè ecclesia euangelium suum, (quod tamen non est euangelium; nisi quòd erant, qui eo orbem terrarum concussuri, & Christi euangelium conuulsuri erant) contulerunt, atque ita ne dexteram quidem societatis vllius ecclesiæ præhenderunt. Tentauisse quiddam eiusmodi videri possent, sub ipsa exorientis Luciperi, Luteri dicere volebam, initia; cum ille ad Leonem X. Romanæ ecclesiæ nostræ antistitem ita tum scripsisset. Viuifica, occide, voca, reuoca, approba, reproba, vt placuerit. Vocem tuam, vocem Christi in te præfidentis & loquentis agnoscam. Quæ enim vox conuenientior erumpere poterat homini antiquæ ecclesiæ communionem atque auctoritatem imploranti? Verum ex animo id eum non fecisse, euentus ostendit. Condemnatis enim à Pontifice suis, quos obtruserat, erroribus, non ille Christi in Pontifice loquentis sermoni obediuit; sed quæsitis toties diuerticulis, nunc ad scholas & gymnasia doctorum quasi prouocare, nunc concilium Oecumenicum per speciem respectare, nunc Regum, Imperatorum, principum, & omninò gladio accinctorum magistratum iudicio

dicio causam totam permittere; nunc denique eandem ad cerdones, coquos, lanios, nautas, caupones, stabularios, quoad liceret, transferre studuit. Miserum hominem, qui tam fluctuet, nec aut portum vnquam vllum teneat, aut vndis saltem ipsis, quo minus diu miser esse possit, obruatur. Nuperum esse oportet. Nam ni ita esset, equidem aut viuus, aut mortuus, fluctuare iamdudum desiisset. Sed ita est hæresis, quemadmodum de morosopho olim nescio quo, dici in fabulis puerilibus memini; qui cum suspendium commeritum deprecari vel non posset, vel etiam non auderet, arborem tantum infelicem illam, vt posset ad suspendiū arbitrato suo deligere, id orabat. Quo impetrato, cum ad sexcentas arbores suspendendus duceretur, omnes ad vnam recusabat, & tum hanc, tum illam, alia atque alia de causa excipiebat, & auersabatur; atque hoc astu, vitam à suspendio, quoad longissimè poterat, tuebatur. Nec aliter sanè noster ille, de quo loquimur. Cum enim ad extremum, ne in illa quidem cerdonum ac laniorum colluue, in qua vna, tanquam in inanissima quadam Aeoli aula, homo ventosissimus diutissimè se iactauit, despectus ab omnibus, & à seipso penè iam relictus ac desperatus, acquiesceret, verbo ad scripturam tandem ipsam appellare, reuera ad seipsum, & ad sua ipsius decreta, quibus & scripturam omnem, & omne mortalium genus voluit esse subiectum, repente ex monacho, monarcha orbis terrarū factus, causam ipsam aduocare non dubitauit. Nimirum enim cautè prouidit, tanto scilicet serius condemnatum se iri. Verum interea tamen, quid est, quæso, ab omnibus desciscere, si hoc non est? aut quid est ab omnibus deferi, si hoc non est? aut verò quid tandem turpe est, si hoc vtrumque turpe non est? Dices. Atqui hæreticis, vt desint accessiones ceteræ, ipsi quidem sibi, in illa ipsa gregis sui exiguitate, qua mirificè gloriatur, satis sufficiunt; qui nō numero sententiarum, sed pondere valere, & non multi-
tudine

tudine hominum, sed doctrinæ veritate, se suâque volunt
populo commendari. Audio, & quod das etiam accipio.
Verum dic illud mihi. Si sibi ipsi sufficiunt, & si sua ipso-
rum paucitate gloriantur, cur modò Pontificem Max. mo-
dò concilia, modò scholas, modò aulas, interdum autem
quoque modò non aulas, videntur respectare, vt dixi-
mus? Tum autem, si se suâq. quod tu ais, volunt populo
commendari, quomodo quæso, seipsis contenti videri po-
terunt? Miserum, mihi crede, miserum, & falsum prorsus
ac inane est, hoc eiusmodi consolationis genus, velle pau-
citate suffragatorum contentum videri. Visné autem o-
stendam tibi, tuos istos magnificentissimos, & tuo iudi-
cio, sua forte contentissimos homines, reuera sui ipsius
pœnitere, & sua ipsorum forte contentos non esse? Non
nimis, vt puto, diu est, cùm gens ista, postquàm se à Lati-
nis, vt dixi, ecclesiis exclusam esse cerneret, & tamen non
esse bonum hominem esse solum, intelligeret, fecit, siue
illius, vt dico, domesticæ solitudinis pertæsa, siue, quod
magis existimo, ipsa suorum facinorum victa conscientia,
vt Græcorum schismaticorum prouincias adeundas, & eo-
rum animos suppliciter sibi esse per litteras pertentandos
existimaret; vt si fortè, fortuna ipsa, ad eam, quam ambi-
ebant, affinitatem cum Græcis coniungendam, ipsis aspi-
rasset, cuestigiò ad eos commigrarent, & vna eademque
opera, id quod fuerunt, hæretici permanerent, & quod non
essent, assumerent, ac schismatici fierent; vel saltem vt hæ-
retici in schismaticorum sinu, nidum suum locarent. Reli-
gionis igitur suæ capita, scripto vtcumque compræhen-
dunt, scriptum id ad orientales illas ecclesias mittunt; si
annuant, paratos se esse ostendunt ad dexteras societatis cū
eis coniungendas. Ita illi, cùm latinas ipsas ecclesias, fun-
dum veluti quendam populum suum, spreuissentne ipsi, an
ab iis potius sprete essent, factum est, vt non iam Veios, nec
Babylonem, sed Byzantium se transferre, & Romam ve-

terem, totius religionis caput, noua Roma, quæ nunc est totius abominationis caput, permutare voluerint. Verum ne hic quidem apud Græcos istos, magnopere quicquam miseri homines profecerunt, nisi quod suo se ipsi indicio, ut forices, prodiderunt. Est enim in manibus, luculentum Græcorum illorum Byzantinorum scriptum, scripto istorum oppositum; in quo sic tractantur isti, sic notis verè Threyciis, ad perpetuas quodammodo æternitates compunguntur, ut dum scripti istius nota vlla in dei ecclesia extiterit, extabit autem, ut arbitror, quamdiutissimè, cum sit etiam de sua lingua in alienam pereleganter translatum, tamdiu dedecus istorum sempiternum aboleri non possit. Quid verbis opus est? Genus planè hominum nullum est, cui hæc sua male feriata dogmata non obtruserint, & quasi vietam quandam ac malè conciliatam, diis deniq. iratis natam filiam non passim prostituerint. Ecce autem, ubi nullum se omninò generum vspiam acquirere potuisse intelligunt, faciendum necessariò esse animaduertunt sibi, ut eam tandem domi ipsi suæ retineant, quam ament, quam somnient, qua se oblectent, quam postremò animum suum esse ducant. Nempe cum spiritus immundus exierit de homine, loca ipsa arida obambulat, studio requietis. Qua frustratus, inquit, Reuertar domum meam vnde exiui, fixisq. ibi sedibus, reddit omnia posteriora multò prioribus deteriora. Sic isti, cum omnia circumquaq. lustrassent, nec satis ubi consisterent inuenirent, in sua tecta reuersi, ibi se necessariò, sprete ac contempti continuerunt: illud interea vetus, ignauissimorum hominū, taciti vsurpantes.

Populus me sibilat: at mihi plando

Ipsæ domi.

Domus, domus, inquam, in crassissimis suis tenebris latere, miseri isti homines necesse habuerunt, lucem ipsam hominum ferrè amplius nequaquam potuerunt. Eam igitur
ego spon-

ego sponfam vestram appetam, aut etiam vltro oblatam accipiam? quæ quoniam nemini obtrudi potuerit, itur ad me? Non ego certè quidem, sed nec quisquam alius, me auctore. Si enim in illa summa orbis totius impietate, & legis christianæ etiamtum ignoratione, magna se niti ratione existimabant Iudæi illi, ad ipsius Pauli Apostoli doctrinam christianam infamandam, quòd illi sectæ, vt ipsum appellabant, christianæ, ab omnibus vbique contradiceretur; profectò multò nos verius æquius, in hac tanta euangelii luce, & hoc sæculo christiano tam erudito, idem obiicere possumus hæreticis nostris, illudque summa cum confidentia dicere, non solum fidem, sed ne manum quidem vertendam nobis esse, eius ipsius sectæ causa, quæ passim ab omnibus orientis ac occidentis ecclesiis christianis, tanto studio & consensione, non tantum respueretur, verum etiam oppugnaretur. Apparet igitur, doctrinam hanc eorum, quam, si vera esse debuisset, aut vniuersalem omninò, aut alicui saltem ecclesiæ veteri addictam esse oportuit, vniuersalem quidem fortassis ex eo videri posse, quòd locus ferè sit nullus, vbi obtrusa non fuerit; cum autem nusquam accepta sit, constat profectò, non priuatam solum atq. ab omnibus ecclesiis seiunctam ac separatam, sed etiam impiam prorsus atque nefariam, omninò autem erraticam, ne dicam hæreticam, esse oportere. Quod cum ita sit, meritò iam quidem non solum paulò antè Byzantini illi, quos modò diximus, ab hoc hominum genere studiosè se refugere, scripto publico edito ostenderunt, sed etiam maiores olim nostri, homines prudentissimi, legibus huius regni nostri communibus, & fœdere, ac sanctione publica, eiusdem doctrinæ homines, (atque adeò tantò tolerabiliiores, quanto Hussitarum & Calixtinorum doctrina, quæ tunc in vicinia maiorum nostrorum viguit, nostri istius temporis hæreticis, Anabaptistis & Trideistis, tolerabilior videbatur) abigendos ex hoc regno & exterminan-

minandos, ac in vltimas terras deportandos, putauerunt. Quid ago? Moscus, Moscus nuper ipse mediusfidius, princeps à religione nostra catholica, propter schisma suum, alienus, à Latino etiam & Romano nostro nomine, propter morum suorum barbariem, quammaximè abhorrēs, tamen cū nonnullos eiusmodi homines, de ciuilibus alioqui iniuriis ad se publico nomine allegatos, satis pro sua feritate comiter ab initio excepisset, vbi tādē de dogmate illorum insolenti, & suis quoque ecclesiis schismaticis inaudito, factus fuisset certior, non potuit dogma illud non penitus auersari, & styli quoq. sui acumine, non perfringere. De alienis loquor. Ego verò ipsos illos inter se ita separatos & ita exosos esse dico, vt alteri alteros, quod iam diximus, extra synagogas suas eiiciant, diris deuouent, ignibus denique suffocandos & exurendos tradant. Sed de nouitate & discessione hæreticorum ab ecclesia, hætenus sufficiat. Vtrumque sanè eorum diuinitus mihi videtur Ioannes ipse apostolus in sua canonica epistola expressisse, cū ita scribit de hæreticis. EX NOBIS, inquit, EXIVERUNT. Defectionem notat exeuntium hæreticorum, ex ecclesia. SED NON ERANT EX NOBIS, inquit. Notat eorum nouitatem, qui nescio vnde orti, patrem quidem inter orthodoxos ciere non possunt. Pergit Ioannes. NAM SI FUISSENT EX NOBIS, NOBISCVM VTIQVE PERMANSISSENT. Quasi si diceret. Si noui non fuissent, antiquum quidem planè obtinerent. Vt ita ex iis verbis apostoli abundē intelligi possit, sicut ipsum, permanere cum orthodoxis, catholicorum est, ita contrā, non esse ex orthodoxis, & tamen exire ex orthodoxis, proprium esse omnium hæreticorum, quorum alterum, vt dixi, arguit nouitatem eorum, alterum autem inconstantiam, & mobilitatem summam. Meritò igitur idem apostolus, tempus ipsum hæreticorum, cuiusquam iam tum horam ibidem appellauit, vt sicut extremo ipso tempore nihil esse potest

potest recentius, ita omnibus hæresibus nihil esse queat nouius. Vt igitur concedamus, hæreticos, ipsis iam tum Apostolorum temporibus extitisse, sicut ipsius quoque Ioannis Apostoli temporibus, ipso teste, extiterunt hæreticorum patriarchæ, Nicolaus, Ebion, & Cherintus, tamen ex eo nullam eis prorsus nec antiquitatem concedemus, nec ciuitatem. Neutrum enim obtinent, nec, esse ex nobis, vt ciues; nec, nobiscum permanere, vt antiqui inde dici possint; sed vt olim, cùm initio ex nobis exiissent, id autem est, cùm primùm orthodoxos reliquissent, non ciues catholici, sed factiosi hæretici fuerunt, ita nunc nostris quoque temporibus, quum à nobis exeunt, non aliud quàm factiosi, & à catholicorum ciuitate seclusi homines debent appellari; quando vetus illud, nobiscum permanere, amiserunt. Vt igitur ea, quæ fufius aliquanto diximus, ad vnam summam contrahamus; quam, quæso, eorum ecclesiam esse putabimus, qui & nuper adeò nati, ab ecclesia vera descuerunt, & ad nullam aliam in orbe terrarum ecclesiam, temporibus suis antiquiorem, sese contulerunt? Sed cùm ex nobis exissent, altare contra altare excitarunt, & se, pro nouæ synagogæ auctoribus, audacissimè venditarunt; sic quidem, vt non minus à schismaticis, quàm à catholicis ipsis, nec magis à catholicis, quàm à seipsis reiiicerentur; homines, quibus

neque apud Danaos vsquam locus, insuper ipsi Dardanidæ infensi, pœnas cum sanguine poscunt.

Si veram igitur religionem quærimus, à noua quidem & singulari, quantum possumus, declinemus; quæramus autem, nec recens natam, nec à communione orbis ipsius Christiani separatam.

CAP. VII.

Ecclesiæ catholicæ consideratio.

L

Ecclesia

Ecclesia catholica est, quæ omnes vniuersitates complectitur. Rerum, Locorum, Temporum, Personarum, Rationum.

Singula horum explicantur.

Adaptantur omnia ad ecclesiam nostram.

In qua & rerum vniuersitas esse ostenditur. Vbi de communione alterius speciei, in eucharistiæ sacramento agitur.

& locorum, & temporum, & rationum,

& personarum. Vbi de Papistarum appellatione.

Ipsi hæretici nostram ecclesiam, catholicam esse profitentur.



Tenim ecclesia, quæ vera est, quæque hoc nomine verè appellari debet, ea non minus CATHOLICA, quàm vna & sancta esse debet. Quid est, catholica? non priuata, nō quotidie noua, non obscura; sed clara, prisca, perpetua, publica; breuiter, vniuersitatē quandam rerum, locorum, temporum, personarum, rationum etiam, & omninò generalem omnium, vt sic dicam, generalitatem compræhendens. Rerum; quæ videlicet, non vnum aliquid singulare ex doctrina sancta excerpit, vnumq. illud vrgeat; sed quæ omnia seruare doceat, quæcumque diuinitus, tam scripto, quàm voce viua, imperata, tradita, laudata etiam ac commendata sunt nobis. Locorum, quæ non hîc modò, aut illic, nec, aut in deserto modò & inculto, ac ignobili aliquo vico, aut in ædium tantum priuatarum penetralibus, Christum concludat, sed quæ vltimis ipsis terræ finibus imperium eius describat, atque definiat. Temporum; quæ non id, nunc demū disputandi atque in vulgum spargēdi causa arripiat, quod aut olim condemnatum est, aut modò natum, simul vt exortum est, paulò pòst humore destitutum exaruit; sed quæ, quod fuit iam inde ab initio, & quod etiamnum permanet, & ad extremum vsque extremi illius vniuersalis iudicii diem permanebit, id ipsa quoque, iam inde ab initio acceptum,

acceptum, ad extremum vsque retineat, & constanter profiteatur. Personarum; quæ videlicet neque Pauli se esse dicat, neque Apollo, neque Cephæ, neque multò his inferiorum, Luteri, Caluini, Bezæ; sed quæ se esse profiteatur corpus vnius & indiuisi Christi: ex quo tota ipsa compacta, & connexa, augmentum facit in sui ædificationem, hoc autem est, in constitutionē ouilis illius vniuersi, quod Christus vnicum se esse in terris omnibus prædixit habiturum; &, quo se vno vniuersa ipsa ecclesia catholica concludit. Rationum denique; quæ nihil omninò priuatæ rationis priuatim sibi seligat, (ex hac enim eiusmodi priuatarum rationum priuata selectione, hæreses ipsas, & ortum pariter, & appellationem suam accepisse constat) sed quæ, cum commune naturæ, &, quæ secunda quasi natura est, scripturæ, iudicium sequatur, tum verò in ipsa scriptura pertractanda, hos sibi veluti cancellos quosdam communes, & in omni professionis genere pernecessarios, circumscribat. Vnum, ne scripta in speciem contraria, verbis potius inter se committat, quàm sententia conciliet. Alterū, ne sententiam vnius, duorumūc, aut communi omnium sententiæ, aut verò perspicuo ipsi scripto anteponat. Tertium, ne quod omninò, quantumuis in speciem perspicuum, tanto autem magis, ne quod apertè ambiguum legis mutæ scriptum, aut suo, paucorumūc hominum sensu definiat, aut sententiæ omnium communi, id autem est, viuæ voci consuetudinis & auctoritatis receptæ, quasi ex aduerso obiiciat. Postremum, vt priuatam quamlibet ratiocinationem, communi vel omnium, vel plurium hominum, vel certè consuetudinis, &, quod omnium tutissimum est, auctoritatis ipsius receptæ ratiocinatione temperet. Omninò autem, ne aut secreta modò quædam veluti Stoicorum paradoxa, secretis, ac separatis à communi vniuersorum sententia rationibus defendat, cætera aspersionetur; aut rursus solas vulgatas, & quæ secundo populo de-

pulo defendi possunt, sententias, protrita ipsa ac peruulgata ratione confectetur, prudentum decreta negligat; sed medium teneat, & in modum apis circumuolitans, vndiq. ita delibet ac decerpat, vt vulgaria sanioribus condat, humana autem diuinis regat atque moderetur. O speciem, Christiani, ecclesiæ excellentem. Concupiscit & deficit animus meus in atria eiusmodi domus domini. Quibus sanè omnibus ritè examinatis & perpensis rebus, facile omninò constare potest, cùm hæreticorum synagogæ, ad hanc eiusmodi catholicismi descriptionē ne aspirare quidem posse videantur, (si enim ea quæ diximus, communia cum catholicorum sententiis haberent, hæreses vtique non essent) solam ecclesiam nostram esse, quæ eam descriptionem planè exprimat atque repræsentet. Etenim principio quidem si rerum vniuersitatem ipsam respicias, nihil planè ab ecclesia nostra reiici depræhendes, eorum, quæ per diuinos aliquando homines, tam scripto, quàm voce viua tradita, quæque etiam siue præcepto atque iussu eorum imperata, siue adeò consilio, orbi terrarum ad perpetuitatem sunt commendata. Neque enim ecclesia catholica illud inculcat vnum. Fidem iustificare; quod vno aliquo in scripturæ loco fortè fortuna repertum, solum hæretici nostri percrepare, solum tonare, & solo eo orbem terrarum permiscere videntur; sed addit quoque, quod in aliis eiusdem scripturæ locis non minus scriptum reperit, fidem in Christo, eam demum valere, quæ per charitatem operetur. Alioqui si adsit omnis fides, omnis, inquam, fides si adsit, absit autem charitas, nihil perfectum videri posse. Fidem enim, quæ factis cassa atque inanis sit, ociosam & mortuam planè esse. Neq. adeò solum illud usurpat, nihil damnationis esse, iis qui sunt in Christo Iesu; sed etiam adiungit, quod ibidem statim sequitur. his, inquam, nihil damnationis esse, qui secundum carnem ambulant. Quid aliud facit ecclesia? Ea verò non solum illud obtrudit,

obtrudit, Crescite & multiplicamini, & replete terram, „
quod vnum amici isti nostri, cum plausu, & quodam quasi
hinnitu plus satis ingeminant; sed alterius quoque admo-
net, quo repleri posse cœlum iudicat. De virginibus, in- „
quit ipsa cum Paulo apostolo, præceptum non habeo, „
consilium autem do, tanquam misericordiam consecuta, „
vt sim fidelis. Non solum ingerit, Scrutamini scripturas, „
quo ipso hæretici aures nostras plus satis obtuderunt; sed
vnâ cum eo, illud quoque non dissimulat. State & tenete „
traditiones, quas didicistis siue per sermonem, siue per e- „
pistolam nostram. De quo ipso paulò post copiosius age- „
mus. Non solum denique dicit illud. Accipite hunc panẽ „
& comedite. &, Bibite ex hoc calice omnes; cuius vnus „
rei causa nouatores isti orbem ipsum terrarum hætenus
perturbarunt; sed etiam & dicit, & credit illud, quod ibi-
dem continuò sequitur, quodque adeò non omnis credit
synagoga. Hoc est corpus meum. Hic est sanguis meus. „
Præuaricari nos dicent, cùm hæc scribimus, quæ de calice
domini scribimus. Quotus enim quisque, inquit, in ec-
clesia vestra, bibit ex calice domini, ad quem tamen à scri-
ptura omnes sine discrimine palàm inuitantur verbis illis.
Bibite ex hoc omnes, bibite ex hoc omnes? Cùm igitur „
vos quidem, inquit, non omnes homines ad bibendum
admittatis, ecquònam modo in hoc genere vniuersitatem
illam rerum atque dogmatum sanctorum, quam catholi-
cismi nomine vsurpando, vobis proteruè arrogatis, com-
plexu vestræ ecclesiæ contineri arbitrabimini? aut verò,
quomodo ecclesiam ipsam vestram, catholicam, hoc au-
tem est, vniuersalem esse defendetis, in qua & symbolum
sanè alterum, sacramenti vel maxime præcipui, est accisum,
& ex eadem illa parte, verba testamenti ipsius dominici
clarissima, nullum neque honorem, neque vsum habere
videantur. Nam de symbolo quidem sacramenti, inquit,
ent, certum est, dominum Iesum, ea ipsa nocte, qua in
L iij mortem,

mortem, pro vita & salute nostra, vita ipsa salusque nostra tradebatur, non magis panem quam poculum cum vino in manus suas præhendisse, vtrique æquè benedixisse, vtrumq. etiam æquè suis omnibus ad participandum præbuisse; in iis autem ipsis præterea rebus, ad omnem temporum perpetuitatem in sua ecclesia stabiliendis, & quasi testamenti ipsius nuncupatione solenniter sancientis, eo verborum genere vsum esse constat, quod non minus differtè ad vinum & calicem, quam ad panem ipsum, ad duo scilicet, non ad vnum, pertinere videretur. Neq. enim modò dixit, Comedite, quod pani congruit; sed etiam dicit, Bibite, quod vino conuenit. Tum autem, illud denique luce meridiana clarius est, à vobis, qui catholici videri vultis, panem solum in ecclesiis vestris retineri, panem tantummodo asseruari, vinum & calicem posthaberi, nec ad vllum omninò ecclesiæ vsum adduci. Audio fratres mei, audio; &, vt puto, etiam quid velitis intelligo. Speciem nimirum eius sacramenti alteram, præcisam in ecclesia nostra, & diminutam esse dicitis: vsum autem & honorem eorum verborum, quæ eodem pertinebant, quæque nos, dicis tantum causa retinuisse videmur, vel sublatum apud nos esse, vel interuersum. Nos verò, ô amici, neque accisum quicquam horum aut diminutum, neq. adeò deprauatum aut deformatum in ecclesia nostra esse asserimus. Etenim speciei quidem vtriusq. præsentiam in hoc sacramento, quam vos in ecclesia nostra cernere, aut omninò negatis, aut saltem dissimulatis, non obscure sanè ferimus; cum in iugi illo, & non, vt apud vos ferè, menstruo, sed, vt apud nos, planè quotidiano, sacrosanctæ missæ sacrificio, vtramque seorsum, in ecclesia nostra, sacramenti speciem consecramus, vtramque etiam per manus hominis sacerdotis, in altum attollimus, & singulas earum palàm in ipso conspectu omnium defigimus, ac oculis omnium repræsentamus: idque adeò facimus, ne quid eorum hæretici, gens im-

gens impudens & inimica, negare posse videantur, quæ nos tam clavis & apertis indicibus, apud orbem ipsum terrarum, quotidie, ad omnia propemodum templorum altaria, etiam atque etiam contestamur. Nullam igitur planè earum specierum partem abesse ab ecclesia nostra existimamus; non, ne latere quidem. Non abesse, quia consecrantur; non latere, quia attolluntur, & passim omnibus in conspectum dantur. Nisi vos fortè, sicuti aliàs corpus ipsum Christi in eucharistia, non verborum mysticorum vi consecrari, sed oris ipsius vestri & palati dignitate atq. præstantia perfici, hoc autem est, non tunc cum consecratur fieri, sed tunc demum cum à vobis manditur, confici & compleri asseritis, ita species quoque ipsas eius corporis, quia absint ab ore vestro, iccirco eas ab ecclesia planè abesse affirmatis. Quod si facitis, tunc vos quidem, dum palato tantum vestro, quid adsit, aut absit, iudicatis, diuinum illum ecclesiæ palatum profectò non perspicitis, quod ferè de Epicuro vestro pronunciauit olim Ennius non nos. Atque hæc quidem de specie vtraque eius sacramenti. Iam uerò quod ad verborum rationem attinet, illorum præcipuè, quæ in ipsa testamenti dominici nuncupatione, ad vini speciem referuntur, BIBITE EX HOC OMNES, magna sanè iam ex parte illud constat, nec honorem, nec usum verborum eorum legitimum, deesse in ecclesia nostra. Quid enim? Equidem honos mihi verbis detrahi tunc videtur, cum fides illis non habetur; usus, cum illis non obtemperatur. Quem vos igitur alium verborum istorum, BIBITE EX HOC OMNES, honorem apud nos requiritis, quando nos verba illa, uti ad Apostolos esse dicta, ex euangelio nouimus, ita ad eosdem illos, & quidem ad omnes, dicta esse, constantissimè credimus & confitemur? hoc etiam amplius, quod illis ipsis verbis domini, euestigiò Apostolos obtemperauisse, bibisse ex eo omnes, credimus planè & confitemur? Illud quæ adeò ipsum iccirco statim

statim ibidem ab Euangelista Marco, Petri, aduersarii vestri summi, discipulo, quasi de industria ad reliquam historiam additum esse dicimus, ut vobis, qui vestro isto calice, opportunè importunè ingerendo, frustra ecclesiam conturbatis, crucem vnà cum calice, eo loco Euangelista ille figeret, vosque penitus hoc ipso, quasi quodam stimulo pungeret ac fodicaret. Bibite ex hoc omnes; & biberunt ex illo omnes. Bibite ex hoc omnes; & biberunt ex illo omnes. Honorem igitur & dignitatem verborum illorum. Bibite ex hoc omnes, integram manere in ecclesia nostra, constat. Quid vsum? Non minus & vsum quoque. Quomodo? Quia nos quidem verborum illorum vim, quæ Apostolis ipsis in cœna illa accumbentibus dicta sunt semel à domino, omnes ut biberent, quibusque etiam tunc illi verbis impigrè obtemperarunt, biberunt enim sanè omnes, eam vim extinctam statim cum verbis ipsis, & è medio sublatam non dicimus; sed uti tum erat, ita ad eorum posteros & successores sacerdotes propagatam, omni studio in ecclesia nostra retinemus; sic, ut quoties modò sacerdotes nostri pro populo faciant, toties eorum verborum vsum in ecclesia dei abunde, atque etiam multò quàm apud vos ipsos illustrius, renouari videamus. Quem tu igitur vsum alium requiris, cum is quem ostendimus, & legitimus sit, & factus apud nos ac tectus conseruetur? Dices. Atqui non sacerdotum tantum causa dictum est, Accipite & comedite; ergo ne illud quidem alterum, bibite ex hoc omnes, sacerdotum tantum causa dictum esse existimandum est. Agè. Quorum igitur tu causa dictum esse censeres? Omnium, inquires. Atqui omnes iam biberunt. Recita Marci Euangelistæ testimoniū. Et BIBERVNT, inquit, EX EO OMNES. Dices. Atqui ad eosdē ipsos dictū est, bibite, ad quos dictum est, comedite. Cum igitur vos ipsi, inquis, illud, comedite, transferatis ad plebem ipsam quoque, quid est, quòd hoc, bibite, ad plebem eandem transferri re-

ferri recusatis? Respondeo. Iam hæc quidem vestra hæreticorum culpa est. Ab initio enim sic non fuit; cum pia & benigna mater nostra ecclesia sancta, quod acceperat à domino, id ipsum tradebat quoque promiscuè omnibus ferè nobis, iisque ipsis, uti panis, ita calicis quoque usum liberum patere planè volebat; non quasi id omninò ad salutem necessarium esset, cum in quibusdam catholicorum ecclesiis, iam tum etiam temporibus Apostolorum, ab hoc ipso calice, sine detrimento, atque adeò sine reprehensione vlla, publicè abstineretur; atque haud scio, an eadem illa ex causa, ex qua etiam à sanguine & à suffocato abstinebatur, à recentibus illis christianis. Cum enim viderent boni illi viri, & ad vnam inter mortales exercendam charitatem facti, plerosque Iudæorum, abhorrentes ab esu sanguinis, propter dominicam in lege sanctionem, offendi cerimonia illa sacramenti nostri, in qua sanguinè ipsum domini sub vini specie fidelibus propinari audiebant, dederunt hoc nō grauatè mutuae ipsi charitati, ut ipsi quoque, illorum causa, sicut à suffocato & idolotheo, ita & à sanguine, in ipsa etiam cœna dominica abstinerent. Atque ita sensim quasi, posteritati ipsi modum præscriberent, ex quo posteritas ipsa intelligeret, in alterius istius sacramenti specie usurpanda, charitati potius Christianæ inseruiendum, quàm summis verborum Christi apicibus inhærendum esse. Ergo, quod dicere cœperam, si ab ipso ortus sui initio, dabat ferè ecclesia catholica populo calicem hunc domini, palàm profectò ostendebat, ipso etiam calice passim usurpando, offendi, aut peccari nihil. Sin à calice abstinebat, certè usum illius non esse tantopere vulgò necessarium, quàm nunc à vobis exigitur, iam tum reipsa demonstrabat. Cæterum postquàm & olim quidem exortum esset odiosum quoddam & crudele nimis hæreticorū genus, qui absurdissimis de Christi domini corpore, spargendis in vulgus opinionibus, usum temporibus illis libe-

M

rum ac

rum ac penè promiscuum calicis domini in ecclesia morati essent; & hoc etiam tempore, vos ipsi successissetis item, qui de verbis illis, Hoc est corpus meum, &, Hic est sanguis meus, lites ex litibus sereretur, & omnia in summam dubitationem, ac perturbationem adduceretur, factum est, vestra quidem & vestrorum, ut dico, culpa maxima, ut & tunc quidem usus hic ipse calicis, decreto concilii Ephesini suspectus quodammodo redderetur plebi christianæ, & idem in proximo hoc Tridentino concilio, in locum pristinum non restitueretur. Dices, nec suspectum reddi debuisse, nec restitui non oportuisse, Christo quidem domino iubente. Bibite ex hoc omnes. Audi nunc iam, ô bone. & audite, audite, quotquot estis ministri, non magis verbi diuini adulterati, quàm nequitiae istius & licentiae cuiusdam inauditæ temporum istorum, præ qua orbis iam vniuersus ingemiscit; atq. haud scio an vos etiam ipsi cum orbe vniuerso. Ferretisne vos, si quis sit, qui vos, cum vestra ista verbi istius vestri prædicatione, ab hominibus ad canes, ab aulis ad caulas, adigere conetur? vosque adeò tergiuersantes & omninò restitantes, illa denique diuina sententia grauiissima percellat? Ite prædicate euangelium omni creaturæ. Omni creaturæ? Abnuere vos video. Atqui scriptum est, inquam. Prædicate omni creaturæ; prædicate omni creaturæ. Atqui vos excipitis, non licere, ex ipsius etiam domini sententia, sanctum dare canibus, neque margaritas ante porcos proici oportere. Audio, audio; idem ego tamen, euangelium nihilominus prædicandum esse omni creaturæ, ex ipsius verbis euangelii censeo. Non me fertis. Ne ego vos quidem. Dicitis enim, Bibendum esse omnibus de calice domini. Et in eo nimium sanè proteruè vrgetis illud ex euangelio. Bibite ex hoc omnes, Bibite ex hoc omnes. Ego contrà excipio ex eodem illo euangelio. Bibisse ex eo omnes, bibisse ex eo omnes; & si quid, communicauisse certè veteres illos christianos homines, in fractione pa-

etione panis, nulla calicis facta mentione. Quid vos ad hæc? Vos verò permolestè iteratis tamen, Bibendum esse omnibus. Bibendum esse omnibus. Quis vos ferat? Sed agam etiam vobiscum lenius. Ferretisne vos, si quis iam vos, de iis, quæ ad communionem vtriusque sacramentalis speciei pertineant, differentes audiat; & cùm ex vobis plus satis audierit, in participatione huius sacramenti, & bibendum omnibus, & omnibus manducandum esse, continuò inferat, ne infantes iam quidem arcendos esse, ne nauseabundos quidem, ne saturos quidem, ne publicis quidem flagitiis coopertos? Quid faceretis? Non ferremus, inquires, hominem ineptum & importunum. Dicite igitur mihi. Si omnibus promiscuè ac communiter & bibendum esse, & manducandum censetis, quid est, quòd vos ipsi, non omnes promiscuè ad vtraq. admittitis; sed certa quædam hominum genera ab utroque arcere audetis? et tamen vos legitimum sacramenti huius vsum in synagogis vestris retinere iactatis: cùm verbū, OMNES, non in omnibus planè retineatis etiam ipsi? Et bene vos quidem in eo facitis, quòd non quoslibet promiscuè ad vestras illas vestrorum mysteriorū vmbrae temerè admittendos esse existimatis. Sed in illo tamen ferendi non estis, quòd quæ vobis licere vultis, ea ne ipsi quidem ecclesiæ sanctæ licere existimatis; ac neque illud vlla ex parte reformidatis, quod fortè aliquis per iocum in vos iacere posse videatur.

Quid domini faciant, audent cùm talia serui?

Deinde in illo, immanium etiam mihi tyrannorum mores imitari videmini, quòd, cùm vos ipsi vestra malitia, ipsis, dico, vestris maiorumque vestrorum hæreticorum factis fœdis, hanc eiusmodi calicis quandam quasi orbitatem, in ecclesiam ipsam induxissetis, parum habetis induxisse, nisi nobis id ipsum, quasi non à vobis profectum, assiduè vltro exprobretis, & tantum non lugere etiam, in ipsa plaga, crudelissimè nobis per vos ipsos imposita, superbissimè

prohibeatis. Nos verò, cùm fatis ob eam rem indoluimus, scelusque adeò vestrum, pro pietate nostra christiana, fatis deplorauius, etiam deo singulares gratias agere non prætermittimus, quòd in tanta, & tam rabiosa vestra maiorumque vestrorum aduersus ecclesiam conspiratione, etsi fieri sanè non potuit, quin magnis ecclesia incommo- dis afficeretur, eò tamen perueniri potuisse nunquam per- miserit, vt, quod vos inprimis agere ac cupere videbami- ni, ratio ipsa ac series vniuersa dominici testamenti, in v- niuersum, cum pane & calice simul, ecclesiæ ipsi eripere- tur. Nunc autem, quod vobis oculi doleant, manet pro- fectò ecclesiæ nostræ in perpetuum hæreditas plena, cor- poris & sanguinis domini, sub panis & vini elementis ipsis, &, vt ad ea, vnde proximè digressi sumus, aliquando re- uertamur, manent etiam eidem veræ Christi sponsæ, do- nationes omnes, semel à sponso suo Iesu Christo factæ, & ad omnem perpetuitatem consignatæ. Manent non modò, quas diximus, scripturæ bibliorum integræ, sed etiam præ- terea & scripturæ patrum, & leges ac instituta conciliorū, & traditiones maiorū, quas vos ne accipitis ferè quidem. Manent hodieque in nobis, scribit quidam non nimis ve- tus auctor, (ne dicas doctrinam aliquando fuisse interr- ptam) Manent, inquit, manent Apostolorum vestigia & eorum religio, quia ex deo est, nō potest dissolui. Vestes, inquit ille, Israelitici populi per annos xxxx. integræ in de- fertis permanserunt; atqui multò magis Apostolorum ve- stes, super iumentum impositæ saluatoris. Hic est autem quoque idem huius sponsæ vestitus ille aureus, peculiaris ipsi & proprius, quo sese à dextris sponsi sui maximè reddit conspicuam & insignem. Præter quem etiam ipsum, vndi- que illi suppeditant varia aliorum quoq. genera vestimen- torum variorum, quibus ita circumamicta est, vt non iam solum diuina possideat, sed vt etiam humana omnia meri- tò sibi vendicet; vsque adeò quidem, vt quicquid omni- nò vspi-

nò vspiam, in ipsa etiam ethnicorum philosophia, aut solidi est, aut synceri, aut veri, aut honesti, id omne iure optimo æquè suum esse ducere & possit, & debeat; vti abunde docuit D. Augustinus. Neque id verbis solum, in illis suis de doctrina christiana libris, sed etiam rebus ipsis, in omni genere librorum & scriptorum suorum; quibus copiosè admodum ostendit, depromptis tot & tantis ex media philosophia rationibus, ad catholicæ religionis defensionem. Quid ostendit? ostendit ecclesiam nostrā catholicam, dominā esse totius profanæ philosophiæ. Quod ipsum cæteri quoque omnes eiusdem nostræ ecclesiæ doctores & magistri, scriptis suis omnibus, philosophorum decretis refertissimis, affatim demonstrarunt. Atque hæc est sanè regia illa gaza, reginæ huius ecclesiæ nostræ, cum nullis quidem pellicum donariis aut monilibus comparanda. Cæteris enim singulis aliquid fortassis pro earum modulo datum est, in hanc vnam affatim omnia sunt cōgesta, quæ rerum omnium quasi quandam vniuersitatem, de qua primo loco dicere institueramus, repræsentare videantur. O speciem Christiani ecclesiæ nostræ excellentē. Concupiscit & deficit animus meus in atria eiusmodi domus domini. Atque hæc quidem de vniuersitate rerum. Iamuerò in ipsa etiam locorum vniuersitate, quod erat in distributione nostra alterum, non minus profectò ecclesiam hanc nostram insignem dabo. Neque enim ea vno se aliquo mundi angulo circumscribit, vt sunt fundi hæreticarum synagogarum, tam angusti illi quidem, vt fundamitti posse videantur; sed ecclesiæ nostræ vera sunt latifundia, toto ipso terrarum orbe longè lateque expansa, non solum in Vitebergensium aut Geneuensium agro atque ditione, sed planè quā patet hæreditas ipsa & possessio Christi domini, à mari videlicet vsque ad mare, & à flumine vsq. ad terminos orbis terrarum. Gratias Deo agit Paulus Apostolus per Christum Iesum, primis etiam illis Euāgelii tem-

angelii temporibus, ad Romanos scribens, quòd fides eorum
annunciaretur iam tum in vniuerso orbe. Quantò magis
nos hoc quidem tempore & agere debemus, & habere
gratias summo Deo, cum videamus eadem illam fidei Ro-
manæ professionem non solum in Sarmatiam nostram
penetrasse, non solum Europam, Asiam, & Africam pera-
grasse vniuersam, sed etiam in ipsum iam nouum, & hac-
tenus omnibus mortalibus planè orbem incognitum cõ-
migrasse; sic quidem, vt prius ferè ad novos illos & toto
diuisos orbe Indos, euangelium catholicæ ecclesiæ nostræ,
& iterum dico, nostræ, & iterum atque iterum dico, Ro-
manæ, peruenerit, quàm de ipsis ad cæteras orbis terrarū
nationes fama aliqua certior peruenisset. O speciem, Chri-
stiani, ecclesiæ nostræ excellentem. Concupiscit & deficit
animus meus in atria eiusmodi domus domini. Et rerum
igitur vniuersitatem complectitur & locorum. Quid tem-
porum? Etiam temporum quoque. Cum enim cæteras se-
ctas omnes heri & nudiustertius nasci, imò indices etiam
& oriri videmus & occidere, tum ecclesia quidem catho-
lica, nostra hæc, inquam, qua libenter continemur, eccle-
sia Romana, origines suas, iam inde ab Apostolorum, atq.
adeò ab veterum illorum patriarcharum temporibus re-
petit, eundem etiam illum vetustissimæ religionis ac do-
ctrinæ succum & fidelissimè retinet, & per omnes tempo-
rum vicissitudines constantissimè conseruat, sic, vt vel ex
ipsa quoque temporum ratione, iure optimo catholicæ
ecclesiæ vim atque appellationem debeat obtinere. Neq.
enim nos quidem, qui illis ecclesiæ catholicæ finibus pro-
pemodum infinitis continemur, nouam vllam, & recens
aut natam, aut partam religionem colimus, non etiam vl-
lam aut parimus ipsi, aut ex aliis concinnamus, quod hæ-
reticorum est; qui nostris his temporibus, in nostra ferè
ecclesia catholica, ex catholicis nati parentibus, cum in
alia baptizati, in alia educati sint, in alia deinde viuunt, &
in alia

in alia denique moriuntur. Ita est fluxa & caduca omnis hæreticarum siue religionum, siue ecclesiarum ratio. Nos autem. Cum dico, nos, primum nosipsos qui viuimus, intelligo, deinde verò & patres, & auos, & proauos, & abauos, & atauos, & maiores etiam nostros omnes, quorum fatu, siue mundo huic, siue deo mundi auctori, generati sumus. Nos igitur, inquam, iam inde à temporibus, vt dixi, Apostolorum, eiusdem religionis catholicæ temporibus, in eadem ecclesia catholica nascimur; nos cum maioribus omnibus nostris christianis, in hac ipsa ecclesia semel nati, nos in eadem illa Christo domino per baptismū initiati, hætenus in eadem viuimus; nos denique omnes, omnes, inquam, non magis adeò cum maioribus, quàm cum posteris etiam ipsis nostris, perfuncti huius vitæ statione ac munere, in eadem morimur, nulla apud nos non modò doctrinæ veteris cerimoniarumque Apostolicarum mutatione subsecuta, sed eadem planè illa veteri, & hætenus salua, & perpetuò vigente religione. Quod enim pro Petro, Romanæ sedis præside futuro, rogauit Christus dominus, vt ne deficeret fides eius, in eo profectò ita est pro sua dignitate exauditus, vt non modò dum viueret, sed vt etiam multò magis se vita functo, fides tamen eius viuere ac vigere videretur. O speciem Christiani ecclesiæ nostræ excellentem. Ac tantam quidem esse & doctrinæ & ecclesiæ catholicæ antiquitatem, diuturnitatem, constantiam, mirum videri non debet, cum ea, præter illa, quæ hætenus dicta sunt, de rerum & locorum, & temporum vniuersalitate, etiam rationum eiusmodi vniuersalitatem adhibeat, in tradenda & propaganda doctrina sua salutari; quas rationes omnium communissimas, vt diximus, & in omni professionis genere maximè vsurpatas, atque ideò etiam perpetuas esse, nemo est quin agnoscat. Ita enim scriptū ipsum sequitur, vt duobus scriptis in speciem contrariis sese offerentibus, semper aut magis perspicuum amplectatur, aut verò

verò vtrumque commoda interpretatione leniat atq. moderetur; interpretatione, inquam, hausta, non ex vnius, duorumue, sed ex communi aut omnium, aut saltem pluriū, aut certè sapientiorum sententia, vel potius cōsensu. Communem autem quoq. ipsam eiusmodi sententiam, vel consensum, non vnius alicuius hominis priuata opinione, sed vel consuetudine ipsa, vel certè recepta, siue magistratus ipsius, siue adeò conciliorum œcumenicorum, auctoritate metiatur. Ita sanè, vt si quis fortè hanc, qua ad eum modum nostra vtitur ecclesia, ratiocinationem vniuersalem esse inficiari ausit, is nullam planè aliam ratiocinationem vniuersalem possit vsipiam, in omni scientiarum genere reperire. O speciem ecclesiæ catholicæ excellentem. Longum sit, si singula coner vltèrius explicare, sed certè ita esse, vt dico, res ipsa loquitur. Ex quo patet, meritò eam ecclesiam & vniuersalem esse, & tot sæculis firmam atque stabilem permanere. Quæ quidē ad omnia, illud accedit denique, quòd ea ipsa, ita idem illud vniuersalitatis suæ nomen maximè tuetur. Nullis etiam præterea personis mortalibus sit alligata. Nulli enim à suis partibus, tantam & habeat, & habuerit semper copiam hominum clarissimorum, siue potentiam quis spectet, siue doctrinam & eruditionem eorum, vt vel hac sola propemodum re, si defint cætera, meritò sibi catholicæ nomen ecclesiæ vindicare posse videatur; cum ab eo ipso tempore, quo Christi euangelium in orbe terrarum primū insonuit, omnes propemodum viri, siue probitatis, siue doctrinæ, siue adeò honorum etiam opinione præcellentes, (monstra modò quædam & portenta naturæ excipio) omnes, inquam, eiusmodi, ab ipsius nostræ ecclesiæ Romanæ partibus fuisse, hostibus autem eius & inimicis, omnibus suis viribus restitisse videantur. Tot doctores sancti, tot Episcopi, tot Duces, tot Reges, tot Imperatores, tot Pontifices Maximi. Et tamen ex tanto eorum numero, de quorum clarissimis nominibus, suam ecclesiæ ipsi nostræ
appella-

appellationem desumere, non turpissimum profectò futurum fuerat, nemo vnus ita honoratus, nemo tantopere adamat, nemo planè illi tam formidolosus extitit, vt ex eius vnus nomine nominari se permiserit, appetierit, sustinuerit, aut verò etiam vita & salute illius, salutem & incolumitatem suam contineri existimauerit; quod vtrumque conciliabula ipsa hæreticorum, & faciunt quidem, dum de suorum auctorum nominibus denominationem accipiunt, & experiuntur, dum eorum interitu, ipsa quoque ad interitum deducuntur. O speciem insignem, Christiani, ecclesiæ nostræ. Quo minus mirandū est, si ea ipsa, quæ tot illustrium virorum ac principum nominibus vti noluit, ad suam ipsius appellationem conformandam, de fece illa hominum plebeiorum & factiosorum haurire nunquam voluerit; vt aliquid videlicet, vel olim cum Arrianorum, Pelagianorum, Manicheorum, Donatistarum, vel nunc etiam multò magis cum Viclefistarum, Hussitarum, Luteranorū, Zuinglianorum, & cæterarum eiusmodi pestium, cognomine atque appellatione, commune habere videretur. Non diu est, cum incredibilis quædam hæreticorum prauitas, Papisticæ appellationem cœpit illi affingere. Quæ quidem appellatio, etsi planè neque probrosa per se est, (Paparum enim appellatio honoris semper, nō contumeliæ causa fuit vsurpata) & præterea, cum non ex vna quapiam persona priuata, sed ex Episcopo & pastore ecclesiæ vniuersalis desumpta sit, omninò inter priuatas denominationes censeri non potest; tamen ne hac quidem appellatione eiusmodi, tum satis honorifica, tum ab omni singularitate aliena, vtendum sibi esse ecclesia ipsa nostra existimauit vnquam, contenta hucusque, tum christianæ, vt est in Actis Apostolorum, tum catholicæ, vt est in symbolo eorundem, nominibus quàm latissimè patentibus appellari. In priore enim, propter eius ipsius mentionem, quem deus posuit caput super omnem ecclesiam, ipsius etiam omnis ecclesiæ, “

N

Ad autem

id autem est, reliquorum omnium membrorum eius, & totius adeò corporis eius, simul videtur fieri mentio; in posteriore autem catholicæ ecclesiæ vocabulo, omnes omnium hominum personæ, ætates, sexus, nationes, vnius ac eiusdem fidei, & amoris mutui conspiratione copulatæ, liquidius etiam multò esse videntur compræhensæ. Quam quidem eiusmodi personarum vniuersitatem, quemadmodum ipsa illa ecclesia nostra, Apostolici maximè muneris functione, solet in vnum congregare, ita rursus functionem eiusmodi, vel sola illa perennitate successionis, studet planè in perpetuum tueri ac conseruare, quòd pro patribus ipsis, assiduè nascantur illi filii: quos ipsa in demortuorum parentum loca, continuata successione substituit, & vt David inquit, principes constituit super omnem terram; atque ad eum modum quidem, non solum catholicam se esse, vt modò diximus, sed etiam, quod statim dicemus, Apostolicam ecclesiam demonstrat; dogmataque adeò ipsa sua, diuina esse, & diuinitus reuelata, vera etiam & in semetipsis iustificata, abundè declarat & ostendit. Opinionum enim humanarum commenta delet dies, veritas autem domini manet in æternum. Audisné hæc, ô nuper nata, ô nondum adulta, ô nunquam omninò nec staturæ iustæ capax, nec ætatis: sed veluti vitiosus quidam frutex, sic humili semper & ad terram abiecta, & nescio quomodo contorta ac compressa, & omninò in omnibus malè fausta specie ac figura infamis: ô denique & semper, & citò sponte tua ad interitum ipsum vergens: ô postremò, quod utique extremum interitus tui solatium videri poterat, omnis planè successionis expers, hæreticorum synagoga? Audisné hæc? Videsné ô misera, hinc quidem si spectes, veram ecclesiam, nisi vniuersalem esse non posse; illinc autem à parte altera, ecclesiæ tibi vniuersalis non modò rem, sed ne appellationem quidem posse vlla ratione conuenire? Excipit synagoga, & ait. Quid vobis ipsis? inquit; conuenitné

uenitné vniuersalis ecclesiæ siue res, siue appellatio? Ego
 verò maximè conuenire iam ostendi satis. Sed quoniam
 iterum atque iterum quæris, iterum tibi atque iterum pro
 ecclesia nostra respondebo; & respondebo, vt opinor, sic,
 vt hoc etiam ringare magis, & si vis, vt etiam siue rumpare
 ac moriare, siue adeò, quod ego omninò mallet, à via
 tua mala conuertare. Nonne legis apud Augustinum, tam
 certam esse catholicæ appellationem ecclesiæ ipsi nostræ,
 vt si in vrbe aliqua, rogentur ab homine peregrino singuli
 hæretici, de loco, vbi ad catholicam conueniatur, nullus
 ex iis tam perfrieta fronte futurus sit, qui suas, aut cætero-
 rum hæreticæ factionis hominum ædes, ausit pro catholi-
 cis ædibus digito designare? Igitur non catholici omninò
 estis vos. Quod enim contra vos, vestro ipsorum testimo-
 nio, testimonium validius possum adducere? At, qui sunt
 tandem catholici, vestra etiam ipsorum confessione? Euol-
 uite, euoluite libros vestratium, elegantiorum præsertim,
 & aliqua saltem modestia ac verecundia præditorum: re-
 perietis, in his eorum libris, toties penè nobis, ego autem
 dico, nobis, non vobis, catholicismum, hoc autem est, v-
 niuersalitatem attribui, quoties partium vtrarumque, in
 hac contentione, distinctio minimè odiosa, erat facienda.
 Satin' est? Ne sit satis à modestis viris & grauibus testimo-
 nium petere; petamus etiā scilicet à facietis. Repetite igitur
 hoc loco memoria, illos quoque hominum vestrorum
 cachinnos, & sales in ecclesiam ipsam nostram, ab urbanis
 illis hominibus vestris, acutè scilicet & assiduè coniectos;
 nonne comperietis, in ipsis quoque eorum probris, non
 dubiè, eius, quam quærimus, vestigia veritatis? vbi Caco-
 lycos nos, ad catholicorum videlicet nominis contume-
 liosam imitationē, semper fuisse appellatos videbitis. Nos
 igitur, & faceti & inficeti illi vestri, catholicos appellabūt;
 vos, qui neutrum profectò estis, & alterutrorum tamen
 sententiæ stare necesse habetis: vos, inquam, aut negabi-
 tis, aut

is, aut assensum sustinebitis? Vos verò, si sapitis, nostram hanc ecclesiam catholicam agnoscite, ad eamque equis, quod dicitur, & velis contendite; priuata illa vestra conciliabula, cane peius oderitis & angui.

CAP. VIII.

Ecclesiæ Apostolicæ consideratio: quæ est in successione.

Quartum saxum fundamenti ecclesiastici est, Apostolicam ecclesiam esse.

Ea res ferè in successione consistit.

Successionis ecclesiasticæ vis & utilitas.

I. *Ut unde vera doctrina petenda sit, sciamus.*

Loci aliquot scripturæ explicantur. De Magis.

De Maria peccatrice.

De Maria matre dñi.

Ostenditur, utilitatem hanc, propriam successionis esse.

2. *Ut nos ab ignobilitate religionis facilius defendamus.*



Tque hoc quidem, quod modò attigimus, de filiorum in vices parentum substitutione, præcipuum quendam, mea sententia, vsum habet, ad veram ipsam ecclesiam inuestigandam. Neque enim facilè dixerim, quænam sit res alia æquè præstans, & ad id quod agimus, æquè efficax, quàm si quis illud assiduè, non magis mente promptum gerat, quàm ob oculos positum intueatur, quod nos in hac interiorum christianæ, & huic oppositæ Satanicæ ecclesiæ notarum, & quasi fundamentorum comparatione, quartū esse volumus; quòd ecclesia ipsa, præter cætera, quæ suprà exposuimus, eadem & est, & dicitur

citur APOSTOLICA; hoc autem est, quòd successionem
quandam continuatam iam inde ab Apostolis, ad viuum,
vt sic dicam, potest in seipsa demonstrare; successionem,
inquam, non magis certorum hominum in loca & cathe-
dras ac Episcopatus ab Apostolis institutos, quod quidem
ipsum etiam per se magnum est, quàm doctrinæ suæ in
doctrinam ipsam Apostolorū, quæ apud Episcopos ipsos,
nec ferè alibi, deposita omninò extitit; qui etiam ipsi de-
inde, mittendis quaquauersum in vices suas, ac per manu-
um impositionem ordinandis præsbyteris, doctrinā ipsam
Apostolorum, & vicaria quasi ac delegata eorum opera,
per totum terrarum orbem disseminauerunt, & eandem,
sua quidem in præsbyteros auctoritate, præsbyterorum
autem vicissim erga se obedientia, integram ac incontami-
natam hucusque conseruauerunt. Quid iuuat ea considera-
tio successionis, inquis? Permultum equidem. Ibi enim
profectò vnumquodque reperiri verisimilius est, vbi re-
conditum est, quàm ibi, vbi nunquam est, neque conditū,
neque positum. Vt enim ii, qui in arte differendi versan-
tur, locum aiunt esse argumenti sedem, ita nos, qui certam
ac firmam doctrinā de Deo quærimus, successionem hanc
Episcoporum, sedem esse veræ & Apostolicæ ipsius doctri-
næ existimare debemus; sic, vt eam quidem non aliunde,
quàm ab iis Episcopis, qui in Apostolorum loca succeffe-
runt, hauriendam esse censeamus. Nam cum omnibus in
vniuersum sacerdotibus ita demandata sit diuinitus custo-
dia scientiæ salutaris, vt eam populus scilicet ex ore eorum
requirat; tum verò nominatim eadem hæc ipsa scientia,
tanquam peculiare quoddam depositum, eorum fidei cre-
dita est, qui ab Apostolis semel instituti, succedere sibi, ad
consummationem sanctorum, in opus ministerii debuerūt;
& ita quidem credita, vt depositum eiusmodi, omni ad-
hibita cautione, diligenter non solum sibi asseruarent, sed,
vt Paulus Timotheo præcipit, etiam aliis custodirent. At

non custodierunt, inquis. Primùm. Quis mihi id persuadet? deinde verò etiam, quis me eius rei iudicem constituit? Nam, vt de primo primùm loquar, dicite obsecro, mortales quotquot estis, quis nobis alius scripturas, ceremonias, sacramenta, sacrificia: breuiter, tam doctrinam, quàm vitam euangelicam, ab ipsis Iesu Christi Dei nostri temporibus, ad hæc vsque tempora conseruauit, quàm Apostoli, & Apostolici viri Apostolorum successores? Quis hæc alius, secundum Apostolorum quidem & Apostolicorum virorum tempora, in ipsum terrarũ orbem propagauit, quàm Apostolorum successores? Quis hæc aliquantò post, ad Gallos, Germanos, Anglos, Scotos, Saxones, Boëmōs fratres nostros, atque adeò ad nos etiam ipsos Polonos, alius detulit, quàm Apostolorum successores? Quis hæc denique alius, nouissimis istis nostris temporibus, ad has, toti olim antiquitati incognitas, Indias nostras nouas deportauit, quàm Apostolorum successores? Dicite vos, qui primi omnium in Polonia, non sobrii, vt ille ad euertendam rempub. sed Luteranico veneno foedo imbuti, ad internitione delendam religionem accessistis; & qui primi, diuinos illos, ac fidelissimos & religiosissimos homines maiores nostros, nulla planè aut religione tangi, aut etiam pietate moueri, docere ausi estis; siue vos Illæ, siue Discordiæ, siue Cosmii, siue Crouicii, siue nescio qui alii fuistis. Dicite, inquam. Quis in Poloniam, biblia nostris hominibus cathechizandis importauit? nonne Apostolorum successores? quis ea ipsa, vestri similibus hæreticis confutandis conseruauit? nonne Apostolorum successores? Quis doctrinam euangelii apud nos, quis ecclesiarum traditiones, quis solennes sacramentorum ritus atq. ceremonias, Iesu Christi fouendis in Polonia ouibus custodiuit? nonne Apostolorum successores? Albertus primùm, qui ex nostro Archiepiscopatu Gnesnensi, inter diuos relatus est; & post eum Gaudentius, Hippolytus, Bossuta, Stephanus, Petri duo, Martini duo, Iacobii tres,

bi tres, Ioannes octo, Nicolai duo, Vincentii duo, Borislauus, Hæroslaus, Bozenta, Dobrogostius, Vladislaus, Sbigneus, Fridericus, Rosa, Lascius, Dreucius, & cæteri, qui in Gnesnensi nostra Archiepiscopali sede, eorum loca deinceps tenuerunt, vsque ad ipsa maiorum nostrorum tempora? Post illa autem tempora, dicite, quis omnem vim doctrinæ diuinitus inspiratæ, & viui illius ac maximè efficacis sermonis dei, aduersum vos & successores vestros, hæreticos, in Polonia vibrauit atque expediuit? Nonne Apostolorum & Apostolicorum illorum virorū, in eadem Archiepiscopali sede successores? Critius, qui vestram hæresim scriptis etiam suis oppugnauit, Latalitius, Gamratus, Zergouius, Prærembius, Vchanius; qui omnes audaciam vestram auctoritate sua sæpe compresserunt? Quorum ipso- rum insistens vestigiis, is qui nunc eandē sellam honoris Archiepiscopalis obtinet, Stanislaus Carncouius, luculētis suis, tum in ecclesia contionibus, tū in senatu sententiis, & nefarios vestros in dei ecclesiā impetus egregiè coërcet, & doctrinam peruellit: non sine consentientibus ad omnia studiis & operis reliquorum cōsortium & collegarū suorū. Io. Demetrii Solicouii Archiepiscopi Leopoliēsis. Petri Misco- uii Episcopi Cracouiensis. Hieron. Comitis Rosraseuii Vladislauiē. Georgii Ducis Radiuili Vilneē. Lucæ Coscelecii Posnanieē. Petri Dunini Volscii Plocē. Martini Cromeri Varmieē. Victorini Virbicii Luceorieē. Ioannis Borucouii Præmislieē. Georgii Gedrocii Samogitiæ, Petri Costcæ Culmeē. Adami Pilchouii Chelmeē. Martini Balobresii Camenecē. qui sunt hodie in Polonia Apostolicorum illorum virorū successores. Dicite, dicite, inquī, vos Ilfæ, Crouicii, Cosmii, Discordiæ; Dicite, & ad ea quæ rogamus, respondete. Aut verò quoniam isti, de quibus loquimur, vestratium hæreseon patriarchæ, mortui sunt, dicite vos ipsi saltem, qui vultis hæretici, hæreticorum illorum hæredes & successores. Dicite, dicite. Vnde nam illi ipsi

¶ Ipsi patriarchæ vestri hæretici, biblia, quibus aduersus ecclesiam, pessimo suo consilio vterentur, acceperunt: nonne, vt dicimus, ab Apostolorū successoribus? Inficiari nō possunt (interdum enim ferunt nō obscure:& cum primum ipsi, ad omnia in ecclesia subruēda accederēt, biblia ipsa sub scamnis præsbyterorum nostrorum delituisse vociferantur) verbo tamen assentiri recusant. Quid igitur faciam, homo, in re clarissima, testimoniis destitutus, & vestro viuorū, & illorum quasi minorum gentiū, vestrorum inter nos patriarcharū mortuorū? Quid faciam? Tu quæso, Martine Lutere, qui nec viuus es, in frustra conceptus à tot successoribus tuis, nec mortuus: viuis enim, quanquam admodum miserè, in iisdem illis qui te discerpserunt. Tu igitur, cui nonnunquam inuito solet verum ipsum erumpere; tu, tu, inquam, homo liber atque ingenue, adiuua hanc veritatem nostram testimonio tuo, &, quod soles, tuo te ipsum gladio iugula. Quæro igitur abs te, sic, vt omnes homines possint exaudire. Quis tibi, Martine Lutere, homini & nato & facto ad interitū & occasum ecclesiæ Christi, biblia sacra suppeditauit? illa, inquam, biblia, quibus tu, cum saluis & integris, ad tuam ipsius & multorum salutem vti potuisses, ad tuum arbitrium & cauillationem detortis atque deflexis, ad tuam, & multorum aliorum perniciem abuti maluisti? Sed tamen, quis ea tibi suppeditauit? Nonne Apostolorum successores? Quis baptismum, poenitentiam, cætera sacramenta, ad tuam vsque ætatem, à prima ipsa in his regionibus fundatione christianismi, custodiuit? nonne Apostolorum successores? Quis doctrinā ipsam christianam conseruauit? nonne Apostolorum successores? Si negas, obsignatis tabellis agam tecum. An enim non hæc sunt tua verba, in tuo quodam libello ad posteritatis memoriam consignata? Atque hîc equidem adeste mortales, & singularem hominis, non tam in exprimendis animi sensibus eloquentiam, quàm in catholica

deferren-

deferenda ecclesia prudentiam, attendite. A Papa, inquit
Luterus, totam scripturam, & prædicandi officium habe-
mus. fatemur enim sub Papatu plurimum esse boni chri-
stiani, imò omne bonum christianum, atque etiam illinc
ad nos deuenisse. Est enim ibi vera scriptura, verus bapti-
smus, verum sacramentum altaris, veræ clauces ad remissi-
onem peccatorum, verum prædicandi officium, verus ca-
techismus; in summa, verus nucleus christianitatis. Papè,
hæccine sunt Luteri verba? Papæ igitur, Lutere, qui sunt
successores Apostolorum, hæc omnia tibi verè, vt quidem
ipse fateris, conseruarunt; & me existimare vis, ea mihi fi-
lio à patribus ipsis inuideri, quæ tibi, hosti atque inimico
capitali, tam prolixè, & tam liberaliter ab eis communi-
cata sunt? Nimirum ecclesia catholica, vt se benignissimi
patris illius, qui in cœlis est, hæredem esse, omni, qua po-
test, ratione declaret & ostendat, solem quoque & ipsa su-
um oriri facit super bonos & malos, & pluit item super
iustos & iniustos, depositumque hoc sanctum iis etiam
ipsis communicat, quos non ignorat, suis istis bonis, esse
aduersus seipsam abusuros. Quid tergiuersaris Lutherane, &
contra tam apertum magistri tui testimonium, euangeliū
te ab ecclesiæ nostræ præpositis accepisse inficiari conaris?
Atqui Augustinus multò verior religionis catholicæ do-
ctor, & matris quoque ecclesiæ obseruantior filius, plus
etiā illi aliquanto tribuit. Non enim sic solum dicit, Euan-
gelium non haberem. Sed, Euangelio, inquit, non credere,
nisi me ecclesiæ auctoritas commoueret. At cuius tandem
ecclesiæ? Aude dicere, tuæ: si tua synagoga fuit temporibus
Augustini. Facile igitur teneo, quod volui, Apostolo-
rum nimirum successores, hoc autem est, Papas, & catho-
licæ nostræ ecclesiæ præfectos, vsque adeò depositum il-
lud diuinum custodiuisse, vt ipsis etiam inimicis suis, isti,
dico, genimini viperarum, dum ipsi modò aliquā in-
lucem crumpant, ipsa materna viscera erodere non dubi-
tant;

tant; his, inquam, ingratiſſimis & crudeliſſimis hominibus, fideliffimè illud ſuppeditare, & quaſi lupos, in ſuam perniciem propriis vberibus alere, nunquam hætenus detrectarint. Certè Ambroſius quoque, (vt iam in ore duorum vel trium ſtet omne verbum) ſymbolum Apoſtolorum, quo non magis præcipua fidei noſtræ capita, quàm hæc, in quibus expendendis verſamur, veræ eccleſiæ veſtigia continentur, ab Romana ipſa eccleſia, ſemper intemeratum cuſtodiri ait & ſeruari. Et quidem diſertè, ab Romana, inquit: vt facilè inde Papas, eius eccleſiæ præſides poſſis agnoſcere, ad quorum vnū epiſtolam etiam illam ſcribit. Quis igitur aduerſus res tam claras, vt oculis ipſis cerni, tam ſolidas, vt manibus prope teneri poſſint, tam denique certas, & ratas, vt per ipſa etiam hæreticorum ora erumpant, perſuaderi ſibi patiatur, ea à ſucceſſoribus Apoſtolorum cuſtodita non fuiſſe, quæ orbis vniuerſus ex eorum manibus accepit? quæ hæretici, gens inimica, ex eorum ſcriniis ſuſtulerunt? Verùm demus interim, quod iſti volunt, non cuſtodiuiſſe, aut certè mala fide cuſtodiuiſſe. quid tum poſtea? Egone verò à quoquam aut magiſter aliquis ſum conſtitutus, cornicum oculis conſigendis, aut Cenſor, maioribus meis notatione cenſoria caſtigandis, aut iudex, patribus ipſis meis iudicandis, & non modò turpi, ſed etiam nulla actione condemnandis? Equidem res ipſa non modò magiſterium, cenſuram, iudicium ué meū non fert, ſed ne aduocationem quidem aut patrocinium deſiderat; adeſſe magis iubet ad imperandum, vel ad parendum potius; ſic enim antiqui loquebantur. Nimirum filius ego ſum, illi patres; ego diſcipulus, illi magiſtri; ego ſeruus, illi diſpenſatores, conſtituti ſuper familiam domini, ad ſuum cuique diſenſum opportunè, &, vt ego interpretor, temporum ipſorum habita ratione, tribuendum; breuiter, ego ſum ouis, illi paſtores. Paſtoresné igitur à gregibus, an contrà, greges à paſtoribus paſcuntur? quod
ait domi-

ait dominus. Enunquam, quæso, quisquam oves vidit, pa-
storem ipsum pascentes, aut alia sibiipsis pabula, quam,
quæ à pastore præberentur, inquirentes? Mihi verò & pa-
fci sufficiat, non etiam pascere; & illud præterea satis esto,
quod summus omnium pastor Christus ait. Quicquid de-
mum ii dixerint, qui in cathedram Moïsis successerunt, id
omne præstari à nobis oportere. In quo ipso, illud etiam,
quod dicam, obiter, non sine singulari animorum nostro-
rum voluptate, animaduertendum pariter ac expendendū
est. Totidem penè verbis asseri hoc loco à Christo domi-
no obedientiam nostrā, erga præfectos ecclesiæ suæ, quot
verbis à matre ipsa virgine, assertam fuisse quondam me-
minimus, obedientiam ministrorum illorum nuptialium
in Cana Galileæ, aduersus dominū ipsum Christum. Quid
enim ibi ait mater ad ministros illos de filio? Q V O D C V N-
Q V E, inquit, D I X E R I T V O B I S F A C I T E. Quid autem
hoc loco filius ipse de vicariis suis, ecclesiæ sanctæ præfe-
ctis, ad nos omnes? hoc autem est, ad discipulos suos? Ver-
ba, vt dixi, totidem. O M N I A, inquit, Q V Æ C V N Q V E
D I X E R I N T V O B I S S E R V A T E E T F A C I T E. Potu-
itné, quæso, aut ad sermonem maternum ipsum, magis ac-
commodatè loqui, quàm locutum esse videmus? aut verò
etiam magis sancire imperium ecclesiæ præfectorū, quàm
vti à matre sancitum erat suum? Vt iumentum factus sum
apud te, inquit regius propheta. Ergo mihi quidem an pa-
stores nostri depositum ipsum satis fideliter custodierint,
nec liquet fortassis, nec adeò inquirendum est; est enim
qui inquiret & iudicet; illud liquet, depositum hoc ipsum
commendatum eorum fidei fuisse, aliorum non fuisse;
me etiam ex illorum ore pendere, & ab eis, omnia quæ
ad salutis meæ rationem pertinent, requirere iussum esse.
Quemadmodū igitur Magi illi, qui nato Christo domino
ex oriente profecti, magnæ incredibilis suæ pietatis cau-
sa, terrarum spacia peragrarūt; dum orbis terrarum domi-
num re-

num recens natum quærunt, Hierosolymis de eo percontantur, vbi Deus Opt. & Max. legū oraculorumque suorum sedem ac domicilium tunc esse voluerat; & quemadmodum Maria, dum eundem illum vita functum ac sepultum dominum, extremo honore prosequi desiderat, ad ipsum, in quo eum condi nuper viderat, sepulchrum rectā gradū facit; sic ego nunc etiam, si Christum salutis meæ ducem & auctorem, primū inuenire, deinde autem inuentū tenere cupio, ea sanè loca lustrare inprimis debeo, quæ sunt maximè insignibus ipsius aut testimoniis, aut verò etiam vestigiis, consecrata. In quo etiam, si fortè præter opinionem meam ita acciderit, vt dominum ipsum, neque Hierosolymis cum Magis, neque in monumento cum Maria, reperiam, illud tamen pro eo luci feram, vt ibi quidem, principes sacerdotum & scribas, hic autē, angelum ipsum, reperiam, qui mihi interim, tanquam exoptata illa in naufragio Cynosura, solis orientis aut obeuntis regiones, ita in mediis illis meis dubitationibus, siue Bethleemum, siue adè Galileam, certa tunc temporis domini mei hospitia ac receptacula demonstrent, & officium animo illi meo hæsitanti præstent iucundum inprimis atque salutare. Mater quidem ipsa dei, cum eundem illum quem pepererat, Christum filium impuberem, duodecim annos natum, Hierosolymis per obliuionem reliquisset, non temere huc illuc vagatur, non petit ignota loca vlla, sed cum illum paulisper inter notos & cognatos perquisisset, neque inuenisset, eandem illam subito viam redit, & statim filium Hierosolymis, vbi eum reliquerat, hoc etiam magis, quòd inter doctores, audientem illos, & interrogantem illos, inuenisse perhibetur. Fratres. quæcumque scripta sunt, ad nostram doctrinam scripta sunt, vt per patientiam & consolationem scripturarum, spem habeamus. Facite igitur, facite. Facite quicquid vultis homines miseri, & omnibus lachrymis dignissimi. Ecce nunc iam prædico vobis. Nisi Christum

Christum intra eius propria sacrosancta ecclesiæ cubilia
quæsieritis; & nisi, vnde paulo antè digressi estis, eodem
cum Maria matre eius redieritis, nunquam vbi pascat, nun-
quam vbi cubet in meridie, cognoscere poteritis, sed vti-
am semel, post tot greges infamium & vagabundorū isto-
rum sodalium ipsius vagari incepistis, ita perpetuò errabi-
tis, & nec viam, nec vitam, nec veritatem reperietis vnquā.
Hic, hic apud nos & via, & veritas, & vita deposita est. Hic,
hic apud successores Apostolorum & quærenda ea vobis &
inuenienda est. Sed vrgent aduersarii, quī fieri possit, vt hæc
tanta, successioni isti accepta sint ferenda? Ego verò, quī
id fiat, non valde quærendum esse putem, quando rem
ita se habere planè videam. Vt enim pugnaciter admodum
& per contentionem minimè necessariam facere videretur,
qui non prius ignem ipsum, vi calfaciendi præditum esse
fateatur, quàm quī id fieri possit, ratione penitus & intelli-
gentia compræhendat, ita planè præfracti, & ad iurgia at-
que rixas nati hominis esse dixerim, (qualem quidem iur-
gandi consuetudinem ecclesia dei prorsus repudiat) malle
disputando tempus perdere, ecquónam modo fieri possit,
vt tanta prærogatiua omnes Apostolorum successores di-
uinitus ornati fuerint, quàm id fateri, quod verum ac ma-
nifestum esse docuimus; vel potius, quàm eo frui, quod
ad vsum & vtilitatem nostram diuinitus nobis datum &
concessum esse meritò agnoscere debemus. Quanquam
etiam si quis quærere amet, ne causa quidem eius rei ni-
mis obscura esse potest, cum eiusdemmodi exempla in ipsis
oculis nostris sint defixa. Constat enim, ne longè abeamus
exemplis ad eam rem cōquirendis. Qui honos, quæ com-
moda, quæ prærogatiuæ, regibus nostris Poloniæ, ipsis e-
tiam adeò Vitembergensibus Burgimagistris vestris, sunt
vnquam attributæ, eas ab aliis ad alios, non noua vlla de
singulorum magistratu ferenda lege, sed ipso illo successi-
onis in magistratum illum iure atque beneficio deuenire.

Quæro enim, cur Stephanus hic Batorius, quem nuper adeo principem optimum & prudentissimum, atque omnibus regiis virtutibus ornatissimum, ex Palatino Transylvaniæ Regem nostrum creauimus. Cur hic, inquam, publico totius huius regni nostri consilio præsideat: id quod annis superioribus ne somniarat quidem? Respondes. Quia rex est. regibus autem id licere. Cur mandet, cui velit, honores reipub? Quia rex est. Cur fruatur vectigalibus & commodis Reipub? Quia rex est. Cur vitæ necisque meæ habeat potestatem? Quia rex est, & omnibus regiis muneribus fungitur. Rex autem quî, inquam? Nimirum respondes, in locum regum suffectum & inauguratum successisse. Sed mitto reges, & eodem hoc modo quæro de Burgimagistris tuis. Cedò. Cur Wolfgangus iste vester nescio quis vrbanam exerceat vestram iurisdictionem? Respondes. Quia magister ciuium noster est. Cur in ius vocet? Quia magister ciuium est. Cur in carcerem duci iubeat? Quia magister ciuium est. hæc autem, quæ dixi, magistri ciuium sunt omnia. Vnde autem ei magistratus hic ciuium? Nempe, ais, in locum magistrorum ciuium suffectum esse. Itané autem quæso? Tu verò iam me quoque, quid tibi de successionem ecclesiastica roganti respondeam, egregiè docuisti. Quære enim ex me nunc iam tu quoq. Quid ita Gregorius hic XIII. Pont. religiosiss. & sapientiss. vniuersæ ecclesiæ præsideat? Respondebo. In promptu causam esse, quia Petrus est, & maximè ad eum pertinet de omnibus ouibus Christi. Petro enim profectò dictum est. Pascere & oues & agnos meos. Quæres deinde. Quid ita porrò liberè aut cōstituat passim quos velit Episcopos, aut quos nolit destituat? vel saltem non constituat certè quidem? Dicam. Quia Petrus est. Quid ita vsurpet soluendi potestatem, & ligandi? Quia Petrus est, respondebo. Petrus autem quî? inquies. At ego totidem verbis. In locum Petri, dicam, suffectum & inauguratum successisse. Atque hæc est ferè prima successionis huius in ecclesia

Eccl. Lib. I. Cap. VIII.

III. *Apostolica
Successio*

ecclesia insignis admodum vtilitas: vt vbi potissimum à vacillantibus interdum ac dubiis nobis quærenda sit ecclesia, scire sine omni controuersia, atque adeò sine difficultate posse videamur. Cui quidem vtilitati ipsi, alteram hanc quoque exaduerso vtilitatem, nihilo, vt puto, priore inferiorem, addamus licet, quòd vti non solum ad nobilitatem nostram gloriosum, verum etiam ad legitimi nostri generis demonstrationem, certum in primis & maximè idoneum non esse non potest, habere domi quasdam veluti maiorum imagines, quibus semper ad certitudinem simul & claritatem nostri generis rectè niti, & ignominiosum illud S. P. quo Romani olim nothos & incerto patre procreatos significare solebant, vitare posse videamur, ita necessarìò fatendum est, nos, qui successionem hanc in ecclesia nostra, ceu quasdam maiorum nostrorum imagines, tenemus ac tuemur, facile præ cæteris omnibus, legitimum ac nobile genus nostrum in religione christiana, & tenere ipsos ac tueri, & ab aliorum etiam calumniis posse vindicare. Eorum enim videlicet progenies, & posteri, atq. adeò hæredes sumus, qui viderunt ipsi & audiuerunt, deque ipso visibili illo diuino verbo manibus suis contrectauerunt: vt hoc nomine certior ad nos earum rerum hæreditas deueniret, quarum in verissima possessione patres ipsi & maiores nostri extiterunt, ad quos ipsos ita os ipsum domini locutum est, vt ab ipsis deinde ad alios, eorum omnium mysteriorum possessio deueniret, quæ ad ipsos quondam ore ipso Dei veri & æterni, coram voce viua promulgata fuerunt. Cuius sanè hæreditatis cretionem, Dauid etiam ipse in seipso apertè agnoscere videtur, cum ita in psalmo loquitur. Hæreditate, inquit, acquisiui testimonia sempiternæ legis ac voluntatis tuæ, domine: & acquisiui quidem, inquit, non mihi tantum, sed etiã posteris, & in eodem genere hæredibus ipsis meis in æternum. In ea igitur ecclesia, quæ sola hæreditate ac successionem tam locuples est, libenter per-

ter permaneamus, vel si quid ab ea digressi sumus, ad ipsam nos certè primo quoque tempore rursus referamus.

CAP. IX.

Successio Episcoporum nulla apud hæreticos, ac ne missio quidem: ex quo inuisibilis ecclesia.

Successioni in ecclesia opponitur Neglectus successionis apud hæreticos, & Missionis simul.

Nullam esse successionem apud hæreticos.

Caput successionis Missio est: qua carent hæretici.

Atque ideo audiri non debent.

Locus Apostoli. Quomodo inuocabunt in quem non crediderunt.

Hæretici, cum Successionem & Missionem ostendere non possent, necessario finxerunt ecclesiam inuisibilem.

Ecclesia inuisibilis hæreticorum refellitur.

Loci scripturæ explicantur. Euang. Dic ecclesiæ.

Psal. In sole posuit tabernaculum suum.

Philip. λόγος ζωῆς ἐπέχουσας.

Euang. Nō potest ciuitas abscondi &c.

Concluditur, Illam potius ecclesiam agnoscendam esse, quæ fundamentis nitatur, quàm quæ ipsis careat.



I possent, saltem successionem hanc, aduersariorū administri, in se ipsis utcumque demonstrare, quosnam, quæso, spiritus fumerent? quos triumphos agerent? aut verò quem tandem nostrum non iustissimè ad suam illam factionem trahere, atque allicere videretur? Nunc quis est, qui nō miretur, homines nullis natalibus insignes, nullis propemodum ortos maioribus, & breuiter, terræ filios, tan-

hos, tantam familiam ducere? Cupio, inquit Tertullianus, ostendant mihi, ex qua auctoritate prodierint, edant origi-
 nes ecclesiarum suarum, euoluant ordinem Episcoporum
 suorum, ita per successiones ab initio decurrentem, ut pri-
 mus ille Episcopus aliquem ex Apostolis, vel ex iis qui fue-
 runt cum Apostolis, habuerit auctorem & antecessorem.
 Hoc enim, inquit, modo, ecclesiæ Apostolicæ census suos
 deferunt, &c. Sic ille de Apostolicis ecclesiis. At nostri qui-
 dem isti, pugnent quantum volent, licet; neruos etiam, si
 videtur, intendant omnes, se ipsos denique in quaslibet
 formas vertant, non modò tamen origines synagogarum
 suarum, Apostolicis ecclesiis æquales non edent, sed ne au-
 ctoritatem quidem ullam, ex qua ipsimet prodierint, po-
 terunt vnquam, quod satis sit, demonstrare. Nam à vetu-
 sta quidem illa Apostolica successione tantum profectò
 absunt, ut ne nunc quidem nostris hisce temporibus, legi-
 tima via ingrediantur ad stadium illius successionis ritè a-
 liquando conficiendum. Quæ est enim via legitima Apo-
 stolicæ successionis? Mitto interim respondere cætera, quæ
 in hoc genere non absurdè fortassis dici posse viderentur;
 sunt enim, ut puto, alterius & loci, & temporis; illud di-
 cam, quod & breuiter, & verè, & omninò sine controuer-
 sia, semper potest, & sanè hoc loco non solum potest, sed
 etiam debet, responderi. Caput eius viæ, de qua loqui-
 mur, necessariò scilicet non aliunde quàm à missione ipsa
 repeti oportere. Quæ malum est, inquires, ista missio? Apa-
 gè. ego verò illam dico missionem, de qua ipsum etiam
 Apostolorum Græcum nomen planissimè est sumptum;
 & de qua item extat illud præclarum admodum Pauli
 elogium, in ea ad Romanos. **QVOMODO PRÆDI-**
CABVNT, inquit ille, **NISI MITTANTVR?** Eam
 ego missionem, ceu caput & originem quandam toti-
 us eius viæ, sine qua successio Apostolica confici non po-
 test, spectari imprimis dico oportere. Quæ quidem mis-
 sione

lione cū omninò careatis, omninò etiam non modò suc-
cessionem & progressum Apostolicum non tenetis, sed ne
initiū quidem ipsum progressus aut successionis Apostoli-
cæ, rectè capessere potestis. Cū enim ea missio sit initi-
atio ipsa, & primus, vt ostendimus, aditus ad Apostolicam
exercendam functionem, dabitis mihi, credo, interim hanc
veniam, si, quod rebus addico maximè necessariis, idem
verbis quoque pronuncio, vos, quanquam vobis omnia
audacissimè vendicetis, tamen sine hac missione, &, vt di-
co, initiatione, ne initium quidem habere eius cursus, qui
„ in Dei ecclesia conficitur, speciosis illis pedibus euange-
„ lizantium pacem, euangelizantium bona. Quam enim,
quæso, missionem, vestris istis conatibus, vestris ausis te-
merariis, vestræ isti incredibili licentiæ, vultis, aut verò
etiam potestis prætere? illamné, obsecro, quæ est, via
& ordine hoc nostro vsitato, vt vos missos fuisse ad nos per-
hibeatis, ab aliquo visibili, legitimo, ordinario magistra-
tu? an verò potius illud dicitis, vos neque ab hominibus,
neque per homines, sed diuinitus planè ad nos, amandatos
fuisse, nec ordine cōmuni, nec ratione prorsus nostris tem-
poribus vsitata? An ne hoc quidem contenti, non vos ho-
mines ex hominibus natos, sed sic cœlitus in orbem ipsum
terrarum, tanquam Diopetas quōsdam, subitò delapsos,
vultis perhiberi? An quid est præterea? Quod si nihil est,
vt certè nihil esse potest, tunc si vos quidem aut cœlitus
profectos, aut saltem diuinitus missos esse dicitis, diuinæ
sanè istius ac cœlestis vestræ, siue missionis, siue adeò ori-
ginis, fidem nobis faciatis necesse est, iisdem illis diuinis &
admirandis editis operibus, quæ cœlestem nobis originem
vestram apertissimè repræsentent, quæque adeò in omni
ætate seculorum omnium, omnes extra ordinem diuinitus
missi legati, secum quoquouersum afferre semper solebāt.
Hæc sunt enim indicia & non quædam insignes, eorum,
qui non ab hominibus, neque per homines, mitti ad homi-
nes con-

nēs consueuerunt. Sin autem ad viam & rationem inter homines vsitatam confugitis, quam vobis fortè arrogetis, tum aut ipsi planè fateamini oportet, missos vos non esse, cum vel à nullo reuera hominum missi sitis, sed vos ipsi vltro ingesseritis, vel, si ab aliquo missi estis, ab iis demum missi sitis, qui, cum ipsi antea missi non fuerint, vel non ad mittendos alios missi fuerint, mittendi certè vestri facultatem nullam habuerunt; aut verò, si, missos vos non esse, fateri non vultis, imò contrà, missos esse, omnibus persuadere studeatis, videte quæso, ne ad missionis eiusmodi vestræ fidem astruendam, non satis omninò sit; vos ex nobis prodiisse, nisi etiam ex nobis fueritis. Quid est autem, ex nobis fuisse, nisi nobiscum permansisse? vti sanè egregiè beatus Ioannes Apostolus, in eo, quem suprà exposuimus, suæ epistolæ canonicæ loco interpretatur. Quod cum ita sit, equidem si nostri isti missos se esse videri volunt, ante omnia, non modò videant, vtrum ex nobis prodierint; in probris enim id potius, quàm in laude duci solet, sed etiam, idque multò magis, an ex nobis fuerint, hoc autem est, an nobiscum permanserint; deinde verò, & se, & nos, omnibus illis incommodis expediant, quibus, vt dixi, suam hanc missionem maximè exagitari ac vrgeri intelligunt. Sin autem, quod extremum est, totam hanc missionis rationem contemnunt, & pro nihilo ducunt, tum & nos quidem eos contemnamus, ac pro nihilo ducamus, & ipsi, desinant ià eadem vllum penes se progressum aut successionem Apostolicam iactare, sibi que adscribere, quando initio quidem Apostolico, quæ ipsa est missio, planissimè destituuntur. Sic enim ait Christus ad Apostolos. ECCE EGO MITTO VOS. Et alibi. SICUT MISIT ME VIVENS PATER, ITA ET EGO MITTO VOS. Illud autem profectò constare inter omnes existimo, qui non procedat, id autem est, qui non incipiat Apostolico more atque modo; qui que etiam deinde cum processerit, non succedat, aut non progrediatur

grediatur modo atque more eodem, ab eo mehercule finem Apostolicum frustra vnquam sperari, aut expectari. Quæ est igitur per Deum immortalem, tanta animi nostri cœcitas atque infania, vt, cum dux nobis & auctor quærat, ad patrum nostrorum sanctorum vestigia persequenda, & ad eandem aliquando metam cursu nostro contingendam, ad quam illi olim, ex his nostris carceribus euolauerunt, eorum tamen potissimum in hoc genere auctoritatem nobis sequendam esse arbitremur, qui non modò quò nos tandem perducant, quicquam pensi non habent, sed ne illud quidem curant, quò ipsi perueniant; &, quod maius est, non qua semita pergant, non etiam, quam saltè insistant viam, admodum considerant; cœci ipsi, & cœcorum duces, atque adeò ne duces quidem. Quid dico, duces? ne homunciones quidem; quando non ducem à quo missi fuerint, non auctorem à quo profluxerint, idoneum vllum edere; dicam amplius, non, ne illud quidem, quid sit, Ducem esse: non, ne an sit quidem vsquam Dux & auctor vllus, satis docere posse videantur. Mihi verò sanè Christus ipse eos potissimum nobis ad cauendum tanquã digito mōstrasse videtur, dum illis maximè seriis verbis ad nos vtitur, quorū antea quoque facere mentionem cœperamus. ATTENDITE, ATTENDITE, inquit, A FAL-
SIS PROPHETIS, QUI non mittuntur, sed vltro ipsi AD
VOS VENIUNT, vobisque se obtrudunt. Hi sunt enim il-
li, quos ipsos totidem penè verbis designat Hieremias pro-
pheta in persona Dei. Currebant, inquit, & ego non mit-
tebam eos. Ergo, vt hunc tandem sermonem aliquando
concludamus, neque ipsi, cum missi non sint, Apostoli
esse possunt, neque nos, si eos audiamus, fideles esse vl-
la ratione poterimus. Pulchrè enim colligit Paulus, dum
ita gradationem illam suam instituit OMNIS, inquit, QUI
INVOCAVERIT NOMEN DOMINI, SALVVS ERIT.
QVOMODO AVTEM INVOCABVNT, IN QVEM
NON

NON CREDIDERUNT? AVT QVOMODO CRE-
DENT, CVM NON AUDIERINT? QVOMODO AV-
TEM AUDIENT, SINE PRÆDICANTE? QVOMO-
DO VERO PRÆDICABVNT, NISI MITTANTVR?
Ex quo sequitur, vt, nisi eos habuerimus, qui ad nos mit-
tantur, neque prædicatores sanè habere, & quæ huius cõ-
sequentia sunt, neque audire salutare quicquam, neq. cre-
dere, neque nomen domini inuocare, neque adeò salui es-
se posse videamur. Tantum est in hac missione momenti
constitutum. Qua missione dum carent isti, illam etiam
profectò perennem successionis Apostolicæ, de qua dixi-
mus, continuationem habere non possunt. Quibus duabus
orbati rebus, ad demonstrandam quidem ecclesiam sum-
mè necessariis, hoc ipso sanè confiteri perquàm necessariò
cogebantur, si modò vera dicere volebant, ecclesiam pe-
nes se esse nullam. (Quibus enim rebus opinionem præ-
sentis apud se ecclesiæ tueri debuissent, quibusque adeò
indiciis, si quis pressius vrgeret, demonstrare eam potu-
issent, his qui eam legitimis quasi insistentes vestigiis in-
uestigassent, iis ipsi omnibus præsidiiis prorsus se esse in-
telligebant destitutos.) Verùm cum nondum vsque adeò
desiperent, vt quæ sibi rebusque suis maximè nocitura vi-
derentur, iis se ipsi vltrò alligarent, & apertè atque in-
genuè, nullam apud se esse ecclesiam faterentur; quid fe-
cerunt? viam atque rationem excogitauerunt, subtilem,
vt ipsis videtur, & totam tectam, beneque dissimulatam,
qua studia inquiringium ecclesiam, penitus ab instituto
dimouerent, potius quàm se in eiusmodi necessitatem con-
iicerent, demonstrandi apud se ecclesiam, quam nulla pos-
sent ratione demonstrare. Quam igitur in eo viam &
rationem iniuerunt? Ecclesiam esse minimè aspectabilem
asserere cœperunt; vt si quis vnquam, eius videndæ atque
cognoscendæ cupidus, ostendi eam sibi, & ab ipsis eo-
rum cœtibus atque conciliabulis exhiberi flagitaret, is se

nodum scilicet in scyrpo quærere, & rem quæ reperiri non posset, frustra confectari intelligeret. Totam igitur inuisibilem, vt dixi, id autem est, remotam ab hominum sensibus, & in solis eorum cogitationibus defixam atque recõditam ecclesiam esse dixerunt, sic, vt ipsorum quidẽ iudicio, Christi domini ecclesia, veluti quædam imaginaria Platonis respub. non tam re existere, quàm mente duntaxat homuncionum miserorum concipi atque informari videretur. Nimirum versuto illo & callido, quod dixi, sermonis genere defungi semel maluerunt, vt omne mortaliũ genus, sua illa, & à se conficta, inuisibili, id autem est, propemodum nulla, ecclesia includerent, quàm vt, visibili concedenda ecclesia, seipsos planissimè ab ea exulare, confiteri, vti oportuit, necesse habuissent. Atqui hoc quoque inscien-ter ab ipsis, atque adeò peruersè esse factum, facilè intelligi potest. Cur enim toties Vitebergensem, toties Geneuensem ecclesias ipsi nominant, si Viteberga, si Geneua aspectabilis est, ecclesia non est? Quid autem? An verò ignorant, spiritum sanctum inuisibilem ipsum, posuisse visibiles Episcopos in grege dominico visibili, qui regerent ecclesiam Dei? Quid ita? nisi vt eam, quæ ex visibilibus constaret, & à visibilibus regeretur, visibilem quoque esse ostenderet. Neque enim vt inuisibili ipsi, ecclesiæ auctori, conseruatori, domino, visibiles sibi constituere vicarios non erat difficile, ita contrà visibilibus ipsis villicis atque vicariis, inuisibilem ecclesiam regere commodum esse poterat aut opportunum. Imouerò erat incommodissimum: neque id villicis tantum & vicariis ipsis, qui regerent, sed gregi quoque ipsi qui regeretur; atque haud scio an huic multò etiam magis. Quò se enim grex ipse aspectabilis sub noctem, requietis causa reciperet, quouè aut ab imminente tempestate, commoditatis gratia se subduceret, aut lupo insectante, securitatis ergò confugeret, si ecclesiam ouile suum cernere non posset? Et ne de grege tantum vni-

tum vniuerso loquamur : quid si pauci quidam , ex iis qui in eodem censentur grege , alter in alterum , vt fit , iniuriosus existeret , quid agerent ? Inter se , inquires , disceptarent. Atqui iam fecerunt ; disceptarunt. Arbitros , inquires , adhiberent. Adhibuerunt , nec hilum tamen profecerunt. Quid agerent ? quid agerent ? Ad ecclesiam , inquires , referrent. Audio. Sic enim Christus ipse iubet. Ad quam autem ecclesiam referrent , quæso ? ad eamné quæ cerni non posset ? At quomodo quis ad eam confugeret , quoué modo eam alloqueretur ; quæ omnem oculorum obtutum effugiat ?

Numné inter densas umbrosa cacumina fagos
veniret ; ibique iniuriam , quam acceperat ,

Montibus & syluis studio iactaret inani ?
Numné vt illa nescio quæ , apud nescio quem pòetam ,

Cælo atque terræ suas proloqueretur miseras ?
Sed nos hæc commenta inuisibilis ecclesiæ hæreticis relinquamus ; & simpliciter , vbi Apostolos , vbi prophetas , vbi doctores , vbi gubernatores , & reliquos eiusmodi præfectos diuinitus positos viderimus , ibi ecclesiam esse , & vel ex eo ipso , oculis cerni posse , nobiscum statuamus , ad eamque eiusmodi ecclesiam querelas nostras deferamus. In ecclesia enim profectò positos esse eiusmodi præfectos , testatur Apostolus. Quod si est , vt est , equidem pastores fortassis ipsos , pro pastoribus interdum non agnoscere , per summam nostram proteruiam & contumaciam , poterimus ; vbi autem pastores sint , ibi ecclesiam non esse , nunquam profectò cū ratione dicere poterimus. Paulus alicubi ignotum se de facie fuisse Iudææ ecclesiis profitetur : ciné tu autem ignotas vicissim de facie ecclesias fuisse putas , qui eas & nomet , & toties adeat , & Euangelium cum illis conferat , & dextras iungat ? Augustinus nonnusquam , in sole tabernaculum diuini illius gigantis positum esse , dum ex psalmo recitat , dictum id ad ecclesiam transferre non dubitat. Vt mihi sanè Solem de mundo deripere , aut certè inuisibilem ipsum

ipsum esse dicere videantur, qui ecclesiam inuisibilem esse
aiant. IN SOLE enim profectò POSUIT dominus TA-
BERNACVLVM SVVM ecclesiam. In quo sole? equidē
vel in illorum hominum splendore, qui, sicut luminaria in
mundo, ita prærogatiua functionis suæ, in ecclesia Dei
prælucent, in medio ethnicae nationis prauæ & peruersæ,
ἡ ὁ γοῦ ζωῆς ἐπέχοντες, vt ait Paulus ad Philipenses; hoc autem
est, vicem atque rationem, &, vt planius id quod volo ex-
primam, præstantiam omninò animæ, atque ad eò mentis
ipsius referentes, in hac ipsa compage totius mystici corpo-
ris, quod est ecclesia; vel certè, quod idem penè est, In so-
le, id est in diuina illorum ipsorum, successorumque illorū
claritate, quibus ab ipsomet domino in Euangelio dictum
fuit. Vos estis lux mundi. Quorum mihi quidem prope-
modum vtrumque, pastores illos & doctores significare
videtur, quos ascendens Christus in altum, ecclesiæ suæ
dedisse perhibetur. Qua quidem etiam ex ratione, opportu-
nissimè illud in eodem illo Euangelii loco illatum fuisse
videtur, quod ibidem statim à Christo domino dictum fu-
it de ecclesia, non posse ciuitatem abscondi in vertice mō-
tis positam; neque lucernam vnquam eo consilio accen-
di, vt accensa sub modio delitecat, sed potius locari super
candelabrum, vt luceat omnibus qui in domo versantur.
Ita sanè vt non magis pastores ipsi & doctores in ecclesia
esse positi, quod dicit Apostolus, quàm, quod ait psaltes,
ecclesia vicissim ipsa in eis, ceu in quibusdam mundi soli-
bus, collocata esse videatur; vel potius, vt ipse disertè lo-
quitur, in sole; & vt Christus in Euangelio, in vertice, tan-
quam in vno. Mala est enim multitudo principū. ἔιστοὶ καὶ ἡ ἀρχὴ
ἡ ἐκκλησία. Quæ mihi sanè omnia totidem videtur verbis expressis-
se vnus Cyprianus, cū scribens ad quendam dicit, & Epi-
scopum quidem in ecclesia esse, & ecclesiam rursus in Epi-
scopo sitam videri. Nam & fundamentum profectò eccle-
siæ, in ecclesia non esse non potest, & ecclesia rursus ipsa, nō
benè po-

bene potuit, nisi in suo fundamento, extrui & exædificari. Videtis, amici, quò nos ipsa rerum series deduxerit; quam quidem dum sequimur, eò sensim perducti sumus, quò quasi non cogitabamus hoc tempore peruenire; vt fundamenta scilicet ecclesiæ esse intelligeremus pastores ipsos & doctores nostros, diuinitus in ecclesia positos & constitutos. Quod ipsum quoniam diuinum donum est, maxime fanè beneficii loco est reputandum. Sed de his satis. Nec de his solum, verum etiam de illis omnibus, quæ ad illius quadrati ecclesiastici à nobis designati fundamenti rationem pertinere videbantur. Quæ quidem cum hoc ipso, quòd fundamenta sint, debeant nobis esse charissima, tum aliquanto etiam chariora, quòd eiusmodi sint, quæ ad communionem & participationem sui, hæreticos non admittant, catholicos admittant solos. Etenim quid aliud causæ esse dicemus, cur hæretici, dum signa & notas illas studiosè persequuntur, quibus veram, vt putant, ecclesiam circumscribunt, hæc ipsa, quæ diximus, maximarum rerum pondera, neq. recensent ipsi, & certè à nobis allata in medium, repudiant? Quid? nisi quòd, si ea semel pro signis ecclesiæ reciperent, statim fateri cogerentur, ecclesias suas, quæ tantorum & tam illustrium diuinorum beneficiorum exortes sunt, in ecclesia vera non posse numerari. Quod cum ita sit, vt hæretici ad earum rerum communionem minime possint pertinere, quæ res in ecclesia fundamenti obtinent rationem, constat equidè, ipsos non modò in fundamento à nobis discrepare, sed etiam fundamentum tã ecclesiæ, quàm doctrinæ suæ habere propemodum nullum. Ex quo ipso sequitur etiam, vt quemadmodum qui in nostra ecclesia sit, hic super firmam petram fundatus sit, ita qui sit, aut esse velit in illorum synagogis, hic nihil habeat, cui tutò insistere atque inniti posse videatur. Quæ quidem omnia accuratius cõsiderata & expensa, sicut multos, ne ab ecclesia exciderent, tenuerunt, ita nihilo pauciores

abreptos

abreptos iam & aberrantes, ecclesiæ restituerunt, & ex di-
uturnis erroribus reuocatos, in certissima rursus ecclesiæ
statione collocarunt. Restat igitur, vt quoniam hæc, vt po-
tuimus absoluiamus, reliqua quæ supersunt, vti cœpimus,
persequamur; quæ ipsa non minus multis adiumento fu-
isse comperimus, ad euitandas vel contemnendas insidias
hæreticorum. Et quidem ab his quasi incunabulis ac fun-
damentis ecclesiæ, ad illos iam, quos dixi, parietes, & co-
lumnas, & omninò ad sublimiores huius ipsius ædificii
partes, non tam corpore, quàm animo collustrandas, nos
ipsos attollamus. Quæ quo altiores in ipso ecclesiæ ædifi-
cio partes obtinent, hoc & ipsa quidem magis conspi-
cua sunt, & structuram quoque ipsam ecclesiæ
ipsius, bene ac firmiter in fundamentis
cōstitutam, magis atq. magis con-
spiciuam reddunt.

ANDR.

PATRICII NIDECICI

DE ECCLESIA VERA ET FALSA.

LIBER II.

Qui est de parietibus & columnis
ædificii ecclesiastici.

CAP. I.

Biblia catholica L x x. interpretum.

*Post fundamentum ædificii ecclesiastici, de parietibus & columnis
est agendum.**Parietes & columnæ ecclesiæ sunt quatuor, Biblia, Patres, Con-
cilia, Traditiones.**Primus paries est, Bibliorum ipsorum.**Ecclesia nostra recipit Biblia sancta & veneratur.**Libros etiam omnes Bibliorum servat & tuetur.**Una conuersione Bibliorum, quæ olim facta est à L x x. viris,
est contenta.**In una unius conuersionis interpretatione acquiescit:**quæ ipsa est omnium veterum theologorum communis.**Nos quoque ipsi ecclesiam in iis rebus sequi debemus.**Locus Deuteron. de libro legis à sacerdotibus desumendo.*

Lacet igitur, quoniam fundamentum
ipsum ecclesiæ, saxis quatuor ad solidi-
tatem muniuimus, eademq. saxa ista,
quasi signa & notas totidem esse ostē-
dimus, quibus vera ecclesia insignita,
facile ex fundamento ipso à non veris
ecclesiis internosci posse videatur. His
inquam, absolutis, placet deinceps, operis ipsius nostri pro-
sequendi

sequendi gratia, totidem siue parietes, siue adeò columnas excitare, quæ lapidibus illis innixæ fundamenti, ecclesiam & sustineant, ne corruat, & sepiant atque muniant, ne dilabatur, neque etiam cuius facta peruia, ex domo ipsa casta ac pudica, fiat caupona latronum & spelunca ferarum; sed potius vt ita vndique apta nexaque sit, vt specie quidẽ structarum maceriarum istarum, hortũ nobis veluti quendam conclusum, & furibus bestiisque inaccessum referat, atque repræsentet. Statuamus igitur has macerias eius, vel hos parietes, & has columnas quatuor, illas esse. Biblia, Patres, Concilia, Traditiones. Quas nos quidẽ ecclesiæ nostræ catholicæ notas omnes esse appositas, vbi quæserimus, inueniemus; in aduersariorum autem singularibus, quotquot sunt, ecclesiis, vix interdum vnam earum inueniemus; & si quid, vix omninò alteram; omnes autem profectò ne vix quidem. Etenim Bibliis exceptis solis, quæ tamen etiam ipsa quàm indignè ab istis accipiantur, & tractentur, paulò post suo loco dicemus, equidem quot verba præterea, ex iis, quas modò dixi, ecclesiæ notis, effatus apud hæreticos fueris, totidem angues horribiles de improviso pedibus eorum obieceris. Ita sunt illis hæc ipsa patrum, conciliorum, traditionum sanctarum nomina planè insuauia & iniucunda, res autem ipsa detestabilis etiam & execranda; cum contrà ecclesia ipsa nostra catholica sponsa Christi, & in thecis atque armariis suis sedulò hæc conseruet, & in quodam quasi mundo suo muliebri libenter admodũ numeret, atque adeò in deliciis etiam habeat. Audiamus enim regem illum prophetarum, quid dicat. Astitit regina, inquit, à dextris tuis. Quo ornatu, quæso? IN VESTITV, inquit. Hoc primum. IN AVRATO. Hoc secundũ. CIRCVMAMICTA VARIETATE. Tertium & quartum. Vt vestitus quidem nomine, quemadmodum mea fert opinio, biblia ipsa; deaurati autem appellatione, patres ipsos deotasse videatur; circumdatam autem varietate cum di-

cum dicit, concilia penè & traditiones innuere voluisse videatur. Sed nos, vt dixi, singula hæc cum singulis hæreticorum conferamus; sic tamen, vt quæ sunt prima, prius explicemus. Ante omnia igitur, ecclesia ipsa catholica, sanctum hoc & diuinum donum BIBLIORVM, & scripturarum sanctarum, sancta quadam ac summa cum veneratione recipit; & quoniam omnes scripturas illas instinctu afflatuque diuino intelligit esse generi mortalium, ad spem salutis æternæ traditas & tributas, quibus, vt Apostolus inquit, & doctrina religionis proponi populo, & hostes ipsius coargui, & maledicta eorum in religionem, corrigi atque emendari, & omninò omnes, in iis, quæ ad colendam iustitiam pertinent, rectissimè institui posse videantur, idcirco eas omni debita pietate amplectitur. Hoc primum. Quid deinde? Etiam. Libros omnes eorū bibliorum, quos recipit, diligenter omninò seruat ac tuetur, & vt supra dixi, tanquam depositum fidelissimè custodit; ita quidem, vt quos semel diuinitus nacta & adepta est, non perdiderit ex eis quenquam, sed ita asseruarit, vt inde ad hæreticos quoque ipsos, nec aliunde, quod ostendimus, peruenisse videantur. Hoc secundum. Quibus quidem duabus suis actionibus, illorum hominum insipientem admodum palatum detestatur, vel potius infano & diabolico eorum furori magnopere occurrit, qui, (sunt autem hi quoque ex genere quodam hæreticorum nostri temporis) tanto scripturarum sanctarum odio exarserunt, vt eas non ab oculis tantum suis, sed etiam è conspectu ipso totius terrarum orbis, magno studio remoueant, & extinctas prorsus, atque è medio sublatas esse cupiant. Et recipit igitur scripturas sanctas ecclesia, & easdem seruat ac tuetur. Sed quoniam id ipsum synagoga quoque interdū vel facit, vel certè facere se simulat, (Hæc est enim ferè esca, quā illa, hamo ipsi letifero inductā, solet ignauis atque insullis piscibus obicere: & hic est, vt superius diximus, quasi quidam vestitus illius, &

Q iij

quasi

Andr. Patricii Nid.

quasi operimentum illud ouile, quo induta hæc ipsa synagoga, solet se plerumque conspiciendam ouibus christi-
anis exhibere, vt eos tanto facilius fallat, & deinde in mo-
rem lupi, laniet ac dispergat) iccirco duo item alia facit ec-
clesia: quæ mihi multò etiam ipsa maiora esse, & multò
maiorum rerum momenta continere, nec ferè, quod ca-
put est, cum hæreticis communia esse videntur. Vnum,
quòd, vti quidem semel accepit de manibus Apostolorum
Biblia, à septuaginta ipsis interpretibus ex Hebræo conuer-
sa in Græcum, (hac ipsa enim Bibliorum cōuersione, ipsos
quoque Apostolos vsos fuisse, non difficulter ostendi po-
test, ex iis quæ in nouo testamento citantur per Apostolos
ex veteri desumpta) ita hac eorum translatione perpetuò
vtitur. Alterum, quòd, vt illa sunt vno modo atque ratio-
ne, ab omnibus illis Lxx. interpretibus conuersa, ita ipsa
quoque, vnā iis atque eandem sententiam attribuit, hau-
stam ex vnanimi omnium catholicorum theologorum
consensione. Et vt illis prioribus duabus rebus, hostes ferè
suos atque inimicos ipsos Bibliorum sanctorum crudelio-
res, iugulat, qui in librorum illorum vitam videntur quasi
conspirasse, ita his rursus duabus posterioribus, nobis po-
tissimum, qui sumus eius ciues atque liberi, magnopere &
ex animo consulit. Consulit autem, tum quòd hac ratione
viam hæreticis, quam alioqui, insidiosis suis præstigiis, do-
losè ad nos affectare videtur, strenuè præcludit, tum quòd,
prouisis ad eum modum, & munitis iam nobis, facilè dein-
de animis nostris & consensionem in diuinæ religionis do-
gmatibus instillat, & hoc ipso beneuolentiam quoque ac
charitatem inter nos mutuam, tum inchoat ab initio, tum
verò etiam alit inchoatam. Quod quidem vtrumque non
solum mirum, sed etiam planè miserum in modum discer-
punt ii, qui suis ipsorum distractis in diuersa studiis, ipsas
quoque distrahunt mentes aliorum: dum nec libros quidē
Bibliorum sanctorum, aut vllos, aut omnes, aut etiam ve-
rè & ex

rè & ex animo recipiunt; nec in iis quos recipiunt, vna linguarum conuersione vtuntur; neq. adeò, si fortè vnquam, quod fieri vix potest, in vnâ eandemq. conuersionem consenserint, verborum illius cōuersionis sensum aut satis callent, aut fideliter tradunt; nec deniq. in suo illo, quē tradūt, sensu, peruerso quidem ipso, & vt leuissimè dicā, alieno, aut sibi satis constant, aut consensum ecclesiæ, vlla ex parte reuerentur. Quod igitur olim Deus Opt. & Max. per Mo- sen in Deuteronomio, omnibus Israëlitarum futuris regi- bus, magna cum auctoritate videtur præcepisse, vt post- quàm in reges lecti fuerint, inque regio folio confederint, ante omnia legem ipsam exhiberi sibi postulent, quam as- fiduè intueantur; nec verò legem quamcumque, aut vn- decumque descriptam, sed descriptam tantum de ipso sa- cerdotum Leuitici generis exemplari; idem nos, vel tantò etiam magis, quantò inferiores regibus nos esse intelligi- mus, præceptum nobis esse existimemus, ne quos alios Bibliorum sanctorum libros aut aucupemur ipsi vndeli- bet, aut verò obtrudi nobis vltro patiamur, quàm libros de ecclesiæ sanctæ manibus acceptos, & ad vsum, vtilita- temque nostram, in maximè fidelibus ipsius scriniis diligē- ter hætenus conseruatos. Nam exotica quæ sunt, ea vim illam boni naturalis retinere non possunt, quin aut veri aliquid non edant, aut falsi etiam admisceant, aut in toto denique ipso genere, permulta, tum in verbis, tum in sen- tentia ipsa corrumpant ac deprauent. Deinde autem eam potius ecclesiam amplectamur, quæ sanctos hos libros constantissimè asseruat ac tuetur, quàm illam, quæ eos vel omninò non recipit, vel non ex animo recipit, vel certè vtcunque receptos con- torquet planè & inquinat.

CAP. II.

Biblia ab hæreticis aut contempta,
aut pessimè tractata.

*Hæretici qui minus violenti sunt, ii scriptũ bibliorũ retinent quidẽ,
sed retentum, partim variis conuersionibus peruertunt.*

*partim diuersis interpretationibus, vel committendo
inter se scripturas, vel ex certis dubias reddendo, contaminant.*

Hic loci scripturæ expendũtur. Gen. Eritis sicut dii &c.

Euang. Hæc omnia tibi dabo &c.

Violenti hæretici tollunt scripturas è medio ipsas.

idq; vel ex parte: vt nonnullos scripturæ libros, vel ipsorũ librorũ capita.

vel omninò: vt scripturam ipsam vniuersam.

Gradus hæreticorũ ad præcipitium.

1. *Biblia perperã cõuertere.*

2. *pẽius interpretari.*

3. *pessimo consilio abiicere.*

Hæreticorũ discipuli bibliorũ ignari.

Nos scripturam primũ ipsam à catholica ecclesia desumamus.

Deinde sensum eius scripturæ à spiritu ecclesiæ S. perquiramus.



Tenim quis est, qui nesciat, eò infantiæ,
furorem istorum per id tempus pro-
cessisse, vt ne à Bibliis iam quidẽ, quo-
rum apud eos nonnulla vtique esse vi-
debatur religio, admodum tempere-
tur? Quæsitæ enim prò dolor ratio ne-
faria est, atque etiam vtinam inuenta
ne esset, tam corticem earum quàm medullam, id autem
est, tam scriptum quàm sententiam arrodendi, arte quidem
& conatu diuerso. Interdum enim illi vtrumque retinent,
tam scriptum quàm sententiam: sed quod retinent, idem
illud retinendo, inquinant, vt dixi, atque contaminant; in-
terdum autem ne retinent quidem: sed scriptum illud, se-
dem sen-

dem sententiæ, sub quo, quasi sub quodam cortice, sententia, quasi medulla delitescens continetur, aut membris illud mutilant, aut partibus principalioribus detruncant, aut totum cum ipso etiam vestigio interimunt & extinguunt. Quorum in altero, vestimentis se ouium amictos esse ostendunt, in altero luporum præditos natura atque ingenio; quod vtrumque in hæreticis omnibus, Christus dominus, diligenter, vt diximus, esse monuit obseruandum. In priore enim illo, cum & scriptum retinent, & scripto ipsi sententiam aliquam attribuunt, vestitum sibi mehercule ouium accommodant, vt co tecti, facilius oues incautas fallant atque decipiant; in hoc autem posteriore, cum aut omnino, aut magna ex parte, illa tollunt, quibus & scriptum continetur & sententia, tum mihi iam non arte neque simulatione tecta vti, sed luporum in morem, vi omnino aperta atque crudelitate tyrannica rem agere videntur, de qua posterius loquemur. Nunc, quod dixi, inquinari ea ab iis & contaminari retinendo, id duorum ferè generum videtur esse. Vnum, cum scriptum ipsum, quod retinent, Bibliorum sanctorum, multis suis & variis conuersionibus sic peruertunt, vt illud quicquid est, ad nihil aliud quam ad fucum modò hominibus faciendum, retentum esse videatur. Quod quidem facile verum esse agnoscet, qui secum modò in memoriam redierit, quantulo temporis spacio, pro vna illa Lxx. virum conuersione, quæ tot seculis in ecclesia catholica vixit, ipsi plus penè quam Lxx. Bibliorum conuersiones nobis pepererunt; & pro vna atque vniformi eorum ratione, varia quasi & diuersa Bibliorum genera substituere non dubitauerunt. Quid, quæso, vt agerent? fucum vt facerent. Alterum cõtaminandi Biblia genus est, cum illa ipsa scripti ipsius, quasi cutis ac coloris deformatione non contenti, quæ fit verbis ipsis scripturæ variè pro arbitrio conuertendo, ipsum denique iugulum petunt sanctarum scripturarum, ipsam dico sententiam, quæ

R

scripto

scripto ipso continetur; idque etiam non sic, ut nullam statim esse dicant, tunc enim profectò si nulla esset, nec petere eam possent telis suis, nec ad fallendum alios adhibere, sed sic, ut quæ recta & germana est, eam scholiis suis ac commentariis peruersissimis, de industria infirment, commutent ac euertant. Quo quidem in genere etsi multa cuique vltro in mentem venire certò sciam, repetenti secum hoc loco, quot & qualia illi scholia, tum in inscriptionibus capitum, tum in oris & marginibus librorum Biblicorum addiderint; quos ad sensus, & ad quàm varios, ab vno; ad quàm diuersos atque contrarios, ab æquabili atque perpetuo; ad quàm falsos atque impios à vero atque salutari, suis quibusdam commentariis rem omnem traducere studuerint; ita in vniuersum cœlum terræ permiscentes, ut omnia tanquam ebriis, sursum ac deorsum agi atque ferri viderentur. Ego tamen, quod ipse nuper adeò, cum summa mea admiratione cognoui, nec, ut arbitror, sine multorum admiratione efferre potero, id hoc loco prætermittere nec possum, nec debeo. Illorum quidem quatuor duntaxat verborum domini, *HOC, EST, CORPVS, MEVM*, interpretationes, ingeniis insanorum istorum & turbulentorum hominum confictas, non quatuor solùm esse, ut essent quot verba tot sententiæ; nec esse bis quatuor, nec quater quatuor, nec decies quatuor, nec vicies quatuor, nec quadragies quatuor, sed hoc etiam amplius, quinquagies quatuor; ut quidem sunt, non à me, cui hæc persequi minimè vacat, sed ab aliis hominibus integerrimis numeratæ, & in ipsis etiam istorum libris, quasi in quibusdam cubilibus, nominatim commonstratæ. In qua ipsa scripturarum sanctarum interpretatione sua, tã varia & multiplici, & quod caput est, planè inconstanti, nulla se obstringi verecundia existimauerunt, quominus scripturas aut inuicem inter se quasi committerent, atque ita altera alteri exitium molirentur, aut certè scripturæ ipsi exploratæ & minimè

minimè dubiæ, dubias planè & incertas interpretationes affingerent. Atque vtrumque, quod dixi, ex vetere est diaboli arte desumptum: qui & scripturas quidem ipsas hostiliter committere, & verbo ipsi certissimo diuino dubiam suam interpretationem attexere, quoties tempus occasioque tulit, minimè vnquam, in omni præteritorum seculorum antiquitate dubitauit. Mitte te deorsum, inquit belua, illa ad Christum dominum. Quid ita? Scriptum est enim, inquit, Deum angelis suis custodiam tuam demandasse. Malignè. Neque enim hac scriptura ritè abuti potuit, ad vltro tum appetenda tum accersenda pericula; quando eiusmodi proiecta audacia atq. temeritas, Dei prouidentiam, Deumque adeò ipsum, proteruè admodum tentare, ei que illudere dicatur: quod apertissimè alia scriptura, & grauissimè prohibetur. Verùm sic solet ille quidem. Quid illud alterum, & quidem multò vetustius? De fructu ligni, inquit Eua ad serpentem, quod est in medio paradisi, præcepit nobis Deus ne vesceremur; ne fortè moriamur. Hæc illa. At serpens ille malignus Leuiathan affingit euestigiò interpretationem. Non hoc est, inquit: sed scit Deus, in ipso escu vestro fructus tam delicati & tam iucundi, oculos vestros apertum iri, vosque adeò ipsos tanquàm nouitios quosdam & repente factos deos, Deo ipsi similes futuros, insitã scilicet habentes in animis vestris notitiam quandam absolutam & perfectam boni æquè ac mali. Quæ quidem interpretatio, confestim non modò vim ipsam mandati diuini eneruauit, sed etiã Euam ipsam matrem, & omninò parentes ipsos nostros, de omni illo innocentia & immortalitatis statu deturbauit, & in hac ipsa, in qua versamur, miseriarum valle collocauit. Ita & tunc quidem mandatum, quod erat ad vitam largiendam institutum, inuentum est mortiferum & exitiosum, & deinceps semper, vbi modò litteræ ipsæ sanctæ, quæ natura sua sententiam sanctitatis, & vitæ totius plenissimam, ceu diuinum quendam odorem

continent, adulterinis hæreticorum interpretationibus fuerint deprauatæ, confestim suauissimum illum, & vt ita dicam, vitalissimum odorem amittere, ac tetrum quiddam, & quasi mortiferum concipere videbuntur. Nimirum scriptura omnis vt ventus est, qui vnus & idem existens, alium ex puro loco, alium ex impuro lacu odorem afferre secum solet. Quo autem tetrior est is, qui vitali cibo clàm insidiosè vitiato, quàm ille, qui letali apertè præparato veneno, hominem interimit, hoc nos quoque immaniolem & sceleratiorem ducere debemus eum, qui salutaribus diuinorū oraculorum perscriptionibus, ad pestiferam & peruersam interpretationem detortis, occidit, quàm eum, qui aperto quasi Marte, diris & incantationibus ad hominum perniciem institutis, mortes procurat sociorum. Et item. quo scelestior est, qui ex insidiis, quàm qui vi aperta obuios trucidat: & denique quo crudelior, qui animos, quàm qui corpora interimit, hoc planè nequior ille putandus est, qui sub specie diuinorum oraculorū, mortem & quidem sempiternam, innocentium hominū animis machinatur. Quid ita? quia hic quidem, qui gladiatorio ad nos animo affectat viam, cauèri vtique ac vitari potest; ille autem, qui per occultas & minimè suspectas insidias tollit homines, quo magis latet in illo simulatæ religionis nomine, hoc ad nocendum accedit non solum promptior, sed etiam & tectior, & commendatior. Quo sanè in genere, vel ipsum illum, quem dixi, intueamur, artis istius exitialis principem, & quasi architectum diabolum; qui quidem, dum olim, in locis illis solitariis & desertis, cominus ageret cum Christo domino, nisi ante omnia vestitum illum ouium prætendisset, SCRIPTVM EST, inquit, & nisi se primum, hoc eiusmodi sermone, sermoni bonorum & religiosorum virorum similimo, in quendam quasi lucis angelum transformasset, vix profectò, aut etiam ne vix quidem, postea se tam apertè lupum, vel potius tam manifestè angelum sal-

lum Satanæ exhibuisset, vt auderet deinceps Christo dicere, Hæc omnia tibi dabo, inquit, si procidens adoraueris me. O vocem sacrilegam. O impietatem execrandam. Iuuat hoc loco, iuuat, antequam vltius progrediamur, obiter intueri, & cum animis nostris quammaximè possumus expendere, in quem tandē lupum & quantum, ouina illa pel- lis, in quam se Satan pro illo tempore induerat, euaserit; vel potius quem lupum & quàm infestum, intus aluerit; vt ex vno magistro omnes discipulos, & ex vno crimine, omnes eiusdē criminis affines, tanto & pressius cognoscere & diligentius cauere posse videamur. Audet, audet, non iā olla, aut vas aliquod luteum, in ipso fictoris sui conspectu apparere, & hiscere; sed audet titio ille infernalis, cui iam inde à primo rerum omnium exordio, cum vniuerso illo tetrismo apparitorum suorum grege ac numero, sempiternus est ille inferorum ignis accensus & præparatus; audet, inquam, propius pedem conferre, & in os dicere. At cui, quæso? Præstanti ipsi ac præpotenti rerum omnium domino, effectori, parenti, moderatori, arbitro; qui se fecit, qui quæ omnia fecit, quæ in his terris constituti circum- quaque videmus, quæque etiam non videmus. Quid au- det dicere? O vocem, omni omnium illarum linguarum execratione dignissimam, quæ eam vnquam ausint quomo- documque vsurpare. Audet dicere ambusta ista fudes, & titio, vt dixi, infernalis, suo rerumque omnium domino. Huc, huc, procide, inquit, supplex, ad pedes istos meos in- faustos & infelices, omnibus & flagitiis patrandis destina- tos, & pœnis simul ac suppliciis æternis luendis deuotos. Procide, procide, inquit: & cultum illum, tibi vni ab omni- um mortalium genere debitum, in me vilissimum simul ac nequissimum mancipium transferens, & te ipsum quasi na- tura ac maiestate diuini tui numinis expolians, meq. adeò illa vestiens, ac omni gloria & honore coronās, adora, ado- ra me, inquit. O vocē plusquàm Tartaream, ô vocē plus- quàm

quàm omnibus Erebis dignissimam. Atque hoc quidem, quod nunc audet stigmatias iste, infinitis partibus maius est, & atrocius, si conferatur, illo ipso, quod olim ab ipso statim ortu suo, idem hic leuissimus transfuga, per summam suam impudentiam ausus fuisse perhibetur, cum diceret, "Conscendam, inquit, super astra, & ponam atque erigam in Aquilone sedem meam; atque ita sublimè elatus, reddar æqualis sublimi illi & excelsò, qui in altis habitat, quiq̃ue partes mundi & tenet, & numine adeò suo complet altissimas. Longè hoc, inquam, illo atrocius est. Quid enim? Ibi quidem fremit modò aduersus Deum, & meditatur secum inania; hic autem in voces iam erumpit sceleris & sacrilegii plenissimas. Ibi, satis habet rapinam modò illam arbitrari, & mente tantum atque cogitatione secum voluere, qua Deo æqualis esse queat; hic se nebulo non æqualem Deo facit, sed fert planè superiorem. Ibi, futurum duntaxat tempus spectat, à præsentì abstinet; hic, euestigiò in ipso fœdissimo conspectu suo, procumbere vult cœli ac terræ dominum. Ibi, de absente hero loquitur seruus nequam contumacius; hic furcifer præsentem præfractè & contumeliosè alloquitur: vel, vt planius dicam, non tam alloquitur, quàm præcipit, & tantum non pro imperio mandat. Ibi, temeritate potius quadam ductus, quàm elatione aliqua animi subnixus, quæ esset digna imperio, non dicit, iubebo poni à meis & locari sedem meam: sed dicit, ipse eam manibus meis ponam, vel ipse conscendam, & ipse folium hoc meum exaltabo, idque adeò, superis inferisque omnibus inuitis, vltro occupabo, nec in eo aliorum operis præstolabor, vt me in folio meo reponant, & federe faciant. hic autem quid? Tu, tu, inquit, per teipsum, fili Dei altissimi, pone hanc ipsam sedem meam; & subiiciens non solum humeros, sed etiam omnes istos sacrosanctos artus tuos, quos mortalium tuorum seruandorum causa induisti, pedibus hisce nefandis meis, me in ea, ad quam semper aspiravi,

aspiravi, maiestatis fede, libens ac volens colloca. At vbi tandem, quæso, vult mastigia iste collocari? Est enim id quoque audire operæprecium. Olim quidem temporibus illis præantiquis, Aquilonis tantum nescio cuius latera videtur affectasse; hic, iugulum ipsum petit, & ceruices domini, in quibus maiestatis suæ solium figi ab eo velit ac locari. Ibi videlicet relinquit tamen deum pristino loco suo, se modò vtrumque ipsi opponere, & ex aduerso locare conatur; hic deum de solio deturbat, sibi que ipsi, quantum potest, subiicit. Ibi, particeps tantum & socius regni vult esse; hic solus sine socio vult regnare. In summa. Ibi, inuidere magis gloriā videtur deo: hic auferre. Quid auferre? etiam magna ex parte quodāmodo iam videtur velle videri abstulisse. Quid enim est aliud, regna & imperia distribuere cupere, quod hic facit, nisi velle videri diuinam in se transmouisse gloriā? Sanè ab initio sic non fuit. Etsi enim, in hoc ipso nequam & impuro spiritu, statim post exortū ipsius, vt diximus, prauitas quædam est reperta, ea tamen intra certos, vt ostendimus, cancellos constitit; eousque, quò deinceps in istis desertis ac incultis locis progressam esse videmus, progressa non fuit. Vnde igitur dicemus, tantas postea collegisse vires hanc beluam, vt auderet nunc iam, id, quod illi antea ne per somnium quidem optare in mētem venerat? Nimirum illam, illam sibi viam callidissimus artifex, ad hæc omnia, satis, vt putat, communiuit, quòd pii ac religiosi cuiuspiam assumpta & assimulata persona, conatibus suis infandis, scripturæ sanctæ nomen & appellationem per speciē prætexuit, & hæc duo verba, *SCRIPTUM EST*, admurmurauit. En, quibus gradibus, à minoribus illis sceleribus, ad hæc tanta, & tam atrocia facinora, capitalis hic ascendit. En, quam viam & quā callidam ac occultam institit. Quid hæc ad nos? inquires. hæc enim, quæ narras, acta transacta sunt dudum. Quā vellem fratres mei, quā vellem. Sed, o quot sunt, his etiam nostris temporibus,

poribus, quos hoc istud hæreticū, vel potius diabolicum, SCRIPTVM EST, hoc inquam solum, SCRIPTVM EST, plane totos perdidit & euertit, & in maximos deniq. ac teterrimos totius vitæ errores, prò dolor, præcipitavit? atq. etiamnū perdit, euertit, præcipitat? Permultū igitur, & iterum atq. iterum dico, permultū pertinere ad nos existimo, nos in alieno, & quidem maximè in hoc tam illustri, quod proponitur, exemplo, etiam atque etiam intueri casus ipsos nostros; & cū videamus, quid tentatum sit in capite ipso & magistro nostro Christo Iesu, ab ipso omnis fraudis & nequitiae capite & magistro diabolo, considerare item, quid agatur cum membris ipsis Iesu Christi, hoc autem est, quid agatur nobiscum quotidie, qui sumus membra Christi, ab ipsis membris & instrumentis diaboli. Quid mirum enim, si homo homini, æqualis æquali, audeat, ad obtegendas quaslibet versutias, obiiicere ^{τὸ} SCRIPTVM EST, cū idem ausus sit diabolus obiiicere Deo? Quid mirū, si interdum homo leuis, per aliquem mentis ipsius suæ errorem, opponat id homini, eoq. ipso imponat etiam homini, quod ipsum, diabolus pater totius vanitatis, summa animi confidentia & obstinatione opposuit Deo? atq. adeò, quo ipso, si dicere fas est, imponere voluit deo? Nonne videmus? nonne quotidie cernimus? nonne his oculis assiduè intuemur, quid fiat, quæuè insidiæ tendantur bonis? & quàm sæpe illo ipso, SCRIPTVM EST, oculi eorum præstinguantur, non dico tantum ab hæreticis illis immanibus, sed interdum etiam ab his, qui hoc ipso arbitrantur obsequium se præstare deo? Prouideamus igitur, quod in nobis est, ne ab his quoque in speciem bonis viris, qui id quod SCRIPTVM EST, libenter, sed ex mentis potius quadā leuitate, quàm malignitate solent obtendere: prouideamus, inquam, ne in fraudem aliquam capitalem, verè boni impellantur. Sed de his satis. Quid dicemus de aliis? (iam enim ad illos, quos proposuimus, violentiores Bibli-
orum ho-

orum hostes veniamus) qui leuiorum istarum velitationū
omnium, harum, dico, quasi quotidianarū hæresum per-
tæsi, quæ scripturarum sanctarū cauillatione occupantur,
ad illa, quæ dicere cœperam, facinora capitalia, statim,
quò iure qua iniuria decurrunt: & scripturas ipsas sanctas,
interdū per partes, quā possunt, vellūt, interdum cum vesti-
gio planè vniuersas tollūt è medio. Per partes. Modò enim
Daniclis prophetæ quædam, & Marci ac Ioannis Euangeli-
starum quædam, ex scriptis eradunt sacrosanctis: modò
autem integros Thobiæ, integros Iudithæ, integros Esteris
libros, integram Sapientiam, integrum Ecclesiasticum, in-
tegram Baruchi prophetiam, integram Machabeorum hi-
storiam, à veteri testamento; à nouo autem, integram Ia-
cobi, & integram Iudæ epistolas, & Petri ipsius secundā, &
Ioannis secundā pariter ac tertiam, & Pauli deniq. eam quæ
ad Hebræos est, refecare non verentur. Parua loquor. Iam
enim non desunt etiam, qui cœlestium, nescio quarū, reue-
lationū recentium amici, omniū autē in vniuersum veterū
scripturarum sanctarum capitales inimici, vsq. adeò furi-
unt, vt omnes in vniuersum, quod dixi, scripturas, ad mor-
tem decretis suis adigere, & de ecclesia, quasi de ciuitate,
exterminare minimè dubitēt. Necem se afferre aiunt litte-
ræ ipsi necem adferenti. Quid? etiamné ludunt in re plus-
quàm seria? Falsam & adulteratam repudiare se inquiunt.
A quibus autē, nisi ab ipsis, & ipsorū maioribus adulterata
est? Suis opinionibus contrariam esse dicunt. Imò, suas opi-
niones scripturis esse contrarias, dicere debebant: nunc
autem ita agunt, quasi normæ ipsæ ad eorum opiniones, &
non contrā potius, opiniones eorum ad normam ipsam seu
quadrare, seu flecti debere videantur. Naso cereo eam esse
criminantur. Vos verò, amici, nimis rigido cū ferro, ad eū
cereum truncandum nasum accessistis. Non primi, inquit,
sumus qui ad hoc opus accessimus. Proles igitur, quod
fatemini, nequissimorum hominum estis, & in superiorum

S

illorum labores introistis; & cum illi ante vos, scripturam sanctam, partim libris ipsis integris, partim certis librorum capitibus, pro sua libidine, quasi mutilassent, idque etiam, quod reliquum factum erat, tum conuersionibus variis, tum interpretationibus diuersis exagitassent: vos reliquiis illis vi vitam euitare non dubitauistis, easque ad eum modum extremo supplicio mactatas, regiè & superbè ex ecclesia, decretis ipsis vestris eiecistis, atque sic quidem mensuram facinorum patrum vestrorum compleuistis. Vt ita veniat tandem super vos vindicta omnis, Bibliorum tum mutilatorum, tum perperam conuersorum, tum multò etiam peius, ad hominū intelligentiam transmissorum; quæ vos propemodum omnia suscipienda vobis esse existimauistis, contrà templum, & altare, quæ vobis omni ratione adoranda, non violanda fuerunt. Qua quidem ipsa in aggrédiunda re, iidem illi gradus nefarii, licentiæ atque audaciæ vestræ notati sunt, ad ruinam vestram præcipientes, qui in aliis item omnibus ausis vestris, fuerunt semper obseruati; vt primū videlicet aliquis vestrum existeret, qui Bibliorum sermonem bonum, malè in aliquem popularem sermonem conuerteret: tum alius deinde succederet, qui perperam conuersa peius etiam interpretaretur: postremò autem exoriretur ille, qui maxima cum ratione, omnia illa abiiceret, & semel omnibus in hoc genere molestiis minimè necessariis defungeretur. Quid enim rectius faceret, quàm cum nucleum corrosum iam atque à vermibus confectum depræhendisset, euestigiò & putamen vnà cum nucleo abiiceret, & ter quater in terram despueret, & hianti planè ore suo, nauseam illam omnibus præsentibus & intuitibus, necessariò testaretur? Hoc interest, quòd in nuce quidem vermes nucleum bonum exederunt, excrementa reliquerunt; hic autem, isti videlicet magistri vestri, per summam suam malitiam, & sibi, & vobis, fontem ipsum Bibliorum perlucidum turbauerunt, & cum turbassent,
non mi-

non minus ipsi, quàm vos quoque, qui eorum ductum secuti estis, de fece ipsa haurire nō dubitauerunt. Quæ igitur ex hæresiarcharū ipsorū fraude atq. malitia deliberata, viderentur aduersus Biblia ipsa proficisci, diximus hætenus vt potuimus. Quid cæteri, capita illa viliora, qui in hoc quidem genere malitia peccare non videntur? Illi verò, si qui eiusmodi sunt, qui in media hæresi, malitia aliqua non peccent, crassa omninò ignorance peccare videtur. Cùm enim sibi pulcherrimos in scripturis progressus fecisse maximè videantur, homines ridiculi, propter aliquot selectiores saltem sententias, pro fide aduersus opera, ex euangelio excerptas, & mente atque cogitatione compræhensas, ita sunt vel maximè præcipuorum religionis nostræ capitum prorsus rudes, vt corticem modò quendam, eorum quæ Bibliis contineantur, tenere, à medulla illa interiore, in qua sola vis boni est, procul omninò abesse, & propterea in circuitu tantum ipso ambulare, medium nunquā ferire, & nunquam quò destinauerunt, peruenire posse videantur. Non secus ac Pharisei & Sadducei quondam; qui cùm sibi pulchrè sapere, & in ipsa scripturarum cognitione satis excellere viderentur, audiunt tamen à Christo domino. Illi quidem. Euntes, inquit, discite quid sit, Misericordiam volo & non sacrificium. Isti autem hoc etiam acerbius. Erratis, inquit, scripturarum ignari. Quomodo, discite? & quomodo, ignari? Vtique ignari: quòd verba tantum, inquit, scripturarum teneatis, vim earum penitus ignoretis. Discite, autem: vt quod verbo tenetis, re ipsa aliquando tandem exprimatis; nec sitis, quod estis perpetuò, semper discentes, & nunquam ad veritatis cognitionē peruenientes. Nimirum veritas & vis omnis scripturarum sanctarum, non in litteris est, vt isti putant, aut in characteribus, sed in vi & interpretatione spiritus. At cuius spiritus? non quidem priuati nostri, multò autem minus hæreticorum, sed spiritus ipsius diuini. Vt sicut nemo omninò hominum

minum scire potest, quæ sunt hominis, nisi spiritus hominis, qui in ipso est, ita & quæ dei sunt, nemo præter spiritum dei, cognoscere posse videatur. Quem quidem ipsum suum spiritum Deus non alii quàm soli ecclesiæ appromisit. Ergo in hæreticis, quod ad Biblia ipsa attinet, nihil quartum reperiās, præter aut capitale scripturarum odium, aut meram earum calumniam, aut certè summam ignorationem. Nos autem si differre ab ipsis volumus, sicut certè velle debemus, illa duo præcipuè in hoc genere memoria teneamus. Vnum. Scripturam sanctam, nec voluntate humana allatam esse, sed à spiritu sancto profluxisse: nec humana item voluntate, sed eodem illo sancto spiritu interprete exponi oportere. Quis enim legē verius interpretetur, quàm is qui eam condidit? Alterum. Spiritum illum sanctum, diuinarum scripturarum & auctorem & interpretem fidissimum, non vni alicui priuato homini alligatum, sed ecclesiæ ipsi, verè, vt modò dixi, & maximè propriè esse appromissum. Quamobrem si quid ex scripturis puri, si liquidi, si salutaris, haurire cupimus, ne ad solas, quæso, scripturarum chartas nudas accedamus; imò si viui esse volumus, ne consulamus mortuas; si catholici perhiberi, ne alias quàm catholicas, & de manu præbyterorum catholicorū sumptas. Quin & earum quoque ipsarum catholicarum sensus scripturarū, ne à Pythonibus istis nescio quibus perscrutemur, qui litteram quidem scripturæ emortuam, & mortis ministram, tenere possunt, à sensu ipso viuo & vitali scripturarum sanctarum penitus sunt exclusi, sed relictis iis, semper in rebus nostris dubiis, certissimum totius veritatis magistrum, diuinum spiritum adeamus: eumque ipsum in sola catholica ecclesia, nec alibi, & conueniri, & inueniri posse, persuasum habeamus. Quid enim? Nunquid nos, qui in populo dei censemur, non à deo nostro responsum requiremus? num viui ipsi, à mortuis hæreticis consilia scilicet rerum nostrarum capiemus? Ad legem, inquit propheta,

pheta, ad legem; sed & ad testimonium, sed & ad testimonium. Quam ad legem, quæso? ad legem, quod satis superiore capite admonuimus, descriptam de sacerdotum exemplari. Quod autem ad testimonium? ad spiritum, dico, sanctum & diuinum, qui solius ecclesiæ catholicæ, non hæreticorum synagogæ, & doctor est, ac magister, & testis, non modò pro testimonio spiritui nostro, quòd simus filii Dei, sed etiam pro sigillo promissionum, & pro pignore futuræ hæreditatis nostræ: & omninò pro duce etiam & auctore, cùm aliorum omnium bonorum, tum ipsius inprimis veritatis, in vna, sancta, catholica, Apostolica ecclesia inquirendæ, adipiscendæ, tenendæ etiam perpetuò ac possidendæ. Quæ cùm ita se habeant, nos quidem interim ad id quod nostri instituti est, oculos diligenter referamus, & cùm diuinum prorsus beneficium esse intelligamus Bibliorum sanctorum, quibus ferè ecclesia catholica, in media huius præsentis vitæ morte viuit, in mediis etiam istis cœcæ huius nostræ ignorantia tenebris atque erroribus, regitur; demus sanè operam, vt in ea potius ecclesia persistamus, quæ Biblia ipsa, (at quæ & qualem parietem?) in ipso suo ædificio integrum ac benè munitum retinet: quàm aliam vllam quæramus, quæ vel sine hoc pariete, hiare, nosque ad eum modum, omnibus omnium bestiarum ac latronum impressionibus periculosissimis obiicere videatur; vel quæ, pro integro illo ac benè firmo pariete, pertuso vndique ac comminuto vtatur: nosque adeò si nò iam feris bestiis, atque sicariis hominibus, at certè ventis pestilentibus, vel saltem ruinæ ipsi imminenti obnoxios exponat ac relinquat. Libro enim utiq. Bibliorum tectos nos esse ab ea parte oportuit. Quod autem tantum robur libri esse potest, quod non tot conuersiones labefactent, non tot interpretationes debilitent, non tot censuræ infirmant, quot ab hæreticis ad Biblia conuellenda, certatim quasi tela quædam, assiduè contorquentur? Quæ quidem

Biblia, quando ad eum modum tractantur ab hæreticis, in eo præsertim genere, in quo vno se ipsi magnopere, præ nobis penè etiam ipsis, iactare solent ac venditare: quid expectas quid facturi sint in aliis, cum videas quid in iis faciant, quæ se pro sacrosanctis habere videri planè volunt, & cenferi.

CAP. III.

Hæreticorum contra patres & Doctores SS. indignatio.

Hæretici suo sensu scripturas interpretantur.

Ideo patrum expositiones, qui est secundus paries ædificii nostri, vel non curant: ex quo in multa incommoda incurrunt, vel ut à suspectis refugiunt, vel certe eas cauillari non desistunt, vel denique palam contemnunt.

Patres contemni non debent. tum quia doctissimi ac fidelissimi, tum quia ad sedandas controuersias maxime idonei.

Hæretici cum patres reliquerunt, ad sua ipsorum somnia delabuntur, quæ neque eruditione cum scriptis patrum conferri possunt, & tempore ipso citò euanescent.



Ixi de Bibliis, de quæ eorum interprete spiritu ipso diuino. Verum hæretici, cum non ignorent, & scripturas quidem ipsas Bibliorum sanctorum ita esse difficiles, vt ad earum intelligentiam, quemadmodum nunc diximus, sensus ipsi nostri penitus sint hebetes & obtusi; & donum præterea ipsum interpretationis earum, donum esse proprium ecclesiæ, ab eodem illo diuino profectum spiritu, à quo potissimum ipsæ quoque illæ emanarunt; vtrumque tamen vtrinque æque negligunt, & fusque

fusque deque habent. Nam & ea, quæ non intelligunt, in-
 terpretari tamen audent, & interpretationes ipsas tuas ne-
 que spiritu illo sancto auspice aggrediuntur, neque eccle-
 siæ sensu atque intelligentia definiunt, sed sic, nulla neque
 ecclesiæ expositione fulti, neque diuini illius spiritus adiu-
 mento nixi, propria interpretatione, quam quidem, de sen-
 tentia beati Petri Apostoli, ab omni prophetia scripturæ
 necessario amoueri oportuit, quicquid modò vndecunque
 arripiunt, id omne ad priuata detortum desideria, deprau-
 uant potius quàm declarant; atque hoc modo non solum
 ipsi per se, in sacrosancta adyta illa scripturarum ingredi
 non queunt, sed etiam duces ipsos difficilis & inuiui, addo
 etiam & periculosi itineris, Doctores ipsos ecclesiæ sanctæ,
 indignissimis acceptos modis reiiciunt atque aspernantur.
 Homines, in postremo illo & contemptissimo hominum
 genere positi & locati: quos Hesiodus nec per se sapere
 ipsos dixit, nec aliorum sapienter inuentis uti velle, siue
 ad vitam ipsam, tum suam, tum aliorum, rectè & lau-
 dabiliter instituendam, siue ad ingenia saltem, tum sua
 ipsorum, tum omninò elegantium quorumque hominum
 vel pascenda, vel oblectanda. Indocti planè atque instabi-
 les, uti iam pridem ab eodem illo Apostolorum principe
 sunt appellati; indocti quidem, qui lumen illud docentis
 intus, ac præeuntis spiritus sancti, de industria extinguant;
 quo doctore simul ac ductore quoque, in tantis errorum
 tenebris, verum ipsum & dispicere, & sequi, & tenere po-
 tuerunt; instabiles autem, quòd posteaquàm à columna
 illa & basi totius veritatis, ecclesia discesserunt, nusquam
 omninò, ne in ipsis quidem illis recens susceptis suis errori-
 bus, diu consistere posse videantur. Vbi enim ex illo ipso
 tutissimo ecclesiæ portu semel soluerunt, seque deinceps
 non rectoribus legitimis, patribus et doctoribus sanctis, ve-
 hendos tradiderunt, sed tetis fluctibus, ac spurcis opinio-
 num suarum tempestatibus iactandos permiserunt, tum ve-
 ro magis

rò magis atque magis, nunc huc, nunc illuc, miserè nauem
allidunt, & ad extremum, gubernaculo ipso scripturarum
sanctarum vel fracto, vel amisso, vel certè de manibus ex-
cusso, quolibet deinde, & quantumuis vario atq. etiam ad-
uerso doctrinarum vento correpti, temerè circumaguntur :
ut ita non solum velut cæci, errent & vagentur, non solum
ut illi qui sine duce sunt, sapissimè offendant, sed etiam, uti
furiosi, vltro oblatum lumen respuant atque auersentur,
nec se à sanctissimis quibusque hominibus & doctissimis,
duci ac doceri sinant; inuidi etiam & maligni, qui non so-
lum ipsi hoc tanto bono non vtantur, verumetiam alios
uti eo siue prohibeant, siue adeò minimè patiantur. Su-
spectos se viros illos habere, aiunt. Ego verò si id de suorum
temporum æqualibus, theologis nostris, æmulis istis suis
dicerent, cum quibus propriè concertatio ipsis doctrinæ
atque ingenii intercedat, minus mirarer, prudentiam etiā
fortassis illorum approbarem. Nunc verò quis non mire-
tur, eos ab illis aliquam in suspensionem vocari, cum quibus
lis ipsis nulla, certamen nullum, controuersia etiam nulla
intercedat? quis non miretur, viros à memoria quasi ho-
minum præsentium remotissimos, à suspensione istorum re-
motos non esse? & eos ipsis in eiusmodi suspensionem veni-
re, quos mors ipsa, pridem vel naturæ reddita, vel huius
ipsius, quam profiterentur, religionis causa adita, sicut de
vita planè ipsa prius exemit, quam de huius temporis con-
trouersiis nostris, aut sentire, aut diuinare saltem potuissent,
ita eos ab omni istiusmodi suspensione iamdudum vindica-
uit. Suspectos se habere aiunt. Qui quæso? cum ipsi iam
quidem voluntatem ambulatoriam illam non habeant, ut
aut in gratiam, aut in odium cuiusquam, diuersum ab eo
quod semel dixerunt, loqui possint. Dixerunt autem? imò,
quod ita litteris ad perpetuitatem consignatum reliquerunt,
ut scripta eorum non amplius pro scriptis priuatorum, sed
pro quibusdam quasi ecclesiarum actis ac monumētis pu-
blicis, pas-

blicis, passim habeantur: quibus fides, sine summa capitalis fraudis suspicione, derogari nequaquam posse videatur. Quod cum ita sit, permirum sanè est, & iterum atque iterum dico, permirum est, an potius dixero etiam periniquum, non modò ea non teri manibus istorum, sed etiam planè violari, & suspicionibus indignissimis onerari. Non enim, quod videmus, parcitur sanctitati, non eruditioni, non innocentiae eorum; vi geritur res, & furore quodam insano atque præcipiti, quando illos eorum virorum libros, quibus ducibus, ad veram scripturarum intelligentiam facili-
mè potuissent peruenire, eos ipsos omni cura atque diligentia tanquam ad necem conquisitos, aut studèt è medio tollere ac opprimere, vt ita pereat anima eorum, cum inimicis eorum; aut si non opprimere, saltem ita suppressere, vt tamen iis, cum commodum est, aduersus catholicos abutantur; aut si ne id quidem possint, tum eleuare saltem, & in ordinem quasi cogere adnituntur, vt non modò admiratores deinceps nullos habeant, sed vt vix etiam lectores ipsos. Quod planè nascentibus hæresibus nostri temporis, apertissimè ab hæreticis nostris, maximis corum studiis procurari videbamus. Nunc enim, cum ne in hoc quidem magnopere se quicquam profecisse intelligunt, vt auctoritatè librorum illorum minuere potuisse viderentur, ad cauillos cõuersi, callidas quasdam illorum interpretationes admo-
uere, & omninò varias, pro re, & tempore, & loco, machinas, vario ac mirabili quodam artificio, ad eorum qualecunque incommodum comparatas, conferre moliuntur: idque vel tum maximè, cum maximè testimoniis atque auctoritate eorum, pro catholica adductis à nobis fide ac religione, premi se intelligunt. Quo quidem in ipso genere, illa etiam veteratoria prorsus ratione vti non dubitant, quòd initio quidem non statim aut odisse se patres ipsos ostendunt, aut contemnere, sed vt facilius rudi popello persuadeant, illam etiam venerandam antiquitatem, aliqua ex
T arte

parte à se stare, auctoritatem eorum tueri se magnificè simulant, atque id quamdiutissimè possunt, omni ratione præferunt. Verùm vbi iam doctrinam eorum, in suæ doctrinæ contentiōnem veluti quandam adduci, & quasi ex aduerso opponi sibi intelligunt, tum mihi continuò aut de auctoritate eorum muti fiunt, verbis autem ipsorum, in rem præsentem productis, interpretationem aliquam, si possunt, affingunt, leuem, falsam, ineptam, putidam; aut verò, ne se diu torqueant, statim commutata velificatione, omnes quotquot sunt patres, in turbam, interdum verò etiam infra turbam coniiciunt, & cuilibet de vulgo pares, imò ne pares ferè quidem faciunt. Sic enim alicubi Luterus de Diuo Hieronymo. Hieronymus, inquit, historiæ gratia legi potest; fidei autem & religionis causa ne debet quidem. Nam de iis verbum nullum in eius scriptis reperiās; ideoque inter patres & Doctores ecclesiæ ne numeretur. Quid Origenes? Eum ego, inquit, iam proscripsi. At Christomus saltem. Ne is quidem, inquit, quicquam apud me valet. est enim tantum rabula. Quid Basilius? Monachum duntaxat esse cenſeo: cæteroquin eiusmodi hominem, què ego totum quātus est, ne pilo quidem vno putem esse æstimandum. Quem igitur pro his recipiendum esse iudicas? Eloquar, an fileam? Vereor enim, si dixerò, vt

Auditum admissi, risum teneatis amici.

Sed dicam tamen. vos risum quantum potestis comprimite. Vna, inquit Luterus, vna Melanchtonis, hoc autem est, Mei Lanschnechtonis Apologia, omne omnium in vniuersa ecclesia Doctorū genus longè superat. Quid risistis? Nisi fortè mutuum scabentes mulos. Nimirum

Labore alieno magno, partam gloriam

Verbis sæpe in se transmouent, qui habent salem:

Quod in his est. O Gnathones & Thrasones insulsiſsimos. His isti elogiis, lumina illa & cœlumina religionis ac totius ecclesiæ sanctæ, quibus mundus non erat dignus, isti, qui mundo

mundo non erant digni, afficiunt : his atque eiusmodi laudibus & præconiis ipsos prosequuntur. Quid nos eorum clientes, qui illos pro patribus patronisque agnoscimus, quique in omni doctrina nostra, libenter eos nobis, vel præire, vel certè suffragari pat mur? Nos verò illi, vocabulo, non tam contempto quàm contemptibiliter à se adiuuente, Patrologos, non Theologos videlicet appellant : & nihil aliud quàm patrum ipsorum dictata, in medium afferre quiritantur. Portenta hominum. Quid seipsos? Se quidem ipsos, planè uti germanissimos theologos deceat, nihil humanum pro diuino recipere, omnia in ecclesia, ad sola, verbo Biblia, re, insani sui cerebri deliria, conferre profitentur. Quid agitis boni viri, quid agitis? quò ruitis? siccine vos solos sapere existimatis? Quasi verò diuini illi & cœlestes viri, patres nostri, aut non super Bibliorum fundamentum, genus ipsum doctrinæ suæ ædificauerint, aut ea, quæ Bibliis continentur, minus intellexerint, aut etiam intellecta, de industria, siue tenebris obduxerint, siue adeò dissimulauerint, quorum vnum quidem à rei ipsius euidencia, alterum ab eorum maximis ingeniis, tertium autem à fide & integritate summa, manifestò abhorreat. Quid est enim cuiquam æquè tritum aut familiare, quid æquè planum aut expositum, quid æquè colendum aut venerandū, quàm sunt Biblia his, de quibus loquimur, patribus? Quibus cum vos, id quod est & ipsis conuenientissimum, & per se manifestissimum, ac verissimum, audetis velle adimere, dicite, obsecro, per genium vestrum, cui tantopere indulgetis, per vestram istam eruditionem atq. prudentiam, qua se vobiscum nemo non stultissimus conferre cupiat, dicite, inquam, si qua difficultas incidat in Bibliis sacrosanctis, uti multa eiusmodi in ipsis etiam Pauli epistolis esse, ipse quoque Apostolorum princeps atq. coryphæus, & sentit, & testatur. Dicite, si qua de rebus illis difficilibus, interpretationum varietas oriatur & existat, quónam potissimum siue nos, siue

nos, siue vos etiam ipsos, incertos ac perplexos, confugere
velitis? aut vnde vacillantibus nostris animis confirman-
dis, subsidia comparare debere existimetis? Nos quidem
ad vos medius fidius non ibimus, vt inde aut nihil, aut,
quod etiã peius est, meras pietatis offensiones hauriamus;
nec vos item ad nos, vt opinor, ituri estis. Qui enim ma-
gistri vestri sunt, ii millies errare vos malunt, quàm semel à
nobis ad salutem informari. Aut igitur suspensi vtrunque
manebimus, aut suis quisque inuentis molliter ac delicatè
indormiemus. Atqui neque vos nostris, quanquam, quod
verè dicere liceat, vestris longe melioribus, frui nos, sine ri-
su vestro permittetis, neque nos rursus, sine commiseratio-
ne, vestris vos decretis insanissimis furere in vulgus & bac-
chari patiemur. Quid igitur? itane nobis perpetuò vtrin-
que blandiemur, vt suo quisque studio delectati, conte-
mnamus alteros? aut contrà, itane semper animo erimus
dubio & suspensio, vt ne nostris quidem ipsorum decretis
magnopere niti audeamus? Quid si vtrunque non iam so-
lùm aliena contemnamus, non etiam contemni solùm no-
stra ab aliis sentiamus, sed, qui ferè exitus est eiusmodi con-
tentionum, armis sua quisque tueri incipiamus? atque ita
non modò eam charitatem discindamus, quæ sola nos fa-
cere debuit christianos, sed etiam orbem ipsum terrarum
& rempub. bello ciuili ac seditionibus inuoluamus: & il-
lis, quæ bella ac seditiones necessariò consequuntur, fune-
ribus scelestis ac nefariis omnia compleamus? Etiãne
tum, nullã de eiusmodi dissidiorum tollendorum remedio,
cogitationem suscipiemus? etiãne de rebus interdù vix
persuasus, sæpenumero autem temerè omninò arreptis, di-
gladiari inter nos nunquam desistemus? Quid? si pertæsi
tandem aliquando mutuarum dissensionum illarum, con-
gruere etiam nostras inter nos sententias cupiamus? ec-
quãnam tibi aptior & conuenientior coniungendorum a-
nimorum nostrorum ratio esse videbitur, quàm vt vtrique
viro ab

viros ab omni factionum nostrarum suspicione remotos
adeamus, sententiasque eorum de nostris inter nos dissen-
sionibus exquiramus, & eorum decretis standum nobis ef-
se existimemus? Minimè, inquiunt. Quid igitur? Ad scri-
pturas, inquiunt, ad scripturas. Rectè sanè. Erubescimus
enim nos quoq. quoties sine scripturis loquimur. Ad quas
autem scripturas, quæso? ad illasné à vobis tam in cortice
quàm in medulla violatas? ad illasné aut inuisas vobis, aut
vestrarum, tum conuersionum malignitate an imperitia
peruersas, tum interpretationum diuersitate distractas,
multis etiam librorum quasi capitibus truncatas, atque
adeò ipsis libris integris mutilatas? & denique, ad illasné,
vobis ipsis & hæreticis omnibus, non minus quàm diabolo
ipsi, vt diximus, communes? Verùm hæc interea relinqua-
mus, & optata loquamur. Quid, quæso, si de scripturarum
istarum intelligentia atque sensu, aut non planè nobis con-
stet, aut non prorsus inter nos conueniat? Quid agas? Quid
agam? Scripturam, inquiunt, obscuram, dubiam, diffici-
lem, scriptura apertiore, clariore, faciliore explicabo. Au-
dio. Sed quid, si hæc posterior, nihilo mihi priore clarior
aut facilior videatur? quid si non solum videatur, sed etiam
ita sit? Fieri non potest. Imò potest. Sed mittamus. Quid
si tu vtramque scripturam illam ita contorqueas, vt, non
quod ipsa dicat, sed quod tu velis, id eam & dicere, & sen-
tire iubeas atque cogas? Malitiæ, inquis, hoc esset. Et qui-
dem summæ. sed quid, si facias? aut quid, si etiam ego ipse
idem faciam? quod tamen sciens, profectò nunquam fa-
ciam. Sed vtrumque est, quid si aut tu facias, aut ego faci-
am? Malitiæ, inquis, hoc esset. Quid autem, (quod non est
iam malitiæ, sed, quod est aliquanto minus, imperitiæ) si tu,
quid vtraque illa scriptura velit, non assequare? Fieri non
potest, inquis. Imò potest. Sed quid, si illud, quod omninò
potest, eueniat, vt tu assequare quidem, ego verò te affecu-
tum esse, aut studiosè negem, aut saltem tacitus non cre-
dam, aut

dam, aut verò dubitem, aut certè ipse non assequar? Quid autem, vt demus cætera rectè esse, quid, inquam, si eum tibi honorem habere noluerò, quem tu quoque ipse patribus ipsis habendum esse non putasti? vt decretis mihi tuis, etiam alioqui optimis & sanctissimis, standum esse vlla ex parte existimem? sed, cùm tu tibi licuisse in animum induxeris, à communi antiquorum patrum consensu, arbitrio tuo demigrare, ego item, atque etiam multò magis, licere mihi putem iure meo, à tuis ipsius decretis nouis discedere? Atqui verissima sunt, inquies; optima sunt. Mitto. At tu me initio, non ad decreta vlla & interpretationes tuas, à scriptura velle transdere, sed ad scripturas potius ipsas vocare, videbare. Hoc age igitur. Hoc agam, inquit, & verbum Dei purum putum afferam. Verba. Nec enim in eo quoque à leuitate sua discedere norunt hæretici, vt faciant in hoc genere, quod facturos se receperunt. Sed vbi se initio, in folius expressi, vt ipsi loquuntur, verbi dei auctoritate conquiescere, hominumque interpretationes repudiare ostenderit, ad medium progressi, primùm illo ipso expresso dei verbo, quo, tanquam certissimo receptu, aduersus omnes impressiones vti, constitutum habebant, vel percelli se, vel destitui, vel certè depelli intelligunt; deinde autem eò impudentiæ ad extremum delabuntur, vt Luteriue, Caluiniue, suumue ipsorum verbum, pro verbo dei, nobis obtrudere, vel etiam præ verbo ipso dei, & æstimare, & amplecti, non vereantur. His nos igitur tam imperitis figulis, proh pudor & dedecus temporum simul ac ingeniorum nostrorum, salutem nostram commitemus? quorum, vt cætera omit- tam, tanta est leuitas, tantaque inscientia, vt cùm amphoram ab initio instituere cœperint, rota ipsa corrente inertia atque inconstantia suæ, subitò nobis vrceum pro amphora produxisse videantur? Sed de vrceo facile est. Illa eorum cœcitas, & iudicii peruersitas, omnes profectò perperam electos vrceos longè superat, quòd dum Augusti-
num, Hie-

num, Hieronymum, Ambrosium, Theophilactum, Origenem, lumina illa, vt dixi, & columina fidei catholicæ contemnunt, ac floccifaciunt, & prorsus è scholis christianorum excludunt, ad scopulos istos, quos dixi, religionis, ad Lutherum, Caluinum, & cæteros id genus, misere adhærescunt, homunciones ipsos planè indignos, qui superiorum illorum diuinorum virorum fibulam soluant calceamentorum, si eruditionem spectes; nam in pietatis comparatione, hi quidem cum illis locum habere nullum queunt; cum quantum ab ætate, tantum à reliquis omnibus eorū laudibus, planè abesse videantur. Ex quo fit etiam, vt eiusmodi peruersa illorum iudicia, non modò ratione & argumento refellantur, sed etiā confutentur ipso tempore. Nam illorum quidem diuinorum libri hominum viuunt hætenus, & tempore ac vetustate ipsa, quæ aliis rebus omnibus interitum adferre solet, indies magis ac magis roborantur; horum autem amicorum nostrorum libri, cum nullum prorsus, vt dixi, nec apertæ pietatis, nec eruditionis reconditæ genium habere videantur, cum auctoribus ferè ipsis, atque adeò sæpenumero ante auctores etiam ipsos suos moriuntur; & quæ opiniones de rebus ad religionem pertinentibus, post ipsos demum natos, natæ primū, vt ostendimus, & in orbem ipsum terrarum inuectæ extiterunt, cæ non rarò ante ipsos etiam suos fabricatores extinctos, ipsæ vltro extinguuntur. Atque hæc quidem eiusmodi temporū & tempestatum ludibria, amores sunt tamen ac delitiæ eiusdē generis hominum.

C A P. IIII.

Sanctorum patrum honos in ecclesia
catholica.

Hoc ipso quod ecclesia patres recipit, recipiendi sunt.

Patribus opus est, ultra Biblia & cathechismos, præsertim in medio hæreticorum.

Obiectio hæreticorum. Patribus non sunt tribuendi diuini honores scripturæ sanctæ. Responsio catholicorum.

Ex sola patrum lectione, multos ad ecclesiam rediisse.



Æterum quando illi ab eo, quominus tantopere se ipsi ament, dimoueri non possunt, legant sanè sua cum suis, sine inuidia, quoad libeat; ament etiam eadem quæ cœperunt, sine fiali.

Non equidem inuideo, miror magis.

Nobis ecclesia ipsa, non istos nescio quos, sed planè P A T R E S, ex omni antiquitate selectos, quos oriens, quos occidens, quos vniuersus denique terrarum orbis, summos religionis Doctores ac magistros agnouit pariter, & coluit quidem semper, & adhuc agnoscit colit atque veneratur, eos pro columinibus doctrinæ sanctæ proponit, eos denique quisquiliis istis opponit. Vtros igitur vtris anteponemus? Dicam clarius. Ecclesia catholica mater nostra, Chrysostomum, Augustinum, Cyrillum, Epiphanium, Ambrosium, Tertullianum, Bernardum, Gregorios proponit nobis. Synagoga hæreticorum, non mater, sed nouerca, Luterum proponit, & Melanchthonem, & Brentium, & Sarcerium, & Musculum, & Caluinum, & Bezam, & Zuinglium. Vtri igitur maiorem fidem habebimus? Vtros etiam vtris præferemus? Orbis quidem vniuersus, ante hos nostros quinquaginta, post mille quingentos & ampli-

& amplius à Christo nato annos, hæreticos istos non no-
rat; & tamen vitam pariter & doctrinam Christianam no-
rat. Quid igitur dicemus? Dicunt interdum. Patribus mi-
nimè opus esse; Biblia ipsa sufficere; imò catechismus
ipsum sufficere. Dicunt hæc quidem, & tamen ipsi & ca-
techismos catechismis accumulunt, & Bibliorum con-
uersiones multiplicunt, & libros præterea multos, quasi
magistros quosdam, ad sua sibi desideria còaceruant; pru-
rientes ipsi auribus, & à veritate quidem auersi, ad fabulas
autem conuersi. Quibus quidem omnibus non egerent, si
Bibliis solis contenti essent. Catechismus sufficit. Fortas-
sis: sed quasi modò genitis & lactentibus, non adultis. Bi-
blia sufficiunt. Sufficiunt fortassis: sed adultis, sed solo la-
cte ecclesiæ enutritis, non iis qui à materno ecclesiæ vbere
abrepti, tetro hæreticorū veneno sunt imbuti. Biblia suf-
ficiunt. Sufficiunt fortassis: sed Augustinis, Ambrosiis, Chry-
sostomis, Gregoriis, aut simili ingenio & doctrina præditis;
non iis, qui nisi præmansum, in viscera traicere aut conco-
quere non possunt. His enim profectò Patres & Doctores
ecclesiæ opus sunt. Quid enim? an verò ignoramus fratres,
id quod Paulus ad Ephesios scribens, litteris reliquit con-
signatum, Doctores ipsos & pastores, non minus quàm A-
postolos, & prophetas, & Euangelistas, datos esse diuinitus
ad consumationem & perfectionem sanctorum? Quomo-
do, quæso, AD PERFECTIÖNEM? Nimirum vt non sta-
tim perpetuò, in omnem vitam nostram, conditione illa
puerili contenti simus, primis ipsis agnitionis filii dei rudi-
mentis vtcunque degustandis, in quibus etiam, veluti sem-
per paruuli, semper fluctuemus: sed vt deinceps, insigni-
bus admodum incrementis, ad illam & ætatis maturita-
tem, & perfectionem staturæ, et, quod caput est, morum
absolutionem quandam, nauiter contendamus, quæ est
virorum perfectorum: vt nimirum ab eo, quod semel in
ecclesia catholica præhendimus, nō tantum dimo-

nunquam patiamur, sed potius, actis semel beneficio muneris pastoralis, altissimis in doctrina Iesu Christi radicibus, securè deinceps ventos contemnamus doctrinarum contrariarum, iisque nos ventis vel auferri quòlibet, vel iactari qualibet, vel certè in loco summergi ac suffocari non permittamus. Hoc magis, quòd istiusmodi hæreticorum paratis quidem ad circumueniendum animis atque ingenis instructorum, doctrinas, aduersas nobis atque contrarias, in eiusmodi versutia & nequitia, scribit beatus Paulus
» occupari, vt hominibus iam quidem ipsis pro talis, ipsa autem illa sanctissima Dei Opt. & Max. religione, pro leuissimo talorum ac tesserarum ludo abuti non vereantur.

Εν τῇ κνβεῖα τῶν ἀνθρώπων, inquit Paulus. Significans, quemadmodum malitiosi lusores, talis huc illuc pro arbitrio, quo iure qua iniuria locandis & transferendis, omnem ludi rationem soleant permiscere, ita nequissimos istos homines, animis innocentium virorum temerè illudendo, eosque in diuersa atque contraria superstitionum studia seducendo, omnia vitæ eorum instituta perturbare, ludumq. adeò religionū, non iam tanquam fidium, qui elegantium est scilicet hominū & vrbanoꝝ, sed omninò ceu tesserarum, qui latronum ferè ac ficariorum ludus esse consuevit, ludere, atque in hoc tam proiecto ludo, hominibus etiam ipsis miseris, pro talis, vt dixi, abuti solere. Quorum sanè hominum siue fraudibus, siue ludibriis, ne vsque adeò patère videatur vita nostra, iccirco ecclesia ipsa, quos diuinitus, vt diximus, ad eorum malorum remedium, accepit pastores & doctores, eos studiosè retinet, eorumque opera, in eiusmodi technis vel aperiendis, vel amoliendis, libenter omninò vtitur: hisque adeò auctoribus admodum idoneis, tum seipsam veram esse ecclesiam demonstrat, (veræ enim profectò ecclesiæ, non falsæ, neque assimulatæ, dati
» sunt diuino munere pastores & doctores, vt vbi corpus fuerit, eoem congregentur & aquilæ) tum aduersarios, in-
scitia,

scitiæ, simulationis, erroris, fraudis denique conuincit: opponens ipsis os tutorum ac defensorum suorum, & sapientiam eiusmodi, cui ipsi, cum omnibus portis inferorum, resistere non queant. Quod quidem dum facit, tum verò denique rationem omnem doctrinæ, institutorumque suorum, maximè omnium cõfirmat & tuetur. Etenim quanto quisque propius aberat ab ortu illo religionis nostræ, cùm primùm ecclesia ipsa christiana & orta & nata extitit, hoc profectò & acutius omnia vidit, & certius ac fidelius omnia tradidit, quàm isti tanto interuallo, non modò videre, sed etiam suspicari saltem potuerunt. Illorum igitur pastorum & doctorum libros, quæso Christiani mei, quæso catholici mei

Nocturna versate manu, versate diurna.

Magna enim, mihi credite, continent archana sapientiæ, & scientiæ Dei. Facite, si lubet, periculum in nostra, vt dixi, catholica doctrina defendenda, facite in hæreticorum cõuellenda; facite in humanis, facite in diuinis litteris: facite in virtutibus ferendis, facite in vitiis extirpandis, quæ theologos scire æquum est, solertes dabo & diuinos. Diuinos, inquam, dabo. Diuinos prorsus dabo. Vt habeant aduersarii quod eos mordeat, quodque & queri eos, & diuini hominumque fidem implorare cogat: si hominibus ipsis mortalibus, atque adeò, si naturam communem respicias, etiam vanis, diuinam planè auctoritatem tribui intelligant. Primùm enim vani esse non possunt, in quibus est scientia Dei; deinde, quanquam illa quoque eorum auctoritas, si Latine quidem dicendum sit, diuina prorsus videri non possit, quæ diuinis ipsa auctoritatibus opus habeat ad se confirmandum; tamen illud quoque negandum non est, vbi se his satis corroborauerit, & earum sententiis, vt sic dicam, obsaturauerit, ipsarum sanè quodammodo induere & vim & naturam. Scitum est enim illud Augustini. Ego, inquit, solis eis scripturarum libris, qui iam canonici ap-

„pellantur, didici hunc timorem honoremque deferre, vt
„nullum eorum auctorum scribendo aliquid errasse firmis-
„sime credam. Alios autem ita lego, vt quantumlibet san-
„ctitate doctrinaque polleant, non ideo verum putē, quia
„ipsi ita senserunt, sed quia mihi vel per illos auctores ca-
„nonicos, vel probabili saltem ratione, quæ à vero non ab-
„horreat, persuadere potuerunt. Hæc Augustinus. Quæ ipsa
sanè totidem verbis, in legibus & canonibus ecclesiasticis
extant repetita; ne quis ecclesiam, vti arbitrantur hæretici,
cuius sententiæ pudere, aut pigere vnquam existimare que-
at. Etsi igitur patres suam ipsi auctoritatem diuinæ aucto-
ritati parem prorsus nunquam faciunt; nō, ne nos quidem
ipsi auctoritatem eorum; tamen quoniam & suam ipsi do-
ctrinam ex diuinis potissimum fontibus hauriunt, & au-
ctoritatem suam, maximè diuinorum, vt dixi, scriptorum
& oraculorum auctoritate muniunt, & ab ecclesia, quod
summum est, rectæ, piæ, sanæ, orthodoxæ denique do-
ctrinæ, iampridem testimonium ferunt, fit, vt eorum no-
bis quidem auctoritas meritò diuinæ auctoritati proxi-
ma, atque adeò diuina etiam ipsa esse videatur. Quæ enim
ecclesiæ auctoritas, has aut illas, & Matthæi, & Marci, &
Pauli, & Petri, & Iacobi, & Mosis, & Esaia, & Hieremiæ, &
reliquorum eiusmodi, scripturas, diuinas præ aliis videri,
& passim existimari fecit, (quid est enim, aut quid fuit vn-
quam, ad eas pro diuinis amplectendas, auctoritate eccle-
siæ efficacius?) eadem profectò effecit, vt Augustini, &
Hieronymi, & aliorum consimilium patrum scripturæ, di-
uinis scripturis proximæ, & suo quodam modo etiam di-
uinæ esse videantur. Aut igitur ego quoque, in ipsius diui-
næ scripturæ auctoritate æstimanda, quodammodo vacil-
labo, nisi me auctoritas ecclesiæ commouerit; aut eadem
sanè ecclesiæ auctoritas, te ipsum profectò debet com-
mouere, vt suam, hoc autem est, paulò minorem, patribus
ipsis auctoritatem tribuas, si me voles Bibliorum tuorum
auctori-

auctoritatem recipere pro diuina. Et certè si diligenter attendas, quàm vtiliter eorum auctoritas facta tecta in ecclesia conseruetur, tum verò & tantam illis tribui, & tantopere eam conseruari, multò profectò mirère minus. Noui equidem quàm plurimos, qui in hoc nostræ ætatis miserando, & imprimis calamitoso fidei atque religionis naufragio, cùm, quid amplius facerent, quòue se verterent, in tantis angustiiis, nec haberent, nec viderent, cæteris quasi omnibus destituti auxiliis, & cunctis desperatis rebus, vnā hanc veluti tabulam quandam amplexi, patrū sanctorum lectionem, cùm eam ita tenuissent, vt eam de manibus dimittere, & aliò desilire noluerint, salui per Dei gratiam atque incolumes ex illa tempestate enatarūt, & ad optatum tranquillitatis ac securitatis portum appulerunt. Sic, sic ecclesia catholica, ipsis quoque patrum scripturis retinendis, proponendis, defendendis, suam mirificè aduersus hæreticos constituit auctoritatem.

CAP. V.

Conciliorum auctoritas in ecclesia
catholica.

Tertius paries in ecclesia catholica, sunt Concilia.

Utilitas huius parietis, comparatione superiorum.

Concilium quid.

Conciliorum auctoritas quanta.

Ideo ecclesia necessario suo tempore, etiam cum periculo ad ea confugit.

Hic de concilii Tridentini frequentia & libertate.

Non alit igitur controuersias ecclesia, sed sopit.

Non dominatur fidei, sed omnium iudicio se summittit.

Non aduersam sententiam in conciliis, sed benignam reportat.

Et hæc quidem omnia inde maximè eueniunt, quòd concilia à solo Pont. Max. indicuntur.



Tque hæc quidem de patribus, qui no-
bis alterum quasi ecclesiæ parietem re-
præsentant. Sequuntur, vt dixi, C O N-
C I L I A, quæ à tertio veluti latere, ful-
cire videntur ecclesiam Dei; & quidem
fulcire sic, vt inter humana præsidia,
vbi à diuino discesseris, (quanquam
ipsa quoque Concilia, diuina magis quàm humana præsi-
dia censenda sunt) vix quicquam validius ad firmandum
statum ecclesiæ posse excogitari videatur. Magnum est, sub
vno iudice causam semel obtinere; maius, binorum, terno-
rumue subselliorum decreto, rem iudicatam habere; quid
orbis terrarum iudicio vincere? quid? eius ipsius tam latè
patentis iudicii, non semel atque iterum, sed semper, quoti-
es opus sit, secunda suffragia reportare? Nimirum ipsius
quoque catholicæ ecclesiæ prærogatiua magna est, testi-
monium ipsum solius scripturæ sanctæ; quod est vnus
veluti suffragium iudicis. Quo ipso adminiculo, ac velu-
ti pariete, fulta ecclesia ab vna parte, egregiè se sustentat,
nec hæreticorum sepes, quæ ad illum quoque interdum
parietem adniti velle videntur, magnopere reformidat.
Verum altero illo pariete multò etiam se robustius tuetur
ecclesia, patrum ipsorum, iudiciū videlicet complurium au-
ctoritate; quæ etsi aliquanto infirmior per se, nec admodum
firmiori scripturarum ipsarum parieti innixa, hoc ipso ta-
men mutuo vtriusque parietis complexu angulari, & se-
ipsam roborat, & scripturas sustentat, & quod caput est,
hæreticos, ceu fures quosdam & latrones, facilius amoli-
tur. Maximum autem robur ecclesia colligit, ex tertii præ-
terea parietis ad secundum parietem accessione. hoc autem
est, ex decretis conciliorum sanctorum. Qui quidem pari-
es tanto est firmior, tantoque validior, quanto connixus
ipse omnium mortalium, qui conciliis vniuersalibus quo-
dammodo repræsentatur, connixu certorum hominum, in
quibus

quibus sunt patres & doctores, fortior vehementiorq. habetur. De quibus quidem conciliis statim dicemus, si modo hoc loco eodem, quo structuram ipsam trium ecclesiæ parietum obiter perstringere volumus, quartum etiam illum parietem Traditionum sanctarum, silentio interea non præterierimus; qui mihi ita aptè ad huius totius ædificii descriptionem, positus esse videtur, ut & illum quidem scripturarum ipsarum parietem primum, ex altera parte fulciat, & omnino omnium parietum istorum, tum conformationem totam perficiat, tum firmitatem ipsam, vltima cum primis iungendo, corroboret. Ut iam in hoc amabili ædificio ecclesiæ sanctæ, ex vna quidem parte, scripturæ cum traditionibus, ex altera autem parte, patres cum conciliis, manibus ipsis iunctis ac colligatis, speciem nobis reddant atque imaginem quasi gratiarum illarum, quas implexis inuicem manibus finxerat ingeniosa illa antiquitas ethnicorum. Sed de quarto ipso pariete, ubi de tertio dixerimus, vberius loquemur. Nunc breuiter tertium explicemus ecclesiæ parietem, Conciliorum sanctorum. Quæ quidem non aliud esse videntur, quam Senatus quasi quidam, ex omnibus & viuis, & vita functis patribus, vnum in locum, vnius etiam illius auctoritate coactus, qui solus vel maxime aspectabilis, aspectabili nostræ catholicæ præest ecclesiæ: & quidem coactus, de rebus in religione dubiis, aut controuersis, vel certè ad religionem quomodocumque pertinentibus. Quo ipso tertio addito pariete, minus iam profectò ecclesia pertimescit flabra illa Aquilonum contrariorum. Cum enim singulorum per se patrum, tantam, quantam superiore loco breuiter expressimus, auctoritatem esse statuatur, tum de vniuersis sanè ad concilium coactis & congregatis, magnificè & sentiri, & prædicari oportere iudicat. Intelligit enim, Christum ipsum Dominum, qui duobus, tribusue, in ipsius nomine conuenientibus hominibus, præsto se semper fore est professus, multo magis plu-

gis pluribus, vicem omnium fidelium suorum obeuntibus, & vniuersam rempub. christianam repræsentantibus, suumque adeò diuinum numē inuocantibus, vnum quidem in locum cōactis ac congregatis, coram affuturum, & decretis eorum interfuturum, vel potius præfuturum esse. Atque ea profectò ratio tanti fuisse videtur apud Augustinū, vt magna illud cum ratione, imò magna planè cum libertate & auctoritate, scribere non dubitarit. DICITVR AB
» ALIIS, inquit, QVOD ACCEPIMVS AB APOSTOLIS,
» HOC SEQVIMVR. AT NOS MVLTRO ROBVTIVS,
» inquit, DICIMVS. QVOD ECCLESIAE CONSVETV-
» DO SEMPER TENVIT, QVOD DISPVATIO DIS-
» SVADERE NON POTVIT, QVOD PLENVM ATQVE
» FREQVENS CONCILIVM CONFIRMAVIT, HOC
» SEQVIMVR. Quid est, quæso, in hoc genere, quod maiore confidentia pronunciari potuisse videatur? Si dixisset Augustinus. Non inuiti sequimur, quod disputatio obtinuit: non inuiti, quod plenum concilium confirmavit: magnā profectò rem dixisse videretur, is præsertim qui in ecclesia catholica, maximi ac religiosissimi testis est instar. Nunc idem illud dicit: sed hoc vehementius, & maiore cū energia, quòd cum comparatione & contentione quadam dicit. Dicunt, inquit, alii: neque sanè nihil dicere videntur: se ea in ecclesia sequi & tenere, quæ ab Apostolis acceperunt. Honesta enim planè oratio est. Nos autem amplius etiam aliquid dicimus, inquit, speciosius dicimus, robustius dicimus: ea ipsa nos in ecclesia nostra sequi & tenere, quæ neq. disputationibus labefactari potuerunt, & auctoritate præterea œcumenicorum, maximè celebrium conciliorum, ad perpetuitatem sunt confirmata. Sed iteradum, quæso, eadem hæc mihi, Augustine. DICITVR AB ALIIS, inquit magnus ille ecclesiæ catholicæ antistes, & defensor. Quid dicitur? QVOD ACCEPIMVS, inquit, AB APOSTOLIS, HOC SEQVIMVR. Et quidem, bona cum tua venia dixe-

nia dixerim, ô pater Augustine. Verissimè planè ab illis dici, quod ad eum modum dicitur : magna etiam cum ratione dici, & denique ita dici, ut refelli ac redargui non possit, existimo, quod ita ab illis dicitur. Quod ab Apostolis hausimus, quod ab Apostolis accepimus, hoc sequimur, hoc sequimur. Nimirum enim catholicam ecclesiam, non aliam, quàm quæ sit Apostolica, profiteamur. Non nego, respondet Augustinus ; nec, quod ad eam partem attinet, magnopere quicquam contradico. DICITE, DICITE SECVRI. QVOD ACCEPIMVS AB APOSTOLIS, HOC SEQVIMVR. ATQVI NOS, inquit, MVLTRO ROBVS-
TIVS, & ad refellendos hæreticos multò efficacius DICIMVS. QVOD ECCLESIAE CONSVETVDO SEMPER TENVIT, QVOD DISPVATIO DISSVADERE NON POTVIT, QVOD PLENVM ATQVE FREQVENS CONCILIVM (nimirum his verbis, non obscure perstringit, hæreticorum minuta & admodum infrequentia conciliabula.) quod igitur non infrequens & imminutum, sed PLENVM prorsus ATQ. FREQVENS CATHOLICVM CONCILIVM CONFIRMAVIT, HOC SEQVIMVR, HOC SEQVIMVR. Si igitur Apostolorum traditio, & doctrina certa est, firma est, constans & stabilis est, profectò ea traditio & doctrina, quæ Conciliorum decretis sancita est & perpetuitati consecrata, longè certior ac firmior debet deputari. Quod enim disputatione probatum est, id certius est multò, eo quod nudis verbis est traditum : quod etiam in ipsa quoq. occultissimarum latebrarum inuestigatione, repertum est sanctum, id sanctius utiq. est, eo quod simpliciter pro sancto est receptum; quod denique igni illo Conciliorum sanctorum ita examinatum est, ut nihil tamen in eo vitii depræhenderetur, id profectò purius, eo quod nullam vnquam ignis probationem subiit, esse putandum est. Quo maiorem nos quoq. ecclesiæ esse firmitatem, ex tertii huius lateris, qui est Conciliorum sancto-

rum, ad priora duo latera accessione, existimare debemus: Cui quidem firmitati innixa ecclesia, iam & sibi magnopere præfidere, & aduersarias omnes potestates securè admodum audet contemnere; vsque adeò vt si quando hæreticorum armis appetatur, magno sanè animo, castris conciliorum sese committere, & inde, maiore etiam ardore atque fiducia, in ipsa quasi acie dimicare, semper videatur; neque se ab iis castris, vllis medio sæpe in itinere obiectis atque oppositis discriminibus arceri, non fluminum periculis, non latronum incursionibus, non insidiis in ciuitate, non horroribus in solitudine, non æmulationibus in falsis fratribus, morari patiatur. Ne longe abeam, pro teste eius rei locupletissimo, esse potest, vel Tridentinum hoc, nostris his temporibus & indictum, & celebratū, & per dei gratiā perfectum conciliū; quod quidem cū in vicinia hæreticarū nationum habitum fuerit, tāta tamen catholicorū Episcoporum & theologorū frequentia ac concursu, & quod maxime rem continet, tanta etiam sententiarū libertate celebratum est, vt cū antiquis illis conciliis certare iurè possit. Nam ipsorum quidem patrum numerus, qui concilio subscripserunt, vltra ducentos quinquaginta pertinebat, libertatem autem sententiarum eius concilii, illi demum abunde testari possunt, qui, cū catholicorum nomine ad concilium ipsum venissent, contrarias tamen ibi plerasque moribus ecclesiæ catholicæ positiones, & verbo, & scripto, liberè sunt tutati. In hoc igitur eiusmodi concilio, atque adeò in omnibus œcumenicis conciliis, quid est tandē constitutum, quæso? num pro hæreticis quicquam contra catholicos pronuntiatum est? Diui prohibento. imò & hic, & alibi semper in omnibus conciliis, p catholicis aduersus hæreticos pronuntiatū est. Quæ cū ita sint, iam equidē, tum ex huius concilii, tū e aliorū omniū œcumenicorum conciliorum modo atque ratione, tria sunt, vt opinor, quæ p catholicis diligentius notari ac obseruari possunt.

Vnum.

Vnum. Studium illud singulare sedandarum in religione
dissensionum earum, quæ essent aliquanto antè, inquieto-
rum ingeniorum opera in ecclesia excitatæ: hoc magis eti-
am, quod ab eo studio, nullo vnquam sumptu, nullo labo-
re, molestia nulla, tempore etiam nullo, excludi se homi-
nes catholici ac dimoueri patiantur; quominus publicæ
paci, ocio, concordia, quieti, in commune consulant. Quæ
qui inter homines ferunt, ii verissimè se possunt & Dei fili-
os, & Christi Iesu discipulos appellare. Pacifici enim, ait
Christus Dominus ad discipulos suos, filii dei vocabuntur. “
Et vos quidem sic demum, inquit, pro meis discipulis re-“
putabimini, si dilectionem mutuam vobis cordi esse de-
monstraueritis, in vinculo pacis. Hoc primum. Alterum,
quod in hoc quidem indicendorum conciliorum genere,
notandum pariter & obseruandum esse putamus, illud est,
quod iidem illi præpositi ecclesiæ nostræ, ad quos maiorū
more conciliorum indictio pertinet, tantum abest, vt fidei
nostræ, quod fingunt hæretici, dominari cupiant, vt etiam
vltrò se ipsi omnium iudicio submittant. Quid enim mi-
nus tyranno conuenit, quàm multos habere consilii sui
aut præsides, aut consortes? quid magis, quàm publica cō-
silia maxime infrequētia esse? Regū enim profectò & iusto-
rū atq. legitimorum magistratuū est, rogare sententias: ty-
rannorū, irrogare multas. Tyrannorū est, Sic volo, sic iubeo:
iustorum ac legitimorū magistratuum, Senatores, quibusq.
sententiam in senatu dicere liceat, ad portā Capenam con-
uenirent. Tertium est in hoc genere quod obseruandū est,
ille ipse, illorum sumptuum, laborum, molestiarum comi-
tialium, de quibus diximus, euentus prosperus admodum
ac fortunatus: qui velut æquus quidam iudex, vnde ali-
quando ius stabat, ei parti per Dei gratiam semper victori-
am dedit, in conciliis legimè congregatis. Atque hæc qui-
dem quæ dixi, ex illo mihi vno præcipue capite, omnia de-
pendere videntur, de quo superius, cum rationem concili-
orum

orum breuiter describerem, breuius etiam quodam modo admonui, quòd concilia quidem nostra, vnus illius maximè ductu, auctoritate, iussu, imperio regi solent, qui ipse vnus atque primus, vnā nobis quodammodo ecclesiam catholicā repræsentat: sine quo, vti concilia quidem legitimè aut indici, aut conuocari, aut etiam celebrari non possunt, ita si qua vnquam indicta, coacta, celebrata fuerunt, nullam legitimorum conciliorum rationem, formam, figuram habuerunt: neque tam sedandarum controuersiarum excitatarum, quàm inanis potius cuiusdam & importunæ dominationis constituendæ gratia coacta fuerūt: nunquam etiam, quod caput est, exitus aut pios, aut optatos, aut saltem diuturnos habere potuerunt. Quæ quidem si considerentur omnia, sanè mihi vel ex eo saltem capite, plurimum dignitatis, existimationis, honoris, ecclesiæ ipsi nostræ, cōciliatura esse videantur. Cùm enim ecclesia hæc nostra, in conciliis suis legitimè in spiritu sancto congregatis, & sopire semper controuersias quàm alere, & in iis sopiendis seruire potius bono publico, quàm dominationē ipsam affectare, aut tyrannidē, quod absit, parare sibi vllam voluerit, profectò dignissima esse videri potest, quæ ita Deo Opt. Max. curæ esset, vt omnia propemodum illa, quæ per eam in conciliis gesta essent, pro salute, & dignitate, & quiete totius reipub. Christianæ, Deus ipse benignus & immortalis bene atq. prosperè, tum ipsi illi, tum reipub. vniuersæ, faceret semper euenire.

C A P. VI.

Conciliorum metus atque odium apud hæreticos.

*Hæretici quietem ecclesiæ ferre non possunt, quin eam perturbent.
Et tamē in eo iudicia hominum refugiunt, nec ad concilia venire
volum.*

Hæretici

Hæretici semper in iudicio orbis terrarum condemnantur.

Quanti faciendū sit, orbis terræ iudicio absolui vel condemnari.

Quid sibi volunt hæretici, cū indictionem conciliorum à Pont. Max. tollunt.

Hæretici multitudinem ipsam se aspernari simulant.

Quod perperam faciunt.

*Hæretici, etiam ante conciliorum sententiam, dogmata sua præda-
mant.*

*Fidem pro concilio vniuersali, priuata sua & ephemera conuenti-
cula obeunt.*

Fidem sua somnia totius orbis decretis anteponunt.

*Ecclesiæ decreta conciliis confirmantur, hæreticorum somnia re-
felluntur.*



Ontrà apud hæreticos, omnia in hoc genere eiusmodi esse reperias, quæ rationibus ipsius ecclesiæ quasi ex aduerso obiici atq. opponi videantur: quæq. ipsa benè considerata & expensa, nusquam eos non modò consistere, sed ne vestigium quidem tutò ponere patiātur. Vnum, quod ocium & quietem ecclesiæ, atque adeò reipub. non ferunt, quin in iis omnia, omni qua possunt ratione perturbent & confundant. Principiò enim secedūt à nobis, & deinde hac ipsa secessione sua turbas cient, magnamque rerum omnium confusionem, atq. ordinum inter ipsos discordiam, in ecclesiam, quasi in ciuitatem introducunt. Nam vt interea de nostri potissimùm temporis hæreticis loquamur. Pacatæ planè ante Luterum res erant totius reipub. christianæ; vsque adeò quidem, vt ipsam quoque temporum nostrorum historiam, qui tunc scripserunt, ab ea sibi reipub. pace & quiete insigni, opus suum exordium esse existimauerint. Quiescebat, inquiunt, terrarum orbis. Quiescebat igitur planè & ecclesia & Respub. vniuersa; cū subito, vti quondam in optima reipub. Ti. Gracchus, & in philosophia bene constituta Arcebas, ita

in pacata & tranquilla religione catholica, exortus est Luterus, qui, nouis nouæ religionis præceptis atq. institutis suis promulgandis, perturbare primum, deinde etiam euertere ecclesiã conaretur. Ocium is igitur ecclesiæ nõ tulit, sed cõfusionem in eam, & omnium rerum perturbationem induxit. Tantúmne autem? imò etiam amplius. Cùm enim in illis inceptis suis, non ratione quicquam ipse ageret, nec iudicio, facilè eò delapsus est, vt iudicium quoque hominum & cognitionem de factis suis, seriò admodum refugeret. Est enim hoc quoque alterum hæreticorum omnium proprium, vt iudicio neque suscipiant quicquam in rebus gerendis, neque adeò contendere cupiant; omnia libidini, omnia temeritati subiiciant; siue id superbia, siue astu, siue etiam metu faciant, non disputo: rem ipsam in medio relinquo. Quæro tantum. Venturúsne aliquando ad conciliũ fuerit, vt sui doctrinæq. suæ cognoscendæ facultatem præberet, ille, qui dixit, causam suam neque à deo cœptam esse, neque in deo finiendam? Ille verò dum vixit, non venit; cæteri etiam, qui de grege illo, post eius obitum superfuerũt, non venerunt; cùm tamen concilium & in vicinia fœderatorum suorum celebrari audirent, & ad illud benignissimè fide publica inuitarentur. Cur ita? nisi quia omnem cognitionem refugiunt, & audacia, non moderatione nituntur. Satin' est? Iam hæc quidem ingentia sunt, & omni odio dignissima hæreticorum facinora, velle semper tumultus excitare, & animũ ad eos comprimendos adducere nõquam. Sed est & tertium maius, vt existimo; quòd causa eorum, in iudicio orbis terrarum nunquam stetit; semper recessit condemnata. Parui refert, inquis, Hei mihi. Quanti, quæso, putatis, nunc etiam mercentur isti, si quis Pontifex Max. quod tamen fieri non potest: sed si quis saltem consiliariorum eius Cardinalis, vnus, minimus, aut quod etiam minus est, si quis saltem Episcoporum vulgarium, in ipsarum partes concederet, & se inter Protestantes numerari

merari pateretur? Ferebatur olim, si benè memini, de ne-
scio quo Cardinali, quiddam eiusmodi, ab ipsis illis, ut ar-
bitror, hæreticis confictum. Et item apud nos, de nostrate
quodam Episcopo; fortassis etiam alibi de aliis. Quod qui-
dem ipsum an verum fuerit, viderit qui videt omnia, Deus
immortalis. Et tamen in illa seu inanitate summa, seu cer-
tè in proxima admodum inanitati, paucitate eorum, qui
ipsis nomina dedisse videbantur, homines in aliqua digni-
tate constituti, omnibus lætitiis miseri homines incesserunt,
omnibus etiam gaudiis exultauerunt, quòd Cardinalem
vnum, quòd Episcopum vnum, & item fortassis alterum,
habere in suis partibus dicerentur: quid censetis facturos,
si pro illis staret concilium vllum? quid si ecclesia vlla? ver-
bi gratia, ecclesia cathedralis Cracouiensis? quid si eccle-
sia metropolitana Gnesnè? Insulam vnam, Vitebergam v-
nam, Geneuam vnam, popellum aliquem vnum, homun-
cionem etiam vnum, si quando fortè in nassam suam in-
cautum pertraxerunt, terrarum orbis ipse lætitiā eorum
capere non potest. Quid facerent, quid facerent, si orbis
ipsius terrarum partem aliquam, Europam puta, aut Asiam,
vel iam minorem saltem, sui dogmatis adstipulatricem ha-
berent? Equidem dum hæc ferè typographis exprimenda
committeremus, solennes indixisse gratiarū actiones pu-
blicè per synagogas suas nonnusquam dicebantur, quòd
virum quendam genere nobilissimum, doctrina & litteris
ornatissimum, morū integritate cōmendatissimum, nobis
etiā amicissimum (cuius nomen honestiore aliquo in loco
proferrem libentius) ad se à nobis transiuisse, falsò siue au-
diebant, siue etiam ipsi fingeant. Quid, facerent, si, quod
Deus omen obruat, reuera transiisset? Quid, si vnus atq.
alter secutus eum fuisset? Quid, si, ut Iudæi de Christo in
Euangelio loquuntur, mundus totus abiret post eos? quam
quæso & quantam lætitiā animis concipere viderentur?
Non parui igitur refert, iudicio orbis terrarum stare aut ca-
dere. Non

dere. Nō parui,inquam, vtrumq. refert: tum, quòd nos quidem, quod benè vertat, multas indies singulorum hominum illustrium, eruditorum, accessiones ad nostram ecclesiam fieri videamus, prouinciarum externarū videamus, regnorum & imperiorū barbarorum maximorū videamus: orbem denique ipsum terrarum, (concilia enim œcumenica, orbis terrarum speciem, nomen, imaginem, vicem etiam repræsentant) pedibus, vt sic dicam, in sententiam nostrā venire videamus: tū, quod illi contrā, nō solum aut ab omnibus, aut ab optimis quotidie se deferi, sed etiā ab orbe ipso Christiano vniuerso condemnari, ab eoq. horribile sibi anathema videant irrogari. Quid igitur dicemus? Si, cū ex xxx. iudicibus, vnus cōdemnaret, xxix. absoluerent, aliquid tamē acerbitalis vna illa sententia haberet cōdemnatoria: quid censes, cū vnus absolueret, xxix. condemnarēt? quid? cū nullus absolueret, xxx. condemnarent? quid? cū nō xxix, nec xxx. iudices, sed orbis ipse condemnat vniuersus? Cū igitur amici isti nostri, omnia hæc multò ante præuisa magnopere vereantur, id vnicè dant operam, ne quā ad concilium adducantur: imò ne concilia ferè celebrentur vlla. Et quoniam eiusmodi orationem suam, omnium hominum auribus ingratam, atq. adeò inhonestam planè futuram esse sentiunt, si se conciliis palàm esse inimicos profiteantur, ideo concilia quidem ipsa laudant per speciem & simulationem, sed cū eadem tamen per Pont. Max. indici nolunt, cum libera & Christiana nescio quæ, desiderare se ostendunt, id agunt reuera, ne qua omninò vnquam habeantur. Quis enim, quæso, alius indicat concilia, nisi is, qui etiam pœna proposita, venire ad ea possit cogere? Quis autem est iste vester, siue Pomeranus, siue Luterus etiam ipse, cuius in hoc genere, aliqua sit, non dico apud terrarū orbem vniuersum, sed vel apud reges saltem & principes Christianos, atque adeò vel apud me saltem ipsum, auctoritas? Nam in illa liberi & Christiani concilii circumscriptione, quam

one, quam vsurpant isti, quantus cauillus lateat, quantus-
 que item pateat campus, ad subterfugiendos omnes con-
 uentus, etiam liberrimos, & Christianissimos, quis igno-
 rat? Nempe liberum statim concilium non erit, si modò in
 eo libertas ipsa arbitrii humani defendatur: Christianum
 non erit, si in eo vis ipsa sacrificii Christiani asseratur: Li-
 berum denique simul & Christianum non erit, si, pro his,
 quæ hætenus, ab ipsa Christianæ ecclesiæ origine, pro li-
 beris & Christianis moribus, aut legibus, aut cærimoniis,
 ab omnibus liberis & Christianis nationibus habita sunt,
 propugnatio suscipiatur. Apagè, inquis, cum propugnati-
 one & iudicio omnium: atque adeò cum propugnati-
 one & iudiciis multorum: semper enim erudita ingenia mul-
 titudinis iudicia studiosè vitauerunt. Cur vos igitur, vt mo-
 dò dixi, tantos, ex vno profelyto facto, triumphos agitis, si
 multitudinem negligitis? Cur vos etiam, vt plurimum, po-
 pulo venditatis, si frequentiam & celebritatem fastiditis?
 Cur vulgi suffragia, in confirmandis ministris vestris requi-
 ritis, si cœtuum iudicio nihil tribuitis? Cur denique cerdo-
 num penè vestrorum iudicia interdum nobis opponitis, si
 multitudinem tantopere contemnitis? Vnum malumus,
 inquiunt. Deus benè vertat. Vos igitur, vt confido, nobi-
 scum tandem vni Pontifici Max. manus dabit, & cum eo
 dextras societatis iungetis. Diui prohibèto, inquiunt. Vos
 verò iam diuos etià fortassis agnoscetis, quos olim & cœlo
 & ecclesia pellebatis. Nec diuos, inquiunt, nec multos vo-
 lumus: hominem vnū volumus, sed quemuis potius quàm
 Pontificem Max. vestrum. Bona verba quæso. Quis erit igi-
 tur ille vester, quem vos vnum præ multis, homuncionem
 præ Pont. Maximo, sequendum esse censebitis? Num Pla-
 to erit, qui vnus olim nescio cui multorum fuit instar? Nū
 Pythagoras? vt quod de illo quondā dici solitū accepimus,
 nūc nos ipsi de vestro illo vsurpemus, αὐτῷ ἐφ' ἑαυτῷ. Nō hunc, nec
 illum, inquiunt. Tantummodo non addunt, Sed B. rabam.

Nimirum enim Luterum dicebant ipsum, aut Zuinglium, aut Seruetum nescio quem. Nam hi tres tum simul ecclesiā oderāt. Quos omnes scimus ita multitudini studuisse, ut eam non tantū amare, sed nonnulli etiam eorum, armare, & ex ea exercitus aduersus dominos ipsos conscribere, minime dubitauerint. Multitudinem igitur reuera vos amatis, si modò habere eiusmodi possitis, quæ cœca ipsa, vos cœcos duces sequatur. Sin cœcam habere non possitis, tum videntem contemnere vos simulatis; & in vnus vel paucorum iudicio, contorto & diis hominibusque inuiso, cōquiescere vos, præ vobis fertis: imò, omnium vel certè plurium, vel sapientiorum, atque adeò ipsius orbis terrarum iudicio anteponitis. Quod ipsum quàm rectè faciatis, vos ipsi videritis. Dicite enim mihi. Si quis hodie, qui dies purgationi virginis matris antiquitus est in ecclesia consecratus, exurgat, & siue mentis errore aliquo, siue adeò certa quadam animi obstinatione, conetur vobis persuadere, Calendas hodie Februarias agi; quæ quidem, nostra omnium sententia, heri præteriere; quid ageritis? statimne homini, vel stulto, vel temerario temerè effutienti acquiesceretis? nonne ad alium quempiam, quicquid id est referretis? & si fortè quis vnus, homini importuno assentiretur, nonne plures adiretis? & si plures etiam idem illud dicerent, nonne ad extremum illos demum conueniendos esse existimaretis, ad quos vel maximè feriarum ipsarum indiçtio pertineat? Quod igitur in re momenti minimi, faceretis, ut plurium, vel certè peritiorum saltem, sententiæ standum vobis esse existimaretis, id secus, in re maximi omnium momenti, facietis? & cū de salute vestra agitur, non id quod omnibus, aut pluribus & sapientioribus (ego autem iam dico, non hominibus sed conciliis) verum, iustum, sanctum, legitimum denique visum, sed quod vni, soli, apostatæ, semel, vesperi, in conuiuio collibitum, imò, quod est grauius, quod ab omnibus, vel saltem à pluribus &

bus & sapientioribus (ego autem dico , conciliis, non hominibus) serio, nec semel, reprobatum ac damnatum est, id vos solum pro salutari dei verbo recipietis, & mordicus retinebitis? Ne sinat hoc Deus Opt. & Max. ut catholicæ mentes nostræ, priuatorum potius & singularium hominum ludibria, quàm vniuersalium membra conciliorum esse videantur. Dixi, istos non vnius hominis, sed totius christianitatis iudicio, atque adeò legitimorum omnium sententiis iudicem, causa semper cadere solere. Magnum est: sed est etiam, ut puto, aliquanto maius; quòd ei causæ ultro ipsi semper diffidere, eamque, multò etiam antè, quàm aliorum iudicio amittant, ipsi, ipsi tacitis suis suffragiis apertissime condemnare videntur. Quid enim aliud in causa esse dicemus, cur ad concilia œcumenica, nunquam libenter venire, semper eorum nomen horrere, semper ad eorum mentionem expallescere, semper ea ipsa, haud secus quàm quosdam veluti omnium reorum, inprimis autem perfidiæ suæ scopulos, fugere ac vitare videntur? Nimirum ut quisque est improbissimus, ita maximè odit lucem; nihil tam verens, quàm ne quæ pateant consilia, & facta sua; nihil tam optans, quàm ut terra dehiscat illi potius, quàm cogatur de causa sua publicè, in medio doctorum & honestorum virorum, legitimo iudicio disceptare. Quisquis autem sic est, is certè vel seipsum tacitus iam condemnat, vel saltem animo iam tunc præcipit, ac quodammodo præsentit, se condemnatoriam sententiam, iudicum suorum seueritate omnino esse relaturum. Quorum equidem vtrumque ita magnum est, ut tamen alterum altero, ad causam cuiusque prægrauandam, maius esse videatur. Modò non maximum enim est, suo quenquam iudicio esse condemnatum: quod à Paulo Apostolo, pro insigni nota hæreticis ipsis palàm esse appositum, & quasi iniustum, non ignoramus; & quod non ignoramus, nunquam etiam non meminisse debemus. Sed audiamus, quæso, id quod dicam. audiamus reuera

maximum in hoc genere scelerati eorum animi indicium, hoc enim ipso omnia illa, quæ in homines nefarios dici possunt, planè superarunt; quòd, vbi rixarum iam & contentionum plus fatis excitarunt, vbi iudicia de se hominum prorsus contempserunt, vbi causa sua, orbis terrarum iudicio ceciderunt, vbi seipsos tacitis suis cogitationibus condemnarunt, tum non solùm nullum finem iis malis imponere, sed eò etiam magis contentiones accendere, & mala ex iis exorientia alere connituntur. In vicem enim œcumenici concilii nostri, quod est domiciliũ publicæ concordia, ab ipsis quidem planissimè neglectum, sua ipsorum conuenticula priuata & clandestina, apta accendendis indies pluribus contentionibus, obire, atque inter se agitare cõsueuerunt; in quibus conuenticulis, nec spaciũ vllum tantis deliberationibus accommodatum adhibent, nec legitimum rogandi sententias ordinem retinent, nec moderatæ alicuius disputationis speciem præ se ferunt; sed inflati superbia, præcipites amentia, cùm omnia ita confuderunt, vt ad superiores illas variarum doctrinarum confusiones non ferendas, magna præterea facta videatur accessio, post aliquot statim dies discedunt, magis etiam tum quàm antea, ocio, tranquillitati, antiquitati, vniuersitati, conciliis, ecclesiæ denique ipsi, omnes ad vnum facti inimici; in cæteris autem rebus omnibus, magis etiam tunc quàm antea diuulsi ipsi inter se & distracti, atque adeò omnia facere parati, præut conciliis ipsis œcumenicis parere, aut aliquid saltem concedere videantur, magno non solùm superbiæ, verumetiam insignis stultitiæ suæ argumento. Sicuti enim arrogantis profectò cuiusdam stupiditatis est, contemnere id, à quo sis grauissimis iudiciis in perpetuum condemnatus, ita arbitrari se vnum duntaxat, ad ea peruidenda, & oculis propemodum cernenda peruenisse, quæ antea nulli vnquam hominũ patuerint, in eoque ipso ita iactare se ac venditare, vt opiniones tuas, & priuatas, &

tas, & quod pace tua dixerim, interdum fuitiles, commu-
nibus omnium hominum sententiis ac decretis, diu ac mul-
tum examinatis ac perpensis, anteponas, stultissimæ cuius-
dam, mihi crede, arrogantia est. Quem quidem mentis
non satis sanæ errorem insignem & apertum in aduersariis
nostris, si quis est, qui aut non videat, aut, cum videat, non
ex animo detestetur, is haud scio, quidnam præterea in vi-
ta aut videre, aut verò vitare etiam ac detestari debeat.
Esse enim vnum aliquem, qui suam vnus sententiam, in-
ueteratæ ac receptæ totius orbis sententiæ, atq. adeò non
solum naturæ, sed Dei ipsius voci anteferat, & qui non iam
cornicum oculos configere, sed orbem ipsum terrarum v-
niuersum impietatis pariter atq. insaniam condemnare au-
deat, sequè vnum, in ipsis reliquorum omnium hominum
tenebris & caligine, *τοῦ ὕψους* videre iactet, id verò est, quod
mihi quidem omnem non solum impietatem, sed etiam in-
saniam videtur superare. Atque hic quidem si quis antea
parum miratus est, exiguum ab istis, patrum aliquot &
Doctorum ecclesiæ haberi rationem, is ex hoc iam tem-
pore seriò mirari incipiat, incredibilem hanc eorum teme-
ritatémne an vāsaniam, an vtrumque, an omnia, quæ
in homines stupidos & inertes dici possunt; quòd vsque
adeò sanè, ne totius quidem orbis terrarum consensus ra-
tionem sibi vllam habendam esse existimant, vt malint, o-
mnium etiā mortalium iudicio condemnari, quàm semel
de priuata, hæretica, impia, stulta etiā nōnunquā & putida
sua opinione decedere; de qua tamen paulò pòst, vel tēpus
ipsum, vel certè ipsa animi eorum mobilitas atque incon-
stantia, ingratis eos deducet atque dimouebit. Sic est enim
profectò, id quod, præter cæteras prouincias, vel nostra
Polonia vniuersa teste locuplete, liquidò dici potest, quòd
quæcumque conuenticula vnquam hæreticorum habita-
sunt, ea vt diuturna non serunt, ita edictorum suorum
auctoritatem nullam habuerunt; sed qua leuitate ab ini-

tio coierant, eadem sunt citò post, cum decretis suis omnibus dissoluta. Quibus quidem rebus ex omnibus, illud denique excerpendum hoc loco, & ad vitandas hæreses diligenter inter cætera considerandum est: solius, ut dixi, ecclesiæ catholicæ dogmata, conciliis, id autē est, totius terrarū orbis consensione confirmari; contrā hæreticorū placita omnia, iisdem cōciliis, hoc est, suffragiis omnium gentium & nationum christianarū semper condemnari. Legat, qui hæc volet pressius cognoscere, veterum sanctiones & execrationes conciliorum; legat etiam patres ipsos, Ipi-phanium, Theodoretum, Augustinum, Damascenum, & reliquos, comperiet, eos ipsos, depingendis & publica auctoritate configendis illius temporis hæresibus, ita nostrorum istorum temporum hæreses omnes depinxisse, ita etiam confixisse, ut libri illi tam patrum quàm conciliorum sanctorum, illa quidem parte, qua aduersus sui temporis hæreticos pugnas cient, recentium istorum hæreticorum nostrorum non modò speculum, sed etiam spiculum videantur tanto antè exitisse. Neque enim in his nostris hæresibus quicquam reperias, quod non sit olim, & sanctorū illorum patrum, & verò etiam conciliorum ipsorum, tum ingeniis animaduersum, tum decretis condemnatum. Non est autem profectò prudentiæ, id anteferre, quod sententiis omnium penè nationum condemnatum est, iis quæ sunt omnium suffragiis in omnes æternitates approbata. Quod cum ita sit, quamdiu, quæso, dubitabimus cum ecclesia potius ipsa errare (fas enim mihi sit abuti interea hoc verbo, quo ipso eadē in re abusus est D. Augustinus) quàm cum hæreticis benè sentire? si modò aut hi benè sentire possunt, quos ostendimus, ne sentire quidem; aut si illa etiam errare potest, quæ, ut Apostolus censet, columna est, & firmamentum ipsius veritatis. At quæ columna? quæ tribus ipsa columnis, sicut hætenus ostendimus, sustinetur, & quasi triplici illo funiculo, ad rumpendum quidem & discindendum diffi-

dum difficilimo nequitur, Bibliis, Patribus, Conciliis. Hæ-
resis autem ubi arroganter contempsit hæc omnia, nihil
planè habet, quo se ad aliquem saltem modum tolerabi-
lem sustinere posse videatur.

C A P. VII.

Traditiones Apostolicas repudiant hæretici.

Quartus paries ædificii ecclesiastici sunt traditiones.

Inuisus est hic paries hæreticis.

Hæretici eleuandis traditionibus tentare nos videntur.

*Quòd Hæretici nullas præter scriptas traditiones esse docent, re-
fellitur.*

Euangelium fuit antequam scriberetur.

In scripto Euangelio non omnia acta Christi contineri.

*Locus scripturæ contra hæreticos adducitur. State & tenete tradi-
tiones.*

Locus alius pro hæreticis adductus expeditur. Scrutamini scripturas.

Verarum traditionum nota quæ. ex Augustino.



IS porrò tribus siue columnis, siue pa-
rietibus, quartus etiam paries, iritan-
dis natus hæreticis, quartæue columna
fulciendæ ecclesiæ addatur licet, TRA-
DITIONES ipsæ sanctæ, & illa Apo-
stolorum, ac maiorum nostrorum nō
scripta, sed viua voce per manus tradi-
ta, instituta; quæ ipsa nō minus quàm
tria illa, quæ modò diximus, oderunt fanè hæretici; imò,
quòd ex his illa manasse intelligunt, idcirco odio etiā mul-
to maiore prosequuntur; vt ita

natumque, patremque

Cum genere extinguant;

atque haud scio an vt ipsi etiam vnà intercant. **T**anta est
illorum

illorum rabies, & ecclesiæ nocendi amor. Itaque hoc nomine, & nostram vicem, baronum scilicet, qui hæc non scripta, sed tradita maiorum instituta stupemus, ac pro verbo Dei recipimus, alii inter ipsos rident, alii miserrantur, & suam ipsi insignem admodum, ut ipsis quidem videtur, felicitatem, mirifice prædicant, & penè laudibus in cælum ferunt, quasi iis solis noua quædam, & ante hunc diem oculis mortalium inuisa lux oblata sit, ad peruidendum, nihil esse nobilitatis, nihil excellentiæ, nihil etiam momenti, in his ipsis, quas tantopere admiramur, traditionibus sanctis; falsoque ab his assumi & usurpari honores ac titulos verbi Dei, quod nulla hominum traditione, sed sola scriptura sacra contineatur. Quod nos quidem cum audimus, tentari planè ab his existimemus mentes nostras, & per hæc simulationem contentionis, alterius aduersus alterum, sensim ac paulatim assuefieri, ad vtrumque æquè contemnendum; ut ita primo quasi gradu facto, in contemnendis non scriptis Dei sermonibus, quos solos hoc tempore, traditiones appellare cœpimus, viâ sibi deinde muniant, ad ipsum quoque scripto compræhensum Dei verbum, quod ipsum quoque traditio est, tandem pro nihilo deputandum. Primum igitur, nullas omninò esse eiusmodi traditiones diuinas criminantur; sed omnia, quotquot sunt, diuina instituta, scripto solo esse aiunt compræhensa. Iam hoc primum esse non potest. Si enim solius duntaxat Christi gestorum historiæ conscribendæ, illorum dico gestorum, dum is homo factus, quatuor & triginta ferè annos inter mortales versaretur, vix ambitum hunc terrarum suffecturum esse Ioannes Euangelista arbitratur, quòtnam quæso mundos Democriti requiri censebimus, si quis præterea historiam scribere instituat, non factorum solum, sed etiam dictorum eius? neque enim profectò facere tantum cœpit Iesus, sed, ut scribit alius Euangelista, cœpit etiam docere. Atq. hæc de solo Dei filio, & quidē homine facto, loquimur. Quid dicemus

dicemus de Deo ipso, patre, filio, & spiritu sancto, iam inde ab ipsa æternitate in perpetuas æternitates, aliquid semper agente atque moliente? quot, quæso, non iam solum mûdis, verumetiam intermundiis, eam historiam contentam fore putabimus? Vrgent proteruè sanè, nec magis contra nos, quàm contra se. Quicquid sit, Christum tamen omnia quæ audiuerit à patre, cum Apostolis communicauisse. Audio. Sed quid tum postea? addendum enim ac ostendendū fuerat, & ipsum scripto id fecisse, & ipsos scriptum eiusmodi ad nos transmisisse, & scriptum id extare. Nunc & ipse quidem, præter pauca illa, quæ humi quondā litteris ipsis euanescentibus descripsisse dicitur, in adulteræ nescio cuius accusatione, nihil ferè præterea in omni vita scripsisse legitur; & illi qui scripserunt, primùm ex traditionibus non scriptis hauserunt, deinde, vti Lucas ipse initio euangelii sui de seipso nō diffitetur, multò post scripserunt quàm hæc à domino dicerentur; & denique tam pauca scripserunt, vt indignum prorsus fuerit credere, non plura ipsum à patre, quàm quæ his eorum scriptis compræhensa sint, audiuisse. Hic reprimunt se, & dicunt; omnia quidem, sed non alia, quàm quæ nostra modò scire interesse iudicasset, nobiscum communicauisse. Quid si hoc negem, & non potuisse eos potius omnia portare, vrgeam? quid si etiam parabolas non explicatas, explicationis tamen indigas opponā? Sed adiuuo te, & id quod vis dico; omnia necessaria nobiscum communicauisse. Verùm scriptōne, quæso, nobiscum ea communicauit, quæ communicauit, an voce viua? Nam si viua voce, teneo equidem, quod ego maximè, tu minimè omnium volumus, non omnia scripto esse compræhensa; si scripto, suōne quæso, & ecquonam, cū aut nullum extet, aut, si quod extat, à vobis pro vero non recipiatur? an alieno? vt scripto Platonis & Xenophontis, sententiæ sunt Socratis consignatæ? Quæram igitur, huic quidem scripto eiusmodi alieno, ecquænam scriptura est, (nam vos ad scri-

Z

pturam

pturam solam omnia reuocatis) quæ auctoritatem tantā tribuat, vt eo omnia, quæ ad salutem nostram pertineant, contineri, certò persuasum habeamus? Quod si quam fortè scripturam vnā proferatis, quæram deinceps etiam de illa, quæ huic ipsi fidem faciat, scriptura altera; & deinde de tertia, quæ fidem faciat alteræ; & de quarta, quæ tertiæ; & sic necessariò progrediar in infinitum: ita enim facere, vos me cogitis, qui nihil, non assentiente scriptura, recipitis. Sin aut nullam eiusmodi scripturā proferatis, aut verò proferendis iis, progredi in infinitum non possitis, sed illam, quam vltimā attuleritis, sua se maiestate tueri, dicatis; tum sanè aut vos victos esse agnoscatis, necesse erit, (iam enim erit aliquid, cui, contra vestram opinionem, credi sine scriptura oporteat) aut mihi saltem, quid sit, cur Thomæ au Mathiæ, aut Nicodemi euangelium, non item vt aliorum euangelia, quæ recipimus, sua se maiestate tueatur, respondeatis; aut certè, quod vnum præterea vobis supererit, ad traditiones ipsas ecclesiæ non scriptas confugiatis, iisque ipsis auctoritatem sanctarum scripturarum nobiscū tribuatis. Quod si facitis, tum sanè & illud sequetur, quod modò negabatis, & quod ego statim post ex Paulo ostendam, traditiones ecclesiæ non esse nullas; & illud vicissim sublatum erit, quod aiebatis, omnia quæ diuinitus ad salutem nostram fuerunt vnquam instituta, scripto esse compræhensa. Ego verò initio quidem, cū primū hæc doctrina nostra christiana, in ipso terrarum orbi sereretur, nihil planè scripto compræhensum fuisse, & tamen doctrinam euangelii integram extitisse, successu temporis pauca modò de multis in litteras relata, permulta ita omissa, vt nunc etiam desiderentur, fuisse aio. Ac vtrumque sanè nō difficulter doceri potest. Quod enim ad ipsa nascentis doctrinæ initia attinet, equidem nullum tunc temporis, Christi neque verbum, neque factum, litteris consignatum fuisse, & euangelii tamen nomen cū re pariter viguisse, cū
multa

multa alia sint quæ euincant, tum locus sanè ille minimè reconditus, cùm dominus & magister noster, in ipso discessu ab Apostolis, & in cœlum ad patrem abitu suo, illis ad eos verbis vteretur. Euntes, inquit ille, prædicate euangelium omni creaturæ. Nam si præter scripturam nullum est euangelium, (vt vos vultis religiosissimi scripturarum vindices & assertores) ecquodnam, quæso, fuit illud euangelium, quod dominus & magister noster iussit tunc temporis prædicari? ecquod etiam illud fuit, quod deinde Apostoli ipsi profecti, prædicauerunt vbique, domino cõoperante, per integros propemodum triginta annos illos, qui ascensionem ipsius sunt consecuti? Nam scriptum quidem euangelium, nondum vllum tunc fuisse, ex eo apparet, quòd, qui primus omnium ad mandandum litteris euangelium, animum appulisse dicitur, Euangelista Matthæus, is non nisi anno demum post ascensionem domini trigesimo, vt volunt quidam, ediderit euangelium suum. Sin autem nullo scripto existente euangelio, dominus tamẽ prædicari iubet euangelium, constat profectò, non modò vltra scripturam esse aliquod euangelium, sed illud demum verè esse atque propriè euangelium, à domino ad prædicandum commendatum, quod ipsum scripto non sit comprehensum. Iamuerò antiquiora etiam euangelii ipsius nostri incunabula perlustremus; &, quid tum euangelio ipsi, cū scripturis cõmune esset, inquiramus. Equidem conceptionem Iesu Christi in Mariæ vtero, primum ipsum conceptum euangelii fuisse existimo. Hæc est enim illa veteris plenitudo temporis, cùm misit Deus filium suū in mundū. Quomodo igitur ea conceptio peracta est? Missus est Angelus Gabriel à Deo, ad virginẽ desponsatā viro, cui nomẽ erat Ioseph: & virgini ipsi Maria. Et ingressus ad eā, quid facit? Profertne in mediū libros Moysis? aut librū vllū veterū prophetarū? Minimè gentium. quanquā hæc quidem etiam prolata si essent, nunquā tamen ad euangelium ipsum ita

pertinere potuissent; vt dici posset; quia lex & prophetæ libris scriptis continerentur, ideo legem quoq. ipsam gratiæ, scripto etiã euāgelio cōtineri oportuisse. Hæc igitur mittamus. Sed, profertne saltē, quæso, litteras vllas recens diuinitus scriptas, & sibi ad Mariam deferendas traditas? vt hoc modo euangelium, cū scripto ipso cœpisse, dici potuerit? Ne hoc quidem. Sed quid facit? Narrat Euangelista, ingressum ad virginem, non scriptum vllum exhibuisse, aut de scripto quicquā recitauisse, sed sermone tantum vsum esse. Ingressus, inquit, ad eam dixit. Quid autem dixit, quæso? aut quod exordiū dedit adueniens? Numquidnam ex Mose illud attulit? Semen, inquit, tuū, ô Maria, conteret caput veteris illius serpentis. Numquidnam ex propheta illud? Ecce virgo concipiet & pariet filium? Nequaquam. Nam illud, quod paulò post affert, huic simile. Ecce, inquit, concipies in utero & paries filium: aliò pertinere videbatur; & quidem ipsi etiam virgini: quæ continuò excepit, & ait. Quomodo fiet istud, quoniam virū non cognosco? Quē enim istud rectè obiici poterat, si angelus ex scripturis prophetis pronunciauisset, virginem concepturam primū, deinde etiā parituram fuisse? Verū ille nihil planè ex scripturis depromptum affert, nihil etiam de scripto recitat; sed verbis modò nudis virginem salutat. Aue, inquit, gratia plena, dominus tecum: benedicta tu in mulieribus. Quid autem postea, cū virgo ad legationem ipsius, suspensio nescio quomodo esse animo videretur: qua ratione, quæso, id quod vult persuadet? Scripturamne tunc in rem præsentem affert vllā, qua fidem verborū suorū fanciat? Non. Sed quid? Simplici sermonis genere exponere pergit. Et. Spiritus, inquit, sanctus superueniet in te, & virtus altissimi obumbrabit tibi. Ideoque & quod nascetur ex te sanctum, vocabitur filius Dei. Et si quid præterea, exēplo certè tantum ipso pugnat. Et ecce, inquit, Elisabeth cognata tua, & ipsa concepit filium in senectute sua: & hic mensis, sextus est illi quæ

illi quæ vocatur sterilis: quia non erit impossibile apud deū
omne verbum. Igitur euangelio ipsi, siue quis euangelii
prædicationis initia spectet, siue ipsius illius origines excu-
tiant, qui euangelii ipsius dux fuit & auctor, suum etiam sine
scriptura nomen, suam etiam sine scriptura auctoritatem
constituisse, liquet. Quod autem ad posteriora tempora atti-
net, quibus iam tum extabant euangelia scripta; illo quoq.
ipso tempore, non omnia Christi acta scripto fuisse, quoad
opus sit, compræhensa, vel vnus mehercule sermo ille, quē
dominus ipse, apud duos illos, Emaunta proficiscentes di-
scipulos suos, habuit die ipso suæ resurrectionis, exorsus,
vt Lucas scribit, à Mose & prophetis, demonstrabit. ser-
mo, dico, maximarum rerum, & maximorum mysterio-
rum plenissimus: quem ipsum tamen vnus ille modò Euan-
gelistarum, quem dixi, significat potius, & innuit, quàm
scripto persequitur: cæteri ne significant quidem. Qui ser-
mo cum inter cæteros domini sermones in scriptum rela-
tus non fuerit, indicio est, quod etiā ex multis aliis euange-
liorū locis apertè ostendi potest, multos eiusdemmodi ser-
mones domini, eandē conditionem passos esse; atq. adeò tã
de scripto, quàm de hominū memoria intercidisse. Quod
quidē cum ita sit, quæro, si quis bonus fragmentū saltē ali-
quod eorū sermonum alicunde proferat, repudiandusne is
nobis fuerit, cum tanto munere hoc? Non puto. Atque eas
traditiones quidem, quas nos defendimus, fragmenta esse
dictorum aut factorum, vel Christi, vel Apostolorum, vel
omninò eorum, qui cum iis versati sunt; & præ se fert ec-
clesia ipsa catholica, & iisdem sibi standum esse profitetur.
At hæretici negant; at ecclesia ait. At hæretici oppugnant;
at ecclesia constantissimè tuetur. Vtri igitur credemus? V-
trīnam censes? Mea quidem sententia, ecclesiæ potius, quæ
neque scripturæ testimonio in hoc genere destituitur, & si
fortè etiam destitueretur, sua tamen sua auctoritate opti-
mum quenque frangeret; quàm vobis, ô hæretici, qui ne-
que scri-

que scripturam ferè ad eam rem habetis vllam, &, quam
quam maximè ambitiosi estis, tamen ne ipsi quidem tantū
vobis arrogare audetis, vt sine scriptura loquentibus, quic-
quam vobis fidei velitis adhiberi. Interea igitur, dum vos
aduersus traditiones nostras, aliquam siue traditionem, si-
ue scripturam contorquetis, vel vnā saltem, vel minimā,
vel vix vi expressam; audite, audite, id quod sanè facere de-
betis maximi, vestrum scriptum dei verbum, pro traditio-
nibus nostris non scriptis, à nobis bona fide recitari? Vt
præter comparisonem auctoritatis & scripturarum vtrò
citroque allatarum, illud denique tertium ad contentio-
nis nostræ comparisonem accedat, quòd nos quidem scri-
pturam ipsam, vnicum vestrum præfidiū, contra vos afferi-
mus, et vestro vos iugulamus gladio; vos aduersum nos nec
scripturā fortassis, nec certè traditionē vllam. Sic igitur ha-
bet Paulus Apostolus, in ea quæ est scripta ad Thessaloni-
censes. FRATRES, STATE ET TENETE, inquit. Quid
teneamus, Paule? TRADITIONES, inquit ille. Sunt igi-
tur, tua quidem sententia, aliquæ traditiones. Ecquāsnam
autem ex illis teneamus, quæso? Respondet. QVAS DIDI-
CISTIS ET HAVSISTIS, SIVE EX SERMONE, SIVE
EX EPISTOLA NOSTRA. Hē quid ais Paule? etiāne
verò traditiones nescio quas, præter epistolam quidem tu-
am promulgatas, seruari ac teneri à christianis hominibus
scribis oportere? Ego verò, inquit, & scribo, & aio. Quid
illud Paule alterum? quod maiore nos etiam propemodū
admiratione afficit? Etiāne id, quod scriptum, & ad per-
petuitatem consecratū, ex epistolis tuis sacrosanctis hau-
simus, leuissimo & odiosissimo traditionum nomine appel-
las? Sic enim dicere videris; cū scriptas æquè & nō scri-
ptas traditiones teneri iubes. Ego verò, inquit, & iubeo, &
dico, & appello. Si igitur Paulus Apostolus & traditiones
esse ait; & non scriptas, æquè etque scriptas tenendas esse
scribit; & ipsas præterea scriptas, non minus quàm non scri-
ptas, vno

ptas, vno traditionum communi nomine appellat; quid est, quæso, amici nostri, inimici traditionum, quod Paulo positis ex aduerso respondere, pro auctoritate traditionum non scriptarum depugnanti? Nisi fortè hoc etiam loco, quasi per ludum & iocum aliquem, ad vestra illa, omnibus nota, sed dudum vobis erepta iam arma, recurrere libeat, vanas quasdam & pharisaicas, & legi diuinæ ex diametro oppositas, hominū ^{ἐθελουθῆσκειας} impugnandi: quas nos scimus, nihilo magis, quàm istam vestram, in aspernandis sanctis & diuinis ecclesiæ non scriptis traditionibus, temeritatem, lege quidem diuina meritò exagitari, ad nostras autem & ecclesiæ traditiones, de quibus loquimur, minimè omnium pertinere. Sed intueamur, obsecro, interea, qualem tandè & quantam machinam ex scriptura depromptam, admo-ueant, ad traditiones ecclesiæ subruendas. Scriptum est, in-quiunt, *SCRVTAMINI SCRIPTURAS*. At benè habet quidem. Ego enim non scriptum id solum, sed etiam quasi pro testimonio, per quendam exprobrandi modum, dictum esse agnosco, & quidem dictum Iudæis ipsis; qui, vtut scripturas, in quibus ipsi vitam se æternam habere putabant, rimarentur, Christum tamen Messiam illum esse diuinitus promissum non agnoscebant, nec ad eum, vt vitam haberent, adire volebant. Et scriptum igitur, & dictum esse fateor; præceptum hoc loco omnibus esse, idem vt facerent, id verò non planè inter omnes dico conuenire. Agè verò etiam, præceptum esse agnoscamus; ad scripturas tamen euangelicas, id autem est, ad scripturas propriè nostras extendi non posse, necessariò est confitendum. Quæ enim tunc scripturæ euangelii extabant? vt eas scrutari potuisse viderentur ii, quos sibi verbis illis dominus & magister noster admonendos esse existimabat? Nullæ, opinor, præter veteris scripturas testamenti; quæ etsi de eodem hoc Christo nostro testificarentur, at & obscurè tamen id facerent, nec multum omninò, sine spiritu non scripto, in mentibus hominum

hominum proficerent. Non igitur nos cogit, etiam si præceptum sit, quod dictum de lege veteri est, id trahere ad novam, quæ est propriè nostra, id autem est, christiana. Sed id quoque mittamus, & scripturas illas Mosis ac prophetarum veteres, scrutemur quantum libet Christiani: quis enim eas contemnat, aut quis non potius magnificiat? Verùm ubi illud est, quæso, siue in Mose ac prophetis, siue adedò iam quoque in Euangelistarum ipsorum scriptis, quod tamen à vobis, si causam planè vincere, & traditiones omnes ex ecclesia proscribere voluistis, proferri utiq. oportuit? ut ita scilicet vsipiam diceretur. Negligite mortales securi, & pro arbitrio vestro omne traditionum genus reiicite. Aut illud etiam non paulò valentius? Si amici traditionum vllarum estis, Christo inimici constituimini. Aut saltem illud mollius? Ne traditiones aut scrutemini vllas, Christiani, aut verò in scrutandis & interpretandis scripturis, vllò modo sequamini. Vbi sunt ista, inquam? Quando igitur hoc non adfertis, illud à vobis interim bona cum venia petimus, si placere potis est, nobis ut respondeatis. In vtro horum maiorem cogendi vim inesse existimetis; in eòne, cùm scrutari scripturas iubemur, quod vos obiicitis; an verò, quod nos vrgemus, cùm stare in traditionibus, easque tenere iubemini? nobis enim vestrum illud, vnico verbo, SCRVTAMINI, neque, ut ostendimus, aut satis firmo, aut ad nos dicto, neque, ut constat, admodum vehementi, niti, nostrum, duobus, & quidem multò pressioribus, conceptum verbis esse videtur. STATE ET TENETE. Et vestro illo, SCRVTAMINI, labor tantum & industria hominum, ad rem difficilem & obscuram inuestigandam fortè excitari & accendi videtur; ut quemadmodum „ scribit Lucas in actis Apostolicis, scrutemur scripturas, nū „ hæc ita se habeant; hoc autem nostro, STATE ET TENETE, vos ipsi, obligatione quadam, & planè vinculo parendi, in se magis necessaria, & magis salutari, & magis etiā certa ac

certa ac nota, quàm ardua atque difficili, astringi videmini. Commouent se, & aliò desiliunt, ac dicunt. Quid enim? aut quî, inter tot, & tam varias traditiones, illas saltem germanas atque legitimas, ex Pauli & Apostolorum sermone hauistas, à falsis & supposititiis internoscant? Commodè loqueris. Hoc verò vos, ô amici, verbo vno docere poterant, iidem illi qui docent nos, patres nostri, & canones ecclesiæ, & concilia œcumenica ipsa; sed quum vos egregiè contemnatis hæc omnia, docere sanè vos iam nō possunt; illo tantum decreto Pauli, quod vobis de scripto recitatū, ob oculos assiduè ponere non desistent, mentem vestram perpetuò quatiant, & conscientiam ipsam vestram etiam atque etiam stringent atque vincient, vt Pauli ipsius scriptam, de traditionibus non scriptis, sanctionem obseruare, inque iis adeò **STARE EASQUE TENERE** necesse habeatis. Quem ita præcipientem Apostolum si non audiueritis, Christum ipsum non audiueritis; si ita monentem spreueritis, Christum spreueritis; imò vos ipsos planè, vestramque omnem existimationem prodideritis, qui per scriptam Apostoli auctoritatem, quibus vos auctoritatibus parère, dicis causa simulatis, re vera floccifaciat. Quid agitis igitur? aut quò vos conuertetis, si tenere iubemini quod ignoratis? Equidem adiuuabo vos in his angustis rebus vestris, &, quæ ignoratis, ostendam, ne ignoretis; adferam enim, quid ea de re censuerit magnus vir, & fidei plenus Augustinus, qui ita scribit ad Ianuarium. **ILLA QUÆ NON SCRIPTA, inquit, SED TRADITA CVSTODIMVS, QUÆ QVIDEM TOTO TERRARVM ORBE OBSERVANTVR, DATVR INTELLIGI, VEL AB IPSIS APOSTOLIS, VEL PLENARIIS CONCILIIS, QVORVM EST, inquit, IN ECCLESIA SALVBERRIMA AVCTORITAS, COMMENDATA ATQVE STATVTA RETINERI. Et alibi. QVOD VNIVERSÆ TENENT ECCLESIAE, NON CONCILIIS INSTITUTE,**

TVM, SED SIMPLICITER RETENTVM, ID NON
"NISI APOSTOLICA AVCTORITATE TRADITVM
"RECTISSIME CREDITVR. Hoc magis etiam Leo ma-
"gnus. DVBITANDVM, inquit, NON EST, QVICQVID
"IN ECCLESIA IN CONSVETVDINE DEVOTIO-
"NIS EST RETENTVM, ID DE APOSTOLICA, AT-
"QVE ADEO DE IPSIVS SANCTI SPIRITVS DO-
"CTRINA PROFLVXISSE. Hæc isti ante etiam mille
annos. Nec defunt fanè his quoque ipsis antiquiores, qui
idem sentiunt, quique de ratione ac vi sanctarum traditi-
onum non scriptarum, præclarè admodū existimant. Vos
autem dum veras traditiones à falsis internoscere posse vos
negatis, nullas obseruatis; nullis autem obseruandis, scri-
pturam profectò ipsam, quam vos tenere verbo iactatis,
re ipsa ludibrio planè habetis. Nam si non habetis, cur tra-
ditiones, quas per sermonem Apostolicum didicit ecclesia,
non tenetis, quum eæ tam apertè, vt audistis, vestra scriptu-
ra sanciantur?

C A P. VIII.

Traditionum sanctarum domicilium ecclesia catholica.

*Ecclesia & scripturas magnificat, & traditiones non scriptas non
spernit.*

*Quia vniuersalis est: sine traditionibus autem non essent vni-
uersa.*

Locus Apostoli iterum. State & tenete traditiones, explicatur.

*Obiectio hæreticorum. Paulinas traditiones non scriptas, easdem
esse cum iis, quæ ex eius epistolis hauriuntur.*

*Solutio. Obiectionem esse alienam primùm à Pauli ipsius sententia,
deinde autem à veritate, pietate, perfectione, simplicitate Christiana.*

Obiectio alia. Leuem esse auctoritatem traditionum.

Soluitur multis exemplis.

Præroga-

Prærogatiua traditionū sanctarū. 1. quòd sunt propriæ catholicis.

Non ethnicis, non Iudæis, non Hæreticis.

Locus Apostoli. Depositum custodi.

2. quòd ecclesiā et firmet et ornēt.

Maximè enim obsequentē Christi sponsā videri faciūt.

Contemptores traditionum vapulabunt.

Hos igitur vitare; traditionum autem amicam ecclesiam complecti debemus.



OS equidem, qui catholici & esse, & dici volumus, vtrumque sanè traditionum genus, & si quid præterea imperatum, laudatum, propositum etiā nobis esse nouimus, id omne ad nos pertinere libenter profiteamur. Nam deligere quidem quid obserues potissimū, quidūe item non obserues, cū omnia præcipiantur, delectus est, id autem est, hæresis est; quæ ex delectu, vt diximus, apud Græcos nomen est sortita. Atque in hoc quidem, vtut vobis incredibili sapientia præditis hominibus, bardis fortassis ac stupidi videamur, magnificè nos efferimus, & quod vobis stulticia est, id sapientiam esse maximam interpretamur; cū enim scripturas ipsas magnificiamus, tum traditiones præterea illas vocis viuæ, eodem prorsus loco ducimus. Quid ita? quoniam eadem illa scriptura, quam æquè vobiscum veneramur, nisi quòd nos re, vos verbo tantum; sic docemur. Hominem quidem viuere verbo Dei, verū non illo solū quod perscriptum est, sed omni prorsus, quod procedit, non dico è calamo, & atramento, sed multò magis, vt scriptura dicit, ex ore ipso dei, & vt nos certa admodū coniectura assequimur, illo planè Dei verbo, quod vel ex nutu saltem ipso & significatione eius, verbum esse ipsius possit quomodocumque apparere. Vtrumque igitur æquè retinemus, in eaque re officium nostrum catholicorū hominum perlibenter agnoscimus. Cū

enim ad hominem catholicum, omnes, vt ostendimus, rerum, locorum, personarum, rationū, temporum vniuersitates pertineant, profectò apparet, ex illa, quam primo loco dixi, rerum vniuersitate, rerum, inquam, quæ Christo deuotis, & ecclesiæ addictis catholicis hominibus proponuntur obseruandæ, non magis traditiones non scriptas, quàm scriptas ipsas, posse eximi, quo minus obseruentur; cum alteræ sine alteris, vniuersitatem illam rerum à catholicis obseruandarum minimè perficiant. Quid enim scribit Paulus? "ELEGIT VOS DEVS, inquit, Ô THESSALONICENSES (nunc autem ad nos conuerso sermone idem profectò loquitur) PRIMITIAS IN SALUTEM, idque IN SANCTIFICATIONE SPIRITVS ET FIDE VERITATIS; ad quod quidem electos, VOCAVIT VOS PER EVANGELIUM NOSTRUM. Per euangelium? Itaque fratres, inquit; & iterū dico. Itaque, STATE ET TENETE hoc euangelium, id autem est, TRADITIONES, QVAS DIDICISTIS, SIVE PER SERMONEM, SIVE PER EPISTOLAM NOSTRAM. Patet igitur, vtrumque traditionum genus & euangelii nomine appellari, & à piis omnibus æquè retineri oportere. Sic enim propemodū sonant Pauli verba. VOCAVIT VOS, inquit, DEVS, PER EVANGELIUM NOSTRUM; STATE IGITUR in hoc euangelio, per quod vocati estis, ET TENETE eius ipsius euangelii TRADITIONES; non minus illas, QVAS DIDICISTIS PER SERMONEM, quàm illas QVAS DIDICISTIS PER EPISTOLAM NOSTRAM. Quid his apertius? Atqui nostri Paradosimastyges, cum aliter nō possunt, confusione sola introducta, illa etiam, quæ sunt apertissima, velle videntur obscurare. Aiunt enim, acutè, vt ipsis quidem videtur; vtrasque traditiones æquè commendari, & parem vtrisque commendationem tribui; sed quibus vtrisque? Nimirum Patuinis, inquiunt; idque non tantum ob Apostoli auctoritatem ipsam, sed etiam ob traditionum

ditionum ipsius scriptarum & non scriptarum conuenientiam inter se summam. Quæ enim sunt aliæ, inquit, Paulo Apostolo, traditiones ex sermonibus eius haustæ, quàm quæ hodieque hauriuntur ex eiusdem epistolis? Neque enim consentaneum esse putant, aliud Paulum scribere, & aliud loqui; qui ipse fateatur apud Corinthios, eundem se illum vnum scire ac nosse per epistolam, quem ipsum coram etiam inter ipsos cum versaretur, solum nouisse se ostendit, Iesum Christum, & hunc quidem crucifixum. Alioqui magna voce Galatas per epistolam contestari. Si quid diuersum, siue ipse ille, siue adeo quispiam non solum hominum, verum etiam angelorum, afferre conetur in doctrina euangelica, ab eo quod semel ex eo Galatæ ipsi accepissent, hunc ipsum qui id adferat, non doctorem euangelicum, non internuncium aliquem salutarem, sed virum sacrum ac celestem, sed omni execrationum genere deuinctum hominem, sed, ut ipsius denique Pauli verbo utar, anathema ipsum censeri oportere. His igitur demum traditionibus solis non scriptis, commendationis aliquid relinquere se ostendunt isti, quæ vnas prorsus cum perscriptis traditionibus, & easdem res subiectas habeant, non quæ alteræ ab alteris, rebus ipsis subiectis differant inter se atque inuicem dissentiant. Tunc enim profecto verum esse negant, ut salutariter aliquid, toto illo non scripto traditionum genere præcipiatur, quod ipsum non præcipiatur scripto. Caput igitur est, quod accipere se tandem & venerari inquit, traditiones non scriptas, quæ quidem cum scriptura conueniant; auersari, quæ repugnent. Hæc oratio est, inquit. At mihi quidem tota primum à Pauli ipsius sententia, deinde partim à veritate, partim à pietate, partim à perfectione, partim denique à simplicitate christiana videtur esse aliena. A Pauli sententia quidem. Quis enim hæreticos ferat ita argumentantes? Paulus scripto ipso fatetur, se, cum venisset olim Corinthum, nihil prorsus aliud scire iudicauisse, nisi Iesum crucifixum. Ergo,

non aliæ traditiones Pauli in ecclesia locū habere debent, quàm quæ ex eius scriptis hauriuntur? Quod esset enim hoc argumentationis genus? Dices. At nihil sciuit Paulus aliud quàm Iesum crucifixum. Respondebo. At hunc vnū & eundem, quem solum sciuit, variè sanè pro loco & tempore, tradere non modò potuit, sed etiam voluit; cū omninò is fuerit, qui omnibus omnia fieri studuerit; sapientibus videlicet scriptura ipsa proponenda, in qua se exerceant, insipientibus autem, vt ipse loquitur, & ignaris, qui litteras nesciunt, traditione ecclesiastica relinquenda, cui acquiescant. Dices. At Paulus execratur eos, qui aliud doceant quàm docuerit ipse. Meritò id, inquam. at hoc quidē, ô bone, pro me magis quàm pro te facit. Ego enim ex eo, conuenientius, & ad Pauli sententiam, vt arbitror, accommodatius argumentabor sic. Paulus execratur eum, qui traditionibus eius, viua voce factis cōtraueniat, (de his enim, vocalibus nō scriptis traditionibus, eum loqui in loco proposito, illud euincit, vt opinor, quod præter hanc, nullam ante hac aliā scripserit epistolā ad Galatas; & hanc tamē execrationē de tradito et accepto euangelio, primi iam tū ipsius epistolæ capitis principio ipsi interserat) Ergo præter traditiones ipsas viuæ vocis, quod solum ibi Paulus appellat euangelium, nemo omnium quicquā aliud in ecclesia docere potest, ne scripto quidē ipso. Quod si est, sequitur sanè, doctrinam ipsam scriptam, traditionibus potius viuæ vocis esse moderandam, quàm econtrā. Et certè ita semper factitatum fuisse in ecclesia, infrā etiam per occasionem ostendemus. Nunc satis sit vidisse, argumentationes hæreticorum contra traditiones, à Pauli esse mente prorsus alienas. Videamus iam cætera, quæ diximus; hunc videlicet eorum sermonem totum, etiam à veritate, pietate, perfectione, simplicitate christiana penitus abhorrere. A veritate. Ostendam enim, traditiones non scriptas, etiamsi rebus subiectis differant à scriptura, commendari necessariò oportere. A pietate.

pietate. Docebo enim, illis ipsis, multa piè ac salutariter etiam præcipi posse. A perfectione. Neque enim plenum aut perfectum videri potest, quod illarum duntaxat traditionum meminit, quæ scripturæ ipsi aut conueniant, aut repugnent, cum sint præterea quæ neque repugnent, neque tamen idem dicant; sed aut id, quod in scriptura desit, suppleant, aut, quod obscurum sit, illustrent. Atque hæc quidem tria interim ostendere sufficiat. Nam quantum, planum per se ac manifestum est; summa calliditate ab hæreticis approbari traditiones scripturæ congruentes, respuigantes; nimirum, ut per hanc occasionem, iudicium ad se arbitriumque aduocent, vel potius vi atque astu pertrahant, de his, quæ sint quæ cum scriptura conueniant, & quæ sint quæ repugnent. Ostendamus igitur tria, quæ promissi. Non longè abiero. Quid enim, quæso, ait Paulus ille idem, de iisdem eiusmodi rebus Corinthiis scribens? Equidem cum scripto ipso satis ipsis tradidisset, ea quæ tunc scripto tradenda esse existimauit, infert. CÆTERA, inquit, CUM VENERO DISPONAM. Hic ego sanè, dum tria illa demonstrare laboro, ostendo quatuor. Vnum. Traditiones ipsas non scriptas distingui rebus ipsis, à traditionibus scriptis. Alterum. Non scriptas traditiones vel supplere quod desit scriptis ipsis, vel illustrare, quod in illis fuit obscurius. Nimirum, CÆTERA, inquit Apostolus. Cætera. non ergo eadem hæc quæ scribo, sed cætera; sed alia; sed ab his diuersa; sed reliqua, quæ non scribo, inquit, & quæ desunt scilicet. Hoc est enim, τὰ λοιπὰ. Deinde ex iisdem illis verbis, ostendo tertium. Hæc enim cætera, quæ non scribit, non negligit profectò Apostolus, sed dispositurum se ea esse ostendit, cum venerit. Ex quo patet, vtiliter multa præcipi posse traditionibus non scriptis. Quorsum enim disponentur à Paulo, nisi id vtiliter fieri ab eodem iudicaretur? Et certè cum mecum considero, multa ibidem statim Paulum scribendo fuisse persecutum, cætera tamen illa, scripto tunc

pto tunc persequi noluisse, sed in aduentum vsque suum distulisse: cum hæc, inquam, considero, ita planè iudico, aut illa, vtilius coràm quàm per litteras, tradi posse, Paulū existimauisse; aut certè eius rei aliā ab hæreticis causam inuestigandam esse. Ex quo ipso liquet etiam illud quartū, quod mihi in rebus propositis videtur esse præcipuum, Traditiones non scriptas, re etiam à scriptura differentes, cōmendationem mereri. Atq. hoc fanè illud est, quod idē iste Apostolus Thessalonicensibus quoq. scribēs significat; dum ait, „optare se magnopere, vt illos coràm possit cernere. At cuius „rei gratia? vt tū temporis, inquit, perficiam & absoluam ea „quæ mihi ad instituendam fidem vestram deesse etiam vidētur. Et ad hunc eundem modum alius Apostolus quoq. „dum ad suum quendam ita scribit. Multa se habuisse quæ „illi scriberet, verùm chartæ per atramentum & calamum „committere noluisse: venturum se tamen ad eum esse pro- „pediem, & coràm de his acturum. Quibus quidem ex duobus duorum Apostolorum locis, satis apparet, primū, alia esse quæ transacta sint, alia quæ restent, & quæ ad mutuum congressum differantur. Deinde constat etiam illud, ea de quibus coràm agendum sit, necessaria Apostolis videri. Nam & ea, quæ deesse dicuntur, necessaria profectò ad perfectionem sunt; & de quibus Apostoli agendum sibi esse existimant, inutilia fanè videri non possunt. Quin & illud postremò perspicuum est, pleraque esse in diuinis ipsis præceptis atque institutis, quæ chartæ malè commissæ, rectissimè tradantur voce viuæ. Cur enim & is ipse Apostolus, ea quæ in hoc genere necessaria esse iudicabat, voci viuæ committere vult, scripto non vult? & ille alius, cum facultatem haberet, facere per epistolam Thessalonicenses certiores, de his, quæ illis deesse viderentur, coràm tamen potius ea se esse suppleturum pollicetur? Quibus ex rebus omnibus conficitur, illas etiam non scriptas traditiones, quæ à scriptura reipsa differunt, suam laudem & cōmendationem

dationem habere. Leuem fortassis, inquires : hoc enim tibi
 solum, vt diceret, restare videbatur. Verum tu quidem de
 his, vt lubet, ita iudica, cui cœlum, cœnum, vel vt est in vul-
 gari nostro prouerbio, ahenum esse videtur ; nobis autem
 profectò, ea in quibus constituendis Paulus Apostolus in-
 dustriam suam versari non erubuit, quæque etiam per se
 instituta, tanto studio seruare ac tenere præcepit, & quæ
 alioqui ad perfectionem eorum fidei, ad quos scribit, de-
 esse ostendit, leuia videri non debent. Et si sint leuia, tanto
 hercle magis amplectēda, quòd leuibus, potius quàm gra-
 uibus & difficilibus cōsectandis, officio nostro ritè perfun-
 gi videamur. Vis autem quoque videre, quàm non sint fu-
 tilia, ea quæ ex traditionibus non scriptis emanarunt ? Non
 recito, quæ Tertullianus, & alii commemorant, adoratio-
 nes nostras ad orientem ; non, diei dominicæ interdictum
 ieiunium, non contrà, quartæ & sextæ feriæ imperatum ;
 non recenseo quadragesimæ obseruationem, non, vsum &
 honorem imaginum, non, orationes pro fratribus vita fun-
 ctis, non, cerimonias, cùm aliorum sacramentorum, tum
 baptismi præcipuè, quæ omnia ex vetustissimis traditioni-
 bus non scriptis ortum habuisse constat, ipsum illum bap-
 tismum paruulorum, quo nunc passim, inuitis quibusdam
 hæreticorum cuneis, vtimur, vnde, quæso, habemus, nisi
 ex traditionibus ? Homousii vsurpationem, vnde, nisi ex tra-
 ditionibus ? tres personas, vnum Deum, vnde, nisi ex tradi-
 tionibus ? Trinitatem ipsam, vnde, nisi ex traditionibus ? Ex
 traditionibus autem, dico, non scriptis. Vbi enim scriptum
 est, infantes esse baptizandos ? vbi scriptum est, Dei filium
 patri ipsi esse consubstantiali ? vbi, Mariam matrem do-
 mini, & esse, & fuisse semper virginem ? Deum trinum esse
 in personis, vnum in essentia, (audeamus enim his iam vti)
 vbi scriptum est ? Trinitatis ipsum vocabulum, vbi scriptū
 est ? Et tamen hæc omnia, ceu normæ quædā, non loquen-
 di solum, sed etiam ita prorsus sentiendi, ad magnas olim

in ecclesia excitatas controuersias sopiendas mirificè valu-
erunt, finemque adeò ingentibus dissidiis imposuerunt, &
nos ipsos in maximarum & maximè necessariarum rerum
certa cognitione statuerunt. Vnde? nisi ex non scriptis tra-
ditionibus? Debilissimo, dices, fundamento res maximas
inædificatas. Atqui secus pronunciant iidem illi auctores
maximi. Iræneus inprimis, grauis & perantiquus auctor,
„dum scribit. Si scripturæ deessent, vel ipsis traditionibus a-
„bunde regi potuisse ecclesiam Christi. Et certè si penitus in-
trospicere, ac rem suis examinare ponderibus voluerimus,
ita planè cōperiemus. Cùm scripturæ quidem ipsæ, com-
munes nobis sint cum ethnicis, & Iudæis, et hæreticis, à qui-
bus omnibus non solum leguntur, sed etiā sæpenumero ad
vñs præposteros contorquentur, tū traditiones sanè ipsas
in ecclesia non scriptas, Christianorum ipsorū esse maximè
peculiares; ita vt ad earum communionem soli Christiani
pertineant, gentes autem vel nullo veræ diuinitatis sensu
præditæ, vel superstitione ipsa profanæ, vel à vera & ca-
tholica religione discessione, impiæ, vix, ac ne vix quidem
possint vnquam peruenire; illæ quidem, quòd eas igno-
rent, hæ autem multò etiam magis, partim quòd eas gra-
uissimis contumeliis afficiant, partim verò, quòd planè
contemnant, & pro nihilo ducant; omnes autem in vniuer-
sum, quòd eas ecclesiæ ipsi, vt maximè proprias, relinquant.
Atque ego quidem depositum illud, de quo diligenter cu-
stodièdo, non frustra toties & tam accuratè, vt dixi, admo-
net Paulus Timotheum suum, non magis ferè ad scripturas,
quàm ad traditiones ipsas non scriptas pertinere iudicem.
Sic enim scribit idem Paulus eidem isti Timotheo episto-
„la posteriore. FORMAM, HABE, inquit, SANORVM
„VERBORVM. Quorum, Paule? eorūne quæ scripsisti
„tu? non inquit, sed QVE EX ME AVDISTI TV. Quonā
„quæso in genere doctrinæ? IN FIDE, inquit. Solāne verò,
„vt isti volunt? Minimè, inquit; sed ET IN DILECTIONE
QVOQ.

QVOQUE IN CHRISTO IESU. Tum statim infert. BONUM DEPOSITUM CUSTODI, inquit. Quod quæso? " Ecquodnam censes, inquit, præter id quod dixi, sanorum de fide & dilectione verborum? & quidem eorum verborum, quæ audisti ex me potius, quàm quæ in meis scriptis legisti. Habebone autem tantum penes me formam hanc, non etiam aliis communicabo? Tu verò, inquit ipse capite sequenti eiusdē epistolæ, ETIAM ALIIS EADEM IL-
 LA COMMUNICA ET COMMENDA. Quænam illa? " Iterum, inquit, dico tibi, EADEM QUÆ AUDISTI EX ME, PER MULTOS TESTES. Non, quæ legisti scilicet, aut priore ad teipsum scripta, aut aliis ad alios scriptis, & atramento consignatis epistolis. sed quæ audisti. sed quæ audisti. Hoc depositum, inquit, & ipse custodi, & aliis cōmenda fidelibus hominibus. Atq. hæc quidem Apostolus. Non frustra autem neq. immeritò hæc ab eo toties inculcari, dubitationem non habet. Eiusmodi enim depositum τῶν ἀρχαίων sicubi aut absit, aut minus vigeat, ibi, etiamsi fortè scriptura ipsa ad omnia occurrat, neque nervis prorsus careat, omnia tamen nescio quomodo, vel languere in ecclesia videas, vel certè multa quotidie nova, ad conturbandam eius pacem & quietem exorientia sentias: quæ deinceps, vt leuissimè dicam, tolli sanè aliter, nisi traditionū ipsarum non scriptarū subsidio, non posse videantur. Contra autem, vbi modò depositum hoc traditionum sanctarum fuerit, iuxta præceptum Apostoli, custoditum, ibi, ipsius quidem præcipuè beneficio, omnem statum ecclesiæ veteris & totius christianitatis, in sua semper integritate & quiete permansisse, & ad posteros etiam ipsos in eadem esse transmissum, ex omnium temporum historia notius est quàm vt verbis debeat explicari. Neq. enim vnquam quicquam, quod esset apertè impium, irrepere in ecclesiam potuit, saluis traditionibus; & dubia, si qua fortè interea emerfissent, semper sunt, ex ipsa certa traditionum interpretatione

tatione definita, & pro certis, in ecclesia stabilita. Quid ita
verò? quia ecclesia sancta in eiusmodi euellendis zizaniis,
non semper ad illud confugit, Scriptum est, Scriptum est.
quod ipsi quoque diabolo nouit esse cōmune: sed illud etiā
nō minore asseueratione atq. fiducia audet sæpenumero v-
"surpare aduersus nouatores. Nos, inquit, consuetudinē eius-
"modi nō habemus. Hæccine igitur quispiam reiiciat? hæc-
cine aspernetur? hæccine contemnat? quibus ecclesia &
securitatem quidem ac tranquillitatem suam, quod modò
diximus, maximè tuetur, ab hostium hæreticorum impres-
sionibus, & seipsam præterea morigerā inprimis & Christi
sponsi sponsam amantē maximè exhibet? Agè enim videamus,
quæ res est, quæ sponsam facit videri sponsi amantem
maximè? Nū, si ea in gratiā ipsius, nihil nisi ex præscripto a-
gat? Nū, si nihil, nisi verbere coacta, faciat? nihil nisi cōuitio
expressum in animum admittat? An potius si ipsos quoque
sponsi nutus, quantūuis remissos, ipsas etiā illas quātumuis
tenuēs animi significationes, quā diligētissimè obseruet?
Mihi verò hoc nomine, & hac appellatione, ea demū spon-
sa dignissima videbitur, quæ nullis sponsi nutibus expecta-
tis, ipsa vltrò, quid sponsus amet, quidūc oderit, ex dome-
sticis eius familiaribus perquirat, & omni qua potest ratio-
ne odoretur; perspectis autem & exploratis eius studiis ac
voluntatibus, nihil tam in iis minutum esse existimet, quod
sibi eius deuinciendi gratia, reiiciendum, aut recusandum
esse arbitretur. Si enim semper syngraphas quasi quasdam
à marito expectet, si semper descriptos ipsos officiorum su-
orum indices requirat, nec præter scriptum, aut credat, aut
agat, aut incœptet quicquam, quo placeat ei, cui se proba-
uit, mihi quidem non tam sponsa aut coniunx morigera,
quā morosa quædam ingenii patientiæque maritalis ir-
ritatrix esse videbitur. Sic igitur ecclesia quoque, si omnia
ad summum ius reuocet, & nisi quæ scripta sint, reliqua aut
sponso ingratissima esse deputet, aut ad se nihil pertinere
existimet,

existimet, nã mihi illa quidem, non tam sponsa legitimo iure deuincta, quàm plebeia mulier in concubinae tantum locum ducta esse videretur. Contrà verò si se obsequentẽ potius Christi sponsam domini, quàm difficilem & importunam de grege fœminam, videri vnquam cupiet, tum mihi ad omnia, illas potius aut his similes ad Christum suum voces vsurpabit.

Tuus, ô rex magne, quid optes,

Explorare labor, mihi iussa capeßere fas est.

Aut illas potius ex propheta. Audiam quid loquatur, non tantum quid scribat; loquatur autẽ, non tantum ad me foris, sed etiam in meipsa intus, Dominus deus meus. Audiam audiam: sed & obediam quoque. Nam si aliter sponsa ecclesia faciat, & Dei vocem, quanquam non scriptã, quocumque tamen modo exauditam, negligere audeat, in illas profectò horribiles verborum comminationes protinus incurrat, quas eiusmodi scilicet acutis atque subtilibus, sed iisdem importunis ac fastidiosis seruis, Dominus in euangelio denunciat. Seruus qui norit, inquit, voluntatẽ domini, nec secundum eam se gerat, vapulabit nimis. Quomodo nimis? Exponit Apostolus Petrus. Vsque adeò, nimis, inquit, vt præstiterit cos non cognouisse voluntatẽ domini, quàm cognita ea discedere à sancto mandato dei. A quo mandato, Petre? Num ab eo, quod scripto consignatum ad eorum notitiam peruenit? Non, inquit; sed ab eo, quod traditum illis fuit. & quidem traditum, seu scripto, seu voce viua, & traditione aliqua. Rectẽ igitur dominus ipse vapulaturum seruum ait, qui se ad voluntatem domini non accõmodet, quam norit. Quid autem interest, ex ipsõne domino, & quidem scribente, an loquente, voluntatem ipsius cognitam habeas, an verò aliunde, & alio quopiam modo? Solent enim quoque domini per alium, imò etiam per aliud, suam ostendere sententiam. Hodie, hodie, si vocem domini audieritis, etiam si scriptum eius nullum, & tabulas obsigna-

tas nullas videritis, nolite, nolite obdurare corda vestra. Quis sapiens, & custodiet hæc, & intelliget misericordias domini? Beatus ille, & quidem ter beatus, & quater, qui Deum audit, & quæ is velit, intelligit; eaque ipsa ad officiū suum pertinere iudicat. Contrà, miserum & infœlicem, qui obturat aures suas, vt non exaudiat Dei vocem incantantis sapienter. sicut loquitur propheta. Neque igitur traditiones ab ecclesia tollere, neque nos ab ea, quæ traditiones non scriptas tuetur; rectè segregare possumus: imò conuētus omnes hominum quorumlibet, traditionibus sanctis periniquos, non suspectissimos habere non debemus; ecclesiam verò, quæ traditiones magnificat, maximi sanè facere debemus. Denunciamus vobis, inquit Paulus Thessalonicēsis, & quidem in nomine domini nostri Iesu Christi, vt subtrahatis vos ab omni fratre ambulante inordinatè, & non secundum traditionem acceptam à nobis. Ipsi enim nostis quomodo oporteat imitari nos. Vnde autem nostis? ex scriptisne nostris? Non, sed ex consuetudine & familiaritate nostra. Quoniam, inquit, non fuimus inquieti inter vos, neque ociosi. Et quæ eo loco sequuntur.

C A P. IX.

Digressio. Cur biblia, patres, concilia, malè tractentur ab hæreticis.

Scriptura hæreticis tam odio est quàm lex & iudex improbis.

Patres & doctores tam terrori hæreticis sunt, quàm lictor & carnisfex sceleratis.

Concilia hæreticis instar sunt mortis & supplicii extremi.



IC iam à proposito nos cursu nostro aliquantisper reuocemus, gradumque sustineamus, & quasi iustis in cœpto itinere confectis spatiis, nonnihil insistamus; aut adeò, si lubet, in hanc potius

potius interim cogitationis nostræ amœnitatē veluti quādam, obiter, maiore iam operis nostri confecta parte diuertamus; vt, quoniam diximus superius, traditiones sanctas illa maximè inuidia flagrare apud hæreticos, quòd ex his, omnem & scripturarum, & patrum, & conciliorū ipso- rum, trium maximè sibi inuisarum rerum auctoritatē pro- fectam esse intelligunt; inquiramus nunc iam, in hoc ipso quasi quodā sermonis nostri diuerticulo, quidnam in cau- sa potissimū esse existimemus, cur & Biblia ipsa ac scri- pturæ sanctæ, & patres item ac doctores sancti, & denique concilia ipsa sacrosancta, in tantum hæreticorum odium atque offensionem incurrisse videantur. Quo quidem in ge- nere sermonis disputationisquæ nostræ, licitum sanè velim esse cuilibet, ea hoc loco adferre in medium, quæ modò quisque ad rem propositam existimet vtcunq. posse perti- nere. Habet enim nescio quid hæc eiusmodi variarū de vna proposita re cogitationum congeries et cōcursus, quod sin- gulari quadam suauitate perfusos nostros animos & oble- ctare, & pascere, & ad maiora etiā aggredienda plurimum excitare videatur. Ego quidē dicā quod sentio. Hæreticos homines sceleratis mihi & perditis hominibus in eo persi- miles videri, vt pronunciare nō dubitem, quod facinorosis alioqui hominibus lex sit & tribunal iudicis, hoc hæreticis scripturas esse bibliorum; quod illis liCTOR & carnifex, hoc istis patres & doctores; quod illis carcer, crux, furca, hoc iis nomen & auctoritatem conciliorū esse. Quod cū ita sit, sanè quo loco iudex, lex, liCTOR, carcer, crux, habetur passim apud homines nefarios, eodem apud hæreticos ha- beri biblia, patres, concilia, minimè esse mirandum. Dic- clarius, inquis. Dicam, si potero, vt magis etiam id quod volo intelligi possit. Legibus, inquam, & iudiciis, nefarii ho- mines mirificè admodum, quod scimus, sunt infensi. Quid ita? quia vitæ, & actionib. eorum vniuersis mirabiliter re- pugnat vniuersa ipsa legum & iudiciorum ratio. Oderunt igitur

igitur ex animo ea, quæ sibi tantopere vidēt aduersari; nec
fanè prius quicquam facerent, si possent, quàm vt ea, quæ
sibi ad eum modum obstare intelligunt, primo quoque tē-
pore è medio tollerēt. Verè enim dictum est à vetere pœ-
ta. Quem metuunt, oderunt; quem quisque odit, periis-
se expetit. Sed quoniam ea tollere posse se desperant, sine
quibus, viui inter homines non posse animaduertunt; tum
autem, quoniam confidunt, quicquid in legibus ipsis acer-
bi est, id se innata quadam ingeniorum suorum calliditate,
aut omninò, aut magna ex parte posse euitare, iccirco re-
tinent eas quidem, vt videtur, verùm interim ita se compa-
rant, ita technis & cauillis instruunt, vt non tam leges, &
iudicia retenta, quàm latebra modò quædam & perfugium
scelerum, in retentis illis legibus ac iudiciis, quæsitum ab
ipsis esse videatur. Et certè ad hanc eiusmodi mentem suã
improbam, si modò concessu alicuius, facultatem legum
pro arbitrio interpretandarum adepti sint, nullo negotio
legibus ipsis & iudiciis ad omnes fraudes & latrocinia abu-
tantur. Sic isti. Atque eodem planè modo inter scripturas
& hæreticos res habet, si quis modò velit propius intueri.
Nam & lucem profectò ac splendorem illarum, vita illa &
doctrina istorum tenebricosissima, nequit non odisse; &
quod oderit, id ipsum fanè extinctum etiam nō cupere non
potest; aut, vt iam id possit, illud certè non potest, quomi-
nus saltem refugiat, & clarissimum illud ipsarum lumen ita
auerfetur, vt quemadmodum olim Iudæi aduersus faciem
Mosis radiantem, ita isti aduersus diuinarum scripturarum
splendorem clarissimum, non ausint oculorum suorum a-
ciem attollere. Cur igitur eas quas tantopere oderunt, non
extinguunt? cur non tollunt è medio? Ne hoc quidem, mi-
hi credite, non cogitant; verùm, quoniam ecclesiam diuino
illo sanctarum scripturarum splendore, quo quidem eam
non solum illustrari, sed etiam persus animari intelligunt,
priuari posse non vident, iccirco, dum tollere se posse, id
quod

quod oderunt, desperant, fūco saltem illinere, & totū illud quicquid est, paratis ad eam rem fallaciarum suarum operimentis, quasi cucullione quodam inuoluere, ac verissimam diuinarum scripturarum faciem obscurare ac deturpare nituntur. Tum autem, hac tanta ipsarum patientia abusi, antequam scilicet iudicium earum subeant, vtrō eas quasi pro reo substituunt, & ad suum ipsorum quasi tribunal quoddam aduocant; vt tum demum & vultum earū pro arbitrio fingant, & ludos de ipsis, quantum liberit faciant, & postremō, ludibrio plus satis habitas, veste etiam in speciem splendida indutas, remittant ad aliquem Pilatum; tot calumniis, tot contortarum interpretationum integumentis obuolutas, vt non facilē, præ eiusmodi inuolucris, vera ipsarum effigies possit apparere. Postremō, ita fœdē & contumeliosē acceptas, ac faciem velatas, in solio per ludibrium, quasi pro fœneo quodam iudice, collocant; collocatisque eis, pugnos, pugnos etiam ingerere non dubitant, amarulentum illud tantū non vsurpantes. Prophetiza, prophetiza, quis est, qui te percussit. Itaque non tollunt eas ferē quidem, (quomodo enim eas tollerent? aut quomodo sublatas ex oculis, pugnis cederent?) imō ita eas sæpenumero in os catholicorum dilaudant, vt in ipsorum comparationem, nullam aliam quantumuis sacrosanctam auctoritatem admittant; verū tamen cū eas ita indignē tractent & illiberaliter, vt ab ipsis aut apertē depalmari, aut certē non ex animo laudari, sed veluti iudex à nocente reo palpari tantū videatur, mihi equidem verbo solo ab eis retineri, re, hoc est sententia planē vniuersa euerti videntur. Atque hoc sanē illud est, quōd interdum, nullas rursus scripturas, vt diximus, recipiunt; quōd nouas assiduē biblicorum conuersiones quærunt, quōd de numero sanctorum librorum illorum diminuunt, quōd inscriptiones biblicorum capitum, de suo ipsi capite apponunt; quōd denique ad librorum oras, callidis quibusdam interpretati-

pretatiunculis attexendis, extremū pietati & religioni exitium moliuntur. Progrediamur vltcrius. Auerfantur flagitiosi homines leges & iudicia. sic est. sed multò etiam magis timent & auerfantur carnificem & lictorem. De legibus enim verè dixit, qui eas telis aranearum similes esse dixit, vt ad quamlibet impressionem, vltro potius ipsæ vel cedere, vel perrumpi ament, quàm vt potentes, & factiosos, & nobiles latrones in sua retia immissos, imbecillitate telarum suarum tenere queant; præsertim vbi nulla instantis & vrgentis magistratus diligētia ac rigore fuerint obfirmatæ. At verò licia lictorum & laquei carnificum, quoniam firmitate ipsa sua, manifestò telas aranearum videntur superare, iccirco maiorem etiā metum animis sceleratorum illorum hominum incutiunt, eosque omninò sic exterrent, vt cannabum quoque ipsum, quod laqueis ac liciis materiam suppeditare solet, despuere, iuxta vulgare prouerbum, atque execrari cogantur; lictorem autem & carnificem, prope vt mortem ipsam perhorrescāt. Quorsum hæc? vt intelligamus eandem planè esse rationē inter hæreticos, & patres ecclesiæ ac doctores. Cū enim hæretici scripturam ipsam omni, quod ostendimus, ratione auersentur; tū verò patres ipsos ac doctores sanctos, multò oderūt acerbius, atq. adeò multò plus etiam pertimescunt. Et quidem nō sine causa quoq. Scriptura enim cū pro se ferè non loquatur, trahi se interdum inuitam ab istis, & vi violari patitur: patres pro scriptura apparent, patres aduersario manus colligant, caput obnubunt, in ipsum etiam propemodū lege agunt. Prorsus vt lictoris quasi cuiusdam munus, in hoc sanctissimo ecclesiæ ministerio, sustinere videantur. Quamobrem, quod vulgo quoq. in rebus politicis de carnifice & lictore vsurpatur, plusquam ius & lex permittat, vim & potentiam illius non videri; id de ipsis quoque in suo genere catholicis ecclesiæ doctoribus, passim audias ab hæreticis vsurpari; non plus illis fidei esse tribuendum, quàm

quàm auctoritas permittat sanctarum scripturarum.

Bibliorum igitur leges oderunt hæretici, à patrū etiam animaduersione grauitè sibi metuunt; quid dicam de cōcilijs? Ad horum verò mentionem, subito hæreticis

refugit sanguen, atque exalbescit metu;

quòd ea non iam iudicii, aut etiam licii, sed furcæ planè instar habere existiment. Vt enim qui seueritatē legū aut iudiciorum minimè reformidant, nec virtutis amore à peccando absistūt, tradūtur lictoribus; quòd si ne horū quidē vinculis aut verberibus cōercentur, vt discant saltē formidine pœnæ, minus malefacere, in crucē tandem aguntur; ita, qui scripturarū sanctarum præceptionibus simplicibus & apertis, in officio non continentur, quominus noua, & ecclesiæ catholicæ inaudita dogmata in vulgus disseminent, ad doctores demum & columina illa religionis Christianæ relegantur: quod si ne sic quidem ad officium redeunt, tum postremò ad concilium, tanquam in carcerem detruduntur, & ibi, nisi resipuerint, condemnantur. Horrent igitur isti planissimè concilia, & ad omnem eorum mentionem contremiscunt: cumque adeò quodlibet trium illorū magnopere auersentur, scripturas quidem, vt legem & iudicē, patres, vt iustitiæ ministros; tum concilia sanè non modò auersantur, sed etiam vt mortem ipsam & supplicium extremum perhorrescunt. Atqui ipsa etiam scriptura, si illi tantopere, vt iactant, obedire voluissent, docere eos poterat, consentientes esse catholicis aduersariis suis, dum sunt in via cum eis; ne fortè ab ipsis tradantur iudici, scripturæ, & à iudice, ministris, patribus ipsis & doctoribus; qui tandem mittant eos in horrendum ipsis carcerem conciliorū sanctorum. Quas quidem omnes machinas, in ipsos hæreticos, palàm à catholicis contortas, & strenuè aduersus illos vibratas, ac vbi & quando opus esset, commolitas per Dei gratiam fuisse, ætas hæc nostra vidit, cum insigni quidem hæreticorum probro atque dedecore, catholico-

rum autem ipsorum victoria & triumpho admodum glorioso. Vt mirum non sit, tria hæc, biblia, patres, concilia, suo ipsorum nomine, traditiones autem ipsas, & suo, & trium præterea illorum sibi maximè exorum nomine, quorum illæ progenitrices & parentes existimentur, odio ab hæreticis haberi. Sed nos ad ea quæ restant pergamus.

ANDR.

PATRICII NIDECICI

DE ECCLESIA VERA ET FALSA.

LIBER III.

Qui est de tectis ædificiis ecclesiasticis.

CAP. I.

Sacramenta ecclesiæ catholicæ.

*Due partes tecti in ædificio ecclesiastico. Sacramenta & sacrificia.
Utrique & veritatem ecclesiæ demonstrant & dignitatem magnam.
Quibus & qualibus & quot sacramentis utatur ecclesia catholica.
Sacramenta ecclesiæ septem, & cur.*

1. *Quia res ipsa & necessitas sic ferebat.*
2. *Quia ita conueniebat.*

Sacramenta sunt vasa gratiæ diuinæ.

1. *Quibus grati Deo efficimur.*
2. *Quibus ad implendam diuinam legem adiuuamur.*

Singulorum sacramentorum utilitas.

Alia ratio colligendorum septem sacramentorum.



V M igitur iam fundamenta primum,
deinde parietes etiã ipsos ecclesiæ ve-
ræ; quantum in præsentia fieri potuit,
fatis lustrauerimus, & vtrumque cum
fundamentis ac parietibus hæreticarũ
synagogarum ita contulerimus, vt ma-
nifestò apparuerit, & fundamenta, &
parietes synagogarum istarum, ne in comparisonem qui-
dem, cum ecclesiæ nostræ siue parietibus, siue fundamen-
tis, venire iure posse; quando illæ quidem synagogæ, &
quatuor faxa illa, vnius, sanctæ, catholicæ, apostolicæ ec-
clesiæ,

clesiæ, quæ nos, substructionibus sacrosanctæ Romanæ ecclesiæ nostræ pro fundamento assignamus, non agnoscunt; & ex bibliis, patribus, conciliis, traditionibus sanctis, quos nos totidem parietes esse ecclesiæ nostræ definimus, vix biblia ipsa, idq. per speciē tantum, recipiant; cæteros parietes eiusmodi, non modò ad sui ædificationē non adsciscant, sed etiam ad nostram ecclesiam extruendam non admittant. Hæc, inquam, cū oratione nostra vtcumque perstrinxerimus, restat, vt ad opus intermissum nostrum redeuntēs, tectum denique ipsum operis instituti conscendamus, atque aliquid de sacramētis & sacrificiis, quæ in hoc sacrosancto ecclesiæ ædificio, tecti veluti cuiusdam instar nobis videntur obtinere, breuiter differamus; ex eoq. ipso aliquid præterea, tum ad continendos nos ipsos in gremio ecclesiæ, tum ad reliquos, per dei gratiam à synagogis istis reuocandos, præsidii desumamus.

Intelligendum est igitur, sacramentis & sacrificiis ipsis magnopere etiam dignitatem simul & veritatem ecclesiæ demonstrari. Veritatem. Quid enim tam proprium ecclesiæ esse potest, quàm sacerdos? quid tam peculiare, quàm sacramentum? quid tam eximium, quàm sacrificium? sine quibus omnibus, ecclesia non modò constitui nulla potest, sed ne cogitatione quidem adumbrari. Quid enim, quæso, tam versatur nobis in animo, cū nomen ecclesiæ vsurpari audimus, quàm coetus & conciliū hominū religiosorū, sacramentis in cōmune vtentiū, & sacrificiis ipsis, sacrificiorūue fructu ac vtilitate deuinctorū? Non credis? Tolle ex ecclesia sacramēta & sacrificia. Non vis tollere? an verò ne debes quidē? an verò ne potes quidē? Finge igitur saltē sublata esse, videbis euestigiò tantis & tā necessariis rebus ecclesiam nudatā ac spoliatam esse, vt sine iis, ne nomen quidem ecclesiæ tueri, sed pro ecclesia, conuenticulum tantū nescio quod, & sicut loquitur propheta, vix vmbraculum in vinea, & tuguriolum in cucumerario, dici atque appellari posse

lari posse videatur. Ergo veritas ecclesiæ, vt dixi, sacramen-
tis inprimis & sacrificiis demonstratur. Quid dignitas? Eo-
dem planè modo. Ponamus enim ab hac quidem parte,
cœtum aliquem; primò religiosum; esto. deinde sacramen-
tis & sacrificiis vtentem; esto hoc quoque. nam sine iis ec-
clesia esse omninò nulla potest, vti ostendimus. Verùm, vt
dicere cœperā, ponamus cœtum & religione obstrictum,
& sacramentis ac sacrificiis vtentem: quod concessimus.
quid tum postea? Equidem si is eiusmodi cœtus, sacramen-
ta religionis suæ aut diminuerit ipse, aut quæ non dimi-
nuit, ea in contemptum ac vilitatem adduxerit, aut deniq.
diminutis & in contemptū adductis vti voluerit, tum pro-
fectò cœtus ille, secundum quendam fortassis modum, ec-
clesia dici poterit, at dignitatem, mea quidē sententia, cer-
tè nō habebit: sed res ipsa nescio quomodo, diminutis qui-
dem illis, manca, & quasi membris capta; in vilitatem aut
adductis, tota inhonorata ac contempta apparebit. Quid
ita? quia caret earum rerum plerisque, quæ ecclesiam con-
stituunt, quæque eam maximè illustrem atq. conspicuam
reddunt. Hæc igitur ab vna quidem parte statuamus. Cō-
trā autem ab altera parte ponamus ob oculos, cœtum ac
conuentum hominum, religione insignem, & præterea, sa-
cramētis numero plenis, sacrificiis dignitate augustis, vtriusq.
vtilitate præstantibus, inprimis nobilem; equidem iis ita
positis, & ecclesiæ ipsi attributis, quid est, quæso, quod ma-
gnopere ad hanc eiusmodi speciem, & dignitatem in ec-
clesia, addi oportere videatur? Hæc enim vel sola, mea
quidem sententia, quasi quædam insignia sunt, quæ eccle-
siam, veluti lampada quandam accēsā, videri faciunt, cā-
que non sub modium detrusā, atque reconditam, qui lo-
cus solis debetur hæreticorum conuenticulis, latitantibus
& obscuris, sed super candelabrū ita repositam, vt & ipsa
quidem locum eminentiorem habeat, & cæteris quoq. o-
mnibus lumen ipsum communicet, qui intus sunt, & qui
iisdem

iisdem eiusdem domus parietibus continentur. Hæc sunt, inquam, quæ faciunt, vt ecclesia non solum lucerna sit, in domo reposita, quemadmodum ex Euangelio diximus, sed etiam vt sit domus ipsa, sicuti Paulus Apostolus eam vocat: & domus quidem non in agro, sed in ciuitate; imò ciuitas potius ipsa, ex sententia Christi domini: ciuitas, inquam, illa conspicua & magnifica; non vallibus ipsis depressis atque humilibus obruta prorsus & sepulta; non, ne in æquis quidem ac planis campis posita, sed in monte omninò ipso, vt ait idem Dominus, ita collocata, vt, cū fundamenta ipsius, quemadmodum Dauid inquit, in montibus sanctis iacta sint, ipsa benè supra eiusmodi fundamenta extare, totaque adeò eminere videatur. Imò, quòd verè tandem hoc loco dicendum & concludendum est: hæc sunt quæ ecclesiam, & lucernam in domo, & domum in ciuitate, & ciuitatem in monte; nec id solum, sed etiam, vt ait Esaias, montem planè ipsum, videri faciunt; neque adeò quemlibet montem, sed montem domus domini, montem, in ipso summo omnium collium, ac montium vertice, de industria collocatum: montem, dico, non solum humeris vicinorum collium in altum subleuatum, sed etiam vertice quasi ipso, omnium quotquot sunt reliquorum montium in sublime elatum: vt ita ad eum modum, hæc lucerna, hæc domus, hic mons, hæc ciuitas, supra montem, in alto posita & collocata, omnium oculis maximè exposita esse queat, & ipso statim primo aspectu, omnibus se cognoscendam præbeat, adeoque Hierosolymam nobis illam repræsentet, sanctam, nouam, de cælo delapsam, diuinitus instructam, & omninò tanquam sponsam ornatā viro suo. Quæ de re & diximus iam quidem antea aliquid, & quoties necesse fuerit, etiam inferius dicturi sumus. Sic enim statuendum est. Cū ecclesiam visibilē esse oporteat, vt paulò antè ostendimus, quando eam in Episcopis & Pontificibus, & omninò in magistratibus ac præfectis eius, visibilem esse docuimus,

docuimus, tum, vbi à personis discesseris, & ad res ipsas te conuerteris, nihil esse, omnium, quæ quidem in ecclesia fi-
ant aut gerantur, quod æquè incurrat in oculos, cum ali-
qua specie dignitatis & sanctitatis, vt sunt sacramenta et sa-
crificia ipsa: quorum alterum signum est rei sacrae, alterū
etiam res est ipsa sacra. Nisi autem sint sacra in ecclesia, ne
ipsa quidem ferè ecclesia, sancta omninò dici posset; quæ
nisi sancta sit, ne catholica quidem, sed ne apostolica qui-
dem posse videretur appellari. Rectissimè enim vetus illa
formula antiquitus est in ecclesia vsurpata. S A N C T A
S A N C T I S. Nimirū vt qua in ecclesia vtrumq. id appareat,
eā & sanctā profectò, & catholicam, & apostolicam esse ec-
clesiam agnoscamus: in qua autem non appareat, ibi verif-
simam quoq. ecclesiæ ipsius sanctæ, catholicæ, apostolicæ
effigiem non posse apparere intelligamus. Quamobrem si
ita est, vt est, primū, vt neque ecclesia à sacramentis &
sacrificiis, neque sacramenta rursus & sacrificia ab ecclesia
ipsa separari posse videantur. deinde, vt, vbi ea plena, inte-
gra, augusta, habeantur, ibi integerrima, plenissima, augu-
stissima ecclesia esse censenda sit, sequitur certè, vt quoties
siue veram ecclesiam quærimus, quam amplectamur, si-
ue falsam & adulterinam cognoscere cupimus, quam fu-
giamus, ad sacramenta ferè semper & sacrificia vtroque
proposita, respectum habeamus: & vbi hæc quidē, aut nul-
la, aut diminuta, aut indigne adeò accepta & tractata vi-
derimus, ibi ecclesiæ nomen suspectū habeamus: vbi con-
trà adesse illa, & cū numero pleno, tum summa dignita-
te vigere, conspexerimus, ibi ipsissimam, vt ita dicam, eccle-
siam esse, omnemque eius dignitatem atq. principatum vi-
gere, ne dubitemus. Quid restat igitur? Illud, mea quidem
sententia, vt videamus hoc loco iam nunc, & considere-
mus vtrinque: hinc quidem, ecclesia illa vna, sancta, ca-
tholica, apostolica, quam & nostram, & veram esse eccle-
siam ostendimus, bibliis, patribus, conciliis, traditionibus
D d denique

denique ipsis, quasi suis quibusdam parietibus circumscriptam: illinc autem rursus exaduerso, altera illa, neq. vna, vt leuissimè dicam, neque sancta, neque catholica, neque apostolica ecclesia, quam ipsam scripturis traditionibusq. omnibus aduersariam esse docuimus; restat, inquam, vt videamus, quibus singulæ earum & qualibus sacramentis ac sacrificiis vtantur. Vt ne videlicet in vtrumque pedem amplius claudicemus: sed, si dominus ipse est Deus, sequamur eum, sin Baal, sequamur illum: nec amplius, vt ventis ita opinionibus circumferamur, delati, & quasi rapti tempestatibus, modò in hanc, modò in illam partem. Constat igitur, in nostra hac ecclesia, sacramentorū quidem & numerum esse plenissimum, & pondus existimationis grauissimum: sacrificium autem ipsum tam sublime esse, & tam excelsum in ea constitutum, vt ad eius excellentiæ prædicationem, nullæ nec hominum nec angelorum ipsorū linguæ satis sufficere posse videantur. Constat item, in illa aduersariorum synagoga, nullis planè fundamentis nixa, & nullis etiam legitimis parietibus circumsepta, nihil esse, nō modò ad comparationē nostræ in eo genere, sed ne ad speciem quidem ecclesiæ alicuius: vbi, nec omnia sacramenta plenè numerare, nec vllum eorum non foedissimè tractatum videre queas: ad sacrificium autem quæ pertineant, ea omnia ita abiecta deprehendas & contempta, vt hoc ipso, ipsi illi synagogarum illarū auctores, quasi de industria omnes ignominiarum maculas, quas synagogis suis aspergerēt, quibusq. eas passim inuisas redderēt, quæsiuisse videantur. Longus sim, si singula hoc loco explicare coner: generibus modò ipsis rerum proponendis, hoc tempore contentus ero. Principiò igitur, quod ad catholicæ nostræ ecclesiæ sacramenta attinet, ea in vniuersum septem esse constituit, & eorum singula singula, bus etiā honoribus prosequitur. Sic autem ea nominat. Baptismum, Confirmationem, Pœnitentiam, Eucharistiam, Ordinem sacrum, Matrimonium.

trimonium, Vnctionem extremam. Cur septem numerat ?
 Primū id facit necessariò, deinde etiam aptè & conueni-
 enter. Necessaryò facit : totidem enim casus, vt sic dicam,
 & opportunitates quasi quasdā esse intelligit, quibus sacra-
 menta ipsa administrari necesse sit. Cū enim eorū admi-
 nistrandorū rationem, hominum ipsorū causa esse institutā
 meminerit, tum in numero ipsorū inuestigando, homines
 ipsos maxime intuetur; et quidem tum eos, quibus ea cōfer-
 ri debeant, tū per quos cōferri debeāt. Ex quarum confide-
 rationū altera, Matrimonii extitit sacramentū; vt inde scili-
 cet homines legitimè procreentur, in quos sacramenta cō-
 ferantur: ex altera autem cōsideratione, Ordinis sacramen-
 tū est constitutum: quod collatum in homines sacerdotes,
 idoneos eos facit, qui ipsi sacramenta hominibus distribu-
 ant atque administrent. Atque ita iam habemus duo sacra-
 mēta, necessitate ipsa expressa, & in ecclesiā introducta. Or-
 dinem primū; ex quo sacerdotes, qui sacramenta distri-
 buant. deinde Matrimonium; ex quo coniuges, ex quibus
 deinde genus ipsum mortalium, aptum percipiendis sacra-
 mentis. Quibus duobus absque esset, sacramenta quidem
 aut distribui non possent, aut si possent, perperam distribu-
 erentur. Etsi enim & homines ipsi, ex non matrimonio gi-
 gni vtcunque possent, quibus sacramenta in ecclesia ad-
 ministrarentur: & iidem postea, nullo sacri Ordinis sacra-
 mento initiati, possent sic subito sacramentorū in ecclesia
 dispensatores quomodocunq. constitui: tamen quoniam
 ecclesia catholica, præter cætera, in his duobus sacramētis
 interuenientia mysteria, connubiū quidem Christianorum
 honorabile esse in omnibus cum Paulo dicit, ac thorum
 ipsum immaculatum appellat: honorem autem in ecclesia
 vllum, neminē nisi vocatū temere sibi sumere aut vsurpare
 patitur, iccirco hæc quoq. necessaria hominū siue viuendi
 genera, siue in ecclesia ministrandi, voluit sacramentorum
 appellatione consecrare: vt & ipsa quidem dignitatis plus
 haberent,

haberent, & cæteris actionibus in ecclesia secuturis, tantò etiam maiorem dignitatem conciliarent. Habet hoc enim ecclesia sancta, vt ad nullam ferè vnquam actionem suam, quæ modò maioris momenti alicuius esse videatur, illotis, quod dicitur, manibus soleat accedere, nisi prius omnia actioni illi necessaria, legitimè & præparauerit, & si opus sit, expiauerit, atque adeò consecrauerit. Ex quo est illud, vt baptismo ipsi futuro, & oleum catechumenorum, & chrisma ipsum, multò ante consecret, & aquam ac sallem consecratum adhibeat, & dæmonia exorcizari iubeat, & tum demum baptizet. Quam quidem ipsam rationem sequitur etiam in aliis eiusdemmodi rebus infinitis. Nam & ad ipsius quoq. Missæ sacrificium ritè atq. legitimè peragendum, quid est quod non faciat? aut quid est quod omittat? Templum consecrat. Parum est. Altare consecrat. Parum est. Vasa cōsecrat. Parum est. Indumenta consecrat. Parum est. Sacerdotem consecrat. Etiam parum est: nisi se idem ille sacerdos iamiam ad sacrificium peragendum accessurus, & precibus multis muniat, & confessione præterea ipsa atq. exomologesi delictorum suorum, tum priuata ipsa, priuatim, quantum satis est, expiet, tum publica etiam altera, in ipso iam sacrificii initio, maximè ad id quod agit, aptum atque idoneum reddat. Alioqui non rectè nec ordine sacrificatum, nec sacra illa non polluta prorsus ac violata esse duceret. Planè vt quemadmodum, honoris ipsius Iesu Christi causa, cui nihil neque in conceptu, neque in ortu ipso, labis originalis adhæsisse verè profitetur, à matris etiam ipsius fatu ac conceptu, eandem hanc eiusdem peccati noxam atq. labem studet quàm maximè remouere: ita omnibus aliis in rebus, quas vnquā aggreditur, illud obnixè dat operam, vt singulis sensim ac paulatim, in ipsis iam tū eorum incunabulis, auctoritatem atque opinionem conciliet sanctitatis. Vix enim profectò quicquam esse videtur, quod repente existat purissimum & sanctif-

sanctissimum, nisi antea gradibus veluti quibusdā, ad summā illius & eximiæ puritatis atque sanctitatis opinionem conscenderit. Cum igitur omnibus in rebus, eiusmodi ferè consuetudinem ecclesia nostra teneat, tum in ipsis quoque sacramentis constituendis, ab ea consuetudine non discedit, sed quinque ipsis sacramentis præcipuis, quæ mihi videntur ex totidem vulneribus Iesu Christi crucifixi, ad procurandam hominum salutem profluxisse; cuius generis sunt Baptismus, Confirmatio, Pœnitentia, Eucharistia, Extrema unctio: duo illa, quæ modò diximus, Matrimonii & Ordinis sacramēta præponere necessarium esse iudicavit: quibus homines initiati, alteri quidē distribuunt, alteri autē illa, quæ dixi, percipiant sacramēta. Sic enim facilè prouidet, vt ne sanctum ipsum canibus potius, contrā Christi præceptum, traditum, quàm aut sanctis præordinatis, ad distribuendum commissum, aut verò ex sancto, vt plurimum, matrimonio procreatis, ad participandum concreditum esse videatur. His igitur duobus ad eum modū rectè atque ordine constitutis, cum quinque deinde genera esse perspiceret eorum hominum, qui sacramentis participaturi esse viderentur, quinque etiam sacramenta illa necessariò prioribus esse adiungenda existimauit. Quòd enim esse quosdam videret quasi modo genitos, qui videlicet mysteriis totius futuræ religionis suæ tunc primum soleant initiari, ideo his, primum quoque sacrosancti baptismi sacramentum assignauit; quem esse primum quasi aditum omnibus voluit, ad religionem ipsam Christianam. Quòd autem alios rursus videret, quasi adolescentes in fide, & qui maturitatem iam veluti quandam religionis & fidei, animo consecrarentur: iccirco deberi iis alterum sacramentum existimauit, quod Confirmationis appellauit. Atque ita deinceps, quòd alios initiatos iam & confirmatos, inque religione Christiana quasi adultiores factos, & deo iam consecratos, sæpenumero deinde, siue casibus, siue

imbecillitatibus humanis, in vitium labi, & primæ illius consecrationis suæ notam quasi obliterare cerneret: fecit sanè ipsorum causa, vt Pœnitentiæ præterea sacramentum tertium proponeret, contritionis, confessionis, satisfactionis partibus exaggeratum & perfectum. Itemque, quòd alios fore etiam prospiceret, atque adeò votis omnibus optaret, qui post lapsus illos superiores, ad maiora quædam, in sancta Christiana vita moliēda excitati, ad meliorem se deinde frugem essent per dei gratiam recepturi, quartum Eucharistiæ sacramentum, proprium ipsis & peculiare esse voluit: quo ipso non minus sæpe quàm ipso illo proximo pœnitentiæ sacramento, ad omnes opportunitates suas vterentur. Postremò autem, cùm illorum quoque hominum conditionem cum animo suo reputaret, qui perfuncti iam huius vitæ, & in hac vita ipsius religionis, statione ac munere, beatam iam tum illam beatorum animorum stationē, quæ est merces laborum, & honestè ac religiosè actæ vitæ, meditarentur; & à domino ipso ac imperatore suo ex hoc mundo paulò post ad percipiendam mercedem illam euocandi, in proximo iam, ad sedes illas beatas commigrandi gradu, esse viderentur positi ac constituti: tum verò quoniam maxima illis impedimenta, ad speratam illam & desideratam coronam consequendam instare intelligit, à carne, mundo, diabolo; ideo his ipsis, in extremo & periculosissimo actu illo versantibus, quintum Extremæ vnctionis sacramentū destinavit: extremum quasi omniū sacramentorū colophonem. Quæquidem quinque sacramenta prioribus illis duobus coniuncta sacramentis, septenario planè numero cōpræhendit, nō minus sancto quàm perfecto. Necessitatis in eo, vt dixi, secuta rationem: quam, notandis generibus hominum, sacramentis indigentū, egregiè obseruauit. Nam conuenientiæ, quod iam dicendum est, illa est ratio, quòd ecclesia, hunc ipsum sacramentorū suorum numerum, ad numerum, non iam personarum, vti modo

modò ostendimus, sed potius rerum earum quæ sacramentorum vi atque beneficio, seu depelluntur, vt mala, siue, vt bona, conferuntur, & conuenire intelligebat, & quadrare omnino volebat. Pelluntur enim iis septem illa, omnis nequitia spiritualis capita mortifera. Superbia, auaritia, luxuria, ira, gula, inuidia, segnitia. Conferuntur autem totidem dona ac munera spiritus sancti, quæ Esaias quondam his nominibus videtur expressisse. Sapientia, intellectus, cōfiliū, scientia, fortitudinis, pietatis, timoris domini. Quæ quidem omnia, sacramentis, ceu quibusdam vasis atq. instrumentis certissimis delata, inuisibiliter in hominum animos, legitimè ad eam rem præparatos, illabuntur, & illapsa conseruantur. Atq. hic est quidem honos ille, omnium sacramentorum catholicorum communis, quòd nostrorū quidem hominum sententia, omnia sacramenta, pro rata parte, vasa gratia dei & sint & appellentur: hoc autem est, quòd ipsa sua vi, & ratione quadam intima, nisi tu fortè impediās, & obicem aliquem de industria opponas, dei immortalis gratiam non conferre non possint, omnibus iis ad quos peruenerint. Quæ quidem etiam gratia eousq. valere dicitur, vt iugum domini, quod cæteris nationibus, extra communionem sacramentorum catholicorum positis, durum atq. asperū & planè intolerabile esse videtur, nobis diuinorū istorum sacramentorum participatione resectis, & leue redditur, & imprimis suaue: vt ita ad omnia mandata dei nostri implenda & pro officio nostro exhaurienda, non solum scientia apti, nō solum voluntate procliues efficiamur, sed etiam re ipsa expediti prorsus & parati, & quod caput est, insignibus quibusdam diuinis auxiliis, fulti ac roborati. Verū hi fructus quidem, omnium, vt dixi, sacramentorum sunt: illi singulorū, qui pressius paulò antè expositi, vberiore etiam aliquanto explicationē hoc tempore desiderant. Cōstitutis igitur duobus illis, vt dixi, quasi præuiis quibusdam sacramentis, matrimonio dico sancto, vt illi

vt illi etiam in ecclesia sancti essent, qui prolem sanctam atq. legitimam, percipiendis ecclesiæ sacramentis suppeditent: & ordine ipso sacro: vt ita ex sacratissimis quoq. viris desumatur illi, qui futuri sint ministri Christi, & dispensatores mysteriorum atq. sacramentorum diuinorum. His igitur duobus ad eum modum constitutis, quid facit ecclesia? Equidem dispensationem hanc mysteriorum istorum, à baptismo ipso sacrosancto auspicatur: quem summa cum plurimarum cærimoniarum dignitate atq. sanctitate, sollemniter admodum administrat; quemque adeo omnibus in vniuersum, primum, vt dixi, aditum, & veluti ostium proponit, ad ingressum ecclesiæ dei præpotentis. Quid deinde? Deinde à baptismo, ad Confirmationis sacramentum progreditur; vt quorum mens purgata in baptismo à scelere, vacillat adhuc in fide, ea, virtute istius sacramenti roboretur, & quasi adolescere incipiat, ad dignam personæ & instituto suo vitam inchoandam. Tum autem quoniam ferè fit, vt dum adolescimus, in multos & varios vitæ casus atq. offensiones plerumq. incidamus, quibus à recto virtutis & honestatis cursu depulsi, & quasi ad periculosum aliquem vitæ scopulum illisi, ad naufragium faciendum deducimur, ideo deinceps, salutare nobis poenitentiae sacramentum ab ecclesia proponitur; vt quicumq. post susceptum baptismi sacramentum, & tanquam post ingressum maris cuiusdam, in hac Christiana vita, turbulenti, & omnibus tempestatibus expositi, rectum atq. tutum nauis ipsius cursum tenere non potuerunt, quominus sanctæ & honestæ vitæ naufragium paterentur: sicut sanè, in hac & naturæ nostræ tanquam nauis, imbecillitate, & in his mundi istius illecebris, quasi in maris ipsius pellacia, & syrenarum cantu; & deniq. in hac malignorum spirituum, quasi ventorum quorundam, aut Pyratarum sæuitia & furore, nemo est, qui non aliquando in eiusmodi periculum adducatur. Qui igitur tales sunt, iis ecclesia, hanc quam dico,
poeniten-

pœnitentiam sacramentalem, quasi alteram secundum baptismum tabulam, ex naufragio suppeditat; qua se miseri mortales utcumq. sustentent, dum optatum salutis portum cōsequantur. Videtur autem omnis pœnitentiæ istius salutaris vis & ratio, in ipsa potissimum, de contractis criminibus venia obtinenda, posita esse & constituta. In eius enim vsurpatione, quod scimus, erratis quidem atque culpis nostris profitendis, magnopere nostri nosmet pudere, & pigere, & pœnitere necesse est: hunc autem ipsum dolorem atq. pudorem nostrum, quem tunc de præteritis delictis nostris, volentes suscipimus; grauem imprimis nobis, præter alia, monitorem & magistrum deinceps esse necesse est, etiam atq. etiam cauendi in posterum, ac diligenter providendi, ne nos iterum atq. iterum, eadem aut simili de causa, & suffundi pudore, & dolore angi necesse sit. Expressè enim illud & significanter admodum dictum fuisse à quodam memorant; cum ex eo, ætate iam prouecto, familiarum quidam quærent, vtereturne etiam tum rebus veneris? Diui meliora, inquit, Ego verò non iam ob metum diuini numinis tantum, neq. ob terrores consceleratæ cōscientiæ, quæ vereri piarum mentiū est; neq. adeò ob honorem solum cani istius capitis, & turpitudinem scelerum admissorum, sed vel ob pudorem saltem hominis sacerdotis, cui abditissima illa atque fœdissima animi mei vulnera detegere necesse habeo, libenter meipsum ab alienissimis istis ætati meæ flagitiis abstineo & subduco. Quis enim grauitatem illius admonitionis sacerdotalis sustineam, inquit, si me, commissa illa mea apud se confitentem, ita excipiat? Non te pudet filicernium, senem capularem, ad ineptias iterum redire iuueniles? & eiusdem rursus tyranni dominationi sponte colla subdere, ad cuius seruitutem tolerandam, ætas te iam ipsa magnopere præcipitata, reddidit inhabilem & ineptum? Multa in hac parte dici possent, quæ non solum ad terrendas, & castigandas, sed etiam ad instruendas

struendas, & fouendas, & recreandas hominū consciēti-
as, ex hoc sacramento, tanquā ex fonte, videntur in ecclesia
catholica proficisci: quale est illud, cum per hāc huiusmo-
di pœnitentiæ sacramentalis occasionem, de multis, quæ
ad vitam laudabiliter, & sine repræhensione degendam per-
tineant, instruimur & docemur: quale item, cum de pluri-
morum scelerum nostrorum venia diuinitus obtenta, non
minus ore sacerdotis certiores reddimur, quā si deum
ipsum corā, de gratia sceleri nostro proposita, verba ad
nos facientem audiamus. Sed & hæc nota sunt iis, qui sa-
cramentorum catholicorum vsum habent, & omnino ad
alia festinat etiam oratio ipsa nostra. Posteaquam igitur
ecclesia, hoc eiusmodi pœnitentiæ ceu quodam obsonio,
hominem illa quasi quadam peccati fame atq. inedia du-
dum enectum, ad quandam veluti cibi appetentiam satis
excitauit, tum verò illi dulcem illum inprimis & optatum
ac salutarem τῆς εὐχαριστίας panem proponit: ipsumque dolore
illo pœnitentiæ sanctæ fractum & penè confectū, hoc ipso
sacratissimo, & Iesu Christo plenissimo reficit sacramento.
Quod quidem etiam ipsum tanto verborum honore pro-
sequitur, vt, cum in eo panem duntaxat & vinum, quotidi-
ana illa & egena elemēta, hominum oculis vsurpanda ob-
iiciat, diuina tamen institutione informata, audeat ve-
rissimè dicere, populoque ipsi verissimè persuadere, sub
illo tam panis quā vini velamento aspectabili, Christum
ipsum dominum, non ratione quidem aspectabili, sed &
verè tamen, & integrè, & re ipsa, contineri; verè etiam & in-
tegrè, & re ipsa, sub alterutra, siue panis, siue vini specie,
quod antea monuimus, totum populo diuidi ac dispartiri.
Quid hoc obsecro admirabilius? quid magnificētius? quid
ægris mentibus leniendis & sanādis accommodatius? Ego
enim tunc planè, dū me de hoc pane, aut de hoc calice, par-
ticipare sentio, in coelū me mortalē subuectū esse, & inter
coelicolas ipsos translatū, terrigenam accumbere existimo;
& quoties

& quoties me epulis illis sacrosanctis, hominem indignissimum interesse video, toties me diuorum atque angelorum omnium epulis interesse censeo. Ita me tum glorificare, & planè portare deum in corpore meo arbitror : & omninò ita me primitias quasi quasdā, illius immortalis futuræ vitæ, in hac præsentī mortali, non vita sed morte mea, delibare sentio. O sacrum conuiuium, in quo Christus sumitur, “recolitur memoria passionis eius, mens impletur gratia & “futuræ gloriæ nobis pignus datur. Alleluia, alleluia. Aestu- “at, æstuat mens mea, vel vnus huius sacramenti diuini lætitia incitata. Quo quidem vno freta, & plus etiā satis animata, victoriam se certissimam, de cunctis hæreticorum confictis & vmbatilibus sacramentis, certò consecuturā esse, abundè sibi pollicetur. Vt enim baptismi sacramento, poenitentiae sacramentum, ita sacramento confirmationis, ipsum eucharistiæ sacramentum è regione quodammodo respondet, hominemque ipsum in ipsa catholicæ religionis suæ statione, bene firmum ac bene stabilem constituit; & omninò ad omnia quantumuis ardua pro se aduersus alienos suscipienda, audentem & fortunatum facit : id quod multis sanctorum martyrum nostrorum testimoniis & exemplis luculenter est cōprobatum. Hoc magis, quòd neq. Poenitentia ipsa sit vt Baptismus, neq. Eucharistia ipsa sit vt Confirmatio, quominus possint iterari: cū vtraq. ad omnes & singulos lapsus nostros corrigendos & sanandos, ita videantur esse instituta, vt ipsis identidem, & quidem quàm sæpiissime, vtī necesse habeamus, si ad primam illius institutionis rationem, qua vtrumq. eorum in ecclesiam introductum ac receptum est, quàm proximè accedere, & si de hostibus deniq. ipsis nostris victoriam referre cupiamus. His igitur ad eum modum ecclesia nostra perfuncta sacrosanctis sex sacramentorum muneribus, manum supremam quodammodo sustinet, eamque Extremæ ipsi vnctioni, in corporibus suorum morbo debilitatis, reseruat, quam

deinde ex hac vita propemodū exituris hominibus cōferat;
eosq. ad certamen illud omnium terribiliū maximè terri-
bile, vi ipsa occulta sua corroboret & cōfirmet. Quod cum
ita sit, equidem in his vniuersis sacramentis constituendis
suis, ad eiusmodi mihi quandam rationem Ecclesia, omnia
sua cōponere videtur, vt Baptismo ipso ante omnia consti-
tuto, quem, vt diximus, nihil ferè aliud esse voluit, quàm
primum ipsum aditum ad religionem ipsam Christianam;
reliquorum sanè sex sacramentorum suorum vsum, mirifi-
ca quadam ratione partiatur. Nam distributis in tria paria
singulis sacramentis, primum sacramentorum suorum par,
infirmis ipsis reſeruat; & quidem infirmis, vel animo, quod
appellauit Confirmationis sacramentū: vel corpore, quod
appellauit Extremæ vnctionis. Alterum rursus par, firmis
planè hominibus attribuit & robustis: his quidem qui cor-
pore firmi sunt, Matrimonium sanctum; firmis autem ani-
mo, Ordinem ipsum sacrū. Reliquorū porrò sacramentorū
par tertium, Pœnitentiæ, inquam, & Eucharistiæ sanctæ, id
verò promiscuè inter hos pariter atq. illos cōmunicat, & o-
mninò inter omnes diuidit ac dispensat, ad eum quidem
modum, qui paulò antè expositus est nobis. Quid obsecro
his rationibus ecclesiæ robustius? quid hac distributione
illustrius? quid ad omnes vsus nostros accomodatius?

Cap. II.

Sacramenta hæreticorum.

Hæretici sacramenta diminuunt, & tantum ad duo contrahunt.

Hæretici matrimoniū laudant, sed inter sacramenta nō numerant.

Hæretici sacramenta sua diminuta etiam paruifaciunt.

In eucharistia corpus Christi non agnoscunt.

Baptismum indignissime tractant.

Obiter contra calumniatores Eucharistiæ & baptismi Christiani.

Sed quid



ED quid contra hæc hæreticorum synagoga? Primum sacramenta ipsa, ut cuique eorum collibitum est, numero sensim deminuunt; eaque postremo ad dualem ferè, Romanis nō magis in sermone quàm in sacramentis ignotum numerum restringunt, nec plura quàm Baptismum ferè, & Coenam, ut appellant, domini, in sacramentis numerant. In quo ipso multa sunt quæ mirer; in his autem illud vel maxime, quòd, cum negent reliqua, hæc ipsa duo tamen, sacramentorum nomine dignari dignentur; cum de eo ne verbum quidem in scriptura, à qua ipsi nunquam se recedere profitentur, reperiant. Tum autē quis non miretur illud quoque, hunc ipsum etiā lapidem ab istis loco suo motum esse, qui à multo tempore, satis firmis in ecclesia fundamentis niti videbatur. Quid enim? idne agitur, quæso, ut eorum nobis suffragiis, ad constituendum sacramentorum ecclesiæ numerum, magnopere sit opus? ut ea isti nobis quasi vendidisse videantur, quæ pro sacramentis admiserint? Aut verò, eane sunt tēpora, ut quasi de re integra, sic de sacramentorum numero constituendo, deliberandi etiamnum sit locus? de quo iampridē sanctorum conciliorum decreta intercesserūt. Hæc, inquam, cum ita de omnibus sacramentis ab istis dicta, mirari planè necesse sit, tum verò de Matrimonio sanè ipso quod dicunt, tunc cum illud in sacramentis esse negant, id verò eiusmodi est, ut sine admiratione, non modò ab iis dici, sed ne à nobis quidem audiri posse iudicem. Cum enim ipsi aliàs Matrimonium hoc ipsum, magna passim vocis & clamoris cōtentione in vulgus dilaudēt, & cum in singulis propemodū hominibus, in sacerdotibus etiam ipsis, non sine contentione quadam vrgeant, cunctosque ad illud, non iam dico inuitent, sed tantum nō adigant: hæc, inquam, omninò cum in hoc matrimonii sacramēto faciant, & tamen ipsum hoc

sacramētum esse negent, non mihi iam certè quidem incō-
stanter solū, sed etiam admodum insipienter, & quod di-
xi, etiā mirabiliter quodammodo facere videntur. Ita, vt si
fortè cæteris hominibus, idē de reliquis omnibus sacramē-
tis facere integrū sit, istos id tamē, de eo sacramento vel co-
gitare saltem, in quo ipsi, cū multorū aliorū decreta fa-
uoris plenissima intercessisse, tum sua quoque ipsorum stu-
dia aliās, mirificè enituisse, intelligant; id verò omni profe-
ctò admiratione dignissimum esse videatur. Quod quidem
etiam hoc mihi ab istis fieri videtur inscitius, quòd à Paulo
quoq. Apostolo, cuius se ipsi germanos æmulos atq. imi-
tatores haberi volunt, hoc ipsum, de quo loquimur, Matri-
moniū, non sacramentum modò, sed magnum omninò &
insigne sacramentum, in Christo & in ecclesia, haberi non
ignorant. Nisi si fortè ne Paulum iam quidem magnopere
vereri videantur, quominus sacramentorum ipsorū nume-
rum, magna, vt diximus, ratione ab ecclesia traditum, hoc
ipso eximendo Matrimonii sacramento imminuant, quod
ab Apostolo illo agnitum, & sacramenti appellatione tam
apertè honestatum esse intelligunt. Sed sit leue, imminuere.
Quid? illa ipsa tam imminuta, & ex septenario numero ad
dualem redacta sacramenta sua, putāsne magnificiunt? Mi-
nimè certè quidem. Imò verò de gradu planè, eius, quæ
ipsis debebatur, dignitatis deiiciunt, & ad terram quasi af-
fligunt. Nam cū duo duntaxat, vt diximus, sacramenta
ferè numerent, tum Baptismum quidem, primū infantibus
ipsis inutilem, deinde cæteris quoque parum necessari-
um, & neque tollendo funditus sceleri, neque diuinæ con-
ferendæ gratiæ, efficacem esse aiunt. Ipsam autem eucha-
ristiam, quam nos verissimi corporis & sanguinis Iesu Chri-
sti sacramentum dicimus, ipsi non nisi signum ac figuram
quandam Christi corporis & sanguinis esse aiunt; quæ si e-
tiam adoretur, statim in ipsa illa adoratione, nefarium ido-
latriæ crimen committi, impiè vociferantur. Quibus ego
vtrisque

vtrifq. fanè de rebus dum cogito, quanquam, si in alteram partem peccandum fuit, augeri potius ipsum remediorum numerum, quàm vlla ex parte diminui maluissem; non modò quòd pluribus remediis propositis, minus mali ex damnis ipsis sentiretur, sed etiam quòd bonitatem omninò quandam naturæ atque ingenii redolere videretur, mala quidem quàmmaximè fieri posset, restringere, commoda autem ipsa humani generis, diuinitus præsertim inuenta, nobisque liberalissime attributa, quàmmaximè exaugere; tamen cùm præterea considero, non numero ea tantùm ab istis diminui, verùm etiam, quod peius est, vi, fructu, dignitate, atque adeò efficacitate omni spoliari, & nuda penè signa relinqui, equidem fieri non potest, quin multò magis, ad hanc tantam, eorum qui id faciunt, malevolentiam, eorum qui approbant & recipiunt, amentiam & stupiditatē cohorrescam. Nec verò ego tantum, sed etiam, vt puto, quisquis tandem fuerit, qui modò hæc secum rectè consideret & expēdat. Nam, vt principiò pro Eucharistia aliquid loquamur; quis non miretur, quæso, aut verò etiam quis æquo animo patiat, Christum quidem ipsum dei filium, hoc quod porrigit, corpus esse suum, palàm atque apertè profiteri; homuncionem autem ex aduerso nescio quem asserere, signum modò esse & figuram eius ipsius corporis, atque adeò ne signum iam quidem aut figuram, sed non nihil duntaxat, id autem est, tantùm non nihil: & non ad aliud ferè quicquam conducibile, quàm ad homines in idololatriam impellendos. O audaciam, imouerò ô scelus & nequitiam. Deinde autē, quod ad baptismi sacramētum attinet, quis ferat, quæso, cùm circūcisio quidē Iudaica, magis etiā propemodum ad infantes, quàm ad adultos pertinerit, omnesque, qui modò ea insigniti fuissent, in numerum populi dei retulerit, baptismum nostrum, ita infra ipsius conditionem abiici, vt neque ad infantes pertineat, & cæteris præterea nullam insignem vtilitatem pariat? Quis hæc fe-

hæc fêrat, aut quis patiatur? Atqui de his vtrisque sacramentis Anteccelesiani nostri vtrumque non solum ferunt, sed primi ipsi in vulgus spargunt atque disseminant. Quid tum? inquires. Permulum sanè quidem. Esse enim homines, qui Christo deo exaduerso respondere, & quasi conuitium ingerere non vereantur, impudentiæ est non ferendæ: quæ in nostris istis mirificè appareat. Hoc est corpus meum. Hoc non est corpus tuum. Et item. Esse, qui homines Deo æquiparare, atque adeo, qui hominum ipsa malefacta, Dei ipsius benefactis antepondere, & in suo quidem genere potentiora facere non dubitent, id verò extremæ, vt opinor, ac deploratæ stultitiæ est. Quam sanè obscurè non ferunt ii, qui in prima quidem hominis generatione scelus contrahi, in diuina ipsa regeneratione nullâ penè gratiam tribui cauillatur. Adam igitur, istorum sententia, modico suo fermento, totam generis nostri massam penitus corrumpet; & non multò magis Christus, copiosa admodum sua redemptione, corruptionem hanc restituet, & reipsa reparabit? Dant manus, & quod volumus fatentur; sed quærunt fortassis, quid baptismo cum redemptione Christiana? Dicam igitur, si fortè audire sustineant. Equidem, sicut mortes scriptura duas memorat, primam & secundam, ita etiam, qui mortes vtrasque antecedunt, ortus duos memorat, primum & secundum: & sicut à primo ipso ortu nostro, in quo inest quasi contagio & hæreditas quædam paterni criminis, quod per Adam, primum omnium nostrum progenitorem & parentem perpetratum, in omnes eius posteros est diffusum, eadem hæc scriptura, reos nos apud dei tribunal constituit; (clamat enim Paulus, nascendo nos fieri iræ filios;) ita rursus ortum secundum, & quandam, vt ita dicam, renascentiã, quæ quidẽ diuinitus fiat, proponit nobis; per quam, veluti per canalem quandam, beneficium liberationis, à contagione illa paterni criminis, per Christum partæ, ad nos debeat permanare. Sic enim ait Christus. Nisi quis rena-

quis renatus fuerit, non intrabit in regnum Dei. Quid autē addit Paulus? Quid? Illud scilicet, Vbi abundauit delictū, ibi magis atque magis exundauisse gratiam. Sequitur igitur, primum, vt, cum Adam infantes etiam ipsos scelere suo infecerit, multò magis Christus eosdem quoq. liberauerit, & ex reis exemerit; deinde, vt cum Adam re ipsa maculam nobis omnibus insignem asperferit, Christus eandem multò magis re verissima, in omni perfectionis excellentia eluerit, totamque ita sustulerit, vt nos prorsus in Dei ipsius oculis puros ac putos reddiderit. At qua ratione? gratuita nimirum communicatione obedientiæ, iustitiæ, innocentiaeque suæ. Quomodo autem ea ad nos peruenit? Docui. Per canalem renascentiæ. Quæ verò est hæc renascentia? Hanc quidem tanquam extento digito demonstrat Christus idem, ita planè apud Ioannem, eodem illo loco, quem supra cœpi recitare, inquit. Nisi quis renatus fuerit ex aqua & spiritu, non potest introire in regnum Dei. Potuitne baptismum melius, non dico adumbrare, sed exprimere? Cui ipsi baptismi quantum D. Paulus tribuat, vel vno interim illo ex loco æstimemus licet; cum inquit. Omnes quicumq. baptizati essent, Christum induisse. Patet igitur, quod cogere volumus, baptismū non minus infantibus, quàm cæteris omnibus esse propositum: hoc primum. Deinde verò patet; in omnibus, quicumque abluti eo fuerint, maximam habere, non solum ad tollendum peccatum, sed etiam ad iustitiam Christi largissimè communicandam, efficacitatem. Contrà verò (vt tandem vnde digressa est, eò reuertatur oratio) patet etiam, & meritum quidē Iesu Christi, quod latissimè patere debuit, nimis in angustum ab iis redigi, qui sacramentorum tum numerum diminuunt, tum eleuant dignitatem; & propterea etiam ecclesiam istorum, qui dogma tam spurcum & immane defendūt ac tuentur, maximè deformatam videri, ac prorsus infra omnem synagogæ Iudæorum conditionem relinqui.

CAP. III.

Sacrificium hæreticorum nullum.

Altera tecti pars, in eodem ædificio ecclesiastico, sunt sacrificia.

Ut sacerdotem, ita sacrificium hæretici ipsi habent nullum.

Sacrificium autem catholicum omnibus viribus oppugnant.

Pœna pro sacrificio sublato.

Quàm longè absint hæretici nostri à religione auita.

Hæretici prodromi Antichristi.

Hæretici vitandi, utpote apud quos nihil est sancti.



ED hoc ferè leuius. Quid enim aut tã humile est, quod abiectissimæ isti synagogæ non conueniat? aut tam probrosum, quod non iustissimè in illam possit contorqueri? quæ nihil in scelere mediocre cogitat, nihil molitur, quod non sit

breuibus Gyaris & carcere dignum?

Quid igitur addit præterea hæreticorum ista synagoga, ad illa, quæ dixi, tetra atq. impia? O cœcam furiosorum hominum vefaniam, ô vecordiam deplorandam. Propitii dei signa semper esse pii homines sunt arbitrati, sacerdotem & sacrificium ipsum; auersi contrà & irati plusquàm manifesta indicia, vastitatem altarium, & sacerdotii pariter ac sacrificii interitum & occasum. His enim rebus sanè maximis multatos esse olim, pro maximis eorum sceleribus meminerunt, ipsos dei contemptores. Quod igitur, si fortè, quod absit, per aliquam Dei inclementiam accideret, omnibus esset eiulatibus ac lamentis sempiternis prosequendū, hoc ipsum est, in quo nequissimi homines isti magnificè se effecerunt, & ex quo laudem scilicet ac commendationem synagogarum suarum primariam aucupantur. Quòd enim sacerdotis

cerdotis & sacrificii ipsa etiam vocabula procul à concilia-
bulis suis eiecerint, proscripserint, exterminarint, ex eo o-
mnibus honoribus dignissimos se esse arbitrantur: cum se
propterea sempiternorum opprobriorum affines, & diui-
nis pariter atq. humanis suppliciis maximè obnoxios esse,
existimare debuissent. Sed ipsi tamē & sacerdotem, vt dixi,
contemnunt, & sacrificium ipsum: & quanquam appella-
tionibus illis ludunt interdum magis quàm reuera vtūtur,
neutrum tamen ex animo agnoscunt, vtrumque potius sic
oderunt, & vtrumque ita auersantur, vt neque rem tandē,
neque nomen propemodum ipsum, in suis illis conven-
tibus extare patiantur: vsque adeò quidem, vt illos quo-
que vulgatissimos vitulos labiorum, & illud ipsum com-
munissimum sacrificium laudis, quod verbo adhuc vtcum-
que retinuerunt, non maximi, si modò in emptorem inci-
derint, videantur esse vendituri. Quare cum genus penè v-
niuersum ipsum sacrificii tantopere exosum habeant, vt ne
rationem quidem vllam recōciliandæ cum illo gratiæ ad-
mittere videantur, non est mirum, si nostrum illud ecclesiæ
catholicæ tremendum, & modis omnibus adorandum sa-
crificium, atque hostiam immaculatam corporis & san-
guinis Iesu Christi Dei nostri, non modò non recipiant, sed
etiam omnibus machinis oppugnent; omnibus & neruo-
rum contentionibus, & animorum acerbitatibus inuadāt;
& quantum in ipsis est, omnibus viribus labefactent ac
euertant. Itaque quod nulla ferè hactenus impietas, nulla
ferè quantumuis hæretica hæresis ausa fuit, id nostra ista
insana ac temulenta, facere non dubitauit, vt diceret, obla-
tionē illam mundam, atq. sacrificiū ecclesiæ sanctum, rem
esse rerum omnium profanissimarum profanissimam: imò
rem esse deo ipsi Opt. & Max. (Audisne hæc Christe fili dei
viui, ad dexteram patris in cœlestibus collocatus?) maximè
detestabilem & inuisam. Quam ad eorum vocem sanè exe-
crandā, & omnibus suppliciis dignissimam, terra mihi ipsa
Ff ij tremere,

tremere, flumina etiam ad fontes relabi, sydera denique ipsa auerso vultu retro commeare, & apertissima significatione, tantum scelus palàm detestari videntur. Sed gratia sit Deo meo æterno & immortalī, ante cuius conspectum flecto supplex genua mētis meæ, quòd diuino ipsius nutu atq. imperio iustissimo factum sit, vt perditī isti & nefarii homines, illam præsentem, & simul in ipso illo scelere suo delitescentem pœnam, necessariò sustineant, &, vt Apostolus loquitur, mercedem erroris sui in se recipiant, quòd, dum vanitatē hanc orationis impiæ de industria in vulgus spargere non dubitant, illam etiam manifestam admodum veritatem, eodem tempore, nolentes profiteri coguntur, suas illas non minus perditas, quàm perdentes synagogas ac coitiones, quæ & sacerdote carent, & sacrificio, ecclesiam neque esse posse vlla ratione, neque appellari. Ecquis igitur earum consortium appetat, quæ & vtrò quidem tam apertè ecclesiæ nomen à se abdicant, & in rebus pessimis exultāt, & quod præterea vna illa, sancta, catholica, & apostolica ecclesia sanctissimum hætenus duxit, omniq. veneratione coluit, quod patres nostri, iam inde post susceptam semel religionem Christianam supplices semper & proni adorauerunt, cui cereos incenderunt, cui thus adoleuerunt, cui flores sparserunt, cui cymbala percusserunt, & quod omnibus denique diuinis honoribus sunt profecuti, id idolum, id abominationem, id detestabile & execrandum vocent. Possumusne, quæso, arcem perditorum istorum hominum fortius inuadere? Possumusne, cum degeneres ipsorum animos, tum summam eorundem impietatem, singulari atq. perpetuæ maiorum nostrorum pietati, quasi exaduersò oppositam & obiectam, magis etiam in conspectu totius orbis terrarum statuere? possumusne ipsos illos, à deo prorsus & à religione esse alienos, vel potius deo & religioni esse contrarios, luculentius conuincere, quàm cū ostendimus, ita esse omnem eorum rationem, in rebus ad religionis & cerimo-

cerimoniarum sanctitatem pertinentibus, commutatam, vel potius ita miserabiliter perturbatam & peruersam, & planè aliam factam, vt, quod olim à mille & quingentis amplius annis, maioribus illis nostris, hominibus Christianis, pientissimis, & ad sanctitatem ac religionem natis, fuerit in ecclesia quammaximè sacrosanctum, & maximis quibusque cerimoniis cultum, id isti potissimùm, per summū paternæ & auitæ religionis Christianæ contemptum, acerbissimè inuadant, in id omnibus verborū contumeliis irruant, id pedibus planè sacrilegis conculcent, & quod maximè auersos illorum ab omni penitus religione animos coarguit, id non iam vile & abiectum, non commune & vulgatum, non nullum aut inane esse dicant, quod tamen ne ab extrema quidem improbitate prolatum ferri potuisset, non hoc, inquam, sed (prò nefas & summū seculi nostri dedecus atque opprobrium sempiternū) rem esse prorsus execrandam, statuunt nequissimi homines & decernant. Quo vno nihil hic sol vidit tetrius, nihil hic orbis audiuit in Christum contumeliosius. Hæccine sunt autem obsecro, initia aduentantis Antichristi, an nondum etiam ne hæc quidem? Et. Hinc sunt iam, an verò alios expectamus, prodromos & præcursores hominis illius scelerati, filii nequam? illius, inquam, perditionis filii Antichristi, quem Daniel olim summis esse viribus hoc sacrificium oppugnaturum prænunciauit nobis: & post eum, Paulus etiam Apostolus, illis quasi certissimis notis circumscripsit, quòd se ita aduersum atque contrarium ferre, & planè opponere debeat, non solum deo ipsi, sed etiā dei ipsius appellationi, & quicquid denique esse viderit in aliquo hominum cultu & veneratione, vt non modò Deum esse nolit, sed nomen etiā & memoriam Dei, si fieri possit, abolere atque extinguere cupiat, atque adeò vt ne coli quidem quicquam patiatur, se excepto. Sed quid ego istos Antichristi præcones & antesignanos appello, cū ipsi illi, non solum apertè fateantur, sed

tur, sed etiam planè glorientur, diaboli se esse emissarios, ad hoc ipsum Missæ sacrificium euertendum. Longa est historia Luteri hominis ingenui, in eo libro, quem scribit de Missa priuata, in qua ostendit palàm, se ex longissimo illo diaboli ipsius per noctem intempestam colloquio didicisse, sacrificium Missæ in ecclesia catholica, meram abominationem & idololatriam esse. Et nec pudet nec piget hominem ingenuum eiusmodi auctoritatis, quæ esset meritò bonis omnibus summopere defugienda. Est liber ipse Luteri in medio, à Iusto Iona ante annos propè quinquaginta ex Germanico conuersus. Eum legat qui hæc volet penitus cognoscere. Tu verò nate deo quisquis es, fuge obsecro hos eiusmodi non tam homines, quàm pestes atque pernicies hominum. Recedite ab istis, quæso Christiani mei, recedite, exite inde, exite inde; pollutum nolite tangere, pollutum nolite tangere. Exite de medio eorum, mundamini qui fertis vasa domini, Vel potius vos ipsi discedite à nobis in vltimas terras, non homines, sed monstra atque portenta diaboli, facessite ab ecclesia sacrorum omnium euersores, abite hinc coelo inuisa nomina

procul ô procul este prophani.

Quid est enim apud vos quod commendatione saltem vlla dignum esse videatur? quid non potius pollutum? quid non profanum? quid vel nomine ipso sacrum? parum dico, quid non potius spurcum? quid nō tetrum & immane? qui vetera quidem illa, quæ antiquitus sacra in ecclesiis habebantur, semel omnia aut re violastis, euertistis, sustulistis, aut certè insanissimis decretis vestris condemnastis, ac de pristino atque legitimo dignitatis gradu deiecta, in ordinem cōegistis, atq. adeò contaminauistis: in eorum autem locum, nec aliunde quicquam, quod vspiam sacrum esset, asciuistis, nec ipsi denique per vos ipsos eiusmodi aliquid aut inuenistis, aut saltem quæsiuistis, quod in honorem & venerationem vllam adduceretis; sed cùm omnia in
vniuer-

vnuerſum confudiſſetis, in totius proſectò religionis veſtræ ratione, non modò ſacri & profani diſcrimen nullum reliquiſtis, ſed etiam ſacrum in profanum, imò ſacroſanctum in maxime execrandum, per veſtrum inauditum furorem atque inſaniam, conuertitiſtis; & denique in iſtis veſtris coetibus ac conciliis, nihil præter execrationem atque anathema retinuiſtis. Eheu priſca fides.

C A P. III.

Sacrificium catholicorum.

Et ſacrificium, & ſacrificii dignitatem tuentur catholici.

De oblatione catholica cuiusmodi ſit.

Quantum & quale ſit ſacrificium in eccleſia catholica.



Væ eſt autem eratque ſemper, priſcæ huius fidei, de catholico ſacrificio ſententia? Non abutar exordiis minimè neceſſariis, rem ipſam exponam. Principiò dicunt noſtri, & idem dixerunt ſemper, qui ante nos fuerunt, noſtri. Quid dixerunt? aut quid dicunt? Duo & dicunt & dixerunt. Vnum. Sacrificium in eccleſia omninò retinendum eſſe. Id adeò contra hæreticorum ſententiam, qui eccleſiam ſacrificio quaſi multare videntur. Facit autem hoc eccleſia eo conſilio, ne videlicet ipſa ſacrificio non retento, peiore etiam condicione remaneat, quàm fuerint vnquam adumbratæ illæ atq. adeò execratæ religiones, vel potius ſuperſtitiones omnes, quæ ſine ſacrificio tamen non fuerunt. Nam & adumbratarum quidem eccleſiarum illarum, quæ legibus gubernabantur, ſiue naturæ ipſius, in animis hominum impreſſis, ſiue adeò ſcriptis ipſis & in tabulis Moſaicis conſignatis, ſacrificia extitiſſe memorantur: & inter impios, atq. à veri dei religione auerſos homines

homines, imolatum nihilominus fuisse dæmoniis, legimus in scripturis sanctis. Quod igitur per speciem in ecclesiis adumbratis, per æmulationem quandam in ecclesiis ethnicorum & profanorum, studiosè admodum est obseruatū, vt sine sacrificio nō essent, id certè multò magis, in ipsa verissima & sanctissima Iesu Christi ecclesia, meritò obseruari dicunt oportere, vt sacrificium retineatur. Hoc primū. Alterum est quod dicunt, quodque etiam ipsum dixerunt semper nostri. Retento nimirum sacrificio in genere, pro forma deinde & specie, ac certa quadam notione sacrificii ipsius, nō vulgarem aliquam rem, sed quammaximè eximiam deligendam ac statuendam esse: imò potius, quæ res diuinitus semel iam delecta, & pro sacrificio in ecclesia catholica, cōstituta est, eam omninò esse retinendam. Præclarè. Quo enim dignius, quo sanctius, quo deo ipsi acceptius sacrificium in ecclesia extiterit, hoc & mater ipsa ecclesia dignior, & filiorum ipsius spes, de votis ac precibus exaudiendis suis, certior ac firmitior est futura; cum se obsidem quasi quendam præsentem habere senserint, præsentis cuiusdam beneuolentiæ & gratiæ diuinæ, quæ & iacientia ac languentia eorum desideria excitet, & ardentis iam atque erectas in deum spes, ratas etiam esse iubeat, & vitā deniq. iam nunc cœlestem illam, in hoc corpore faciat eos meditari. Quid autem in hoc genere dignius, quid sanctius, quid denique aut nobis ipsis ad firmandas spes nostras cautius, aut Deo ipsi acceptius, atq. in diuino eius conspectu preciosius, vel esse, vel etiam fingi atq. excogitari potuit, corpore ac sanguine filii eius? ipso dico dei filio, carne nostra infirmissima vestito, & cruci infami pro sceleribus nostris affixo? quem vti semel, in ignominiosa cruce illa, proposuit deus sacrificium, & sicut loquitur Apostolus, propitiationem pro peccatis nostris, nec pro nostris tantum, sed etiam pro totius mundi (hoc autem est, vt ego quidem sentio, pro peccatis omnium & natorum & nasciturorum;

& tam

& tam viuorum ipsorū, quàm etiam vita hac mortali per-
functorum, fructum tamen adhuc propitiationis illius in
certa aliqua vitæ illius immortalis sorte ac conditione ex-
pectantium hominum) ita & nunc quidem, eundem hunc
ipsum, in hoc ipso catholico & quotidiano missæ sacrifi-
cio, sacrificium & propitiationem esse statuit, & in perpe-
tuum eodem planè loco, pro iugi sacrificio & propitiatione
esse volet, donec ipse veniat, iudicaturus viuos & mor-
tuos, in ipso iam extremo fine sæculorum. Ipse igitur dei fi-
lius, ex catholicæ ecclesiæ sententia, & sacerdos est, ac pla-
cator quasi quidam iræ dei, qui offert; & sacrificium est
propitiatorium, quod offertur pro peccatis ac sceleribus
nostris, sanctificans ecclesiam ipsam, tum sui participatio-
ne, in sacra ipsa communione corporis & sanguinis sui, sub
speciebus panis & vini; tū oblatione ipsa patri deo, in hoc
diuino sacrosancti sacrificii mysterio, quo de agimus. Qua
quidē oblatione eiusmodi, munda, vt loquitur propheta,
& incruenta, ita imolatur, & ita incruento quodā modo,
mactatur, vt sic dicam, pro sacrificio dei filius, vt hoc ipso
etiam ecclesiam ipsam reddat planè mactā, id autem est,
maximè auctam, & omni bonorum genere cumulatam;
non dico, præ synagoga hæreticorum, hoc enim dubitati-
onem profectò non habet, sed etiam planè præ seipsa; præ
illa dico, quæ futura fuisset, si eiusmodi sacrificio caruisset.
Quod quidem omninò ita esse, luculentissime apparebit, si
modò omnia, quæ sunt & habentur in ipsa sacrosancta, cū
hoc vno sacratissimo sacrificio conferantur. Nimirum san-
cta est & augusta ecclesia ipsa: atqui sanctius multò est in
ea sacrificium; quo ipsa quoq. illa sanctificatur, atq. adeò
omni genere sanctitatis etiam atq. etiam exaggerata indi-
es cumulatur. Sancta sunt in ecclesia & augusta sacramen-
ta: atqui sacrificium, hoc ipso superat sacramentorum san-
ctitatem, quòd hæc quidem hominum potissimùm causa
esse videantur instituta, sacrificiū autem cultus sit propriè
diuino

diuino ipsi numini debitus ac destinatus ; quem quidem dū pro officio ac munere suo, ecclesia ipsa deo exhibet, infinitis certè sanctitatibus & crescit & augetur. Sancti denique nos ipsi sumus , qui sancto ecclesiæ ipsius gremio cōtinemur: atqui omnis omnium nostrum sanctitas ex merito promanat Christi dei nostri, quod ipsum maximè eluxit in cruciatu & morte eius, obita pro nobis & pro peccatis nostris ; cuius mortis viuam quandā & maximè expressam effigiem, ecclesia, hoc ipso diuino sacrificio repræsentat & deo & nobis. Deo quidem, vt eum placatū suis reddat ; nobis autem, vt ita & annunciemus mortem domini, & memoriā eius assiduè conseruemus, atq. hoc ipso inacti planè virtute efficiamur. Ex quibus sanè rebus omnibus abunde intelligi licet, quantis sanctitatibus ecclesia nostra ex possessione, vt sic dicam, huius vnus sacrificii sanctissimi sit cumulata. De cuius quidem sacrificii sanctitate mirifica, diligentius dum cogito, in eam sanè sententiam deuenio: tantam esse dignitatem & sanctitatem ipsius, vt, quod mihi hoc loco planè Latine dicendum esse sentio, non nisi ab hominibus prorsus insanis contemni vllo modo posse videatur. Quod ego quidem tanto dico audentius, quanto magis hoc ipsum video esse diligenter à Chrysostomo ipso adnotatum. Planè enim cum omnia collegerimus, quæ ad firmandam verissimi sacrificii excellentiam & dignitatem videntur quomodocumq. pertinere ; tum aut id demum sanctissimum prorsus & verissimum esse ecclesiæ sanctæ sacrificiū statuere necesse habebimus, aut verò nullum aliud dicemus sacrificiū, neq. rei ipsi aptius, neq. rationibus ecclesiæ accommodatius, neq. diuina etiā erga nos beneficentia dignius, non dico à nostro, aut ab istorū mediocri ingenio præditorum homuntionū, sed ne ab vllo quidem mortali, aut alioqui facto & creato ingenio, siue potuisse antea, siue nunc etiā, & deinceps in perpetuū, proponi posse aut inueniri. Nihil enim ne fingi quidem, ac ne optari quidem po-

dē potest hoc eiusmodi sacrificio excellentius. Quod cū
ita sit, patet opinor, & augustissimū esse hoc sacrificium, &
tum ecclesia ipsa dignissimū, tum verò diuino ipsi numini
placando, ac propitio reddendo, longè accommodatissi-
mū; tremendum etiam, & omni semper veneratione pro-
sequendum. Patet denique, maxima cum ratione facere
ecclesiam sanctam, vt eo sacrificio, quotidie perfungatur,
tum ad repræsentandam nostris oculis memoriam ipsam
acerbissimorum illorum cruciatuū ac dolorum Iesu Chri-
sti, pro salute nostra perpefforum, tum verò ad admouen-
dum propius quodammodo, & nostris mentibus infun-
dendum, atque adeo obsignandum fructum illum obitæ
pro nobis atq. oppetitæ mortis eius, ex qua sola haustum
ac depromptum est, quicquid est in ipso ecclesiæ sacrificio
sanctum atq. salutare. Superest igitur, vt cū de funda-
mentis & parietibus, & ipso quoque tecto ecclesiæ ipsius
sacro sanctæ hætenus vtcumque disseruerimus, deinceps
etiā de paucis reliquis, quæ intra ædificium eiusmodi, pro
intestino quasi quodam opere posita sunt & colloca-
ta, prout quodque eorum scilicet in mentem
venerit, disseramus. Neq. enim ea eius-
modi sunt, quæ in hac ipsa deli-
beratione rectè omitti
posse videantur.

PATRICII NIDECICI

DE ECCLESIA VERA ET FALSA.

LIBER III.

Qui est de opere intestino ædifi-
cii ecclesiastici.

CAP. I.

Ordo proprius ecclesiæ catholicæ.

Confusio synagogarum hæreticarum.

Intestinum opus ædificii ecclesiastici in ordine ipso consistit.

Ordo facit ecclesiam inuiolatam & inuictam.

Locus Canticor. de terribili ecclesia ordinata.

Ordo ecclesiæ in tribus situs esse videtur, in personis, rebus, tēporibus.

Ordo quo ad personas, triplex est.

Quorum primus est, habere primum.

Quo quidem in loco apud nos est Pont. Romanus.

Hæretici non habent primum.

Non, ne Christum ipsum quidem.

Locus Pauli. Ascendens in altum dedit dona hominibus.

Petro & primo & soli, commissus vniuersus grex dominicus.

Hæretici Petrum demonstrare apud se non possunt.

Non, ne Luterum ipsum quidem.

*Secundus ordo ecclesiæ quoad personas, est ille, qui continet sacerdo-
tes & initiatos & misos.*

Hæretici carent eo ordine.

*Tertius ordo ecclesiæ, ratione personarum, est, non perturbari officio
singulorum.*

Quo ipso ordine hæretici destituuntur.

Locus Iacobi. Ne velimus plures magistri fieri.

In inte-



N intestino igitur hoc opere ecclesia-
stici ædificii nostri explicando, cui po-
tissimum quartum hūc librū nostrum
dicatum esse volumus, ordo sanè ipse
& latius patère, & præcipuas mihi vi-
detur partes obtinere. De eo igitur,
more nostro breuiter differentes, ex-
ponamus verbis paucis, hinc quidem

ea, quæ ad demonstrandum ordinē ecclesiæ nostræ, illinc
autem ea rursus, quæ ad hæreticarum synagogarum con-
fusionem digito quasi indicandam pertinere videantur. Sic
enim facile futurum esse confidimus, vt, cū omnium ani-
mantium solus homo sit, qui, quid sit ordo, quid modus,
quid decorum ipsum, intelligat; omnes ii, qui numero ho-
minum haberi volent, ordine ipso catholicæ ecclesiæ dele-
ctati, libentius in ea permaneant, vel ad eam certè quidem
concitatus reuertantur. Nam cæteri, qui ordine nullo ca-
piuntur, digni profectò sunt, qui quouis aliò discedant,
& pro locis ordine ipso descriptis ac definitis, deserta, quan-
do ita volunt, & inhospita tesqua incolant, eaquæ ad ex-
tremum loca teneāt, vbi nullus ordo, sed sempiternus hor-
ror inhabitat. Quod omen à Christianis omnibus Deus
propitius auertat quæso. Sed nos ad eum, quem proposui-
mus, ecclesiæ catholicæ ordinem, paucis, vti huius natura
loci fert, describendum accedamus.

Equidem sacer ille vates, qui diuinis suis versibus epitha-
lamium quasi quoddam sponsæ huic cœlesti, ecclesiæ ca-
tholicæ cum Christo sponso, videtur cecinisse; in quo san-
ctissimos illos & castissimos alterius erga alterum amores
luculentissimè persequitur; cū sponsam hanc infinitis ali-
is extulisset laudibus, tum in eiusmodi deinceps verba pro-
rumpit, quibus eam depingit progredientem quasi aurorā; “
pulchram vt Lunam, vt Solem autem claram; terribilem “
porrò ac metuendam, non secus quàm castrorum ipsam “

Confusio
hæreticor. aciem ritè atque legitimè ordinatam. Vidit nimirum vidit acutissimè quisquis ille fuit, in vera ipsa ecclesia, quam ille sponsæ Christi nomine dignatur & honore, hæc tria inesse oportere. Vnum, vt commendationem habeat eximiæ cuiusdam pulchritudinis, instar Lunæ, quæ etiam Phœbe ex eo est nominata. Quam ego sanè huius sponsæ pulchritudinem, in apta illorum quasi quatuor membrorum compositione ac venustate potissimùm cernere mihi videor, quòd ea vna, sancta, catholica, apostolica, & sit, & ita dicatur. quod nos primo ipso libro nostro copiosè persecutos esse arbitramur. Alterum, quod ille veræ ecclesiæ vidit inesse oportere, est, vt luce præterea & claritate eiusmodi sit circumfusa, quæ quidem illam, quasi solem quendam alterum, aut certè quasi tabernaculum in sole positum ac locatum, reddat omnibus hominibus maximè insignè atq. conspicuam; quemadmodum sanè obscura esse non potest, tot luculētissimis primò scripturarum ipsarum, hoc autem est bibliorum, patrum, conciliorum; deinde, non scriptarum quoque traditionum, postremò verò sacramentorum etiam & sacrificiorum sanctorum radiis mirificè, vestita ac illustrata. Quæ omnia duobus proximis superioribus libris sunt à nobis pertractata. Tertium porrò, quòd ille ipse diuinus diuinarum illarum Christi cū ecclesia nuptiarum quasi incentor quidam, ad decus & ornamentum Ecclesiæ sponsæ conferendum esse existimauit, est, vt præter formam & claritatem, de qua diximus, auctoritate etiā & vi quadam præcipua ita sit prædita, vt & inter suos honorata, & ab alienis maximè inuiolata esse queat; quòd quidem tertiū, vates hic noster, in ipsa ordinis ipsius soliditate atq. constantia, fixum ac fundatū esse apertè pronunciat; sic, vt certū inprimis ac persuasum nobis esse debeat, quòd ecclesiam quidem amemus, aut verò quòd eam etiam noscamus, aliunde planè proficisci, sicuti ostendimus; quòd autem eam colamus, & meritis omnibus honoribus prosequa-

prosequamur, & vt vno verbo dicam, reuereamur, id omne illi, eius ordinis munere atque beneficio contingere, quo quidem ordine, & nobis suis cultoribus, augustam se & venerandam exhibet, & hostibus rursus ac inimicis vsque adeò formidabilem & inuictam, vt ne ab ipsis quidem inferorum portis valentissimis, magis ei noceri possit, quàm vulgo alioqui noceri solet castris ipsis benè vndique prouisis, ac diligenter omni ratione munitis & vallatis. His igitur tribus ecclesia instructa & ornata rebus, non solum vt aurora in medium progreditur, quemadmodum vati nostro eam describere libuit, sed etiam incedit planè vt regina; quemadmodum eam depingit vates alter, atque haud scio, an vatis huius nostri pater; cùm ita in diuinis illis suis psalmis loquitur: Astitit regina, inquit, à dextris tuis. Hæc est enim mulier illa verè potens, & hæc est illa mascula quædam virago, cuius si quis secum decorem, splendorem, vim denique & potestatem diligentius consideret, precium quidem ipsius, vt ait Salomon, cum precio omnium gemmarum ab extremo vsq. oriente petitarū, non benè omninò conferat: mulieres autem illas stultas & clamosas, quas dum idem iste Salomon huic nostræ sanctissimæ matronæ ex aduerso quasi opponit, speciem & imaginem omnium hæresum oculis nostris repræsentare voluisse videtur; eas, inquam, mulieres insanas, & nihil aliud quàm vociferatione infames, & in ipsa ruina ecclesiæ bacchantes, ne conferre quidem ipsi debeat. Sed quoniam, vt ostendimus, de primis duabus rebus illis, quantum proposito nostro conuenire videbatur, superioribus libris tribus diximus, agè dicamus nunc hoc libro quarto aliquid de re tertia. Quænam est igitur hæc ecclesiæ acies, aut quænam sunt hæc castra, quæ tantopere maiestatem eius tuentur? aut verò quænam hic est ordo, tam illi peculiaris & proprius, vt ab hæreticis non modò euerti, sed ne confundi quidem, nec confundi solum, sed ne vsurpari quidem posse

Confusio
hæreticor.

posse videatur? Ille verò mihi partim in personis & attri-
butis earum, partim in rebus ipsis, partim etiam in tempo-
ribus situs esse videtur. Ac in personis quidē triplicem esse
statuo, quorum primus ille se aspectui nostro obiicit, quē
antea iam, modo quodam & quasi figura exposuimus: qui
videlicet ab vno principe initium sumens, ita deinceps per
omnes commeat, vt neminem quidem non compræhen-
dat, primo tamen illi, à quo sumit, vt dixi, initium, locū pri-
mum atq. præcipuum relinquat. Et reuera, aut ego nihil
omnino intelligo, aut certè ordo ipse, sine primo eoque v-
no (plures enim primi simul esse non possunt) ne intelligi
quidē potest. Quid est enim ordo aliud, quàm ratio quæ-
dam à primo per media decurrens ad extremum? sic, vt pri-
mo ipso sublato, omnem sine dubio rationem ipsius ordi-
nis euestigiò tolli necesse sit. Fundamentum igitur, & qua-
si solum totius ordinis descriptionisque ecclesiæ illud est,
quòd ea non in incertū erret aut vagetur, sed semper primū
atq. vnum habeat, ad quem referatur. Quem nos quidem
eiusmodi primum atque vnum, abunde per dei gratiam in
nostra ecclesia & potuimus semper, & nunc etiam possu-
mus, & poterit in perpetuum omnis posteritas nostra vno
omnium ore demonstrare Pontificem ipsum Romanum:
cuius Pontificatus à Petro ipso Ionæ F. sumens initium, ita
per longam & temporum & hominum successionem de-
cucurrit, vt tandem nostris his temporibus in Gregorio
hoc XIII. Pontifice & re & nomine Maximo conqueuerit:
ex quo quidē deinde annis labentibus, ad alios porrò suc-
cessores ipsius, Pontifices Romanos deuoluetur. Quorum
equidem quilibet propterea & primus est & vnus, fuitque
& erit semper primus atq. vnus, quòd ad eum & ad nemi-
nem alium, in iis quæ Dei sunt, ab omnibus totius orbis
terrarum minoribus Pontificibus, qui modò catholicorum
nomine cēsentur, respectus ac recursus habeatur. At hære-
tici quid? Non sic hæretici non sic. Et si enim ipsi quoque
in ea

in eâ re, tantum momenti positum esse, iam tandem intelli-
gunt, ad veram ecclesiam cognoscendam, vt ad duas illas
veteres suas notas, quibus veram ipsam ecclesiam affixam
esse, existimarunt olim, ad legitimum, inquam, & verbi diui-
ni sonum, & sacramentorum ipsorum vsum, tertiam non ita
pridem notam addere præterea coeperint, obediētiam mi-
nisterio, vt aiunt, ipsi debitâ; sine qua omnis assimilata il-
lius & adumbrata eorū ecclesiæ vis & ratio penitus elan-
guescat; tanta est tamen illarum synagogarum confusio, vt
obtemperari quidem sibi, & postulare possint, & si non im-
petrent, etiâ extorquere gestiant, nunquam id tamen quod
cupiant consequantur: aut verò si fortè ad tempus conse-
quantur, frui tamen eo admodum diu non possint. Dum
enim singuli eorum omnibus imperare cupiunt, ipsi nemi-
ni vni in commune parère sustinent, fit, vt illa, qua sola o-
mnis obedientia constat, totius ordinis ratio, quæ apud hæ-
reticos non ab vno profecta, in omnes ita nescio quomo-
do temerè dimanat, vt nomen etiam suum tueri non possit,
primùm debilitetur quodammodo, siue in tot partes di-
stracta, siue adeò non satis apta neq. suis nexibus colliga-
ta, deinde verò etiam planè funditus euertatur. Dicant e-
nim mihi siue Lutherani, siue Zuingliani, siue adeò alii qui-
cunq. ex turba illa, ecquem habent hoc tempore vnum ex
omnibus, ad quem, omnium suorum consensu, siue summâ
ipsam rerum omnium, siue adeò primas saltem deferant à
Christum, inquierent. Iam hoc primùm falsum est, vt vnicus
ille pacis & auctor & amator, qui nos inter nos vnum esse
voluit, idque summo cum studio patrem deum orauit, su-
bitò tot sectarum, quot inter illos numerantur, atq. adeò
præ multitudine ne numerantur iam quidem, patronus &
antesignanus existat: vt modò dicatur esse Lutheranorum
caput, modò Zuinglianorum caput, modò Anabaptistarū
caput: interdum autem vno eodemque tempore, omnium
istorum caput, capitum tam inter se dissentientium. Hoc,

H h

inquam,

*Confusio
hæreticor.* inquam, omninò & falsum est quidem, & eo ipso cui id tri-
bueretur, planè indignum. Deinde, si maximè verū sit, quod
quidem verum esse nunquam poterit; sed demus interim
verum esse; hoc ipsum tamen quod ita responderetur, non
fatis omninò pressè, neq. fatis hoc loco propriè, mea qui-
dem sententia responderetur. Dicant enim mihi paulisper
iidem illi boni viri Lutherani, siue adèò amicissimi eorum
Zuingliani, quid agant, aut quò se vertant, si eadem ratio-
ne, & Anabaptistæ ipsi quoq. & Trinitarii, & reliqua hæ-
reticorum fex, magis etiam ferè infensa illis, quàm sunt ip-
si nobis, eodē hoc ipso, minime ad eam rem accommoda-
to Christi palliolo abutatur, ad suas quaslibet cōfusiones
obtegendas? Mihi quidem eodem prorsus iure facturi, nec,
quo minus sibi quoq. idem illud liceat, quod cæteris in eo-
dem genere licitum esse vident, quicquam omninò formi-
daturi esse videbūtur. Verū enimvero Paulus Apostolus,
vt hāc eiusmodi defensionem, & hanc eiusmodi latebram,
omnibus æque hæreticis in vniuersū eriperet, iccirco sum-
pta quasi occasione ex his, quæ tunc de vnitæte spiritus in
vinculo pacis, de vno corpore, vno spiritu, vna vocationis
spe, vno domino, vna fide, vno baptismo, vno Deo & pa-
tre omniū, Ephesiis memorauerat, sanè quàm peraccom-
modatè, & maximè necessariò narrat, vnum illum domi-
num Christum, in quo omnes vnum corpus sumus, seruā-
tes quidem vnitatem illam spiritus in vinculo pacis, post-
quàm in superas cœli partes, vi ac potestate sua diuina pe-
netraffet, dedisse dona hominibus. Quæ dona? quosdam
„ Apostolos, inquit; quosdam prophetas; alios euangelistas;
„ alios pastores & doctores. Quem obsecro ad vsum? In o-
„ pus ministerii, inquit, in ædificationem vnius illius corpo-
„ ris Christi, donec concurramus omnes in vnitatem fidei.
Non sine causa, inquam, superioribus illis hæc adiungit. si-
gnificat enim, nunc iam quidem, post abitionem Christi
Dei nostri in cœlum, frustra quenquam aliter, inanem vni-
tatem

tatem fidei, atq. adeò inanem vnitatem corporis iactare ; dicam amplius ; frustra omninò vnitatem vllam spiritus , quæ est in vinculo pacis, aut sperare, aut quærere, aut mente etiam & cogitatione fingere, nisi nos quidem totos regendos ac gubernandos tradamus, huic ipsi muneri ac ministerio apostolico, prophetico, & pastoralis, quod Christus ipse à nobis abiens, & in cœlum proficiscens, vicem suam in terris gerere voluit. Christi igitur ipsius principatum, ad hanc suam, quæ nulla est, astruendam vnitatem, & ad eum, quem quærimus, ordinem apud se demonstrandum, omitant frustra obtendere hæretici. Etsi enim verum est, Christum à Deo datum esse caput super omnem ecclesiam, tamen quoniam is ipse à nobis abiens, & ad patrē reuertens, mēbra sui corporis omnia, Petro ipsi curanda commisit, & tāquam oues scilicet atq. agnos suos dedit eidem pascēdos ac fouendos, sequitur planè, qui à Petro non pascantur, eos de grege & corpore Christi non esse : qui autem ad corpus non pertineant, ii profectò quemadmodum capiti coniungi possint, ne ratio quidem vlla potest reperiri. Vnum igitur Petrum aliquem inter se nobis demonstrent atq. exhibeant, qui inter eos, omnium reliquorum iudicio, princeps sit, & dux atq. auctor eius ordinis, sine quo ecclesia esse nō potest ; si volunt aliquid saltem, apud se, esse ecclesiæ simile demonstrare. Luterum quidem ipsum si nobis pro eiusmodi Petro conentur obtrudere, hunc scimus, viuū etiam tum ac omni contentione renitentem, à non paucis gregalium, de eo, quem sibi opinionis errore finxerat, principatu, præcipitem fuisse deturbatum ; à non paucis, inquam ; qui & ipsi postea, à nihilo paucioribus, de hoc eodem principatu, spe iam propemodū deuorato, depulsi ac detracti sunt ; sic, vt cum illi ipsi, qui eos detraxissent, eodem quoq. non obscure aspirare cernerentur, ab aliis vicissim ex eodem fastigio derepti, atq. ad terram grauissimè sint allisi. Vt aliis iam quidem testibus aduersus eorum principatum, opinio-

Confusio
hæreticor.

ne tantum & voto quorundam affectatum, re nunquam
possessum aut vsurpatum, minimè egeamus. Ipsi enim sa-
tis testatur, nec principem se vllum in sua synagoga agno-
scere, nec eum, qui sine principe teneri non potest, ordinem
amare, sed in ipsa summa confusione, ac rerum omnium
perturbatione perpetuò versari velle. Atque hæc quidem
hæretici. Ecclesia autem quid? de qua ipsa loqui paulò
antè cœperamus? Ea verò, præter eum ordinem, quem di-
xi in ipso quasi vnius hominis principatu consistere, habet
etiam alium ordinem, non minus descriptum ac definitū.
Quem? Illum, inquam, quem ipsum in Melchisedecho o-
lim adumbratum, & in Christo ipso sacerdote sempiterno,
plenè expressum, & perfectum atq. absolutum, inter sacra-
mentorum, vt dixi, suorum numerum lubens ac volens a-
sciuit ac recepit; & receptum, ad selectorum quorundam
hominum initiationem transtulit; eorum, inquam, homi-
num, è quorum manu, sacramenta, è quorum ore, doctri-
nam salutarem populo communicare, quorum item manu
& ore simul, sacrificium panis & vini, atque adeò corporis
& sanguinis Iesu Christi, pro se suisque omnibus Deo ipsi
offerre consuevit. Cuius ego ordinis speciem animo intu-
ens, ita ecclesiam ex eo aptam vndique ac nexam esse com-
perio, vt eius dignitate, hierarchiam planè nobis cœlestem
illam referri in terris ac repræsentari existimem. De quo a-
lius nobis erit narrandi locus. Quo quidē ipso ordine cum
nō minus quàm superiore illo, orbatos esse hæreticos vide-
amus, vt qui nullum legitimum sacris ordinibus initiandi
ordinem amplectatur, sed omnes in vniuersum sola bapti-
smi aqua resperfos homines, ad commune quoddā regale
sacerdotium pertinere arbitrentur; mirum sanè videri nō
debet, si eos, tertio quoque illo, de quo statim dicturi su-
mus, ordine, priuatos ac mulctatos esse meritò arguimus,
atque adeò oculis ipsis iudicamus; tertio, inquam, illo or-
dine, omnibus iam cognito ac perspecto, & vsque adeò in
ecclesia

ecclesia necessario, vt secundum eum omnia geri voluerit Apostolus: illo dico, ordine tertio, qui quidem eorum maximè hominum opera in ecclesia conseruatur, qui secundo hoc hominum initiatorum ordine, sub primo illo ecclesiæ principum ordine continentur. Quis est autem ille ordo tertius? Vt nimirum in ecclesia non omnes de populo sint Apostoli, non omnes prophetæ, non omnes doctores, non omnes interpretes, non omnes denique curatores; sed alii sint qui doceant, alii qui ab his discant: & alii qui curent, alii qui ab his curentur, doctoresque ipsos & curatores suos aliis vicissim ipsi officiis iuuent atq. prosequantur. In quo etiã ipso magnopere peccari videmus ab hæreticis; apud quos ita passim omnibus in vniuersum, commune ac promiscuum factum est docendi munus in ecclesia, vt non modò à tonstrina, & sutrina, & reliquis eiusmodi sellæ atque operis ac quæstus quotidiani locis, sed iam etiam, pro scelus, à carnificina, quod nostris infelicibus temporibus visum est, ad cathedram annunciandi noui istius euangelii, fuerit alicubi prosilitum. O tempora. ô mores. ô nostram omnium cæcitatem, qui hæc nō videamus. ô amentiam, qui non attendamus. ô stupiditatem, qui nō caueamus. ô temeritatem inauditam, qui nos passim ad hæc sacrosancta munera, quo iure qua iniuria ingeramus. Prudenter igitur & planè necessariò monet nos frater domini in sua epistola, ne velimus, non dicit, omnes, sed, plures saltem magistri fieri; causamque etiam addit, quam nostra hæc tempora esse verissimam plus satis comprobarunt. Ad hunc enim modum, inquit, à multis in multis offenditur, & præterea maius ac terribilius iudicium accipitur. Siue enim offensiones ipsas spectes; dic mihi, quæso, per deum immortalem, quæ & quanta, his nostris temporibus offensionum ac scandalorum sylua enata est? dum pro pietate & religione, quæ olim sub paucis legitimè ordinatis magistris illis maximè viguit; nunc, cum omnes ferè per

Confusio
hæreticor.

fas per nefas magistri videri volumus, omniū prorsus hominum animos omni vitio & scelere inficimus; & dum decretis maiorum nostrorum non paremus, fenestram ad omnē licentiam aperimus? Siue spectes pœnam & iudicium, ecquānam, quæso, atrocior pœna nostræ erga maiores nostros contumaciæ, non dicam, infligi, sed fingi etiam ac excogitari poterat, quàm quòd ab æqualibus quidem nostris, in quolibet recens inuento & excogitato à nobis dogmate, acerbissimè oppugnamur, à minoribus autem ne impetramus iam quidem, vt vel nostris, vel aduersariorum saltem nostrorum inuentis & placitis contenti conquiescant; sibi autem ita temperent, vt nouas ipsi indies & mōstrosas in religione opiniones in vulgus ne procudāt? Cuius ipsius tanti mali non modò reddenda ratio, sed etiam, tanquā reis capitis causa planè in iudicio dei dicenda est; iis quidem, inquam, qui nulla certa vocatione, nulla, vt sic dicam, ecclesiæ ordinatione, seipsos ad hoc munus ingesserunt, eumque honorem non vocatione legitima, vt Aaron, sed vt Core, Datan, & Abiron, per summam audaciam & temeritatem vsurparunt sibi. Iurè igitur plectuntur, traditi in sensum reprobum, & in inordinatissimam viuendi pariter ac docendi rationem. Quare nos quidem ordinem ecclesiæ, inter cæteras eius prærogatiuas multas, vnicè amplectamur, ab eoque nos deduci ne patiamur; hæreticorū autem synagogas, totius ordinis, totius denique vitæ, & rerum ac officiorum omnium perturbatrices, summa cum animi attentione deuitemus: ab ipsis denique hæreticis, vt à fratribus inordinate, contra ordinationem ab apostolis acceptam ambulantes, diligenter caueamus; idque adeò hominibus honestis & moderatis frequēter proponamus, ad absterrendos eos à cœca ista, & præcipiti furiosorū hominum vesania, & ad adducendos ad ecclesiæ catholicæ ordinem atque sanitatem. Et hætenus quidem, de triplici ordine ecclesiæ, quantum ad personas attinet.

CAP. II.

Contiones, missæ, cantus, horæ
catholicorum.

Ordo ecclesiæ non solum in personis, vt supra, & attributis earum, sed etiam in rebus consistit.

Rerum, aliæ quasi vocales sunt, aliæ quasi mutæ.

Tum de vocalibus hoc capite toto.

Ecclesia catholica tum contionum suarum voce, tum missarum & bonarum ipsarum cantu, ostendit se magnam erudiendi nostri curam gerere.

Ecclesiasticarum contionum & cantuum præstantia, moderatio, scopus.

Locus Gen. de arbore scientiæ in paradiso, & de vitæ planta.



Tque ecclesia ipsa longius porrò ordinem suum hunc protendit, & à personis ipsis etiam ad res transfert, vel potius & personas ipsas ad res accommodat, & rerum ipsarum vtilitatem atque vsum cum omnibus passim hominibus communicat: & omnia denique sua studia conatus que adeò suos omnes eò dirigit, vt quicquid suscipit, quicquid agit & molitur, id totum, ad omnes homines, ipsa salutaris cœlestis euangelii ac pietatis doctrina imbuendos, planè conferre videatur. O solertem Christiani parentem nostram ecclesiam, & in omnes partes bene consulentem ac prouidam, & quod caput est, etiam beneficam & benignam: quæ, vt modò bene faxit nobis, nunquam quicquam remittit de suscepta semel pro nobis cura atque sollicitudine: quin vertit se in omnia, & quasi optima quædam Euangelica Martha illa, rerum omnium fatagere non desistit, quominus nobis & exhibeat semper & commendet vtile inprimis ac salutare ministerium suum. Nam vt interiora illa præcepta eius atque instituta hoc loco omit-

co omittamus, quæ perfectissima quadam & absolutissima ratione traduntur in scholis & gymnasiis ac collegiis doctorum virorum ab ecclesia institutis, & ea attingamus tantum, quæ passim sunt omnibus, & politis, & barbaris, & sapientibus, & insipientibus cōmunia: in iisque ipsis, ut ab his potissimum incipiamus, quæ se ipsa sua vi produnt, & sensus nostros vltro sollicitant, nō muta videlicet ipsa, neq. tacita, neq. omnino inertia, sed voce ac sermone, quasi quadā vita, constantia. Ut ab his igitur incipiamus, profecto & cōtionibus ad populum sacris, & missarum sacrificiis ipsis, & reliquis symphonicorum, ac laudes diuini numinis, in hymnis & psalmis celebrantiū, hominum cātibus, & omnino omnibus horariis precationibus publicis, & multis aliis eiusdemmodi rebus, quarum est semper in ecclesia nostra, non modò assidua, sed etiam rectè atque ordine instituta continuatio quædam: continuatio, dico, magnis piorū primum ac religiosorum hominū ad eam rem impensis studiis, deinde maximis eorūdem, & ex sancta veluti quadam ambitione profectis sumptibus, in hæc tēpla nostra, à maioribus nostris introducta, & ad perpetuitatē confirmata: profecto, inquā, ecclesia omnibus iis vsurpādis rebus, ipsos etiam infimæ classis homines, quatenus opus est, non finit esse earum rerum rudes aut negligentes, sine quarum cognitione & compræhensione, aut potius fide & persuasione, vel etiam hoc magis, disciplina & exercitatione, salus hominum Christo addictorum, constare ferè non potest. Nam contionum quidem ipsarum voce ac sermone, ea nobis abunde suppeditat, quæ præcipuorum fidei & religionis nostræ Christianæ capitum, aut officiorum nominibus, ipsa iam pridem consecrauit: quibus etiam ipsis certa feriarum tempora designauit, quæ nos, ipsius ductu, hauriendis inibi per ocium, eiusmodi salutariū documentis Christianis, commodè traducamus. Missarum autem illa quotidiana solennia, piis rursus meditationibus nostris publicè excitandis

Eccl. Lib. III. Cap. II.

249. *Contiones*
Cantiones
catholicor.

tandis pariter atque inflammandis voluit esse dedicata, eo potissimum consilio, ut quicquid, audiendis sacris illis contionibus, seu de diuina erga nos benignitate, seu de nostro vicissim, erga numen illud diuinum nobisque propitium, officio ac potius pietate, & quæ sunt eiusdem generis, percipissemus dudum, id totum, ad conspectum illum Missæ & sacrificii sacrosancti (cuius ceremoniæ quotquot sunt, omnes sunt, in ipsam totius vitæ Iesu Christi dei nostri ob oculos nostros repræsentationem, maximo patrum ac maiorum nostrorum studio, ingenio, consensu ab ecclesia collatæ.) id totum, inquam, sub idem illud Missæ tempus, taciti nobiscum meditari, in eoque etiam in dies deinceps singulos recolendo, & in ipsum quasi vitæ exercitiorumque quotidianorum nostrorum succum ac sanguinem conuertendo, versari videamur. Iam uerò cantus reliqui ecclesiastici omnes, qui sunt laudibus ipsis diuinis personandis dedicati, quantam nobis, quæso, orationum & precum ac votorum materiam subministrant? dum orantibus quidem illis, qui nobis totius quasi ecclesiæ personam referunt atque repræsentant, pudere nos atque tædere necesse est, non ipsos etiã nos, pro quibus tunc præcipuè oratur in ecclesia, studio illo canentiũ pro nobis & orantium ita commoueri, ut socias quoque operas nostras qualescunque cū illis cōiungamus; & deo ipsi, cui gratiæ illæ publico nomine pro cūcta ecclesia persoluantur, nos quoque ipsi priuatim à nobis ipsis debitas persoluamus. Quæ quidē contionũ cationumque instituta omnia etsi sunt ecclesiæ ipsi, nonnulla saltē ex parte, cum hæreticis communia, ipsa tamē ecclesia quantum maximè conniti potest, ita se, in iis quoque communibus, comparat & componit, ita omnia agit atque moderatur, ut nec contiones suas contionibus hæreticorum, nec catechismos catechismis, nec cantus cantibus, nec orationes orationibus, vlla in parte vel sanctitatis, vel eruditionis, concedere patiatur; imò verò illud vnicè elaborat, ut hæc omnia, eorũ

quidem iudicio, quibus hæc vtrunque cognita sint ac perspecta, & sanctiora apud se quàm vîquàm alibi, & eruditiora, & omni perfectionis genere absolutiora esse apparent. Vnam illam in hoc genere pernecessariam profectò moderationem interim adhibens, quam vtinam adhibuissent, atque adeò vtinam etiam nunc adhiberent antagonistæ nostri consiliis institutisque suis, vt scientiam quidem & intelligentiam rerum ipsarum abstrusiorum, perfectam illam & absolutam, doctis & intelligentibus solis referuet, sanctitatem verò ipsam, quæ est vsus eorum omnium maximè præcipuus, & certè omnium ex æquo communis, populo vniuerso, id autè est, doctis pariter & indoctis, libenter concedat atq. communicet. Quam etiam ipsam sanctitatem illa re potius æstimandam esse censet, quanto studio à quolibet nostrum, ea quæ ab illa proponuntur, excipiãtur, & quæ excepta sunt, quanta alachritate, moribus ipsis ac vita nostra exprimantur, quàm quanto scilicet ingenii acumine compræhendantur, aut quàm acuta & subtili disputatione limentur, atq. defendantur. Non tam enim in subtilitate vlla siue intelligendi siue adeò differendi, quàm in obseruandis summa cum diligentia iis, quæ diuinitus præcipiuntur, nouit esse à Christo domino fœlicitatem & beatitudinem hominum, id autem est, summum animorum nostrorum bonum, constitutum. Sic enim ille quondam
„ ad auditores suos. Si nouistis hæc, inquit, quæ toties in-
„ culco vobis, beati eritis; sed ita denique, si feceritis ea. Itaq. ecclesia ipsa cùm paradisum veluti quendam habeat, omni prorsus stirpium ac plantarum genere diligenter admodū & copiosè consitum ac conseptum, sic, vt inde nulla planè arbor absit, quæ modò aut visum fouere, aut gustum etiā ipsam delectare posse videatur. scientiæ tamen illam arbo-rem, qua non frustra meminit primis illis, & recens etiam- tum formatis parentibus nostris, fuisse diuinitus interd-ctum, remouet quodammodo ab aliis arboribus ac sepo- nit, suo

nit, suo & loco & tempore fruendā ab adultis iam & corroboratis viris; ipsam autem vitæ plantam, in qua vna prope modum sunt omnia, in ipso horti atque paradisi sui medio, & quasi vmbilico, constituit; vt hoc ipso, omnes sine vllō ætatis, aut ingenii, aut maturitatis discrimine homines, ad vescendum fructu obuiæ atque expositæ eius ipsius arboris, pelliciat & inuitet.

CAP. III.

Templa, cerimonie, festa catholicorum.

Ecclesia, ipsis etiam quasi mutis rebus, nobiscum loquitur; cum eas ad sensus admouet.

Ad oculos, templa & ornatum templorum.

Ad aures, campanas, & musica instrumenta.

Ad nares, suffimenta.

Ad tactum, aquam, cineres, genuflexiones &c.

Ad gustatum, cum cætera, tum corpus ipsum ac sanguinem domini.

Ad omnes sensus, pompas ipsas supplicationum.

Cerimoniarum ecclesiasticarum, feriis ipsis purificationis Mariæ, species & dignitas singularis.

Atque hæc quidem, quod ad ordinem, qui in rebus est situs, attinet.

Ecclesia, ne ea quidem quæ sunt temporum, prætermittit: vt festos dies.



Ræterea autem eadem hæc ecclesia nostra, postquam à contionibus, missis, horis denique ipsis orationum suarum interquieuit, & vocē quasi ipsam ac sermonem remisit suum, non remanet tamen prorsus muta, & omni ex parte iners ac ignaua, sed pro vocalibus illis suis contionibus, missis, cantibus, aut tacitas rursus, aut certe minimè articulati sermonis, machinas veluti

quasdam ad sensus ipsos adhibet, quibus in animos suorum
fidelium, id quod vult, hoc autem est, pietatem & religio-
nem, possit commodissime instillare. Admouet enim ad o-
culos, primum templa ipsa, ornatumque omnem illorum.
Vt ita templis quidem ipsis Deo ponendis & extruendis,
ipsum illum esse ostendat, à quo, primum hæc omnia quæ
videmus, & constiterint ab initio, & regantur hoc tempo-
re, & conseruentur ad perpetuitatē: à quo deinde, nos quo-
que ipsi & facti, & de seruitute liberati, & in spem vitæ æ-
ternæ vocati simus: cultu autem illo & ornatu templorum
procurando, gratias eidē vtcunque referat, tum de illis ab
eo iam receptis, tum de his, quæ in dies singulos recipimus,
beneficiis tantis. Sicut enim mundus hic, magnum abunde
fert testimonium bonitatis, sapientiæ, ac potentiæ dei, qui
eū scilicet condere, & voluerit, & nouerit etiam ac potuerit;
ita propemodū templa nostra, veluti microcosmi quidam,
monumenta esse videntur, ad æmulationem maioris istius
mundi instituta, quæ numinis illius diuini ac præpotentis,
bonitateque præterea & sapientia præcellentis, præsentiam
in oculis nostris, propius quasi defigant (ex quo ipso, mun-
dus quoque ipse templi appellationem antiquitus, apud
ipsos etiam ethnicos, est consecutus.) Et rursus, sicut mun-
di ornatus iste, cœlique inprimis ipsi, qui sunt summum &
maximum mundi totius ornamentum, enarrant, sicut Da-
uid loquitur, & more quodam suo quotidie celebrant glo-
riam ipsam laudemque dei ipsius immortalis; ita hic cul-
tus ornatusque templorum nostrorum, quasi tacitus qui-
dam præco esse videtur & buccinator earundem illarum
immortalium laudum diuinarum, ad quas perfoluendas,
animus rectè vel à natura informatus, vel diuinis præce-
ptionibus institutus, & factum & natum se esse sentit atq.
proffertur. Extruit igitur ecclesiæ templa Deo Opt. & Max.
in eoque, illam Centurionis euangelici laudem diligenter
æmulatur, hominis ethnici & profani, necessario ipsius tē-
pore,

pore, apud Christum dominum, cum singulari illius fructu ab aliis commemoratam, eo quidē tempore, cum dominū ipsum ad opem illi promptius ferendā adducere conarentur. Dignus est domine, inquebant, beneficio tuo. Diligit enim gentem nostram; cuius rei insigne admodum monumentum, in omnium oculis cōstituit, cum synagogam ipse ædificaret nobis. Hanc laudem, inquam, ecclesia nostra, præter cæteras heroicas ac penē diuinas laudes suas æmulatur. Tot enim passim extant, singulari catholicorum hominum studio constructæ basilicæ, tot fana exædificata, tot templa, maximis eorum & sumptibus excitata, & donariis aucta, & fructibus ac redditibus omnis generis cumulata, ut ea res inuidiæ illis citius esse apud hæreticos posse videatur, quàm ut apud pios & recto iudicio præditos, non possit, aut non debeat certe quidem, erectam ipsorum in deum fidem ac religionem, & ardentem Christianæ pietatis faces atq. flamas, plenissimè in illis demonstrare. Extruit igitur templa ecclesia nostra, extruit, extructaq. cum aliis plerisque rebus, tum cereis potissimū & tabulis atque picturis exornat; ut cerei quidem accensi, maiestatem quandam numinis præsentis significant, tabulæ autem illæ, egregio opere perpolitæ, & publico illo in loco fixæ ac locatæ, ponant sub aspectum, quantū maximè possunt, earum ferè rerum memoriam, de quibus alioqui vel in scholis subtiliter controuerti, vel pro contione fusè admodum differi solet ac disputari. A quo quidem utroque ornatu interdum etiam abstinet, dum contractam veluti frontem suā, apertum cuiusdam quasi mœstitiæ suæ indicium, nobis solet exhibere: idque aut cereis extinguendis, aduersus immorigeros, atq. ea de causa anathemate percussos filios; aut imaginibus ipsis & picturis nobilioribus vel adis ac tegendis; dū nos diebus ipsis ieiunii quadragenii, ad poenitentiam sollicitat sanctiorē: ut ita ab omni exteriorē specie oculis quasi vsurpāda, exclusi, intus in ipsos nos de-

Ii iij

scenda-

scēdamus, & in ipso cōscientiæ nostræ sinu interiore, nobiscū ipsi strictiorem quandam vitæ morumque nostrorum rationē subducamus. Admouet item ad aures nostras, & cāpanas; & cymbala, & reliqua eius generis tintinnabula ærea; dū hoc ipso indicio, & quasi clasico, absentes quidem vel ad templū vocat, vel orationis admonet, vel certè, quid intus intra ipsos tēpli parietes & cācellos geratur, facit certiores: præsentibus autem ipsis & ad templum iam conuocatis, signū dat, præsentis ipsius numinis suppliciter adorandi. Interdum tamen ea quoque pro æreis, ligneis vtitur tintinnabulis; quod quidem illa facit diebus ipsis parasceues: siue ad designandum miserabiles illos & deflendos eius temporis lapsus Apostolorum ipsorum, qui subita quadam animorum consternatione, ob indignissimum & acerbissimum magistri & domini Iesu cruciatum, tunc temporis ingruentem, ex æreis lignei facti videri poterant; siue adeò ad contestandum etiam dolorem ipsum suū, hinc quidem, cruciatu ipso, & morte atque obitu vnigenæ filii dei sponsi sui, expressum; quarū tunc rerum omninò acerbārū, anniuersaria ipsa memoria per omnia templa recolitur: inde verò commiseratione quadam prouocatum earū prolapsionum nostrarū, quæ diræ necis illius, illorumque grauißimorum tormentorum causa extiterunt. Interdum verò vsum omnium tintinnabulorum istorum & campanarum, tam ærearum quàm lignearum, planè intermittit; vt cū in ipso fortè publico aliquo facinore commissō ac perpetrato, maiore vtēs interdicto, sonitus omnes, nisi horridos & violentos nescio quos, vetat prorsus atque aspernatur. Nec verò aut cymbalis modò & campanis, vti nunc diximus, aut assis etiam tantū hominū vocibus, vt paulò antè ostendimus, vtitur ecclesia nostra, auribus nostris inferuiens; verū etiam celebrioribus ipsis diebus depromit musica quædam instrumenta, ad erigendos iacentes nostros animos, & excitandos ad laudes diuinas, maiore aliquanto

liquanto cū lætitia decantandas : quod vel maximè apparet diebus ipsis parasceuen sequentibus, qui sunt anniuersariæ rediuiui ipsius domini nostri memoriæ consecrati; quibus quidē diebus ipsis nihil prætermittitur, quod ad exhilarandos cantu ipso hominum animos pertinere videretur. Atq. hæc quidem ad aures. Adhibet verò etiam odores ac suffimenta ipsa nostris naribus; vt & maiestatem diuini numinis repræsentet, & feruorem præterea maiorem quendam in nobis exuscitet, maiestatis illius sempiternæ precibus nostris tanto ardentius venerandæ, opisque ipsius ad vsus nostros contentiosius quodammodo exposcendæ : vt videlicet, quemadmodum ea quæ odorum causa hic adolentur, ad nares ferè deferuntur, ita preces & supplicationes ac vota nostra omnia, igne diuini ipsius amoris succensa in præcordiis nostris & inflammata, rapi in conspectum ipsum domini, & ad aures benignas eius protinus perferri videantur. His enim tunc quoque, aut certè non absimilibus verbis ecclesia ipsa, in ea cerimonia administranda vtitur. Admouet denique eadem hæc ecclesia ad tactum nostrum, plura etiam ferè quàm ad vllum sensum aliū. Adhibet enim modò aquæ, modò cineris asperisionem, adhibet crucis impressionem, genuum flexionem, pectoris percussionem, osculum denique reliquiarum sanctarum; quæ omnia, vel monumenta, vel certè inuitamenta esse vult pœnitentiæ interioris. Postremò gustatus etiam ipsius nostri non præmittit habere rationem; primū quidem, dum eum cupediis aliis plus fatis vel obrutum, vel irritatum, indictis ieiuniis, tum recreat, tum cohibet, & quantum potest, ad moderationem reuocat; deinde autem cū diebus certis solennibus, & panem populo, & vinum, & salem, & fructus terræ, & cætera quæ ad esum, aliūque præterea familiarem vsus nostrum pertinent, benedicta, & verbis solennibus sacrata proponit, & denique, dum ipsum Iesu Christi corpus & sanguinem, sub panis & vini forma ac specie consecratum,

cratum, vescendum depromit, & fidelibus ipsis communi-
cat. Atque hæc quidem quæ dixi, sensuum sunt singulorū;
illa quæ dicam, omnium; dū supplicationibus ipsis ac pro-
cessionibus illis, quæ sunt veluti sacrorū solennes pompæ
quædam, sensus omnes reficit: in quibus quidem & speciē
oculis ipsis gratam ac illustrem repræsentat, & aures cō-
cētibus exquisitis permulcet, & naribus odores afflat iucū-
dissimos, & aquam ferè spargit, & multa osculo nostro ex-
cipienda defert, & ipsum denique Iesu Christi corpus, cibū
atque adeò vitam ipsam & corporum & animorum no-
strorum, circumgestat. Vt ita nimirum & audiamus, &
olfaciamus, & manibus quasi contrectemus vndique, vim
ipsam infinitam benignitatis diuinæ; gustemus etiam & vi-
deamus, quàm suavis sit dominus & quàm beatus sit vir
qui sperat in eo. Quid his, quæso, in eo genere plenius? quid
speciosius? quid in omnes partes illustrius, aut gloriosius,
non dico, in ecclesia catholica fieri, sed fingi saltem ab hæ-
reticis ac cogitari potest? Equidem fremant omnes licet
portæ istæ inferorum, dicā tamen liberè quod sentio. Vnus
hic certè quidē dies cereorum, quem hodie in ecclesia no-
stra catholica solennem piè religioseque obimus, memo-
riam recolentes illius diei, quo die olim, maiorum more,
& Christus puer, qui semper erat domini, vel potius qui
semper erat dominus, domino ipsi sistebatur; & Maria ma-
ter eius, quæ virgo ipsa, agnum illum nitidissimum, & fi-
lium præ filiis hominum speciosissimum pepererat, ex re-
centi illo, omnibus ex partibus mundo planè atque casto
partu suo, ex lege purgabatur in templo Salomonis. Vnus
hic dies, inquam, vti diurnum hoc ipsum lumen suum vin-
cit propemodum flamis lucernarum istarum, piè ac religi-
osè in templo accēsarum, ita reuera specie & pulchritudi-
ne istarum cerimoniarum suarum, & ea quasi maiestate,
quæ exurgit ex tot repentè incensis cereis benedictis, lon-
gè superat omnes omnium hæreticorum, quotquot sunt
inter eos,

inter eos, falsas illas atq. ementitas pietates. Quod si iam in his tantopere appareat, quæ tamen nec primum, nec præcipuum locū obtinent in ecclesia nostra, concludi sanè potest, ea quæ apud nos excelsiora sunt, ne habere quidem hæreticos, cui comparentur. Ego enim profectò ita mecum statuo. Totum hoc genus cerimoniarum in ecclesia nostra, de quo loquimur, eiusmodi esse, ceteris in eadem ecclesia rebus comparatum, quod propter humilitatem & abiectiōem suam, pedum mihi prorsus vicem, in hoc corpore, quod est ecclesia, gerere videatur. Si igitur pedes ecclesiæ nostræ, euangelizantis pacem, euangelizantis bona, admodum speciosi sunt, ipsius etiam Apostoli testimonio, imò si ipsa synagogæ vestræ facie formosiores sunt, sicuti ferè ostendimus; quid dicemus de manibus, & pectore, & ceruice, & capite eiusdem ecclesiæ nostræ, cū cæteris rebus vestris cōparato? Atqui cerimonias ipsas, pedum, quod dixi, instar obtinere in ecclesia nostra, inde profectò ostendi potest, quòd, quemadmodum pars illa corporis, in speciē abiecta est, re ipsa, quod videmus, apprime est necessaria, ita cerimoniis ipsis nihil in ecclesia in speciem humilior, nihil ferè ad vsum magis necessarium potest reperiri. Concedūt, quod dicitur de abiectiōe, negant quod de vfu. Ego verò contendam hoc loco, & vt puto, euincā etiam, nihilo planè momenti minus inesse in cerimoniis ipsis, ad animos nostros in pietate Christiana, aut erudiendos, aut retinendos, aut fulciendos, aut attollendos, aut promouendos, quàm in pedibus ipsis esse cōspicitur, ad sustinendū ac deportandum corpus ipsum. Omnino enim, quemadmodū sine pedibus, infirmus est ad progressum omnis conatus voluntatis, debile ac eneruatum rationis imperiū; ita planè sine cerimoniis, mancum est quodammodo omne exercitiū pietatis. Etenim fermo ipse Dei immortalis, qui in eiusmodi pietatis negotiis summa quædam lex est ac veluti ratio, dominans & præscribens agenda voluntati, etsi fidem

K k profectò

perfectò, ex auditu ipso, in animis nostris generare, atq;
adeò voluntati etiam ipsi insculpere potest; pietatem ta-
men, qua maximè vivit ac viget fides ipsa, oculis repræsen-
tare hominum, sine usu cerimoniarū nō potest: progressum
autem in pietate, sine cerimoniis externis ipsis, quas dico,
ne moliri quidem: dicam audacius, ne polliceri quidem.

Quid ita? quia cerimonie ferè sunt, quibus pietas ipsa,
in animorū iam quasi ipsorum concepta visceribus, foras
emergit, emerfa alitur, alta sustinetur, sustentata crescit &
accessionibus augetur. Neque enim pfectò homines sunt,
vt spiritus ac mētes cœlestes illæ, quæ interioribus solum
motionibus agitatae, omnia efficiunt, quæ destinariūt: sunt
enim spiritus expertes corporis. hominū autem ipsorū, nō
magis animo quàm corpore constantiū, actiones, illæ etiā
quæ religionis sunt & pietatis, intus conceptæ, foras penè
spectāt, & extrinsecus perficiūtur; vsque adeò sanè, vt cū
corde ipso satis crediderimus ad iustitiam, tum oris tamen
cōfessio ipsa, quod ait Apostolus, necessaria nobis sit ad sa-
lutem. Cōcludamus igitur, quod ostensum est, cerimonias
ipsas in ecclesia, & propter speciem ipsam abiectam suam,
pedum planè in corpore humano similitudinem habere.
(In omnibus enim, quæ vnquam ab hominibus religiosis
cum fide & pietate suscipiuntur, actionibus, nihil penè est
cerimoniis in speciem vilius, nihil humilior,) & propter
usum, quòd iis pietas ipsa nostra & ferri propemodum, &
propagari, & in oculos hominum incurrere, eosq. ad æ-
mulationem quasi quandam incitare soleat, maximè ne-
cessarias in ecclesia videri. Quod cū ita sit, iurè perfectò
ecclesia, hos ipsos pedes in hoc corpore, cerimonias dico
ipsas, tam mutas quàm etiam vocales illas, vt ad integri-
tatem suam necessarias, admodū libenter retinet. De qui-
bus nos quoque ipsi, idcirco hoc loco agendū nobis esse
existimauimus, quòd eas ad rerū ipsarū in ecclesia necessa-
riarū ordinē describendū, maximè iudicaremus pertinere.
De quo

De quo quidem rerum ipsarum ordine satis hæcenus dictum esto. Iam verò neque illa adeò, quæ nos temporū esse, & ad tertium ecclesiæ catholicæ ordinem pertinere diximus, ecclesia nostra prætermittit. Illa enim certa dierū solennium tanquam in fastos quosdam distributio, quos dies ecclesia annuis cōmutationibus iubet obseruari, quid aliud est, quàm simplex & aperta hominum simpliciū, ab ecclesia summo consilio & summo ordine tradita, ab hominibus autem ipsis magna cum pietate vsurpata, institutio, in rebus ad salutem pertinentibus? Nam dum & conceptionem, & natiuitatem, & circumcisionē, & adorationem à magis, & quadraginta dierum post baptismum ieiunium, & tormenta, & mortem, & sepulturam, & resurrectionem, & in coelos ascensionem Christi domini, Spiritus denique eius sancti missionem, statutis ab ecclesia magistra temporibus, in festis illis conuentibus nostris, celebramus, quid aliud quàm capita fidei nostræ Christianæ singillatim quasi profitemur, & beneficia denique diuinitus in salutem nostram impensa nobiscum recolimus? atque utinam, ita ut par est, recolamus. Quid Martyrum, quid Apostolorum, quid Euangelistarum, quid Confessorum, quid Virginum, quid aliorum sanctorum, in certos dies anni, conceptæ ab ecclesia feriæ, aliud sunt, quàm & eiusdem illius fidei nostræ adiumenta, & ad gratiarum actiones incitamenta, & exempla ad vitam Christianis legibus ac moribus instituendam & formandam proposita?

Cap. III.

Hæretici, ceremonias omnes aut tollunt,
aut solo auditus sensu definiunt.

Hæreticorum nonnulli, omnes ceremonias reiciunt;

Quod non est ferendum.

Nonnulli eas solas retinent, quæ auditui tantum seruiant;

Quod reprehendendum.

(feriores.)

Cantiones & cœnæ hæreticorū, cantibus & missis catholicorum in-

Contiones hæreticorum, contionib. catholicorum inferiores.



Vm igitur omnia satis exposuerimus,
in quibus tantus, vt ostendimus, & tā
illustris elucescit catholicæ ecclesiæ
ordo; ordo, inquā, ille, decus & orna-
mentū singulare, totius eius, quod est
in nostra ecclesia, operis intestini: re-
stat, vt hæreticarum quoq. ecclesiarū
ipiarum, in hoc eodem genere, rationem illam sine ratio-
ne, & sine modo modū, & omninò quæcunq. est, omnem
conditionem earū, hoc loco iam excutiamus, & de ordine
ipso earum minime ordinato aliquid differamus. Et sanè
quoniā de eo ordine, quem in personis ipsis spectari, quem-
que adeò trium ferè generū esse, docuimus, verba facientes,
vna iam eademq. opera, vno etiam & eodem, primo huius
libri capite, breuiter, tam ea, quæ fierent apud catholicos,
quàm quæ apud hæreticos gererentur, sumus psequuti; de
reliquorū autem duorum illorum ordinum genere, quorū
omnis, partim in rebus, siue vocalibus, siue mutis, partim
in temporibus, versaretur ratio, nō alia duobus proximis
capitibus superioribus diximus, quàm quæ ad catholicas
tantum ceremonias pertinere viderentur; agè dicamus nūc
item duobus sequentibus capitibus, de iisdem illis cerimo-
niis

niis rursus, ea quidem, quæ ad hæreticos tantum spectare videantur. Sic enim cōparationis illius, iam inde ab initio à nobis institutæ ratio requirere videtur. Incipiamus igitur, tum in genere de omnibus, tum in specie de vocalibus cerimoniis eorum. Nam de mutis ipsis sequenti demum capite agere constituimus. Hoc autem ipso loco ostendamus, primum hæreticos illos ferendos profectò non esse, qui ceremonias in genere omnes, ab ipso ecclesiæ sanctæ ordine in vniuersum sine discrimine abdicare connituntur. Deinde illos quoq. ipsos perperam facere, qui solas mutas reiicere, vocales retinere videntur: in quibus tamē ipsis, nihil sit apud eos, quod nostrarū vocalium catholicarum ceremoniarum ordini, descriptioni, dignitati admirabili, vel cōferri saltem posse videatur. Principiò igitur, qui ceremoniarū ipsarum genus omne, quas nos vniuersas, vtiliter in sensus ipsos, & magna cum pietatis accessione atq. incremento, posse influere diximus, omninò fastidiant, & à conuentibus ipsis Christianorū faceßere debere censeant, eos non satis omninò religiosos, imo verò nō satis cautos neq. intelligentes homines, esse reputandos ostendamus. Sic enim planè hoc agere videntur, quasi in his terris, vel hac potius in infinitate vulgariū ac popularium hominū, quibuscum viuitur, cum solis viuatur perfectis illis viris planeque sapiētibus, qui sensibus corporeis, ad quos propemodum omnis ceremoniarū vis & ratio referri solet, non egent nec vtantur, spiritu tantum solo ducantur ac regantur; & nō plures potius sint inter nos, qui hauriendis cœlestibus in hac visibili ecclesia mysteriis, lacte magis quàm cibo solido opus habeant; vel, si qui sunt, q opus ipsi nō habeant, quasi iccirco cæteros illiusmodi, quorū semper longè maior est numerus, inbecilliores, & minus in earum rerum exercitatione pgressos, statim cōtemnere ac pro nihilo ducere debeāt: & quasi meminisse eos Apostolici in hoc genere exempli nō cōueniat, qui omnibus omnia factum

se esse, noto illo epiphonemate gloriatur, ut omnes Christo suo lucrifaceret, & ad agnitionē veritatis ipsius tāto facilius adduceret. RECITA epiphonema. QVIS INFIRMATVR, inquit, ET EGO NON INFIRMOR? QVIS OFFENDITVR, ET EGO NON VROR? Ita isti, dum nimium scilicet magni, in oculis leuissimorum hominum; nimium perfecti in oculis imperfectissimorum volunt apparere, primum ecclesiā ipsam vanitate orationis suæ dedecorāt, deinde infirmioribus ipsis offensionem sunt; ad extremū autem, pro perfecta illa, cuius opinionem venantur, sapientia, ridiculam nobis nescio quam sapientiā suam demonstrant, plenā ociosarum quarundā, nec cum natura hominis satis cōgruentium cogitationum; quibus cogitationibus illi, dū se modò miseræ ipsi plebeculæ, vtcunq. vēditent, quanta se apud deū, & bonos omnes, ignominia afficiant, quarū deniq. & quā à Christiano pectore alienarum rerū cupiditate flagrare se interea ostendant, non attendunt. Christianorum enim profectō virtus propria humilitas est, non se efferens supra modum, neq. communia illa cæteris mortalibus diuinitus tributa beneficia fastidians, priuata autē sola & præcipua ac singularia quædam, semper anhelans, aut verò eadem sibi arrogans, & interdum quasi præsentia adesse iam fingens; sed cōmunibus illis cōmuniter cū aliis contenta, ita priuatim vitam instituens, ut iis quasi cōmunibus insistens gradibus, sensim connitatur ad sublimiora illa, quæ sunt proposita homini Christiano ad perfectionem contendenti. Quæ ipsa, ipsos illos quos dico, præteruecta gradus, non conuellat statim eos, neq. demoliatur, sed aliorum quoq. studiis, atque æmulationi, eodem illo modo terendos relinquat: ut iis quasi fulcimentis connixi & ipsi, altius in dies in exercitio pietatis ascendere cōentur. Hæc est illa Christianorū propria virtus humilitas. A cuius ipsius laudabili instituto, cū longè aberrant isti, qui ceremonias ecclesiæ omnes, sua ipsorum dignitate quasi inferiores

inferiores esse existimant, fit sanè, vt eorum exquisita illa ac
 nimiū elata sapiētia, & aliena sit ab animo ac professione
 Christiana, & excludatur planè à possessione bonorū illo-
 rum, quæ sunt nō alta sapientibus proposita, sed demissis
 atq. humilibus ipsis appromissa. Iustum ex fide viuere, scri-
 ptura ait, & fidem donum dei esse, eadē hæc ait: & verum
 est vtrunq. sanè quod ait. Quid tū igitur? Tūne iam, quæ-
 so, inani illo fidei nomine confestim superbies? & quia iu-
 stum ex fide viuere audias, tu te quoq. continuò & iustum
 esse, & ex fide sola viuere, existimabis? & quia fides, dei do-
 num sit, idcirco tu te nulla audiēdi verbi dei cerimonia e-
 gere iudicabis? Atqui & fidem ipsam interiorem, externa
 charitate niti, & eandem lege ipsa cōmuni, ex auditu verbi
 oriri necesse est, & verbum quoq. illud, quod audiri ne-
 cesse est, prædicari quoq. necesse est, & quod prædicetur,
 id ab iis demum prædicari necesse est, qui sint missi. Hæc
 autem penè omnia, audiendi, prædicandi, mittendi nomi-
 na, ad ceremonias profectò pertinent, & sensibus ipsis ex-
 ternis diiudicātur. Nunc si quis cōmunia hæc iura omnia
 migrare, & solos illos *ἐνθροισάτω*, ad fidem animo suo cōci-
 piendā, expectare constituat, nec interim charitatis operi-
 bus incūbere, audiendīsue iis, qui diuinæ voluntatis nuncii
 atq. interpretes legitime ad nos mitti solent, vacare velit, ne
 mo pfectò nō videt, quāto se is & scelere obstringat, quòd
 vſitatam illam & cōmunem dei gratiā ingratè aspernetur;
 & exponat periculo, ne deinceps, contempta cōmuni gra-
 tia, nullius priuatæ gratiæ capax esse queat. Sed de contē-
 ptoribus ceremoniarum satis. Sunt igitur alii rursus, qui ce-
 rimonias, non iam quidem omnes in vniuersum ex ecclesia
 eiiciant, omnes tamen omninò, vnico auditus ipsius sensu
 definiant, ac circumscribūt: nec quicquam ferè in religio-
 ne, admittant, quod in eorum animos extra auditū influere
 posse videatur. Hinc est, quòd neq. templa ferè ædificent
 vlla, neq. tabulis ea & picturis instruant, neq. suffimentis
 cōpleant,

cōpleant, neq. aliis ferè rebus, quæ ad reliquos sensus aliqua ex parte afficiendos pertineant, exornent : contiones modò & cantiones quasdam retineant ; quibus aures tantum ipsas vtcumq. oblectare posse videantur. Qui profectò etiam ipsi reprehensione vacare non possunt. Primum enim si oblectationis gratia id faciunt , dupliciter mihi omninò falli videtur ; tum quòd ne assequuntur quidem id quod volunt, tum quòd etiamsi plenissimè assequerentur, non magnopere haberent tamẽ, vnde sibi magnam aliquã, aut rem, aut gloriam comparasse videantur. Ac non assequi illos sanè quod desiderant, palàm est. Etsi enim ipse, nec contionibus eorum penè interfuerim, nec cantiones in ecclesiis eorum exaudierim vnquam, quantum ex iis tamen, qui hæc nobis non solum cum fide, sed etiã cum quadam synagogarum illarum laude referre adnitebãtur, intelligi potuit, equidẽ cōtiones eorũ frigidæ planè & ieiunæ esse cōperiebã, confutas ex ineptiis puerilibus, cōuitiis petulantib. calumniis minime Christianis: breuiter Philippicas potius quàm homilias. pleraq. enim omnia ex postillis modò Philippi hausta videbãtur, gustũ doctrinæ alicuius solidioris aut elegãtioris, gustũ pietatis, gustũ etiã comitatis saltẽ & humanitatis cōmunis nō habebãt. Cantiones autẽ ipsas multò etiã frigidiores videbã esse, semisomnes videlicet totas, à somnolētis nescio qbus poëtis, furore de vino correptis, sine vlla arte aut venustate cōpositas, ab oscitātibus etiã aniculis, nō secus quàm ad fustum & linum decātatas, & omninò vtrumq. horum nulla nec sermonis suauitate conditum, nec sonorum iucunditate aspersum, nec vtilitatis deniq. fructu temperatum; sed sic in vulgus populo obtrusum, vt ipsi quidem illi auditui eorum, cui id parari videbatur, si rudes ipsi essent, nullum operæ precium reddere, sin eruditi, nauscam planè & fastidium, non oblectationem parere videretur. Non igitur planissimè quod quarunt assequuntur ; vt se rudi illo & incondito cantionumue
contionum^a

contionum uero genere oblectare vlla ratione posse videantur. Quod tamen ipsum etiam si ut vellent assequerentur, quid tum quæso referrent inde? aut quod magnum ex eo operæ precium consequerentur, quod in diuinis ipsis laudibus, nihil propemodum aliud quam oblectationem suam quærere dicerentur? Iam si non oblectandi sui causa, sed pietatis & religionis suæ exercendæ gratia faciunt, ut omnia eiusmodi, solo auditu, ut dixi, definiât ac metiantur, velim ut ad id mihi, quod breuissime dicâ, breuiter quæmaxime possunt respondeât. Cum enim deus Opt. & Max. auctor sensuum nostrorû, & omniû earum facultatû, quibus à prima ipsa nostra origine, abunde ab eo instructi & ornati sumus, omnes planè eas vires & facultates animi à se diuinitus tributas nobis, ipsumque adeò totum nostrum animum, conferri à nobis voluerit ad se amandum & adorandû: quid sibi volunt, quæso, magistri isti imperfecti nostri? cum cæteris quasi sensibus omnibus abdicatis, ab obsequio certè diuino amotis, audita tantum ipsa obtrudunt nobis? imò verius, auditum ipsum obtundunt nobis, insuauitate illa cantuum verborumque suorum, quibus nos, ad seruiendum deo viuenti factos, cæteroquin à seruitute eius auocant, & in quinta duntaxat eius colendi parte constitutos, contentos esse volunt? vel potius, deum ipsum quinta aut decima colendi sui parte contentum esse iubent? Quæcum ita se habeant, audebunt tamē isti, parum dulces musici & symphoniaci, parum etiam vehementes oratores ac concionatores, vastas illas, nec fatis in eo genere excultas suas synagogas, cum illo templorum nostrorum ornatu & splendore eximio, vlla ex parte elegantia, urbanitatis, pietatis denique ipsius comparare? Non illi, me iudice certè quidē, superiores vnquam futuri. Contendant enim quantum volēt, & se in omnes victoriæ obtinendæ partes quammaximè possunt concitent, rumpentur tamen citius, quam vlla ratione posse videantur ecclesiam sanctam adæquare.

re. quid dicam, superare? Id quod vel ex fine saltem ipso, harum, quas dico, siue contionum, siue adeò cantionum etiam ipsarum, vtrinque considerando, liquidò cognosci poterit. Quæ finis enim horariarum in ecclesia cantionū est, aut etiam esse potest, nisi laudes ipsæ dei? Quæ sacrificii, nisi placatio ipsa dei? Vtræ igitur laudes augustiores sunt? illæné, quæso, quas tu, vno aliquo certo tempore, semel, in diēne, an in hebdomada, an in mense, an in anno, an in vita, an ne hoc quidem, deo ipsi persolvas; an verò, quas ecclesia ipsa persoluat eidem, singulis non magis diebus quàm noctibus, in certa horarū spatia distributis? ex quo preces etiam ipsas appellauit horarias; horarias autem tam diurnas, ex quo vocabulum Diurnaliū; quàm nocturnas, ex quo Nocturnorū appellatio promanauit. Et illæné Dei laudes augustiores sunt, quas tu, idiotarū tuorū lingua decantes; an quas ecclesia personet, lingua ipsa omnibus occidentalis huius nostræ ecclesiæ hominibus cōmuni? In quo sanè illud inest manifesti discriminis; quòd, quisquis fortè ex quacunq. mundi regione in templū nostrum tunc venerit, cū hæc à nostris decantentur; is, si modò sit in Christianorū aut scholis eruditus, aut ecclesiis enutritus, continuò, ex illo ipso quod decantari audierit, & Christianos nos esse agnoscat, & deū ipsum, lingua Christiana sibi nō ignota à nobis adorari, sine vlla cunctatione pronunciet: cū interim idem ille, in vestra illa vestrarū abominationū templa ingressus, euestigiò ex dissonis sonis illis, & inconditis vestris cātibus ac numeris, aut barbaros vos esse, & tantum nō musto madere, deputet, aut certè, quid vobis tandē velitis, planè nesciat: quorū idiotismum illū, à paucis omninò, idq. vicinis tantum ipsis vestris, aliqua ex parte intelligi intelligat. Et illæné dei laudes illustriores sunt, quas tu tibi, tuusue ille nescio quis, nuper natus, nuper excogitauit, & nuper in synagogas istas vestras inuexit; an quas ecclesia ipsa à LXX. viris de Hebræo sermone dudū cōuersas

iam

iam inde ab Apostolorū ferè tēporibus sibi adsciuit, & in
 suis sacris vsurpauit? Et illæné, quas vos, in illo vestro, deser-
 to & profano, omnibus certè rebus sacris vacuo prorsus &
 inani tuguriolo, vtcunq. decantatis; an verò, quas ecclesia
 ipsa nostra, in illis suis augustis, & vt sic dicā, ritè effatis ac
 legitimè consecratis templis ipsis, in ipsa illa, dico, sacrofan-
 cti corporis & sanguinis Iesu Christi præsentia visibili, &
 maximè exoptata, qua omnia tēpla catholica mirificè ho-
 nestantur, suscipit decantandas? Et illæné, quas vos homi-
 nes, à charitate, à religione, à fide, à deo auersi, profani planè
 & vt plurimum, ab omni diuinæ prouidentiae sensu soluti,
 reddere vos deo existimatis, si modò id quoq. existimatis;
 an verò, quas ecclesia ipsa, benigna & fidelis mater nostra,
 & Christi dilecta sponsa, magno animo & spe certissima
 cōcinit? & vt leuissime dicam, quas viri sacrati ipsi, quotidie
 tanquā pensum solent, pro munere officioque suo, domino
 deo persolvere? Atq. hæc ferè de prece & cantu, nostro ac
 vestro simul. Quid dicā de vtriusque sacrificij gratia & di-
 gnitate? cū vos sanè sacrificiū nullū neq. habeatis, neque
 habere cupiatis? Sed fingamus tamen habere. Liberæ enim
 sunt cogitationes nostræ, Vtrū tu igitur sacrificiū deo esse
 acceptius existimas? tuūne illud, quod nullum est; an
 verò hoc ecclesiæ nostræ sacrificium augustissimum, de
 quo olim æterni patris vox clara intonuit, & in eo com-
 placitum sibi esse, memorabili illo edito oraculo, respon-
 dit? Hic est filius meus dilectus, in quo mihi complacui.
 Vtrum tu, inquam, deo ipsi placando sacrificium gratius
 esse censes, tuāne illam cœnam, nullis planè arcanis my-
 steriis commendatam, sed totam in vulgus sic proiectam;
 an verò nostrum hoc potius sacrificium, ex cœlestibus ac
 diuinis mysteriis conflatum, atque, vt videmus, arcanum
 planè totum? Et vt profusius etiam aliquanto loquamur.
 Tuūne tu illud nescio quid, deo ipsi esse dices charius,
 quod diabolus ipse, cū ad te aliquando, nocte, vt scribis,

concubia diuertisset, & in catholicum hoc sacrificium nostrum, quod tu ibi priuatam Missam appellas, acerbius quoad vellet inuectus esset, insusurrauit tibi; an verò nos, maiore cum ratione Missam hanc ipsam nostram deo esse placando aptiorem asseuerabimus, quam Christus dei filius verbis illis, Hoc facite in mei commemorationem, instituit; quam Apostoli, domino cooperante & sermonē eorum confirmante, promulgauerunt; quam deus deniq. ipse signis multis consequentibus cōprobauit; & quam ipsam adeò, nemo bonus improbauit, nisi eclogarius ille quotidianus tuus, & facundus congerro diabolus? Qui cum iam inde ab initio ita factus esset, vt Christum dominū adorare necesse haberet, iubente scriptura. Et adorent eū omnes angeli eius; & olim tamen, in illis Iudææ desertis vtrò se ipse ab eo carne conuestito voluerit adorari; cū diceret, Hæc omnia tibi dabo, si procidens adoraueris me: & deinde apud te, in vestris illis horribilibus noctium intemperatarum conuiujs atq. sermonibus, ausus est aduersus hoc sacrificium sanctum, impurum os suum, te vno auditore fretus, aperire, eiusq. adeò impietatis, & in sacrificium ipsum diuinum blasphemiae execrandæ, auctorem se profiteri; quod non vlla alia creatura, non, ne tu quidem ipse, qui toti mundo os oblinere non dubitauisti, ausurus vnquam esse, nisi hoc vno auctore fretus, videbare. Sed de cantibus & sacrificijs satis. Quid? contionum ipsarum tractatione, poteritne à vobis ecclesia nostra adæquari? Finem obsecro ipsum contionum obiter inspiciamus. Quem igitur alium finem esse dicemus contionum sacrarum, nisi doceri primū, deinde verò etiam suaderi ad iustitiam & incendi? Paulus hoc Apostolus duobus in locis egregiè videtur expressisse. Altero, cū inquit. Omnia quæ scripturis
» facis continentur, tum ad doctrinam pertinere, tum verò
» ad patientiam & consolationem: Altero autem, cū scribit discipulo suo, Scripturam omnem ab altera parte tum
ad fi-

ad fideles docendos, tum ad infideles arguendos valere; *hæreticar.*
 ab altera autem, tum ad ea quæ praua sunt corrigenda ac
 emendanda, tum ad ea quæ difficilia & ardua sunt, homi-
 nibus persuadenda. Primùm igitur; vtri docent rectius,
 quæso? nostrine, qui à recta ipsa docēdi & instituēdi ratio-
 ne, orthodoxorū nomen meruerunt? an vestri potius, quos
 Apostolus à peruersa & præpostera eorum doctrina, &
 subuersos ipsos esse ait, & subuercentes appellat? Vtri dein-
 de mouent ac incendunt efficacius? Vestrine illi, quorum
 contiones supinis ac oscitantibus auditoribus plenæ sunt;
 vbi nulla commotio nec animorum, nec corporum; vbi
 nemo hominum neq. ad peccati dolorem satis concitatus,
 neq. ad spem veniæ satis erectus, neq. timore gehennæ, vt
 par est, concussus, neq. adeò gaudio vitæ sempiternæ cum
 aliquo sensu lætitiæ perfusus vnquā est? vbi tantum abest
 vt cuiusquam animus inflametur, vt ne corpora quidem,
 somno ac tædio illius contionis affecta, possint excitari;
 breuiter vbi omnia ita frigeant, & in re, & in actore, & in
 spectatore ipso, vt demptis epiphonematis & conuitiis illis
 in Papam & Papistas, quibus contiones illæ nimio plus a-
 bundant; dempta etiam illa, si diuis placet, doctrina vestra,
 patribus ipsis nostris inaudita, & tota ad seditionem com-
 parata; ne verbum quidem de his audiuissemus vnquam.
 Hās ne tu igitur vestras contiones, illis nostrorū hominum
 contionibus antepones? in quibus nos ipsi multorum ora,
 modò timore pallere, modò rubere pudore, & modò la-
 chrymis ipsis affatim profluentibus rigari, sæpe vidimus: in
 quibus crebra multorum suspiria notauimus, frequentes
 gemitus notauimus, multas oris, multas pectoris percus-
 siones notauimus: interdū verò etiam; tanquam in publi-
 co funere complorationes animaduertimus. Quid præte-
 rea? Vestrine obsecro isti, pro contione, mouebunt aut in-
 flamabunt quenquam ardentius, ex quorū maximè inertī
 & frigida disciplina, illiusmodi fæces hominum profluxe-
 runt,

runt, quales & primo ipso eorum librorum nostrorum, ubi de sanctitate ecclesiæ catholicæ, & prauitate non catholicæ disputauimus, descriptos & adumbratos vidimus; & nunc hoc ipso infelicissimo sæculorum tempore, inter vos, atq. adeò iam etiam quodammodo inter nos, contagione morum istorum ac institutorum vestrorum contaminatos, reipsa experimur? an verò nostri potius, ex quorū contionibus atq. institutis, tanquam ex equo scilicet Troiano, innumeri principes, singulari morum atque vitæ præstantia commendati, prodierunt? multi, quorum vita antea penitus erat à deo auersa, ad deum sunt conuersi. ex quibus postea pleriq. nouam planè vitam inchoarunt: qui propterea Incipientes sunt appellati; alij etiam id quod bene inceperunt, melius indies sunt profecuti; qui sunt dicti, Proficientes: nonnulli autem quoque in eo stadio vsque eò sunt progressi, vt quantum maximè vita hæc nostra perfectionis capax esse potest, à perfectione ipsa non longissimè abesse viderentur; qui etiam ex eo Perfectorum sunt nomen & existimationem in ecclesia sanctorum consecuti. Quæ vobis quidem, hoc tempore vix nominibus saltem ipsis cognita esse videntur: nobis, ieiuniorum ipsorum, humicubationum ipsarum, ciliciorū, flagrorum etiam sponte susceptorum austeritate, & deinde eleemosynarum ad profusionem vsque largiendarum abundantia, precum denique & obsecrationum ad deum allegandarum frequentia & feruore, in ecclesia nostra, magnopere sunt, an fuerunt potius, antequàm vos venissetis, & nouis vestris contionibus, nouum religionis & pietatis genus inuehere in orbem cœpissetis, commendata. Habes de vocalibus

hæreticorum ceremoniis, ad mutas

ipsas veniamus.

CAP. V.

Hæreticorum templa, festa, ceri-
monia mutæ.

Hæretici nulla ipsi templa ædificant.

Locus Actor. Deus in manufactis non habitat.

Euang. Neque Hierosolymis neque in monte hoc, sed in

Hæretici templa ab aliis ædificata non ornant. (spiritu & veritate

Id faciunt tum contra officium suum.

Locus Psal. Domine dilexi decorem domus tuæ.

tum contra timorem diuini numinis.

Locus Euang. Domus mea domus orationis vocabitur.

Exempla duo recentia, de vi templorū & ceremoniarū catholicarū.

Obiter de ceremoniis baptismi catholici.

De festis & calendariis hæreticorum.



Voniam igitur de ceremoniis hæreti-
corum, tum in genere de omnibus,
tum in specie de vocalibus, fatis, capi-
te superiore dictum esse videtur, iccir-
co hoc loco nec de his agemus quic-
quam amplius, nec de illis; agemus ve-
rò de mutis tantum, idque etiam sic,
vt à templis ipsis eorum, sermonem hūc nostrum auspice-
mur: si qua modò ratione, templa eorum aut esse possint,
aut appellari, quæ, nec vlla sanè ædificantur ab ipsis; & quæ
ab aliis ædificata sint, ea ita deformantur, vt nullum pror-
sus in eis, aut perquam exiguum, templorum vestigium
cerni ac spectari posse videatur. Docebo vtrunque suo or-
dine. Nostri enim, ad Centurionis illius, quem dixi, imita-
tionem, templa sæpe multa, & quidem augusta admodum
atq. magnifica, multis in locis erexerunt, multos etiam qui
ea erexissent, dotauiissent, ornauiissent, sæpe ac multū lau-
dauerunt, in cœlum denique ipsum studiis & voluntati-
bus

bus suis sustulerunt. Plenæ sunt passim catholicorū regiones & ciuitates, pleni pagi agrique ipsi, plena oppida, plena compita, plena deserta etiam atq. ab hominum frequentia remota, loca multa; plena, inquā, tum tēplis ipsis, tum corū quoq. hominum laudibus atq. encomiis, qui ea primi aut fundauissēt, aut decorauissēt, aut locupletauissēt. Excutite annales regnorū, repetite memoriam rerumpub. Vix quicquā certius nominibus eorum cognoscetis, qui ædem, qui templū, qui fanum, qui sacellum, qui oratoriū deo Opt. & Max. vspiam posuissent. Hæc nostri: Isti autē, quos nulla, ex virtute vera petita laus accēdit, nullum exemplū mouet ad pietatis proditum imitationem, nullus vsus ad æmulationē prouocat earum rerum quæ auctori ac conditori nostro deo deberi videātur: nullum sanē per hæc omnia infaniæ suæ & loca & tempora, templū, vel ligneum saltem, aut cespititium, vel cubitale tantum aut palmare, extruxerunt: aut si extruxerunt, dicant id apertē quæso, nec nos diutius in tantarum rerum ignoratione versari patiantur. Sed nimium est, sacrum requiri à profanis. Dicant igitur vel illud interim, quot domos saltem profanas, ad hanc suam superstitionem, vel exercendam, vel tradendā, siue ipsi exædificauerunt, siue ære saltē suo comparauerunt. Vnam fortassis ex omni nostra memoria, aut alteram, profanam domum proferre possunt, quam, non illi quidem ædificauerint, sed à catholicis profanis hominibus, ad profanos vsus ædificatam, emerint ipsi, & ad suas deinde religiosas illas profanitates conuerterint: sacram certē deōue dicatam ædem eorum sumptu, aut exædificatam ad eam rem, aut saltem fuisse vnquam comparatam, vix reperiemus vllam. Alienis illi & sumptibus & laboribus, ad suam libidinem & amentiam & furorem abutuntur; & totum illud erraticæ opinionis suæ virus, ex emendicatis priuatorum quorumcumque ædibus, aut certē ex direptis ac ereptis templis ipsis nostris, olim ad nostram & tuendam & conseruandam

uandam & propagandam catholicam religionem, à maioribus nostris excitatis & consecratis; nunc eheu ad istorum blasphemias & execrationes deformatis & profanis factis, eructat ac erumpunt. Tanta est fucorum istorum ignauia, non in domos utique suas alienos labores conuehentium, sed in ipsis planè alienis præsepibus eos deuorantium. Atqui in media eiusmodi impietate sua, etiam faceti scilicet esse ac videri cupiunt; verba illa scripturæ sanctæ perperam à se repetita, peius etiā vsurpantes, quibus ille ipse excelsus ac præpotēs deus, cuius sedes cœlū est, terra autem scabellum pedū ipsius, neq. in manufactis habitare, neq. aut Hierosolymis, aut in monte illo Samaritanorū proprio, sed in spiritu tantū & veritate, rectè adorari, dicitur. Quibus planè verbis ipsis, cum videant deum ipsum, per omnem rerum naturam intentū & commeantem, & in omnibus vigentem ac relucens, nullo certo loco, neq. mansionem ipsam suam, neque adorationem quoq. sui, concludere omninò voluisse, periniquè sanè faciunt, cum illum aut nusquam esse, qui vbique sit, aut nullo in loco adorari debere, cuius gloriam tellus vniuersa cœliq. adeò ipsi plenissimè personare videantur, existimari volunt. Cum verò audiant, spiritu ipsum & veritate coli velle, eāne de causa ipsi, nullū ipsius colendi locum extare volent? nullum ipsi extruere cupient? nullum ab aliis extructum, æquis oculis aspicere sustinebunt? O pietatem hominum insignē, ô acumen eorum singulare. Patet igitur quod volumus, templa ab iis ædificari nulla, eludi omnia. At dices. Illa tamen quæ ab aliis ædificata essent, omnibus rebus ad ornatum instrui ab istis ac perpoliri. Quis est quæso parasitus hic tantus, qui hæc sibi tam turpiter imperauerit assentari synagogis istorū, in quib. præsertim synagogis omnia sine ordine, sine decore, sine imagine, sine vlllo denique dei signo atq. vestigio sic relictæ ab iis esse conspiciat, ut aræ etiā ipsæ, sanctissimæ ibi quæ erant, quasi haræ ab istis factæ, templa verò in stabula

bula propemodū alta ferarū, & tantū non in speluncas
latronū commutata esse videantur; nulla penē neque of-
ficii illorum, neq. adeò diuini metus ipsius habita rationē.
Videamus enim hoc loco, quæso, quantum in hoc genere
Dauid ipse rex & propheta, distare voluerit officiū suum, à
more & cōsuetudine istorum. Qui postquā acerbissimo
illo, vt antè diximus, aduersus malignantium ecclesiam
concepto odio, altare ipsum domini, arctissimè se esse dixit-
set, præ illa scelestorum hominum colluione, complexu-
rum, consilio quidē, quod statim ibidem sequitur, audiendi
vocem laudis, & enarrandi vniuersa mirabilia dei; protinus
animo alachri & læto, & ad id quod dicturus est erecto
planè ac incitato, exclamat, illud quod nō ignoramus. DO-
MINE DILEXI DECOREM DOMVS TVAE, ET LO-
CVM HABITATIONIS GLORIAE TVAE. Sic enim
loquitur vir, non ad istorum scilicet modulum, in piis ac
salutaribus animi exercitationibus versatus. Tu nosti, in-
quit, pater summe, quā mihi cordi semper fuerit decus
& ornamentum omne sacratissimi fani tui: quòd eo qui-
dem loci residere mihi videretur, singulari quadam & pe-
culiari ratione, laus & gloria ipsa nominis tui sancti, Dile-
xi, dilexi decorem domus tuæ. Nec verò cum decorem di-
lexit tantū, sed etiam & eximiū, & splendidum, & omni-
nò in omni genere excellentem, animo suo habuit impres-
sum & obsignatum. Descripturus enim aliquādo elegan-
tiam illam, & quasi mundum muliebre earū fœmina-
rum, quæ in beata & bene lauta domo atq. familia procre-
atæ, quasi ad pompam educantur; ab ipso fanè templi orna-
tu, descriptionis illius similitudinem mutuari non dubita-
uit. Filia, inquit, eorum vndique ornata ad similitudinem
templi. Vt ita apertissimè ostenderet nobis, templa ipsa
diuina singulari quadam & excellenti ratione, ornari o-
portere: quæcunq. verò tandem sint ædes illæ, quæ ornatū
aut nullum habeant, aut quotidianum non excedant, eas
non

non rem, non nomen, non deniq. templi ipsius similitudinē
vlla ratione tenere posse. Atque hæc quidem Rex & prophe-
ta Dauid. Isti autem tanto Dauide inferiores, ad officiū pro-
fecto suū minimè pertinere arbitrantur, quid templis ipsis
fiat, omniq. adeò ornatu ac cerimoniais eorum; & omninò
quicquid de templis ipsis, deq. eorum cultu ac ornatu dici
audiunt, id totū futile prorsus esse ducunt; imò si qua tem-
pla ab aliis ædificata sunt, ea non ornant; si qua ornata, &
donis vasisq. necessariis instructa, ea despoliant; & sic omni
decore nudata vel negligūt prorsus, vel in prophanū planè
vsum adducunt. Quod cum faciunt, non iam mihi solū
officij sui, vt dixi, sed etiā eius qui deo debebatur timoris,
planè obliti esse videntur. Quid enim dicant, aut quid a-
gant, quæso, si eundem illum dominum Iesum Christum,
quem olim Iudæi semel atq. iterum, ob eandem hanc cau-
sam, minaciter ad suas ipsorum scapulas funiculis fenserūt
perstreptem, ipsi nunc quoq. tertium sentiant? vetus illud
elogium, denuò magna cum animi sui libertate depromen-
tem, & maxima vocis contentione in ipsos detonantem.
DOMVS MEA, inquit, ò hæretici, DOMVS MEA, DOMVS
ORATIONIS VOCABITVR. Domus orationis vocabi-
tur: erat igitur vestrum, inquit, in hac orationis domo ora-
re potius, quàm quod penè dixerim, arare; & domū ipsam,
quæ mea esset, modis potius omnibus ornare, quàm in ea
tam fœdè errare, vt inter hanc, & domum quamlibet pro-
fanissimam, nihil admodum interesse videatur. Atque hoc
sanè ita vestrum erat, si modò aut officiij vestri ratione du-
ceremini, aut nominis deniq. mei, siue beneuolentia tene-
remini, siue verecundia vlla. Vos autem perditi homines &
profligati, domo ipsa mea, quæ orationi potissimū erat
dedicata, abuti non dubitauistis, pro antro ferarum & spe-
lunca plusquàm prædonum ac sicariorū; quorum crudeli-
tas omnis, in exagitandis modò ac diuexandis corporibus
consumitur; cum vestra immanitas, ne animorum quidem
Mm ij ipsorum

ipsorum peste atq. interitu possit satiari. Ad quas profectò domini voces tam horribiles, quid isti quæso dicerent, aut quò se tandē verterent, si hæc eiusmodi tela aduersum se à Christo domino vibrari, & quasi fulmina verborū, magna vi animaduerneret cōtorqueri? Nisi si fortè illud expectent, verbo nihilo mollius, suis verò ipsorum fœdis factis etiam dignius. ITE MALEDICTI IN IGNEM AETERNVM, QVI PARATVS EST DIABOLO ET ANGELIS EVS. Ostendi igitur, nec tēpla à bonis istis viris ædificari vlla, nec ornari, nec quæ pro templis, ab ipsis habeantur, templa posse vlla ratione deputari. Quo minus sanè miror, annis paulò superioribus, cuidam propinquo meo, homini catholico vsu euenisse; qui puer etiamtum, cū fortè fortuna in istarum hæreticarum synagogarum vnam, ex priuatis ædibus deformatam, cerimoniis cassam, inornatam etiam de more & incomptam, & omninò templis catholicis, quibus ille assueuerat, dissimilē, fuisset præter spem suam derepente, ab istis hæreticis introductus, interrogatus ab iis, quid illi templum, in quo astaret, templique illius rationes viderentur. Quas, malum, rationes, inquit, aut quod templum narratis mihi? Nam hic quidem vbi sum, in caupona verius quàm in templo versari mihi videor. Apage te cum templo vestro. Et continuò se proripuit foras. Quem eiusmodi pueri quasi diuinitus afflati sermonē liberum, magnus euestigiò multorum ex illo cœtu, tam virorum quàm mulierū, qui tum fortè visendi gratia eò cōuenerant, nō solū applausus, sed etiā repens ex synagoga illa discessus est consecutus. Contrà autē æqualis meus quidam qui paulò antè in domino iam obdormiuit, cū in illo hæreticorū luto, totus, à multo tempore hæsisse videretur, hoc sibi ferè principium explicandi sese, & ad veram antiquæ religionis viam reuertendi fuisse, scribit, in exponenda illius consilij sui ratione, quòd templa catholica adire, ceremoniisque catholicorum sensim ac paulatim, quamuis

quamuis ab initio quidem non satis ex animo, interesse & communicare incœpisset. Quod deinde incœptum suum, ad ipsum vsque vitæ suæ exitum constantissimè vrsit ac tenuit; exitumque illum suum, catholicis ipsis cerimoniis, sub extremum vitæ finem, more maiorum vsurpandis, maximo animo, frustra obnitentibus hæreticis obsignauit; homo cœlo dignus. Cuius ego ipsius, cum hoc loco in mentionem inciderim, vbi agitur de ceremoniarum ratione, libenter sanè hîc apponam sermonem quendam meum, quem mihi aliquando, de baptismi ipsius catholici ceremoniis, cum illo intercessisse memini: qui sermo ipse haud scio an occasionem etiam illi aliquam dederit, illius quasi post liminiò reditionis eius, ad ecclesiam nostram, pridem ab illo relictam ac neglectam. Quod ipsum hoc etiam magis necessariò facere videbor, quòd ea res hæreticorum reprehensioni, aliqua saltem ex parte satisfactura esse videatur; qui ceremonias mutas, nec adhibent ferè ipsi ad sacra sua, nec à nobis dicunt necesse esse adhiberi. Sic igitur ille olim. Memini te aliquando, inquit, in nobili illa actione tua, cum filium viri præstantissimi, ad sacrum fontem, pro tuo præbyteri officio, aqua baptismi esles perfusus, obiter, antequam ad opus ipsum accederes, rege ipso præsentem, copiosè admodum differere, omnes illas, quibus tum ipse vtebare, baptismi catholici ceremonias sacrosanctas, eò potissimum pertinere, vt eis, vis ipsa & ratio baptismi penitior vniuersa, luculenter planè expressa esse videatur. Què ego tunc sermonem tuum, inquit, cum & ex oculis omnium in te vnum magnopere coniectis, & ex gratissima illa admurmuratione, satis approbari ab omnibus animaduertim, ipse qui longius astant, non omninò exaudierim, peto à te hoc tempore, vt ea mihi ipsa, quæ dixisti, iteres; & quid in vniuersum de ceremoniis illis sentias, liberius aliquanto depromas. Atque ego ibi statim, ἀνευ πάλιν quod dicunt. Baptismum, inquam, ipsum scis esse

esse à Paulo Apostolo vocatum lauacrum regenerationis. De quo ipso, est etiam illud Christi ipsius domini ac saluatoris nostri, ad Nicodemum. Nisi quis renatus fuerit, inquit, ex aqua & spiritu sancto, nō potest ingredi in regnum dei. Est igitur, quod vides, baptismi ipsius vis & ratio penitior, regeneratio ipsa. Quod cum ita sit, equidem ecclesia ipsa, quo verbo interiorē ipsam baptismi vim & facultatem, intelligit diuinitus adumbratam esse & expressam, id ipsum ut ipsa quoque, exterioribus suis in baptismi ipsius actione, ceremoniis usurpatis, exprimat atque repræsentet, vniuersamque illam intimam baptismi sancti vim ac rationem, quæ regenerationis est, quam maximè explicet, maximè mihi elaborare videtur. Cuius ego consilium in hoc genere, ita tum mihi in illa, quam adesse cernebas, corona, videor exposuisse.

Cum regeneratio ipsa, auditores, dicebam, atque adeo cum vocabulū ipsum regenerationis, duo mihi præcipua continere videatur: vnum, prioris cuiusdam generationis abolitionem, & mortem denique ac interitum quasi quendam (prima enim generatione manente, secunda sequente minimè ferè esset opus) alterum, destructæ illius & extinctæ iam atque abolitæ generationis prioris, restaurationē rursus ac reparationem quandam. (Nisi enim id quod extinctum & abolitum erat, repararetur ac instauraretur, certè extinctum illud & abolitum, neutiquam videretur regeneratum.) Cum hæc, inquam, ita se habeant, hoc agit modis omnibus ecclesia magistra nostra, ut vtrumq. hoc, ipsis baptismi sui ceremoniis, primū in sensibus, deinde autem multò magis in animis fidelium repræsentet. Primū igitur prioris generationis illius, qua filij iræ procreamur, abolitionem, illo mihi arcani cuiusdam sermonis genere, ad aures nostras palam adhibito, satis exprimere videtur, cum conceptis verbis præire solet nobis, in illa ipsa baptismi cerimonia sacrosancta; ut Sathanæ, peccati auctori renunciemus;

nunciemus; ut pompæ eius renunciemus; ut operibus & actionibus ipsius omnibus renunciemus: Quæ cum facit ecclesia, satis planè ostendit, homines baptismo ablutos, mori peccato, mori carni, mori mundo, mori diabolo, mori illis, quibus ipsis incurritur ira & offensio dei magni, actionib. eorū: hoc autem est, aboleri planè in iis generationem illam priorem, peccato inquinatā. Deinde autem, post hanc prioris generationis ad eū modum abolitionem factā, auspicatur deinde ecclesia restorationem quādam, eius ipsius abolitæ generationis. Quæ ipsa restauratio est veluti noua vita quædam; cum reiecto atque abiurato veterere domino, qui nos preffit iugo cuiusdam seruitutis sceleratæ, nouo nos domino ecclesia addicit, ei que fidem nostram deuouet: dum nos illis secretioribus verbis, illo mystico & mysteriorum plenissimo adigit sacramento. Credisne tu, inquit, in deum omnipotentem, patrem, filiū, spiritum sanctum? Quasi dicat ecclesia. Spondesne tu ac promittis, fidem tuam integram & constantem te esse ad mortem usque seruaturum, ei ipsi domino, cui te ego hoc tempore addico? & cui ipsi tuam seruitutem honestam ac liberalem despondeo? deo, inquam, patri filio & spiritui sancto? Ad eam autem interrogationem dum respondemus, Credo: vel, volo: iam tunc nouam vitam, apud nouum dominum, vel voto saltem ipso auspicamur; priori vitæ illi aduersam planè atque contrariam. Atq. ita duobus illis ritibus in speciem humilibus, explicat ecclesia quàm breuissimè, totam ipsam interiorem vim & rationem baptismi ipsius sacrosancti: quæ est Christianis hominibus firmiter tenenda, & cogitatione etiam atque etiam identidem repetenda. Sed quoniam id officium, cum & renunciare Sathanæ, & in deum iubemur credere, soli inter sensus auditui, præstare videtur ecclesia, & quidem vocali potius ceremoniâ ipsa quàm muta, iccirco deinceps, aliis etiam sensibus pro rata parte cōsulere in hoc genere cupiens, ad alias se

as se multò plures, omnibus iam sensibus communes, sed
mutas quodammodo cerimonias conuertit. Et cum vide-
at, totum illud regenerationis sacramentum reconditum,
duabus potissimū rebus à Christo domino esse definitum,
aqua & spiritu sancto (dicente domino. NISI QVIS RE-
NATVS FVERIT EX AQVA ET SPIRITV SAN-
CTO, NON POTEST INTROIRE AC NE VIDERE
QVIDEM REGNV M DEI) quarum rerū vtraque eius-
modi est, quæ ambas illas, quas dixi, regenerationis partes,
tum vetera demoliendi, tum noua instaurandi, cōpræhen-
dat. (Nam vt aqua, & abstergendis maculis apta est, & cor-
pori simul reddendo nitido idonea; sic spiritus ipse, & com-
pūctionis ipsius spiritus est, vetera ita demoliens, vt qui vi-
dent non videant; & fortitudinis spiritus est, qui sanè ita
noua instaurat, & ita infirmitates nostras adiuuat, vt cum
adsit, magna cum fiducia ac fructu animorum nostrorum,
& dominum Iesum pronunciare, & deum ipsum Abbam,
hoc autem est, patrem appellare non vereamur) Cum hoc,
inquam, vtrumque videat ecclesia, vtrumq. sanè in baptis-
mo, ad exprimendā melius ipsam regenerationis rationem
retinet, & aquam, & spiritum ipsum sanctū. Cæterum cum
eorum ipsorum alterum tantum sensibus subiectum esse
intelligat, (ea autem est, aqua ipsa) alterum autem, qui est
spiritus sanctus, sub sensum cadere non posse perspiciat;
maiores autem multò spiritus ipsius vim esse, sine aqua,
quàm aquæ sine spiritu sentiat; iccirco id vnicè dat operam,
vt, cum mysterium ipsum regenerationis, ægrè admodum,
hominibus animalem vitam viuentibus (sic enim eos in-
terpretor, quos scriptura Græco verbo *ψυχινους* appellat, eos
scilicet, qui vix quod vident credant) persuaderi posse existi-
met spiritumq. adeò ipsum, vt dixi, nec præsentem attrecta-
ri, nec vnde veniat videri, nec omninò qui sit, vllò sensu per-
cipi posse intelligat, homines etiā iis rebus quæ sub sensus
nō cadant, parū admodū permoueri videat; præterea autē
omnium

omnium interesse magnopere iudicet, myſterium illud regenerationis, quod baptiſmo ipſo conficiatur, non modò perſuaſum, ſed etiam quàm ſœpiſſime haberi meditatum; illud, inquam, faciendum ſibi eſſe exiſtimat, ut ad aquæ ipſius elementum illud viſibile, in baptiſmi ipſius cerimonia fideliter retentum, complures alias viſibiles, in locum ſpiritus ipſius inuiſibilis, ceremonias ſubſtituat, quibus id quod intereſt, baptiſmum ſcilicet veram eſſe in aqua ac ſpiritu regenerationem, & ſenſibus efficacius imprimeretur, & ex eo, animis etiam ipſis hominum tenacius infigeretur. Quæ ſunt autem eæ ceremoniæ, quæſo? Animaduertite obſecro, dicebam; & quàm ſint ad partus ac generationis ipſius imaginem exprimendam peraccommodatæ, cognoscite. In quo ipſo velim hoc loco pauliſper vobiſcum memoria repetatis, idem illud quod aliquando D. N. Ieſus Chriſtus, de muliere parturiente, uſurpandum ſibi eſſe exiſtimauit, dum ita diceret in euangelio Ioannis. MULIER, inquit ille, CVM PARIT, TRISTITIAM HABET, laborem habet, anxietatem habet. Illam igitur mulieris parturientis triſtitiam, anxietatem, laborem, cum hoc labore, anxietate, triſtitia conferte, quam ceremoniis ſuis imitatur & exprimit eccleſia noſtra, baptizando: ut eam videlicet parturire, tanto facilius, ex iis ceremoniis, quaſi quibuſdam certiffimis indiciis, poſſitis cognoscere. Quid enim non facit eccleſia, in illa baptiſmi cerimonia ſacroſancta? dum ſe ante omnia, in perſona hominis ſacerdotis, pro foribus templi conſtituit, & in angulum veluti quendam abdit ac retrudit. Qui quidem ſacerdos eo loci, ſtat & demittit ſe; accedit & recedit; genua ponit & reſurgit; ſequè in omnes quaſi partes vertit: dum eum qui baptizandus eſt, exorcizando alloquitur, dum exufflat in eum, dum ſputo ipſum linit, dum crucis ſigno frontem, os, pectus illius terit, dum aures & nares illius aperit, dum eadem de re toties ipſum rogat, & omninò conqueſcere non patitur: dum eum nunc manu

Nn

attrectat,

attrectat, nunc stola operit, nunc sale condit, nunc aqua aspergit, nunc luto quasi macerat. Atque idem ille ex vestibulo deinde illo, ad fontem baptismi progressus, nunc vestibus baptizandum expoliat, nunc oleo perungit, nunc aquæ immergit, nunc hoc, nunc illud cum eo agit. Ecquænam puerpera, Christiani quæso, dicebam, tot tam mirificos gestus, in suorum partu liberorum vnquam edidit, quot & quàm mirificos solet, vt videtis, quotidie edere ecclesia hæc sancta mater nostra, ad baptismi sui solennitatē? Quid ita, quæso? illa maximè, vt videtur, de causa; vt speciem, imò vt spiritum ipsum generationis atq. partus illius interioris, oculis suorum fideiū, quantum maximè potest, repræsentet; mentesq. eorum in certa regenerationis spiritualis fide, constituat ac confirmet. Et hæc quidem illa, dum parit. Quid, vbi pepererit? id autem est, vbi baptizauerit? Idem videlicet hic quoq. facit quod puerpera. Sic enim de puerpera, idem ille Christus dominus, eodem in loco illo. Eadem, inquit, illa mulier, quæ in partu ipso tristitiam insignem præ se tulit, vbi pepererit, non iam amplius meminit priorū illarū suarum angustiarum & dolorū; sed effunditur nescio quomodo gaudio, quodam singulari, & se ad nouā quandam hilaritatem cōponit, eò quòd hominē cernat natum esse in mundum. Cōsimilē igitur ad modū mater nostra ecclesia sancta, vt primum nos deo ipsi peperit; ablutos aqua ipsa in nomē patris, & filii, & spiritus sancti, euestigiò gestus illos angoris cuiusdam & quasi perturbationis plenos relinquit, eorumq. planè obliuiscitur; pro quibus ipsis, tota in gaudiū quoddam conuersa, & aliquot insignia verba præfata, induit nos cōfestim veste illa pura atq. alba, verbis illis vtens maximè efficacibus, & perpetua memoria dignissimis. ACCIPE, inquit, VESTEM HANC CANDIDAM, QVAM PVRAM ET IMMACVLATAM PERFERAS ANTE TRIBVNAL IESV CHRISTI DEI TVI. Quid aliud? Etiam. Tradit accensam lampada in manus nostras, suæ illius lætitia

titiae monumentum; quòd videlicet hominem peperisse se per baptismum intelligat, non iam mundo, aut carni, sed vitæ ipsi beatæ atq. immortalis. Et, ACCIPE, inquit, LAMPADA ARDENTEM ET INEXTINCTAM, QVA CVM POSSIS DOMINO IPSI AD NVPTIAS VENIENTI MATVRE OCCVRRERE; ET CVM RELIQVIS SANCTIS EIVS, IN AVLAM ILLAM COELESTEM RECIPI, VBI PERPETVA QVAEDAM LVX EST, IGNARA TENEBRARVM ET NESCIA OCCASVS. Hæc ferè tunc ego, inquam, in corona illa ad templi possem. Nisi quòd ad extremum, duo ferè addebam verba illa. Liquere omninò ex iis quæ dixi, causam non esse, mea sententia, cur cerimoniis tantorum mysteriorum plenissimis, ab hominibus salutis suæ minime inimicis obstrepere videatur; quod ipsum hodieq. ab hæreticis fieri videmus. Atque hætenus ego sanè cum bono viro illo; quæ mihi hoc loco causam cerimoniarum catholicarum defendenti, non immeritò interferenda videbantur.

Sed nos ex hoc longiusculo quasi quodā interuallo, ad intermissa redeamus, & quod ex propositis tribus ecclesiæ catholicæ ordinibus, videtur etiam superesse, tertium porrò illum malè conciliatum hæreticorum ordinem, qui in temporibus est, excutiamus; ac festa ipsa eorum parū fausta, cum festis catholicæ ecclesiæ comparemus: vt videamus tandem, rerumne duntaxat & personarum cerimonie fallunt hæreticos, an verò temporum etiam rationes apud illos ita sunt institutæ, vt nostro in hoc genere catholico ordini admirabili æquiparari nulla ratione posse videantur. Principiò enim, temerariis ipsis ausis suis, vix vllū festorum atq. profestorum discrimen dierum videntur in ecclesia reliquisse: deinde autem, totum illum ordinem, qui in ipsis rectè ac ritè descriptis ac dispositis, ecclesiæ catholicæ fastis & calendariis, luculentissimè hætenus conspiciebatur, ita videntur conturbasse, vt qui eos sequantur, non amplius in

Christi Iesu recenti ac vigenti ecclesia, sed in illa dudum iam obsoleta & vieta Mosis ipsius synagoga, versari etiamnum videantur. Pro Christi enim Dei nostri feriis, quibus apud nos, memoria veræ redemptionis, liberationis, iustificationis & sanctificationis nostræ, per ipsum partæ, iugi atque perpetua anniuersaria ecclesiæ quasi recordatione renouatur, Iudaicas nobis res gestas, verarum feriarum nostrarum figuras & imagines obsoletas, ac sine Christo non solum inanes, sed etiam pestiferas, reponunt. Deinde verò pro antiquis nobilissimorum martyrum nominibus, qui nobis fidem ac religionem Iesu Christi, & verbo, & re, & vita, & morte, & tum prosperis ipsis ad voluntatemque planè fluentibus rebus suis, tum eisdem rursus, in acerbissimam omnis generis cruciatuum perpeffionem adductis, tanquam signis certissimis ac fidelissimis apposis obfignarunt; in horum, inquam, locum, suorum nobis nescio quorum novorum martyrum nomina proponunt: quorum alius huius, alius illius criminis damnatus ferè est; omnibus autem, ut hæreticis, vita publico iudicio est adempta. Quorum equidem exempla si cæteris ad vitandum proponi in synagogis eorum poterant, ad commemorandū certè proponi in ecclesia catholica non debebant. Tantum enim abest, ut incitamentum aut fomentum vllum religionis ac virtutis contineant; quæ certè prima esse debebant in eo genere; ut extinguendæ potius ac euertendæ religioni seruire planè videantur. O ordinem inordinatissimum. O non ordinem, sed ordinis ac rationis totius perturbationem, & confusionem summam. Verum quoniam omnia hæreticorum studia eiusmodi sunt, quæ delendis atque è medio tollendis bonis rebus omnibus nata esse videantur, nos iam ea omit-
tamus; deinceps autem ædificij nostri ecclesiastici fastigium conscendamus, idque etiam,
ut proposuimus, perlustremus.

ANDR.

PATRICII NIDECICI

DE ECCLESIA VERA ET FALSA.

LIBER V.

Qui est de fastigio ædificii ecclesiastici.

CAP. I.

Catholici religionem inter ethnicos etiã
propagant.Hæretici inter ethnicos nullam,
inter Christianos tantum impiam serunt.*Fastigium ædificij ecclesiastici est flos ipse ac fructus ipsarum religionum vtriusque.**Fructus hæreticorum sunt, omnia conuellere ac demoliri conari.**Hæretici, ad ethnicos, plantandæ religionis causa non eunt; inter catholicos impietatis plantandæ causa manent.**Locus euang. de superseminatis zizaniis, & de prophetis, qui veniunt ad nos.**Hæretici penè Mahometani sunt.**Hæreticorum nugæ doctæ absurdissimæ, ac cum auctorib. ipsis repudiandæ.*

Ensim iam ad ipsum ecclesiastici ædificii nostri fastigium, oratione nostra utcunque delineandum peruenimus. Ex quo quidem fastigio cum omnis ecclesiæ ipsius ratio ita efflorescat, vt non solum speciem quandam illustriorem repræsentare, sed vt etiam fructum quasi quendam bene maturum, earum quæ hactenus an-

regressæ sunt, siue cõsitionum, si ecclesia hortus est, siue substructionum, si est, vt nos quidem esse hoc maximè libro volumus, ædificium, exhibere videatur; perficiendum profectò nobis est, vt ex eo fastigio, hoc autem est, ex fructibus istis tam catholicæ ipsius ecclesiæ, quàm hæreticarum synagogarum, penitus vtrasque earum, in omnes partes cognoscere posse videamur. Hoc igitur eiusmodi fastigium vbi coloribus quibusdam nostris vtrinque adhibitis adumbrauerimus potius quàm depinxerimus, tum extremam sanè operi ipsi institutoque nostro vniuerso manum imponemus. Quando igitur libro superiore concludendo, omnia hæreticorum studia, omnesque eorum molitiones & conatus, ab omni ordine alienos, & ad omniū bonarum rerum destructionem & euersionem institutos esse, quodammodo significauimus; ostendamus hoc ipsum hoc loco vberius, & quidem non tam genere quàm speciebus quibusdam ipsarum rerum sic notandis, vt hoc ipso capite, vna indiuisa opera, & hæreticos ipsos bonis rebus omnibus insidiari, & catholicorum ipsorum hominum studia & conatus, bono semper publico addictos & destinatos esse, doceamus. Omnino igitur genus hoc hæreticorum hominum, bonis rebus communibus euertendis natū, infestum certè quidem atque inimicum, in hoc vno est fuitque semper, vt nusquam quicquam boni nec plantent ipsi, nec ædificent, nec extruant; sed ibi etiam, vbi fortè aliquid eiusmodi plantatum iam ab aliis, & extructum ac inædificatum inuenerint, ipsi non modò non conseruent, sed etiam dedita opera conuellant statim, & deiicient ac demoliantur. Planè vt ipse etiam ille magister eorum & propheta, verissimè quodam in loco scriptum reliquerit, eos qui sine missione, ad docendi munus euangelij temere prorumpunt, non solū non proficere quicquam, sed etiam venire planè accinctos, ad mactandum & perdendum quicquid inuasent. Incipiamus enim à leuioribus. Numerate quæso, Christia-

Christiani, ecquam urbem, præclaris eorum in remp. studiis positam ac fundatam esse inueniatis: nullā inuenietis. Numerate, ecquam artem, ad vitam hominū necessariam, eorum industria adinuentam, auctam, in honorem adductam comperiat: nullā comperietis. Numerate, ecquas ab iis, bene aut viuendi aut sentiendi reperiatis latas leges: nullas reperiatis. Numerate, ecquos fatos mores castos aut pudicos: nullos. ecquam pudoris ac verecundiæ disciplinam constitutam: nullam. Euerfores sunt isti urbium, ofores artium, hostes legum, pudicitiae ac verecundiæ capitales inimici. Quid hæc igitur apud eos frustra quærimus? Sed hæc mittamus, ad quæ perdenda isti nati sunt; & ad ea veniamus, ad quæ plantāda, augenda, ornanda, factos se esse profitentur. Vultisne, quæso, videre studium eorum in religione, & ardorem illum singularem, quem ipsi omnibus suis gerendis rebus videntur præferre? vultis, inquam, videre zelum eorum, non modò non secundū scientiam, sed etiam secundum impietatem singularem? Attendite quæso attendite, & nouum in religione, planorum atque impostorum genus animaduertite; qui se tamen germanos Apostolos, & Paulos ipsissimos volunt perhiberi. Quid enim Paulus? Adnitor, inquit, prædicare euangelium; non ibi quidem vbi antea iam nomen Christi Iesu insonuisset, ne videlicet super alienū fundamentum ædificem; sed sicut scriptū est, inquit. Quibus non est annuntiātū de eo, videbunt, & qui non audierunt, intelligent. Isti autem, Pauli scilicet germanissimi, & Apostoli ipsissimi, quid? Quid? Non vnquam ferè eò pedem mouent, vbi idola eiiciant, & ad Christum Deum barbaras gentes conuertant; quod nostri tamen & fecerunt hactenus semper, & hodieque in extremis Indiis, maximo cum religionis catholicæ incremento, & singulari illorum Indianorum hominū fructu faciunt: sed ibi demum de industria pedem figunt, vbi Christum, impressum iam multò antè à nostris in animis fidelium & obsignatū, ex mentibus eorum

eorum exterminent. Quos mihi sanè pseudoapostolos eiusmodi, videtur Christus Iesus voluisse adumbrare, primùm in parabola illa, vbi narrat, inimicum hominem, facta iam in agro semente per patrem familiàs, venisse eodem, & zizania item sua feminasse; nec verò vtcunque seminasse, sed etiam, vt significatiore vocabulo vtens satis indicat, superfeminasse: superfeminasse autem quoq. non vbiuis, neque alio in loco vllò, quàm in ipso illo dominico agro eodem, in media, dico, ipsa tritici segete illa; idq. etiã fecisse ipsum, non tam vt zizania vlla meterentur, quàm vt ne modò triticum ipsum incorruptum metipossit. Non est igitur, non est, quòd quis istos illis in locis quærendos existimet, in quibus, fibras prius infidelitatis euellere, & stirpes scelerũ extirpare, deinde furculos fidei atque iustitiæ inserere, opus sit; sed ibi potius quærendi sunt, vbi quæ bene consita sint, ipsi male perdant; & vineam ipsam domini Sabbaoth vindemient atque depascantur. Hoc primùm. Deinde designauit eos dominus, non iam quidem in alicuius vmbra parabola, sed in verbis sanè illis, prima fortassis fronte tectioribus, cæteroqui maximè apertis & maximè significantibus; quæ me aliquanto antè recitare memini, dum videlicet ostenderem, dominum ipsum falsis describendis prophetis, diligenter præcipere, cauendũ esse, primùm ab illis qui non mittuntur. sed veniunt ipsi; vt iam diximus: deinde autem, quod modò dicendũ pariter & expendendum est, cauendum esse ab his, qui veniunt, non quidem in remotas vllas aut longinquas & barbaras regiones, regni Deo & Christo acquirendi & constituendi gratia; sed ab iis, qui veniunt AD VOS, AD VOS, inquit; qui estis iam regnũ dei: Quid enim aliud isti agere, aut quid etiam moliri possunt, dum ad vos veniunt, quàm vt & rempub. quidem vestram bene ordinatam permisceant ac perturbent, & vos ipsos adeò exteriore illa ouina specie delusos, in fraudem inducant, & inductos mactent tandem pro arbitrio atq. perdant. O præclaros

claros religionis magistros, ô sacrorum custodes eximios, ô conuersionis ad Christum duces & auctores maximè idoneos, qui per hæc omnia istius euangelij sui tempora, ne vnum quidem, ex misera illa & infami Iudæorum recutitorum colluie, ad Christum vnquam adducant; & non modò nullum vsquam ex gentibus ethnicis & profanis profelytum faciant, non modò eius causa & maria & terras non obeant, (quod tamen Iudæos quoque ipsos factitasse, ex historia ipsa sacra discimus) non modò hoc nomine manum non vertant, non modò vel minimum saltem eius rei gratia digitum non commoueant; sed etiam, si quem fortè diuis iratum, & à catholica iam tum religione sua sponte auersum Christianum, quos solos ex omnibus venari videntur, suis quandoq; laqueis incautum irretiant, non cælo illum inferant, non ecclesiæ alendum committant, sed inferno illum confestim Ereboque destinant, & gehennæ, pro dolor, filium constituent. O dignos inprimis homines, ob quos orbis hic terrarum vniuersus, à solidis illis ecclesiæ catholicæ fundamentis recedat; quorum gratia, & firmos ipsos eiusdem ecclesiæ catholicæ parietes aspernetur, & tecta illius permunita fugiat, & denique veteri ipsi ac constanti, & perpetuo ipsius ordini, atq. adeò sacrosanctis auitarum cerimoniarum institutis renunciaret, seque protinus in hanc tantam rerum omnium confusionem, & cum religionis ipsius, tum salutis quoq. suæ gurgitem, atq. voraginem, viuis, quod aiunt, vidensq. præcipitet. O præclaros religionis magistros. Quorum planè studium illud est vnicum, vt fixa modò inter catholicos vbicunq. immani illa sua cathedra ac pestilenti, principio Iesum Christum ipsum, in cuius vnus nomine, Deus propositam esse voluit omnium vitam & salutem, procul tum è finibus Christianorum abigant, tum ex orbe ipso terrarum eiiciant; atq; hoc ipso deinde, pro scelus & dedecus temporum nostrorum, Mahometo ipsi, homini & vita & doctrina teterrimo, viam

sternant. Quid autem? nunquid studio id tantum suo moriuntur? an etiam successu perficiunt? Certè non fallit eos ne successus ipse quidem. Tantos enim, proh dolor, in hoc turpi admodum & flagitioso stadio suo, & tam turpes ac flagitiosos progressus iam fecerunt, ut plerisque eorum, nihil propemodum, præter præputium, ad Mahometismum obstare; nihil etiam, præter Sarracenicum illud capitis inuolucrum, deesse, quidam nostratium non dubitauerit profiteri. Ita sunt corpore quidè & externo solo habitu Christiani, animo autem toto, penè Mahometani dudum facti. Penè, dico; imò planè & animo & corpore Mahometani facti. Sunt enim, qui in hoc miserando Antitrinitariorum curriculo eousq. processerunt, ut & præputium sibi refecare, & caput Sarracenico tegmine operire, & professione ipsa, Turcæ prorsus fieri non dubitauerint: seque adè eundè tamen cum istis aduersariis nostris deum colere, eandem cum istis fidem ac religionem profiteri, asserere non verentur. Quem quidem eorum sermonem, bonis omnibus horribilem, deo etiam ipsi planè aduersum, audiuisse se aliquando in Transyluania, de Turca quodam ex Christiano facto, retulit ad me nuper amicus meus, vir pereruditus; atque hoc ipsum tunc sibi incitamentum fuisse dixit, ad suscipiendam cogitationem reditutionis suæ ad ecclesiā nostram, ex qua ferè migrasse dicebatur. Quod si qui sunt ex istis tamen, qui corpus adhuc à Mahometismo integrum conseruarunt, cæteris tamen profectò rebus omnibus, non nimirum se alienos esse demonstrarunt. Quantulū enim tu quæso, à Mahometanis abesse eos dices, qui omnia religionis Christianæ septa transiliisse, qui frontem egregiè perfricuisse, qui eò deniq. impietatis videntur deuenisse, ut inter præcipua religionis suæ arcana, illud iam auribus suorum fidelium insusurrare non dubitent: Non est Deus, non est Deus. Hos tu, inquā, quantulum mihi, quæso, à Mahometanis abesse dixeris. Hem quid dixi? Imo verò quantū tu hos, quæso,

quæso, & quam nimium, à Mahometanis ipsis distare pronunciabis? qui blasphemus tantum & impurus in deum sermone, germani utique Mahometanorum videri possunt; at verò vita ipsa & moribus, religionem Mahometanorum ac pietatem ne assequuntur quidem. Ita & Mahometani sunt isti sanè, & hoc etiam Mahometanis deteriores, quòd non solum in deum contumeliosi sunt, sed etiam virtutis ipsius & honestatis existunt inimici. Quære enim ex iis, quid de usu imaginum sentiant; idem prope quod Mahometani respondebunt. Quære, de Christi ipsius natura? idem. Quære de Dei trini essentia? idem: quære de cæteris plerisque religionis nostræ mysteriis? idem, idem. Nisi quòd Mahometani tamen nunquam Deum negauerunt. At verò de bonorum operum æstimatione, fructu, mercede, & quod caput est, studio, si quæras ab utrisque, longè profecto istorum impietatem à Mahometistarum superstitione videbis superari. Nimirum qui male viuit, is deum vindicem non odisse non potest: qui autem deum oderit, is ne Christum quidem, expressam dei & verissimam imaginem, is denique ne illas quidem à pictoribus adumbratas, dei & sanctorum imagines amare potest. Ita qui malè viuit, qui quæ honestatis amore non capitur, is dei diuinarumque adeò imaginum omnium amore teneri non potest. Verissimum enim est, & prudentissimè obseruatum vetus illud, Varronis opinor; certè ethnici cuiuspiam, & à Christi quidem religione alieni, à veritate autem non auersi. Signa deorum, tum sacra esse hominibus desuisse, cum homines ipsi facti essent sacri; hoc autem est, impij & scelerati. Quod totum quidem ut hoc magis, in his de quibus loquimur, hæreticis nostris, verum esse agnoscamus, & ineptissimos eos esse, ad Christi Dei nostri inter barbaros prædicandam religionem, planissimè intelligamus, operæ precium sanè est audire paulisper ipsorum inter ipsos *κρίτας δόξας*: ut ex eorum sermone videlicet, vitam etiam illorum aliqua ex parte odorari, & deinde, quis gustus apud

stus apud barbaros, tam vitæ quàm sermonis eorum futurus sit, si se ad eos conferant, certius iudicare possimus. Audiamus igitur illas eorū ^{κρίσις λόγος}. Putes aut Origenem scilicet quempiam verba facere, aut Paulum Apostolum, aut angelum denique de cœlo ipsum. Tenésne, inquiunt, formulam orandi à Christo propositam? Teneo, respondet ille. Tenésne decalogum? Teneo. Tenésne symbolum Apostolorum? Teneo. Bene habet, inquiunt, ea fides sola te iustificat. Vade in pace. Nihilne amplius? quærit ille. Heus tu, inquiunt, Videsis, ne quem sanctum in vota voces, neue subsidio tibi compares, Mariæ etiam ipsi ne aue quidem dixeris. Feceris enim scilicet contra orationis ipsius formam à Christo promulgatam. Probè mones, inquit. Sed estne præterea quod me velis? Videsis etiam, inquiunt, illi, vt, quod ad decalogi quidem præcepta atq. instituta attinet, tria hæc omni adhibita diligentia obserues. Vnum, vt imagines sacras, ipsius etiam Iesu Christi affixi cruci, signum atq. imaginem salutarem, tollas de templis & triuiis, & omninò vbique locorum demoliaris. Hoc est enim primum & maximum mandatum in lege. Secundum autem simile est huic: Meas & meorum imagines ac statuas, vt conserues. Tertium palmarium est. Nulla vt sit sexta feria, qua tibi fas esse putes ab esu carniū abstinere. In hoc enim vno, vniuersa lex pendet, & prophetæ. Teneo ait iste. Sed quid amplius? Etiam inquit. Neq; enim in hoc sacrosanctarum institutionum genere silentio prætereunda sunt, quæ ad symbolū ipsum fidei pertinere videantur. Dabis igitur præterea operam, vt peccatorum remissioni, quam verbo in symbolo profiteris, certissimè incumbas. Incumbendi illam vnicam esse rationem memineris, vt peccatis te atq. flagitiis omnibus præstes quàm maxime coopertum: ne secus si feceris, iam tu mihi quidem nec remissione peccatorum, nec Christo denique ipso, quicquam egere videare. Nunquam igitur neq; vigiles, neque esurias, neque sitias, & ta-

men nun-

men nunquam te somno, cibo, potu explere ad satietatem negligas : nihil etiam in omni vita eximium habeas, quod non aut cupiditate inuoles tua, aut rapacitate corrumpas, aut ingluuie deuores; aut turpitudine contamines, aut petulantia saltem carpas vtcunq; ac delibes. Nunquam neq. sustineas, neq. abstineas; non facias, sed ne facere quidem in animum inducas tuum : quæ enim re ipsa necessaria non sunt, ea ne voto quidē ac desiderio necessaria esse possunt. Itaque vota sanē eiusmodi rerum minus necessariarum, prorsus quantum potes fugito, aut ne reddito certe quidē, bonas etiam actiones ipsas omnes pili ne facito. Sunt enim profectò pannus menstruatae mulieris, spurcus totus, & in Dei conspectu lutulentus. At illud quod dicemus, mundū est & elegans, sermo fidelissimus, & omni commendatione dignissimus. Da ventri quod vult: Neque enim quod intrat in os, inquinat hominem. Da his quæ sub ventre sunt. Quæ enim parum distant nihil distare videntur. Laxa laxa carni lasciuianti habenas, & claustra illa ac repagula votorum quantumuis solennium & sanctorum securus perrumpe. Vouisti castitatem Deo : hoc nihil est ; melius est nubere quàm vri; ducito vxorem. Quæ ipsa deinde, si quando tibi non statim præstò fuerit, agedum veniat ancilla. Tum ille alter. Hem desine, inquit, omnia hæc seruauī ab adolescentia mea. Estne præterea quod desit mihi? Si vis perfectus esse, inquit, vade, & quàm potes, maledic Papis, Papistisque omnibus. Hæc summa ferè est totius instituti eorum, & hoc fastigium omnium mysteriorum, quæ vnquam ex istorum schola in hanc mundi ac naturæ vniuersitatem profluxerunt. Rudimenta religionis verbo vtcunq. teneto. Religionem omnem ludum iocumque habeto. Diuos omnes contemnito. Sacras imagines euertito. Nunquam ieiunus remaneto. Nunquam quicquam deo voueto. Quæ voueris, ne soluito. Si qua ex voto dederis, feceris, vel repetito, vel rapito, vel infecta reddito. Aut vxorem ducito, aut ancil-

lam aduocato. Papis Papistisque omnibus quàmmaximè
 potes maledicito. Os impudens. Hæccine est tua illa ma-
 gnifica prophetia, quæ loqui debebat hominibus ædifica-
 tionem, exhortationem, consolationem? Hæccine vis est &
 ratio tuæ illius, quam tantopere vrgere soles, scripturæ?
 Quæ quidem si diuinitus, vti videri vis, fuisset tibi inspirata,
 equidem valere debuit, non ad laxandos frenos impudici-
 tiæ ac petulantia hominum, sed ad docendum, ad argu-
 endum, ad corrigendum, ad erudiendum in iustitia, vt per-
 fectus sit homo dei, & ad omne opus bonum instructus.
 Hancine tu ergo fidem Scythiæ, hancine Thraciæ, hanc-
 cine cæteris rudibus ac barbaris nationibus prædicabis?
 quarum certè omnes ad vnam, longè vincunt, ac superant
 impuram istam tuam fidem verecundia sermonis. Tuis ista,
 tuis asotis & delicatulis illis martyribus domi occine; his
 solis te, tuumque eiusmodi dogma vendita; qui cum te
 audiunt, non tam fidem profectò abs te haurire gestiunt,
 quam operibus & factis dudum abnegarunt; quam late-
 bram modò & perfugium qualecumque inquirunt scele-
 rum ac nequitia suæ, & vitæ prorsus in omnem licentiam
 effusæ ac dissolutæ. Barbararum quidem & immanium
 gentium conuersionem ad Christum, nostris relinque;
 & hanc palmam nobis concede, vt quorum maiores in om-
 nem terram quondam digressi, sono vocis ac prædicatio-
 nis suæ, passim Christo domino tanquã colonias deduxe-
 runt, nos eorum posterì, eadem illa maiorum illorum no-
 strorum vestigia relegentes persequamur; & hoc ipso ve-
 ros nos atq. legitimos eorum liberos ac hæredes declare-
 mus, si Christo ipsi domino quàmplurima & quàmremo-
 tissima, de cõuersis ad eum populis ac nationibus trophæa
 excitemus ac constituamus. Ego enim cum mecū barba-
 rissimam istam tuam, & omnium immanissimam, non reli-
 gionem, sed religionis, & honestatis, & omnium virtutum
 corruptelam perpendo, & cum animo meo confidero, bar-
 bariam

bariam equidem in toto terrarū orbe nullam tantam esse statuo, quin te, vbi modò illam, quod tamen nunquam facturus es, adeas, euestigiò ad primum ipsum conspectum tuum, cum hac tua spurcissima ac sceleratissima omnium doctrina, aspernetur, & omnibus decretis atq; edictis suis proscindat, & denique procul à finibus suis arceat, & ad inferos vsque ipsos, ad ipsam illam, dico, sceleratorum regionem eiiciat ac releget. Atque hæc quidem barbari. Nos autem, qui Christianis orti parentibus, liberalissimè ad omnem ciuilem & honestam ac deo dignam vitam instituti sumus, vsque adeone, contra & nominis, & generis, & professionis & naturæ institutionisque nostræ rationem insanemus, vt istos aut recipiendos vlla lege, aut verò æquis saltem auribus audiendos esse existimemus? Non opinor. Quos enim quæso audiam? aut quos recipiam? Illos sine dubio, quos deus ipse auersatur, lex condemnat, ciuitas reicit, barbaria respuit, infernus expectat.

CAP. II.

Successus hæreticorum.

Etiam successus religionum, rationem fastigij in hoc ædificio obtinere videtur.

Religio vtrum sit ex successibus æstimanda.

Infauti successus hæreticorum.

1. *In animis eorum ipsorum, quòd & rationem amiserint & secū ipsi pugnent.*
2. *In naturalibus præsignificationibus eorum.*
3. *In rebus publicis eorum.*
4. *In dignitatibus & honoribus eorum.*
5. *In consilijs, & studijs eorum.*
6. *In statu ipso eorum.*

Dixi



Ixi de fastigio doctrinæ ac disciplinæ partis utriusque simul; & vno quidem capite superiori proximo utrunque ostendi, primum hæreticorum conatus ipsorum, eò propemodum esse intentos omnes, ut exagitato quàm maxime Papa ecclesiæ præside, Christum ipsum, pro quo ille præsidet, & cuius vices ipsas in terris gerit, atque administrat, per illum exagitent; nomenq; adeò & religionem eius, non modò, ut oportuit, ad barbaros nò deferant, sed etiam, quod non oportuit, ex terris & prouinciis Christianis, cum vita ipsa iusta, casta, sobria, pudica, pia, exterminet & proscribant: deinde eodem illo capite ostendi, vetus illud ac perpetuum catholicorum omnium studium, ne nunc quidem in nostris extinctum esse; ita Papam Romanum venerari, ut ipsius imperio, & hic quidem hæreticis obsistere, & ad rudes etiam quasuis ac barbaras nationes, si opus sit, proficisci, ibique Christi numen gentibus illis prædicare, & religionis eius rudimenta palàm proponere, neq. arduum, neque non necessarium, neque adeò à professione ipsa nostra alienum esse existimemus. Hæc utraq. capite, ut dixi proximo, ostendimus: & quidem sic ostendimus, ut intelligeretur fastigium ecclesiæ catholicæ, & quasi eminens signū quoddā, quò potissimum velit ab omnibus collimari, Christum Iesum esse; fastigiū autem synagogarum hæreticarum esse ferè Mahometum: & si quid est Mahometo aut doctrina tetrius, aut moribus impurius. Quorum singuli ita singulis astant culminibus templorum suorum, ut faciliè, cui quodq; templum dedicatum sit, vno aspectu cognosci posse videatur. His igitur ita absolutis, expendamus nunc iam, & ut antea cœpimus, conferre porro singulis etiam capitibus pergamus, successus ipsos & exitus partium singularum: qui quidem veluti vexilla sunt quædā singula, in manibus patronorū illorum singulorū,
pro

pro fastigio posita & collocata, vt videamus statim, & cum animis nostris consideremus, quæ sint res, quibus quisque eorum beare cultores ipsos suos soleat, & quæ præmia sint, quæ aut statim polliceatur accedentibus ad suam seruitutem, aut pro meritis deinde ipsis re ipsa largiatur. His enim atque eiusmodi rebus solent animi hominum plus minus ad hoc vel illud sequendum vel fugiendum, agendum vel omittendū, incitari. Omnino igitur etsi veritas & fides religionis cuiusvis, nō est principiō à successibus, aut prosperis, aut aduersis, deducenda; & catholicæ sanè religionis ratio, suis est & certissimis & maximè propriis firmamentis, aliàs ab aliis comprobata, vt his successuum adminiculis minimè egere videatur; iuuat tamen vel ad illorum firmamentorum soliditatem, vel ad voluptatem etiam quandam animorū nostrorum, hæc ipsa successuum in vtramq. partem commemoratio, quibus Deus Opt. & immortalis, hinc veritatem suarum cerimoniarum, diuinitus nobis iam pridem traditarum, semper est prosequutus, illinc impietate nuper inuentarum opinionum, ex animo se auersari, assidue demonstrauit. Principiō. Tritum profectō illud esse nō ignoramus, diuinam ipsam vindictam, in exigendis suppliciis ab hominibus sceleratis, his, vt plurimum, gradibus procedere solere, vt ante omnia mentem illis eripiat, quorum sceleribus paulō post pœnam sit inflictura. Multis id in rebus per omnem sæculorum decursum, testatum est factū: & certè nisi rem ipsam euentus ipsi maximi, insignibus admodū subsecutis documentis, creberrimè comprobassent, nunquā eius sermonis vsum consuetudo ipsa communis recepisset, nunquam receptum tantisper retinisset. Prima igitur quasi pœna, cū omnium improborum hominum, tum eorum maximè, qui ingratissimis suis animis religionem Dei. Opt. & Max. aut ex animis hominum student euellere, aut in animis ipsis corrumpere adnituntur, illa est, quod omnibus istiusmodi, & sensus communis ab-

latus,

latus, & lumen ipsum rationis naturalis ademptum penè diuinitus esse videatur. Quod quidē hoc loco ita positum, superius exemplis aliquot & rationibus sic planum est factum, vt facile appareret, istos, dum curiosius, impio ac scelerato animo, imaginē mysteriorū diuinorū in libris sanctorū Bibliorū perlustrant, totos lymphatos factos, subitò vaticinari quodammodo & furere incepisse. Ex quo ipso sunt illa, primū ^{αὐτῶν} eorum, quorum paulò antè obiter memini. A liberis omnia geri, vt à feruis: ab hominibus, vt à pecudibus: à viuis, vt ab inanimatis: ab optimis, vt à nequissimis. Deum autem ipsum, fontem bonorum omnium, omniū esse scelerum socium, administrum, auctorem. Quæ fanè illi omnia, si nos Christianos, si viros bonos, si liberos, si homines, si viuos deniq; existimassent; imò si seipso rationis compotes existimari voluissent, nunquam equidem hiscere ausi essent. Ex quo deinde ipso, sunt etiam illa propemodum infinita, vel vnus Luteri ^{ἀντικείμενο}, ipsis illius ipsius dictis pugnantia. Modò enim ait, necessariam esse sumptionē eucharistiæ ex præcepto ecclesiæ. Modo neminem esse ad eam obligatū. Modò, vtramq; speciē videri nō necessariam. Nō modò enim non peccari vnus speciei participatione, sed etiam parum admodum referre, sub alterutra sumas, an sub vtraq; Modò rursus, vtramq; speciē tam necessariam videri, quàm ipsam Christi Iesu confessionem. Alioqui vna specie participāda, & cōscientias hominū grauari, & ipsos in abyssum detrudi. Modò. Vtramq; speciē, si necessaria sit, à concilio esse expectandam. Modò rursus. A singulis, siue Episcopis, siue parochis, posse in ecclesiam induci: à concilio autem non esse acceptandam etiam si cōcederetur. Quæ puerilis sententia tam inconstans vnquam visa est, vt sunt diuini istius prophetæ dicta sibi inuicē opposita? Quæ ego fanè hoc loco deo omnia non recensco, quòd eorum maximam copiā ex ipsius libris decerptā, breui editurus esse dicitur vir eruditus: vt inde facile peti possint. Ex

sint. Ex quo præterea illa sunt, an fuerunt, eiusdem illius Luteri, moribundi an furibundi effata, vesanorum similia, de Pontifice Max. Paulo III. quondam vsurpata. Paula, non Paulus: Papasinus, Papasina: Paulasinus, Paulasina: & cætera eiusmodi: quæ mihi planè bacchantium esse videntur, & tantum non hominū mente captorum. Ex quo deniq; ipso, impia illa & sacrilega sceleratorum hominum dicteria, sunt profecta, quibus conantur imagines è templis, sanctos è cœlo, missam ex ecclesia proscribere: corpus Christi ex sacramento tollere, Christum ipsum de sinu patris Dei excutere, Deum deniq; ipsum ex hac mundi vniuersitate, quasi opificē ab ipso suo opere, amoliri. Quibus ipsis dictis fœdissimis cœlos quatiunt, purgatorium subruunt, infernum stabiliunt, Sacerdotes vxoribus nectunt, labium vnum sacrorum in ecclesia Latinorum confundūt, speciebus eucharistiæ ecclesiam exagitant, vota ieiuniaq. omnia omnemque adeò honestam ac Deo dignam vitam, foras, vt sic dicam, eliminant. Quæ ipsa quidem hominibus sanis ac sobriis, malefanorum ac furiosorum hominum deliria planè videri necesse est. Quæ nos vbi collegerimus, nihil magnopere mirabimur, si in tanta, quantam dixi, inconstantia, vel potius inopia, quod dixi, rationis, bellum secum ipsi, bellum exitiale, crudele, ferum. secum ipsi autem, non partes ipsæ inter se, sed planè secum eorū quisque gerunt, vt iam diximus. Quæ quidem si quis penitus consideret, velim hoc loco duobus verbis doceat nos, quid aliud furere est, si hoc non est, aut qui furor excogitari potest, qui sit cum hoc furore comparandus: quæ pœna, quæ sit cum hac cōferenda. O successus religionis expetendos. O euentus, vitæ scilicet ac salutis iactura comparandos. Sed pergamus porrò aliquantum, in his eorum successibus expendendis. Atq. hoc iam quidem loco repetamus, si lubet, omnes ab initio hæreses, & consideremus cum animis nostris, quæ terrarum eluiones, quæ concussiones, qui hia-

tus, quæ exustiones, quæ sterilitates, quæ siccitates, quæ aquarum inundationes, qui grandinum impetus, qui ictus fulminum, quæ aëris pestilentia, quæ vermiū & bestiarum copiae, quæ annonæ caritates, quæ seditiones, quæ bella, quæ clades, quæ portenta deniq; partuum monstroforum, quæ item horum omnium, siue causæ, siue nuncij horribiles, coelestes diurnæ nocturnæque halonum, cometarum, pogoniarum nescio quorum, & reliquarum lampadum atque ardorum aëreorum apparitiones, singulas propemodū hæreses aut præcesserint semper, aut statim fuerint subsequutæ: quæ si numerare vellem, dies me deficeret, nec iucunditatis ferè quicquam nostra habere oratio videretur. Illud & certum est, & sine contentione vlla affirmari potest, quòd quemadmodū illa, quæ dixi, omnia, hæresim quamlibet penè præcesserūt, ita eandē rursus tot fatalia rerump. incommoda, tot fœdæ regnorum illorum, in quibus modò hæreses viguissent, non iam conuersiones, sed euersiones sunt consecutæ. Testis, olim quidem Græcia, quæ diu hoc isto hæresum malo sic vexata fuit, vt nullis disputationibus sedari, nullis conciliis refrenari, nulla ciuili lege coërceri, nullo legitimo magistratu ad officium adduci, dicam plenius & verius, nulla re nisi barbarici dominatus iugo mansuescieri potuisse videretur. Testis, auorum nostrorum memoria, vicina Boëmia, quæ Hussiana hæresi concitata, cū reges etiam ipsos suos, magnis status & conditionis eorum regiæ periculis inuoluisset, vixdum ipsa hætenus potest respirare. Quid dicam de Germania, domicilio imperij Christiani? quæ nostra iam hac ætate, à cerco illo benedicto maledicendo, ad Augustos vsq. suos Cæsares bello diuexandos progressa, & sectarum innumerabilium voce, tanquam seditionis flabello quodam agitata, omnia, tam in ecclesia, quàm in rep. tentauerit, polluerit, violauerit: & nisi dominus custodiuiisset ciuitatem, etiam propemodum euerterit. Mitto Britanniam, Hungariam, duo regna nobilissima,

lissima; quæ conturbatis religionibus, vix iam pridem domesticam pacem, ocium, libertatem, tueri possunt: dignitatem quidem & splendorem illum veterem in perpetuū penè amiserunt. Belgium & Gallias intueamur: litteris, ædificiis, mercaturis, armis, viris, opibus, prouincias paulò antè ornatissimas, nunc bellorum deinceps ac tumultuū domesticorum, ex varietate religionum ortorum, incommodis, sic attritas, vt vix agnoscas easdem illas esse. Quod si iam ex imperiis, regnis, prouinciis, cadauera propemodum imperiorum, regnorum, prouinciarū, facta esse videmus, hac ipsa hæresum immanitate tanta, profectò quid singulis hominibus inde expectandum sit, vnde in vniuersos tanta calamitas ingruerit, facile intelligi potest. Sed hæc quidem interea mittamus. Illud tantum quod dicam, rogemus eos, cuius, non dico, bonitatis naturæ, sed planè, cuius tandem animi esse putent, respublicas ipsas (quæ sunt quasi naues quædam, quibus delatum hominum genus, in hoc orbi vehatur vniuerso,) tot bellis, quasi per ludum & iocū, concutere, tot tumultibus exagitare, tot premere calamitatibus, tot mortibus & exitiis inuoluere? & deinde in eiusmodi quasi funere ipfarum, ridentes exultare? Non sic quidem ille qui dixit, homo ethnicus, sed vir bonus, & fidei plenus. Cum ciuitatem, inquit, & remp. ita constitutam esse oporteat, vt æterna sit, non potest fanè videri illius interitus vlla ex parte naturalis. Alioqui, si ciuitas, inquit, si resp. si regnū, si imperium, tollatur aliqua ratione è medio, deleatur, extinguatur, simile mihi quodammodo videtur, ac si omnis hic mundus, eodem labefactatus motu, planissimè concidat. Hæc ille. Verùm nos fingamus iam istos, rebus publicis æquiores, ipfarum incolumitati consulere: videamus modò, quàm honoratas eas esse velint, quas conseruarunt; & quanta eas gloria excellere, quantis ornamentis abunde cupiant. Aut verò, ipsa illa doctrina eorū, intueamur, quæso, quam secum dignitatē, quod decus, quam nominis claritudinem

ritudinem illis rebus pub. afferre soleat, in quas aliquando incubuit. Et breuiter consideremus, estne res pub. estne regnum, estne ciuitas, estne domus, estne familia, estne quisquam omnino hominum, qui propter hæresim, aut auctus vnquam veris honoribus, aut vllis verè secundis rebus ornatus ac nobilitatus sit. Ego enim certè non solum honores veros ex hæresi ortos, sed ipsa etiam illa vulgariū istorum honorum nostrorum nomina, quæ sint modò paulò sublimiora, frustra mea quidem sententia inter hæreticos requiri dixero. Velim namq; ostendat mihi quispiã, in ipsis hæreticorum regionibus, & hæresi vigente ipsa, non dico, quot Papæ, Cardinales, Archiepiscopi, Episcopi, Præpositi, Decani, Archidiaconi, Sacerdotes, hæc enim ecclesiasticorum honorum nomina, certum est cum hæresi existere non posse; quæ & oppugnant hæreses, & ab hæresibus ipsis impugnantur, atque etiam interdum, his aut illis in locis, expugnantur. Non hoc igitur, sed illud tantum ostēdat mihi, quisquis est; quótnam inter eos Imperatores ex Regibus, quot Reges ex Ducibus, quot Duces ex Comitibus, quot Comites ex Nobilibus, quot Nobiles deniq. ex plebeiis, aut ibi facti sunt, vbi antea non fuissent, aut in vetere sunt saltem dignitate & existimatione conseruati? O nobilitatem ex hæresi expetendam. O laureolam quærendam, vt ille ait, in mustaceo. Atqui nos quidem ea, quæ dixi, frustra inter hæreticos quærimus: religionis enim catholicæ, non hæresum, neque superstitionum vllarum, hæc sunt propria beneficia. In hæresi quidem nouū aliquem factum regem ué, ducem ué, vbi antea non fuerit, non audiui; nonnullos potius qui iam facti essent, & à maioribus suis regnauissent, pullos ab hæreticis, & regnis ipsis spoliatos, atque in ordinem redactos fuisse, legi & audiui: multos etiam hæreditaria imperia coactos abdicauisse, in eorum autem locum, vel neminem suffectū fuisse, vt ita regium ducaleque nomen planè extingueretur; vel certè rusticos homines,

aut

aut pueros ipsos, aut denique foeminas, regnis atque imperiis maximis prefectas fuisse, legi & audiui. Et certè non usquam liber prodiisse nuper dicitur; in quo quidem tantum non publicè armari videntur homines aduersus supremos ipsos magistratus. Quod si est, prouidendum certè est, ne quid respub. detrimenti capiat. Huc enim profectò spectare isti videntur: hæc eorum studia, hic scopus vitæ, hic doctrinæ est; vt possint tandem extremâ rebus omnibus publicis afferre vastitatem. Equidem quid paulò antè & fieret & gereretur in viciniis, hic illic, hætenus fortassis in alienis tantum exemplis spectabamus: nec facile angulum liberum reperiēbamus vllum, qui, si modò hæreticorum doctrinæ patēre incepisset, non tot & tantis cladibus tandem illis, non tot & tantis seditionibus illis, non tot & tantis tumultibus illis absorberetur, quot & quantis, maxima etiā ipsa regna & imperia, pridem absorpta concidisse videbamus, illorum quidem hæreticorum opera & studio periniquo, qui vniuersum ipsum terrarum orbem, flamma accendere, ferro excindere, internecione delere, ante actis temporibus non dubitauerunt. Quæ omnia nos quidem qui aut vidimus, aut legimus, aut audiuius, sine lachrymis commemorare non possumus, illi qui perpeffi sunt, & qui in medio Tartareo furore illo, vitam cum fortunis suis suorumque amiserunt, non possunt ne cum lachrymis quidem. Hæc igitur, vt dicere cœperam, spectabamus tunc saltem. Nunc verò ne inter nos iam quidem exempla eorū propemodum desiderantur. In ipso enim penè reipub. nostræ corpore, reperti sunt homines, non nostri quidem Polonici nominis; apud nos enim & apud maiores nostros, regum ipsorum nostrorū nomen, sanctum & inuiolatum semper fuit, sed in nostræ tamen Polonicæ reip. complexu, homines loci & ordinis non postremi: qui cū ciuitatem, à maioribus suis, hominibus ipsis catholicis, beatam & florentem accepissent, successu deinde temporis, vetere primum

mum conturbando ecclesiarum catholicarum ritu atque ordine, deinde verò citò post, aucta plus fatis, & in eiusmodi ciendis religionis turbis corroborata, sua pertinacia, regni etiam & Reipub. ipsius permiscendis negociis, eò sunt prolapsi, vt, cum regum iam ipsorum nostrorum imperia leuius habere viderentur, quàm fides eorum & iusiurandū datum postularet, tum reges ipsos, primū cum potestate ad eos mittere, deinde verò etiam venire eodem ipsos, virgis armatos & securibus oporteret. Quæ res à patre ipso rege, ex vsu reip. semel prouisa, non peruenit tamen integra ad filium regni successorem; quominus & ipse quidem, secundum patrem, iterum ciuitatem eandem, ordinādæ ipsius gratia, visere, & deinde aliquanto post ciues ipsos ad se publicè accersitos, seuerius quodammodo accipere necesse haberet, quàm natura ingeniumq; eius semper lene ac placidum ferre videretur. Post cuius denique ipsius obitū, cum regnum ipsum, altero post alterum interregno, ad regem alium, virum hunc maximè strenuum, & omnibus regiis virtutibus maximè ornatum, sed regno tunc temporis nondum satis assuetum, Stephanum hunc Bathorium deuenisset, eò denique vis ipsa mali, dudū compressa illorum pectoribus, manifestò erupit, vt imperio quidem ipsius, armis etiam, priuato nomini parum licitis, repugnare non dubitauerint. Malum planè consilium, sed quid? Ipsi consultori pessimum. Iam tum enim illo ipso facto suo, & pacem quidem atque ocium prouinciæ illius diuturnum subito perturbarunt, & oram etiam illam vniuersam, pacis alumnam, vel cuius adeò ipsa pax alumna fuit, maximis incommodis affecerunt, & denique tum seipsos, tum ciuitatem ipsam, & suam & nostram, in extremum discrimen ipsum propemodum adduxerunt: & reuera penitus adduxissent, nisi nos deus ipse placido lumine respexisset. Ex his igitur, quæ diximus, satis constat, non iam quærendum esse amplius, ecquòdnam regnum, aut constitutum ab initio fuerit ab

rit ab hæreticis, cùm nullum planè vnquam constitutum fuerit, quod legitimum haberetur: non etiam quærendum ne illud quidem, ecquódnam, postquàm ab aliis esset cõstitutum, fuerit ab istis, vllis expetendis rebus cumulatu. Neque enim isti vsquam in salutem aut dignitatem regnorum incumbunt, sed in perniciem. Quid dico? Ego verò dico, ne illud iam quærendum quidem esse, quot homines ex hac disciplina, ad bonorum saltem virorum commendationē nobilitati sint. Nemo enim vnquam ob hæresim, verissimis virtutis laudibus honestatus est. Sed quid quærendū, aut quid ab istis expectandum? Illud fortassis vnum, quod solum videtur superesse, vt videamus & inquiramus, quotusquisque illorum ipsorum, qui hæc sequuntur, saluus & incolumis, non dico iam cum nobilitate, & cum honoribus, & cum fortunis, sed cum vita saltem ipsa, aut si ne id quidem comperiamus, certè cum morte saltem honesta ipsa, potuit ex illo naufragio enatare. Quod cùm diligentissimè quæserimus, in paucis tamen id admodum apparuisse reperiemus. Primum enim aut extremis suppliciis ipsis affecti certè fuerunt, quotquot eiusmodi fuerunt, & quod mirere magis, non in catholicorum ciuitatibus solum, sed etiā in hæreticorum ipsis vrbibus, quæ sunt sectarum diuersarum: quæ hanc eiusmodi licentiam nouandarum religionū ferre se non posse, aliquoties demonstrarunt. Aut verò si hunc publicorum iudiciorum scopulum magna cautione effugerunt, in nihilo tamen acerbiores mortium infamium casus, miseri homines inciderunt, quæ ipsos ferè diuinitus comitari consueuerunt. Hi sunt enim illi, de quibus verè illud dixisse fertur Apostolus: QVORVM FINIS INTERITVS, ET GLORIA IN CONFVSIONE IPSORVM. Hoc autem est, quòd exitus eorum, non est, vt aliorum, aut gloriosus, aut saltem naturalis finis ipse; sed est interitus, ignominia, & confusionis cuiusdam plenissimus. Quod cùm alius etiam Apostolus, & omninò discipulus ille, què

dilige-

diligebat Iesus, egregiè admodū nosse videretur, ne balneū quidem ingredi voluit, in quo Cerinthum hæreticū lauari audiebat. Quis enim mihi spondeat, inquit, non esse ædes ruituras, in quibus Cerinthus lauaretur, inimicus veritatis? Quasi nimirum solenne sit, malam doctrinam malo exitu terminari. Nota est Luteri mors, quæ temporibus nostris accidit: quam ipsam verbis exagitare hoc loco non libet. Sed & post eum, cum multi alij ex ipsius sequacibus, foedis mortium generibus alibi absumpti sint, tum paulò antè hic apud nos in Prussia, nescio quis ex magistris istis religionis nouæ, miserando admodum fato in puteum insiliisse, & vitam sibi ipsi abruptisse dicitur. Nuncq̃. adeò, dum hæc scribimus, cum nudius tertius quidā ex istis, vt solent, ceremonias nostras Catholicas, in æde sacra ipsa, apud Catholicos, in familiari sermone insolentius irrideret, heri eadem hora illa, cum bene sanus & bene valens, hospites aliquot ad prædium inuitasset, subito in ipso prandij apparatu, apoplexia correptus, sensibus omnibus amissis, animam citò post exhalauit. Quæ ego quidem non quasi insultans hoc loco recito. Communes enim casus esse sentio: sed quasi dolens, et si quid, etiam admonens, diligenter nobis vt caueamus, & vt casus ipsos eiusmodi, in aliorum personis intuentes, quorum exitus perhorrescimus, eorum doctrinam, etiam atque etiam vitare studeamus: & omninò quicquid ingruerit, illam potius Sapientis consolationem amplectamur, IVSTVS SI MORTE PRAEOCCVPATVS FVERIT, IN REFRIGERIO ERIT, quàm vt molestiam illam admonitionis Apostolicæ exaudire necesse habeamus, NEMO VESTRVM PATIATVR, VT FVR, AVT HOMICIDA, AVT MALEDICVS. Etsi enim lex ipsa naturæ nostræ communis, omnibus telis fortunæ, vitam nostram ita proposuerit, vt nihil quicquam aliis accidisse meminerimus, quod nobis ipsis, etiam nihil tale promeritis, accidere posse nō existimemus: tamen cum sæpius omninò fieri

nò fieri videamus, vt qui seminant in benedictionibus, in benedictionibus & metant, qui secus seminant, secus etiā & metant, fit profectò, vt mens sibi in ratione religionis bene conscia, aut nihil quicquam eiusmodi metuat, quod hæreticis, vt plurimum, immineat, aut certè si quid humanitus acciderit, omnia leuius ferenda sibi esse ducat: contrà autem, qui se opinionum istarum hæreticarum, siue auctores volunt siue fautores perhiberi, hi si quid aduersi acciderit, nec facile habeant, quo se in mediis illis casibus consolentur, & illā præterea, pro malis suis meritis, diuinitus irrogatam pœnam, vt plurimum sustineant, vt nunquam sibi aduersis rebus satis defungi videantur, sed vt semper omnes tristes exitus cogantur etiam atque etiam expectare. Et certe quod metuunt, id etiam propemodum experiuntur semper. Fit enim ferè vt semper bellū appetant, nunquam victoria potiantur, semper seditiones moueant, quarum tamen incommoda omnia in ipsorū potissimum capita recidant; semper tumultus excitent, & in illis tamen, cū corpore, tū multò etiam magis animo dispereant; non tantum domesticis illis furiis agitati, fraudum scelerumque suorum, mœrore & angore quodam conscientiae incredibili, dum viuunt; non solum ignominiosa morte confecti, dum moriuntur; sed etiam vita iam functi & mortui, igni illo adusti, flammis ardentibus sempiterno, qui designatus est Diabolo & apparitoribus eius. Vt ita videlicet nec viuis illis, nec mortuis, bene esse possit; sed vt viui & mortui, omnibus pariter & diuinis maectentur suppliciis, & humanis.

Qq ij

CAP. III.

Successus Catholicorum.

Consilia non sunt ferè successibus metienda.

Ecclesia catholica ærumnis propemodum crescit & letatur:

Eadem tamen rebus etiam secundis ornatur.

Ecclesiæ Catholicæ trophæa amplissima.

1. *In ipsis inityjs.*

2. *In incrementis ipsis, tum apud cæteras nationes,
tum apud nos quoque.*

*Maiores nostri agnoscebant beneficia religionis Catholicæ,
nudandis gladiis in lectione euangelij.*

& hymno populari Bogarodizxa, decantando.

Lætissima quondam Poloniæ nostræ facies sub Catholicismo.



Religionis veritatem non esse principio ab ipsa successuum prosperitate repetendam, proximè admonuimus. Sed & ipsi quoq; multo antè admoneri nos meminimus ab aliis; & quidem huius sæculi filiis, non imprudentibus in generatione ipsa sua. Quid admoneri? Admoneri, inquam, non in religionis solum & fidei negotiis id esse obseruandum; quæ quia tota ex seipsis apta sunt, ideo fortunam & euentum rerum externarum minimè, vt dixi, respiciunt; sed in aliis etiam quorumuis generû actionibus mortalium: quæ quanquam aliunde planè pendent, nec vllis humanis casibus sunt exemptæ, minimam tamen, vel nullam potius, euentum ipsorum in vtramuis partem, admittunt rationem; vsqueadeò, vt ipsis etiam prosperis & ad voluntatem fluentibus successibus carere eum optauerint, qui vllis euentum, siue in hanc, siue in illam partem, momentis expendendis, commoueri aliqua ex parte videatur. Atque hæc quidem huius, vt dixi, sæculi filij. Ecce autem

tem ex nostris quoq; ex ipsis, dico, lucis filiis: multò etiam istis, quos dixi, horridiores, ita à successibus externis intuentis arcant Christianorum animos, ita nullam eorum rationem haberi debere contendunt, ita deniq; hominem ipsum, Christi nomini addictum, intus constitutum, atque animo obfirmatum esse censent oportere, vt non secundis ipsis rebus felicitatem suam metiatur, quod vulgo fieri videmus, sed vt tum demum beatum se esse existimet, cùm in quàm-maximas & quàmplurimas vitæ misérias & ærurnas perspexerit se incidisse. Hanc enim esse patris nostri cœlestis viam peruulgatam, vt quos diligat, quorumq; amore maximè teneatur, eorum etiam virtutem rebus ipsis aduersis exerceat; atque ita vexationibus istis expolitâ, illustriorem reddat. Ex quo factum est, vt his eiusmodi præceptis eruditi, non defuerint sanè ex Christianis, qui vitæ incommodis atque aduersitatibus iactati infinitis, in maximis tamen bonis versari se interpretarentur, summamq; propterea suo conditori & parenti gratiam habendam esse existimarent, quòd à mundo affligerentur, & passim mortalium omnium miserrimi deputarentur. Videbant enim ipsum quoq. salutis & religionis nostræ auctorem & perfectorẽ Iesum, omnem suorum in hac vita felicitatem, duris ipsis & asperis rebus omnibus circumscripsisse, paupertate, luctu, lachrymis, fame, inedia, inimiciis, maledicto, morte denique ipsa. Nec circumscripsisse tantum, sed etiam in eodem hoc curriculo ipsum præiuisse nobis, pro nobis: proponentem, vt dico, exemplum nobis, sanguine, sudore, tormentis, cruce, morte sua, vt iisdem illis vestigiis ipse, ad vitam illam sempiternam gradiamur. Quæ si ita sunt, vt sunt, quid est, quæso, quod nos hoc loco agimus, cùm hæreticorum religionem aduersis ipsis successibus infamamus, catholicorum contrà, bonis euentibus commendare de industria studemus? An enim ideò, illam quidem malam religionem dicimus, quòd ea aduersis rebus prematur, hanc

contrà bonam & deo placentem, quòd floreat rerum bonarum cumulo & aggregatione? Non est ita. non est ita. Sed illam quidem, digna factorum suorum præmia recipere dicimus, cum castigatur: nos autem ipsos, singulari providentia, misericordia, bonitate Dei Opt. Max. cuius populus & peculium, cuius deniq. pascuæ oves sumus, ex acerbitate illa veterum ærumnarum, quibus ecclesia ipsa, in illo ipso recenti ortu suo propemodum coquebatur, semel ereptos, translatos tandem esse dicimus in hunc statū veræ libertatis, pacis, splendoris, lætitiæ, & omnis deniq. prosperitatis: in quo dum sumus, verissimè de mundo ipso, per Christum nostrum, triumphare incipimus; subtractique quodam modo & erepti calamitatibus illis, quibus mundus ipse vsque adeò plerosque exagitare solet, vt eos sæpe numero de salutis suæ conditione cogat desperare, illam nunc iam quodammodo vitam inchoamus, quam omni angore & ærumna vacuum, omnibus autem bonis affluentem, in cœlo cum beatis omnibus expectamus: prompti interea & parati, omnia aduersitatum genera pro Christo nostro subire, quæcunq; ingruant diuino ipsius nutu atq. voluntate. Cum contrà profanorum omne genus hominum, omnibus suis studiis mollem ac delicatam quandam vitæ conditionē inquirant & persequantur; quam tamen, cum magna animorum suorum molestia, nunquam neque teneant neque consequantur: atque hoc ipso primitias veluti quasdam sempiternarum illarum ærumnarum suarum futurarum degustare nunc iam incipiant, quibus deinde miseri homines perpetuò affligentur. Aliud est autem profectò, nihil aduersi pati velle, & tamen omnibus calamitatibus immersum esse: quod istorum est: aliud, pro Christi nomine omnia pati paratum esse, & tamen bonis ipsis felicitatibus abundare: quod ipsum, absit verbo inuidia, nostrum est. Quarum duarum rerum, illa ex fontibus erumpit iustitiæ diuinæ, hæc ex sinu ipso profluit misericordiæ & bonitatis

tatis eiusdem Dei Opt. & Max. qui sponsam suā ecclesiam sanctam, omnibus rebus ad veram felicitatē, & vitam beatam pertinentibus semper voluerit abundare. Quod ipsum ita facturum se fuisse, multò etiam antè ostenderat ipse per Prophetam, sic inquit. ECCE EGO STERNAM PER ORDINEM LAPIDES TVOS, ET FVNDABO TE IN SAPHYRIS, ET PONAM CVSPIDEM PROPVGNA CVLA TVA, ET PORTAS TVAS IN LAPIDES SCVLPTOS; ET OMNES TERMINOS TVOS IN LAPIDES DESIDERABILES, VNIVERSOS FILIOS TVOS DOCTOS A DOMINO, ET DABO MVLTITVDINEM PACIS FILIIS TVIS: ET NON TIMEBIS, NEC PAVOR APPROPINQVABIT TIBI. HAEC EST HAEREDITAS SERVORVM DOMINI, ET IVSTITIA EORVM APVD ME. DICIT DOMINVS. Et sic quidem per hunc Prophetam. Per alium autem Prophetam sic. ADHVC MODICVM, INQVIT, ET EGO COMMOVEBO COELVM ET TERRAM, ET MARE ET ARIDAM. ET VENIET DESIDERATVS CUNCTIS GENTIBVS, ET IMPLEBO DOMVM ISTAM GLORIA, DICIT DOMINVS EXERCITVVM. MEVM EST ARGENTVM, ET MEVM EST AVRVM, INQVIT. MAGNA ERIT GLORIA DOMVS ISTIVS NOVISSIMAE PLVS QVAM PRIMAE, ET IN LOCO ISTO DABO PACEM, DICIT DOMINVS EXERCITVVM. De his igitur ecclesiæ nostræ trophæis, aliquid interim contra hæreticos dicamus: ipsosque, si fortè eos sui possit pœnitere, oratione hac extrema nostra ad officium adducere tentemus; proponendis hoc loco in medium successibus quibusdam admirandis, quibus affatim dotata & ornata est à sponso suo ecclesia ipsa nostra: vt si quā fortè, amorem ipsius, eorū mentibus possimus instillare, officio nostro defuisse ne videamur. Atq. hoc quidem in genere, cœlestia interim & æterna illa,

na illa, omnibus in vniuersum hominibus, qui piè, iustè, sobriè, intra hanc eandem ecclesiam vixerint, proposita præmia, propemodum omitemus; quæ etsi amplissima sunt, & tantam rerum omnium desiderabilium excellentiam complectuntur, quanta neque oculo hoc mortali vsurpari, neque auribus istis stupidis hauriri, neque adeò animo ipso, corpori isti affixo, satis pro dignitate æstimari posse videatur; in qua videlicet sola & præmium est laborum cum fide exantlatorum, & hæreditas ipsa filiorum ex deo patre & ecclesia matre genitorum constituta: quia tamen in hac mortali vita nostra teneri non possunt, & spe tantum atque expectatione sui animos nostros permulcent, præsens, quod hodie potissimum quæritur, in manū nihil dant, & ideò segnius nos mouent, nostraquæ adeò desideria mortalia, pertenui admodum cupiditate inflammant; agè interim hæc, vt dixi, omittamus. Omittamus autem? Nos verò nec qua ratione quidem ea omittamus, satis videmus, in quibus meditandis, & pro thesauro quasi quodam maximo ac certissimo amplectendis, animum ipsum nostrum assidue versari oporteret. At quo thesauro? Quem, vt Christus ait, neque ærugo vlla corrumpere, nec tinea demoliri, nec fur quamlibet callidus, vlla ratione effodere, ac furari posse videatur. Sed tamen, quod dicere cœperam, quoniam hoc libro toto populariter omnibus de rebus egimus, rarò admodum vltra conditionem mortalem hanc nostram, sermone nostro prouecti sumus; iccirco, nunc quoque eundem illum cursum nostrum teneamus, & altiora illa, quorum modò mentionem fecimus, alij tempori reseruemus; nuncquæ adeò de successibus prosperis ecclesiæ ipsius Catholicæ nostræ, populariter, vt cœpimus, agamus: ac primū quidem, quibus rationibus ipsa creuerit, & quomodo ex paruis illis initiis, ad tantam, quantam videmus, amplitudinem peruenerit, deinde verò, quæ potissimum cum ea, tum cæteris omnibus gentibus ac nationibus, tum nobis præcipuè Polonis ipsis, fausta,

fausta, felicia, atque inprimis gloriosa, ad præsentis huius vitæ statum pertinentia bona euenerint, breuiter hoc loco perstringamus. Inprimis autem oculos nostros ad illam XII. virorū, quos ipsos à missione, Græco verbo Apostolos nominamus, cohortem referamus: hominum ad vulgare opinionē, obscurorum; adeorum numerū quos deuicerunt, perpaucorū; ad opes eorum quos domuerunt, prorsus imbellium; rerum tamen à se præclare gestarum gloria planè præstantium, & omninò magnorum atq; inprimis illustrium. Qui fanè neque viribus vllis confisi, neq; vlla humana sapientia subnixi, neq; splendore vllō generis aut nominis ad opinionem hominū commendati, sed nudo tantum veritatis ipsius Catholicæ sensu muniti ac ornati; nec Iudæos reformidarunt, legis & cerimoniarum sanctitate tumidos, nec tyrannos exhorruerunt, vi & potētia armatos; nec philosophis, doctrinæ & eloquentiæ opinione inflatis, manus dederunt, nec hæreticis denique ipsis, astu & calliditate instructis, quicquam concesserunt; sed tyrannis primū illis crudelibus, præsentī & in Christū ipsum erecto animo, deinde Iudæis, tolerantia & comitate, sapientibus simplicitate, hæreticis veritate, formidabiles facti, facile vniuersos superatos sub iugum Catholicæ ipsius religionis miserunt; & de omnibus, cū vita, tum multo etiam magis morte ipsa sua, magnificentissimè triumpharunt, seque ea re ad omnem posteritatem illustres admodum & gloriosos reddiderunt. Qua autem re potissimū id sunt consecuti? Qua quæso alia, nisi Catholicæ veritatis beneficio & virtute? cui nulla præiudicatæ sanctitatis opinio, nulla orbis terrarum potentia, nullum ingenium, nullæ opes quantumvis magnæ, obsistere potuerunt. Atque hanc quidem illi quasi nominis sui hæreditatem quādam amplissimam, nobis posteris suis reliquerunt; ut scilicet eiusmodi maioribus pognati esse diceremur, qui, ut scriptura ait, PER FIDEM hanc ipsam, quam prædicamus scilicet Catholicam, VI-

CERVNT REGNA, OBTVRAVERVNT ORA LEONVM, EXTINXERVNT IMPETVS IGNIS, HEBETAVERVNT ACIEM GLADII, ET FORTES FACTI IN BELLO, CASTRA EVERTERVNT ALIENORVM: & quod mirere magis, qui tanta hæc quidem confecerunt in vinculis penè & carceribus, cùm lapidibus & faxis obruerentur, cùm medii secarentur, cùm ferro trucidarentur. Dicent fortassis isti nostri, eorundem se maiorum posteros esse. Ego verò quod dicunt, aut libenter omninò concedam, si modò se ipsi antea, siue Catholicos, siue Catholicæ eorundem fidei æmulos esse atque imitatores docuerint; vel si fidem saltem istam suam nuperam, temporibus iam tum Apostolorum viguisse demonstrarint; aut certè vbi neutrum facere poterunt, ad tempus saltem dissimulabo, si modò ipsi sua sorte contenti, honorem nostrum neque nobis invidere, neque sibi ipsis voluerint vsurpare. Neque enim profectò maiores illi, quos diximus, maiores eorum sunt, sed nostri; neque laus illa, cuius modò mentionem fecimus, laus eorum est, sed nostra Catholicorum: & omninò omnes illi Apostolorum in fundanda religione Christiana successus prosperi, atque salutare, nostri, nostri, non istorū sunt; quibus quidem iure nostro posse videmur præ ipsis gloriari. Atque hoc sanè illustri successuū catholicorū fundamento, iactò semel atq. posito, cōsequentia iam ipsius religionis nostræ tempora omnia intueamur: compariemus enim quanta omniū nationū Catholicarū dignitas, maiestas, amplitudo, gloria, hanc, de qua loquimur, Catholicam nostram religionem fuerit semper subsecuta; sic quidem, vt hæc ubique cum ea, aut orta simul, aut certè in maius semper aucta fuisse videantur. Signum eius, quòd, vbi modò Catholica illa religio semel exorta rursus occiderit, ibi rursus hæc omnia occidisse; vbi decreuerit & diminuta fuerit, ibi hæc eadem decreuisse, atque adeò decrescere indies, ac palàm imminui videantur. Posset id multis multa-

multarum gentium exemplis facile confirmari, nisi quod nostra iam ad exitum properat oratio: ipsa autem quoque hæc nostra tempora, si benè attendamus, satis magnum de eo, quod loquimur, ferunt testimonium; illudque abunde docent & ostendunt, quicquid est etiamnum, in vniuersis his regnis atque imperiis Christianis reliqui splendoris aut pristinae dignitatis (cuius, pace omnium dixerim, vix vmbra iam, eamque infaustis istis, & infelicibus hæreticorū sibilis magnopere exagitatā tenemus,) id ipsum quicquid est, nec armis, nec viris, nec ingeniis, nec opibus nostris, quæ omnia quàm sint perexigua, videmus; sed solius tantummodo religionis Catholicæ beneficio, vtcumque à nobis retineri. Parta est ante annos aliquot, per nostros, insignis illa de Turca ad Naupactum victoria. Audete dicere, armis aut viris fuisse partam; nisi orbis ipse vniuersus, voce quasi edita, orationem eiusmodi vestram redarguat, & victoriam illam diuinitus Catholicorum hominū precibus impetratam ac obtentam fuisse, maximè contestetur: in primis autē illius ipsius ieiuniis, orationibus, eleemosynis, faustis precationibus, quas nos benedictiones appellamus, hæc nobis obtigisse, qui tunc pro capite ecclesiæ Catholicæ præfidebat, Pius V. Pontifex Max. & religiosissimus; nostra quidem ætate superiore, quasi Moses alter: qui dum manus suas in altum tolleret, melior sanè nostrorum fortuna fuit; dum autem is manus, vnà cum vita posuisset, vniuersa illa & belli societas, & victoriæ continuatio, tota fuit confestim intercepta. Quanquam sanè, Moise extincto illo, & ad patres aggregato, etiam Iosue hunc Gregorium XIII. in eius locum diuinitus suffectum habemus; qui & dignitatem Catholicæ religionis, & successuum illorum prosperorum veritatem, si modò ad rem ventum foret, non minus sustinere ac præstare posse videatur. Interim autem conferte vos vel cum illo saltem vno nostro Pio V. omnes quotquot estis inter hæreticos simulatæ alicuius sanctitatis opinione

in vulgus commendati; omnes Pastores, Ministri, Superintendentes eorum; equidem omnibus vestris viribus vix vnum aliquem ex contraria vobis factione hæreticum, miserum illum & inermē, ac omni præsidio destitutum, vrbis etiam vestræ præterea mœnibus circumclusum, Pastorem, Ministrum, Superintendentem, tollere fortè de medio poteritis, talem autem ac tantum exercitum barbarorum & immanium hominum armatorum, ceruicibus Christianorum imminentem, precibus vestris, eleemosynis vestris, ieiuniis vestris, (quorum vix nomina retinetis) euertere, aut saltem auertere nunquam poteritis. Quid ita? Non vestrum enim, non vestrum, sed Catholicorum est, aduersarias potestates, ego autem dico, non visibiles istas solum, sed etiam inuisibiles, & aëreas ipsas, superare. Sed vos quidem, si, cum de terrenis istis & visibilibus dixi vobis, vix creditis tamen, quomodo, si de cœlestibus illis & aëreis dixero, credetis? Atqui hoc ipsum fanè, quod dico, palàm profectò in iis, quos energumenos in ecclesia appellamus, sæpenu-mero apparuit, atque adeò quoties vsus feret, & diuini gloria nominis requiret, etiam per dei gratiam apparebit. Vidimus enim plæriq. omnes, vidimus, cum toties spiritus ipsi maligni in obsessis hominum corporibus, voluntati atque imperio presbyterorum Catholicorum nostrorum, inuiti cesserunt; vestro imperio vestrorumque voluntati non cesserunt. Quam vos insignem planè Catholicorum præ vobis prærogatiuam, & agnoscere, & velitis nolitis fateri necesse omninò habetis; ingerere vos in hanc eiusmodi possessionem eorum, ne verbo quidem audetis. Ab hostibus visibilibus, ad inuisibiles delapsa nostra oratio est; nec temere fanè. Quid enim non possint in hostes visibiles, Christo duce freti, ii, qui spiritualium etiam nequitiarum illarum terrorem se esse, toties manifestis admodum indiciis declararunt? Redeamus ad visibiles victorias illas, paululum intermissas; quanquam hæ quoq. de inuisibilibus aë-
reis

reis hostibus victoriæ nostræ, quodāmodo visibiles sunt. Sed nos ad illas, quas instituimus, redeamus; & eum quoque locum primo quoque tempore concludamus. Vicit proximè Stephanus rex noster, & prostravit per dei gratiam, Moscouiticum penè robur omne. Quid? vósne triennialibus illis & maximè memorabilibus præliis, feros homines à modestis, callidos à simplicibus, fraudulentos ab apertis, multos à paucis, existimatis fuisse superatos? Rem miram profectò, nec satis credibilem existimatis. Ego verò, ut orbis tandem vniuersus rem ipsam intelligat, non hoc dico, aut illud; sed schismaticos inquam à Catholicis fuisse debellatos. Cum igitur dico, vicit Stephanus rex Catholicus, putate me dicere. Vicit leo de tribu Iuda. Ille, inquam, leo vicit de tribu Iuda, cuius vnius, omnis semper habita est propria victoria. Nec verò extremo hoc loco, quo victorias ipsas, principum esse Catholicorum proprias ostendimus, quisquam nobis occurrat velim, & ex aduerso obii-
 ciat constantes illas ac perpetuas Turcarum, hominum impiorum, & falsissimæ atq; inanissimæ omnium superstitioni addictorum victorias, de hominibus Christianis. Neque enim profectò illud quicquid est, victoria est, sed tyrannis; & si quid, certè non Turcarum illa gloria, aut illa felicitas est, sed pœna nostra; non religioni nostræ debita, sed multis nostris scelcribus expressa: quam si porrò effugere etiam deinceps volumus, hæreses quidem primùm omnium auerfari, deinde autem ad Catholicam ecclesiam redire, omnes ex animo debebimus. Et tum quidem, cum hæc fecerimus, & à deo aliquid deinde suppliciter postulantes petierimus, nec exauditi fuerimus; VENITE, VENITE, ET ARGVITE ME, dicit dominus omnipotens. Cuius ipsius illa sunt quoque dicta per filium. SI FIDEM, inquit, QVANTV-
 LAMCVNQVE HABVERITIS. (putasne tu autem, hæreticam illum fidem requirere, potius quàm catholi-
 cam?) MONTES, inquit, TRANSFERETIS, ET OMNI-

NO QVICQVID VOLVERITIS PETETIS, ET FI-
ET VOBIS. Ea est Catholicæ fidei vis & potestas, ea, vt sic
dicam, prærogatiua, vt nulla vnquam natio tam habuerit
deos suos propinquos sibi, vti nationi nostræ Catholicæ
proximus est dominus ipse verus deus noster. Nec mirum
igitur, si, cum interim cæterarum omnium fama gentium
barbararum, in obscuro planè sit, Catholicæ quidem ipsius
religionis nostræ tantus est honos, tanta dignitas, tantaque
adeò vel nominis iam atq. vocabuli ipsius suauitas & ma-
iestas, vt reges etiam ipsi maximi, Europæ maximæ, cogno-
mentum ipsum Catholicorum, certatim quasi, in suorum
honorum inscriptionibus ambire atque appetere videan-
tur: de re autem, hoc verò est, de Catholicismo ipso, ita in so-
lidum vsurpent omnes, vt nullus eorum sit, qui regis appel-
lationem legitimè vsurpare auit, qui idem Catholicus non
sit; quique non idem eodem tempore, eodemque hoc ipso
regis vocabulo, Catholicum se esse profiteatur. Nec verò id
communi tantum professione ipsa, sed priuata etiam quis-
que hoc nomine ad Pontificem Romanum legatione missa;
qua & Catholicum se esse hominem, & morigerum bea-
tissimi illius patris filium, declaret & ostendat. Quis neget
igitur Catholicæ ipsius religionis, & rem esse salutarem, &
appellationem ipsam honestam inprimis atque gloriosam?
aut quis est qui dubitet, in ea potius religione censerì, quam
omnes, qui reges appellari velint, imò omnes qui seruari
cupiant, profiteri necesse habeant, & cuius ipsius appella-
tionem potentissimi quique monarchæ, in ipsis honorificis
suis inscriptionibus, vindicare sibi præ cæteris gestiant;
quàm eiusmodi religionem vllam aut quærere aut tueri,
in qua tibi societas cum fœce hominum, & quod caput est,
extra domum domini habitantium, sit ineunda. Nam in
domo quidem domini vel abiectissimū esse præstat, quàm
primo alioqui loco esse in magnificentissimis ipsis atriis sce-
leratorum. Sed hæc, de quibus loquimur, & plures etiam aliæ,
de qui-

de quibus non loquimur, Catholicæ religionis prærogati-
 uæ, omnium nationum sunt; nostros ipsorum annales bre-
 uiter excutiamus. Maiores quidem nostri, post Lachi pa-
 rentis aduentum in has terras tunc desertas & vacuas, quas
 siue ipse Lachus ille, à polo Poloniam, siue cæteri, quod
 malo, ab ipsa posteritate eius, Polachiam primò, quasi Post-
 lachiam, deinde verò molliori vocis inflexione vsi, Polani-
 am, & denique Poloniam appellarunt. Maiores igitur illi,
 quod dico, nostri, etsi magna semper iam inde à primò ipso
 ingressu suo in has terras, bellicæ suæ virtutis documenta
 dare passim studuerunt, annos tamen ferè quadringentos,
 postquàm in his regionibus pedem posuissent, neque cir-
 cumcirca noti, neque satis à finitimorum tuti iniuriis deli-
 tuerunt in illis tenebris barbaræ ac profanæ religionis: om-
 nem cultum diuinum ipsum, in ipsos illos Pogodas suos,
 in Lados nescio quos, & Nias, & Marzanas, & Zizililias, &
 Dieuanas, & Pochuistos, & Lelos, & Polelos, ac reliquam
 illam imbellium & certè minimè diuinorum deorum tur-
 bam conferentes. At verò vbi semel Christum Iesum. Ego
 autem dico, illum Christum, qui tunc passim, sub Messico-
 nis, quem superius Mescislaum appellauì, principis nostri
 temporibus, per omnem terrarum orbem constanter vno
 omniũ ore prædicabatur; non hunc nescio quem, qui mo-
 dò infelicibus istis nostris temporibus, alius Vitembergæ,
 alius Geneuæ, alius Tiguri, alius hîc, alius illic prædicari est
 coeptus. Dico igitur, maiores nostros posteaquam semel
 Christum Iesum illum animis complexi essent, coepisse de-
 repente ita coalescere, vt vicinis primùm formidolosi, mox
 remotioribus admirabiles, postremò apud omnes clari ac
 celebres sint facti: gloriam videlicet reliquarum nationũ
 omnium, siue domesticis in rebus quis requirat, siue multò
 etiam magis in bellicis, non solum adæquantes; verùm e-
 tiam in plerisque fortassis superantes. Ex quo factum est,
 vt per eos, regium inprimis diadema, cum ipsa illa regis ap-
 pella-

pellatione vniuersa, sceptroque & gladio, regni insignibus, non à nescio quibus administris istis, siue petitem, siue adeò impetratū est, (quorum tunc ne nomen quidem audiebatur vsquam: & quorum ipsorum nunc quoq. magna pars, ipsum etiam regium nomen, detestantur; vniuersi autem vnctionem, non solum à regni inauguratione remouent, verumetiam à baptismo ipso studiosè tollunt) sed à Catholico Romanorum summo Pontifice petitem, à Catholico Romanorum summo Imperatore tributum nobis est. Ex quo deinde & celebres illæ nostræ de multis nationibus victoriæ partæ, & victrices nostræ aquilæ prolatae sunt; cum Boemia, Morauia, Russia, Saxonia, Prussia, Dania, armis prorsus nostris cesserunt. Ex quo denique clarissima illa trophæa, & monumenta, ac termini victoriarum nostrarum, columnæ ferreæ, ad Herculis illius inuicti imitationem, ad Boristhenē, & Salam, & Ossam fluuios, fixæ à nostris ac locatae sunt. Ex quo postremò in has ipsas terras tam spaciosas, & tam longè inter se ac latè diffitas, reipub. forma inducta est. Iacto enim illo, quod diximus, Catholicæ religionis fundamento, latae leges, litteræ excitatae, orta nobilitas, & denique libertas ipsa nominis nostri propria nata est; iisdem videlicet illis libertatis, nobilitatis, litterarum, legum etiam & omnis politiæ nostræ auctoribus Episcopis, qui fuerunt custodes ac præsides Catholicæ religionis. Qui soli nostros illos principes, quorum antea arbitria in omni re pro legibus apud nos erant, Deo primùm ac religioni, fascēs atque adeò poplites & ceruices submittere, deinde legibus communibus parère, postremò hominibus sibi subiectis ex æquo & bono imperare docuerunt; regēsque adeò pro tyrannis constituerunt; & ne deinceps odiosum illud, & libertati inimicum, SIC VOLO, SIC IVBE O, in eorum imperio exaudiretur, effecerunt; cum antea apud nos, nihil propemodum aliud æquè sonare videretur. A qua quidem conditione, dura inprimis & acerba, solius religionis Catholicæ

tholicæ beneficio liberati, in eum statum per dei gratiã ad-
ducti sumus, vt nulli nationi suas leges, suos magistratus,
suam libertatem, suum splendorem, & omninò omnem vi-
tæ conditionē, inuidere necesse habeamus. Inde vrbes, ar-
ces, mœnia, ciuitates, emporia, Episcopatus, templa, cœno-
bia, ptochodochia, dotesque amplissimas eorū omniū, fun-
datas à maioribus nostris; inde scholas, & omnem reliquã
tum litterarum, tum bonarum quarumque artium disci-
plinam & exercitationem constitutam in hac repub. acce-
pimus. Ex quibus facile & Græcorum doctrinam omnem,
& virtutem Romanorū, tam domesticis in rebus quàm in
bellicis, ita hausimus, vt in omni laudis atque excellentiæ
genere, paria prorsus cum omnibus politissimis nationibus
faceremus. Planè vt si quis res nostras diligentius conside-
rēt, hic illas quidem, quæ ante catholicã susceptam religio-
nem extiterunt, magno à nostris hominibus animo gestas,
has verò quæ religionē Catholicam sunt consequutæ, di-
uinis & singularibus successibus auctas & cumulas fatea-
tur necesse est. Quos sanè successus omnes, religioni catho-
licæ ipsi acceptos tulisse maiores nostros, homines simpli-
ces & apertos, ille qui tunc passim in ecclesiis Polonicis in-
ualuerat mos, recentis beneficii gratia excitatus, & cuius
postea, per temporūne iniuriam, an per hominum ipso-
rum incuriam, paulatim oblitterata est consuetudo, abunde
declarabat; cū ad ipsius euangelii lectionem, gladij se-
minudi, in templis ipsis à nobilibus hominibus nostris, è va-
gina educebantur, & ita semidistricti ostentabantur, vt &
beneficium quidem ab euangelio acceptum, & euangelium
ipsum, vnde & libertatis & nobilitatis suæ ceperant bene-
ficium, paratos se esse ostenderent, cum vitæ etiam ipsius ia-
ctura, tueri atq. defendere. Quódnam autem euangelium
illud, quæso? Aude dicere, tuum; si de tuo isto, recenti & nu-
per nato, veteres illi Angeloti, Iordani, Prochorii, Vilibalmi,
& reliqui fundatores religionis nostræ, & post eos aliquan-
to, Adal-

to, Adalbertus & Stanislaus, patroni nominis ac gentis nostræ, vel per somnium saltē diuinare tunc potuerunt. Quorum quidem religionis vestigium, cū cæteris plerisque traditionibus eorum, impressum in sacramentis, sacrificiis, missis, concionibus, cantionibus, ecclesiarum nostrarum remanserit; quæ omnia iam inde ab eo tempore, omnibus templorum nostrorum cerimoniis ac ritibus semel consignata, etiamnum vigent, quasi testes quidam domestici, eiusdem illius, quam ab illis, quos diximus, maioribus nostris accepimus, constantis atq. perpetuæ catholicæ religionis: tum verò extat, inter ipsa eiusmodi vetustatis monumenta, pæan ille, Bogarodizza (sic Slaui, à quibus nos originem duximus, Θεοτόκου appellant) pæan, inquam, in virginis matris Mariæ laudem, à Diuo Adalberto ipso, Slaucis verbis, & inconditis, vt illa ferebant tempora, numeris cōpositus: quo ipso pleraque religionis ipsius Catholicæ capita, temporibus quidem his nostris miseris controuersa, tunc verò certa imprimis, & per omnes Catholicas in orbe terrarū ecclesias peruulgata, continentur, vnde quiuis quodlibet petat licet. Quem pæana ipsum, solenne fuisse genti nostræ decantare, aut casibus ipsis aduersis ingruentibus, aut magnis alioqui inchoandis & aggrediundis rebus, vel ex illo sanè memorabili prælio constare potest, quod à Vladislao Iagellone nostro, huius Annæ reginæ nostræ proauo, prosperrimè ante annos CLXX. cum Cruciferorum Marianorum Teutonicorum ordine, imò cum imperio ipso Germaniæ, est gestum: cū Germaniam ipsam magna ex parte vel misericordia Cruciferorum illorū, vel affinitas, vel pecunia, vel lingua, ac causa deniq; propemodū communis, ad arma illa contra nos exciuisse dicebatur. Quo quidem in prælio, post quadringentos demū amplius annos, ex quo pæan ille fuit primū in rempū nostram à D. Adalberto introductus, decantatū eum, & pro classico quasi quodam vsurpatum fuisse, in ipso propemodum procinctu prælii ipsius,

sius, tradunt historici. Et omninò, quicquid deinceps maiores nostri optauissent bene atque feliciter reipub. euenire, aut quicquid denique gratularentur euenisse, in eo celebrando, pæane eodem illo utebantur. Quo ex genere est illud quoque, vt hymnus idem ille nunc etiam, diebus ipsis natiuitatis, resurrectionisque dominicæ, & reliquis eiusdè generis in ecclesia diebus festis ipsis, extra ordinem decantetur. Cuius ipsius vsus, ne vllò vnquam tempore deinceps intermitteretur, iccirco, patrum auorumq. memoria, cùm primùm ferè typi excudendorum librorum publici essent in Poloniam introducti, legibus ipsis nostris per Ioan. Lascium regni Cancellarium publicadis, fuit vnà ipse quoque, publico omnium consensu publicatus, & publicis illis literis ad memoriam sempiternam consignatus, ac legibus ipsis nostris insertus; qui nobis ad omnem temporum opportunitatem, euangelium illud, quod ab initio Polonia ipsa ceperat, nonnullis capitibus vel obscurum, vt ferè fit, illustraret, vel dubium interpretaretur. Cuius quidem hymni memoria dum vigeret in sermonibus & vocibus hominum, non disceptabatur sanè de personis sacrosanctæ Trinitatis, non de vnus illius essentia diuinitatis, non de Christi dei nostri æternitate, non de sacramentorū aut numero, aut vi, aut ratione, non de corporis Christi in eucharistia veritate, non de sanctorum inuocatione, non de purgatorio. Credebantur constanter omnia hæc: non argumento & disputatione, vt nunc, exagitabantur. Interim autem plenum erat penu omnium, plena arca, plenum horreum, plena virtus, plenus pudor, plena fides illa, quæ est dictorum ipsorum & factorum constantia ac veritas, plena mutua suorum caritas, plena vicinorum erga nos beneuolentia, tot affinitatibus & propinquitatibus vndiquaque stabilita; cantus vbique & symphonia personabant, vndique nuncii læti, de nouis aut fœderibus pactis, aut obtentis victoriis, aut omninò prospere gestis rebus, afferebantur; vnde altaria di-

uorum erigebantur, templa Dei immortalis dotabantur, collegia sacerdotum instituebantur; populares autem homines, indies ditiores, clariores, potentiores, fortunatiores reddebantur; & omninò nihil erat, quod plenissimum illud Poloniæ gaudium contaminare vlla ex parte potuisse videretur. Consiliisne autem id conficiebatur nostris, quæso? Dicam, consiliis. Dabat enim nobis profectò deus ille, cuius religionem castè admodum & integrè tunc colebamus, eiusmodi & Reges & Senatores, qui reipub. ipsi bene cupe- rent, bene consulerent, bene denique facerent. Sed quia hæc consilia omnia diuinitus suppeditabantur nobis, dicam verius, non consiliis nostris gubernatas res nostras tum ste- tisse (quæ ipsa quoties ad prudentiæ humanæ trutinam ac rationē reuocata ab externis ipsis hominibus examinaren- tur, toties ad interitum ferè magis quàm ad salutem patriæ cōparandam spectare iudicabantur) sed stetisse admirabi- li quadam benignitate ipsius summi Dei, qui rudem illam tunc temporis ignorātiā præfectorum ac magistratuum nostrorum, ipse, solius diuinæ suæ religionis causa, fidelissi- mè à maioribus nostris cultæ ac conseruatæ, ad salutē sem- per reipub. tanquam ad optabilem portum quendam, in- flectebat, omniaque adeò, etiam consilio nostro minus prouisa, bene nobis atque feliciter faciebat euenire. Quæ nunc ecce, prò dolor, commutatis & conspurcatis ipsius re- ligionibus, sic attrita & accisa intuemur, vt magnopere, tam in publicis quàm in priuatis rebus nostris, non solum feli- citatem illam maiorum nostrorum, sed iam etiam pruden- tiam ipsorum, atque adeò illa ipsa tempora eorum, hodie requiramus. Et, nisi tempestiuè omni cura & studio nostro prouidemus, etiam nescio quid præterea, absit omen verbo, atrocius, horribilius, funestius expectemus, à consiliis qui- dam & ministeriis administrorum istorum, quibus respub. ludus est, regnum iocus, claritas nominis & existimatio tenebræ.

EPILOGVS.

Votum, vt hæc quæ dicta sunt, ita expendantur, vt ad ecclesiam catholicam quamprimum fiat reditio.

Multi hoc tempore ab hæreticis ad ecclesiam catholicam reuertuntur; sed & plures etiam per Dei gratiam reuertentur.

Non ab omnibus malitiosè discessum fuit à catholicismo.

Deprecatio, vt quæ scripta sunt, in optimam partem accipiantur.

Nec enim quenquam lædere, sed vicem tantum ecclesiæ dolere hoc libro voluimus.

Orandum pro his, qui se ab ecclesia segregauerunt; & pro ecclesiæ pace ac tranquillitate simul.

Forma eius orationis.



C de his quidem omnibus, quæ ab initio proposueramus, hætenus dictum esto, non tam pro rei dignitate aut necessitate, quam pro mediocritate nostra: quam ipsam cupio Deo Opt. & Max. imprimis probari. Restat, vt hoc totum pia aliqua & fausta precatione concludamus, ad eum quidem ipsum conuersa, sine cuius numine, nihil est in homine; & qui, nisi solus plantationibus nostris incrementum dederit, omninò iam neque Paulus aliquid est, qui plantat, neque Apollo, qui rigat: quique nisi ipse ædificauerit in nobis, ciuitatè mne an domū hanc istam Ecclesiæ sanctæ, de qua loquimur, & qua, vera ipsa, quam his libris suademus, religio & pietas in deum continetur, frustra, frustra omninò laborant, quotquot sunt qui ædificant eam. O si mihi, pro sua singulari benignitate, largiatur Deus Opt. Max. & immortalis, pater misericordiarum, vt quotacunque earum rerum pars, quas constituendo hoc ipso ædificio ecclesiastico, propositas esse in vtramq. partem hominibus intelligētibus voluimus, tum, cum pro tenui infirmæque parte nostra, & de fundamentis,

& de parietibus, & de tectis, & de opere intestino, & de fastigio denique ipso tam ecclesiæ sanctæ, quàm ecclesiæ aduersæ, disputaremus toto hoc libro nostro; Si mihi, inquam, concedat deus, ut aliqua earum rerum pars, accidat ad aures alicuius viri boni, communi tantum, & hac ætate peruulgato isto religionum errore nonnihil deprauati: qui inita subductaque diligentius eorum omnium ratione, quæ tum ad tranquillandam perturbatam suam conscientiam, tum ad comparandam æternæ vitæ hæreditatem, pertinere videantur; principio præcipitem illum in consilio hæreticorum impiorum cursum suum inhibeat; deinde etiam in tam lubrico & periculoso loco illo diutius ne immoretur; tum autem vtriusque vtrinque sibi propositæ viæ rationem atque finem, quasi libratīs vtrinque ponderibus accuratè admodum examinet, & quid in qualibet parte boni sit aut mali, secum etiam atque etiam perpendat; postremò autem, vniuersalitate, antiquitate, sanctitate, ordine, consensu, sacramentis, sacrificio, successu denique mirifico Catholicorum, cognito & perspecto, quibus profectò rebus omnibus facilè illi, ut diximus, hæreticis antecellunt, quàm concitatissimo gradu, ad eos ipsos, qui antecellunt, contendere videatur. Hæc, inquam, si diuino beneficio contingant mihi, ô felices planè labores meos, ô fortunatas vigilias meas, ô operæ precium, nullis fructibus aut vectigalibus maximis comparandū. Atq. id quidē ipsum, quod tanto animi nostri studio desiderare videmur, hoc etiam non magis optare quàm sperare iam planè & possumus & debemus, quòd his ipsis temporibus, cum in omnes orbis partes oculos nostros circumtulimus, non amplius impietate ista doctrinarum effrenari homines, neque tam impotenter, ut antè, insanire videamus, sed magna ex parte colligere se, & ad se quodammodo redire animaduertamus, veterumq; & diuturnarum suarum aberrationū poenitentia ductos, nouum quoddam vitæ genus palàm auspicari in eccle-

in ecclesia Catholica sancta. In quibus, Polonia quoque ipsa nostra, quæ, cum antea, heu nefas, receptaculum quasi quoddam fuisse videretur, eiusmodi quisquiliarum exter-
narum, quæ alienis, per summam ignominiam sedibus eie-
ctæ, vel, quod inuitus dico, fortassis etiam vltro accersitæ,
natiuam illam veteris religionis nostræ puritatem obscu-
rare semper in nobis, & adulterina nouæ suæ superstitionis
spurcitia cōtaminare quodammodo conabantur, nunc sub
ductis diligentius rationibus, ad mentem sanio-rem redire,
& superiores illas suas separationes, ac discessiones profa-
nissimas perosa, atque peregrinitatem illam hominum ne-
scio quorum auersata, qui hætenus bonitatem morum
ingeniorumque nostrorum prope in ludibriū iam & con-
temptum conuertebant, ciuilem ipsam cum veteribus ciui-
bus concordiam inire, & Catholicam ecclesiam antiquam,
porrectis manibus, per Dei gratiam, amplecti iam videtur.
Ad sunt enim & in media repub. versantur, clarissimorum
virorum filii clarissimi, homines omni elegantia optimarū
doctrinarum perpoliti, graues, modesti, sapientes, disertī, &
omninò ad omne decus reipub. huius geniti; qui relictis
præceptis atque institutis hominum istorum ecclesiæ ini-
quorum, quibus præceptis ab ineunte ipsa ætate sua, vo-
luntate parentum imbuti extiterunt, nunc lubentes ac vo-
lentes, in doctrina ipsa & instituto Catholicorum con-
quiescunt: imò contentissimis suis & ardentissimis studiis,
ad doctrinam & instituta Catholicæ ecclesiæ amplecten-
da rapiuntur. Quorum vnus ante aliquot annos, cum illi
ad nescio quam vsurpandam hæreticorum superstitionem,
vis propemodum à patre ipso, viro clarissimo, sed homine
nō Catholico intentaretur, atq. adeò tantum non inferre-
tur. Permite, inquit, pater, cum ea me venia atq. libertate
in euangelio Catholico versari, qua libertate pater ipse
tuus vir Catholicissimus, euangelio te Luterano vti atque
frui permisit olim. Et alius deinde, etiam non Catholici
sed

sed clarissimi viri, clarissimus & Catholicissimus filius, cum familiarius admoneretur à nescio quo, non Catholico ipso, ut se in vniuersum ad patris, hominis Euangelici iam demortui imitationem componeret, & omnino (uti tum ille loquebatur) ut patrissaret. Ego verò in cæteris ac lubēs quidem, inquit: nisi quòd in religionis negocio, ad aui me potius, quàm ad patris imitationē composuero libentius. Sic enim mihi persuasi, vetustissimam quamque optimam esse religionem. O vocem memorandam & omnium vsurpatione dignissimam. Ego verò cum hæc ita esse video, facile equidem confido fore, ut in dies, his ipsis principibus iuuentutis procurantibus, insignes admodum accessiones ad ecclesiam Catholicā eorū exemplo fieri videantur. Sunt enim sanè multi in illis aduersis partibus, homines nec aduersis, nec peruersis ingeniis, qui non malitia vlla in illud vitæ genus ingressi, sed planè incauti delapsi erāt; quos nos benè ecclesiæ, optimè reipub. ac patriæ ipsi suæ, & cupiuisse, & cupere, facile nobis persuademus; sed ignoratione veri, eam vitæ rationem secutos esse opinamur, qua existimauerunt, maximum se obsequiū præstare deo. Sunt item nihilo pauciores, quibus, tum cum se à nobis, ad nouos istos magistros, in illis primis doctrinæ eorum initiis transferebant, haud facile tantæ eorum licentiæ, & inconstantia, & quod dicendum est, impietatis, in mentem veniebat, quantam nunc in illis re ipsa in dies magis atque magis experiuntur. Itaque cum oculis ipsis suis iam cernant, imò manibus propemodum contrectent ipsis, quoniam callida illa improborum hominum consilia iam tum ab initio spectauerint, & quantam vniuersæ cum religioni tum reipub. ruinam moliri viderentur; quod cauti & prudentes homines, imò quod boni ciues & reipub. amantes solent in hoc genere facere, pedem ipsi quoque optimo consilio referre incipiunt, & se totos ad reipub. & patriæ salutem atque incolomitatem conferre & aggregare non dubitant; satis interea
siue

siue nouitatis studio, siue maiorum voluntati, siue æqualium amicitia, siue adeò temporibus ipsis opinionibusque suis datum existimantes; vltra, in patriæ perniciem contendere non oportere. Illud enim planè constituendum est, nisi iam nunc malis eiusmodi, vel ratione, vel diuini ipsius metum numinis, vel amore deniq. reipublicæ & patriæ, occursum fuerit à viris bonis, magnopere verendum esse, ne his motibus labefactata respub. cum religione vnà concidat prorsus, & quod absit, intereat. Nihil autem est quod minus deceat, quàm vt qui seipsi amantissimos semper esse reipub. magnis, quod scimus, ostenderunt argumentis, hi in tanto rerum omniū discrimine positam, maximè necessario ipsius tempore deserant, & in præsentibus istis periculis constitutam relinquāt; quin potius danda est iis opera, vt quam ipsi pro sua singulari charitate & amore, maximè stabilem esse cupiant & æternam, eam studiis & factionibus profugorum istorum hominum lacerari ac discerpi, eam denique à coniuratis istis in eius perniciem hostibus diutius suffocari & strangulari minimè patiantur. Est enim hoc profectò fuitque semper genti ac nobilitati Polonicæ proprium, vt rempub. ipsam quàm maximè saluam esse velint, & vt ipsius amoris haud facile quicquam in vita anteponant; imò vitam etiam ipsam suam posterius habeant: amicitias autem omnes, & studia quæcunque his aut illis dedicata, respectus etiam reliquos, ad ea quæ in communi hominum vita versantur, hac vna re moderentur, vt iis salus patriæ huius ac reipub. antiquissima semper esse videatur. Quæ laus sanè vti in nostris hominibus & maxima est, & vicinis adeò ac longinquis omnibus nationibus notissima; ita spem mihi planè facit maximam, breui fore, vt colluies illa hominum aduenarum reipub. nostræ infestissimorum, in quam solam, omnis huius libri nostri, non sine causa maxima, exarsit acerbitas, pellatur tandem de reipub. vel tædio hominum nostrorum tam diuturno, vel recenti impatientia,

patientia, vel, quod summum est, iustissima quadam aduer-
 sus eos iracundia & concitatione, ab iisdem illis maximè
 omnium profecta, qui, quemadmodum hactenus aucto-
 res fortassis fuerunt, siue ab initio introducendarum tot se-
 ctarum in Poloniam, siue deinceps earundem retinenda-
 rum, ac defendendarum, ita nunc rursus, iustissimo, vt
 dixi, concepto illarum odio, auctores volent proculdubio
 perhiberi, earum extinguendarum, & tum patriæ ipsius suæ
 diuturna hac infamia, tum reipub. quoq. ipsius admodum
 proxima ruina ipsa liberandæ. Et sicut alias, extra religio-
 nis negocium, semper auctoritatem suam in repub. ad res
 maximè necessarias libentissimè omniū contulerunt, eam-
 que, & domi magnam inter suos, & foris orbi ipsi terra-
 rum, testatam ac notam maximè esse voluerunt, ita hoc
 etiam ipso tempore, illam nobis certissimā dant quandam
 optimi & reipub. amantissimi sui animi significationem, in
 iis quoque rebus, quæ ad dei Opt. & Max. diu admodum
 in Polonia iactatam religionem constituendam pertinent,
 operam suam insignem non esse amplius defuturam. Quos
 nos planè propterea, & nunc iam omnibus honoribus, li-
 benter, vt debemus, prosequimur, & deinceps etiam laudi-
 bus ipsis eorum meritis per omnem occasionem, libentis-
 simè aut prosequemur ipsi, aut certè ab aliis multò excel-
 lentioribus viris, ornari, maxima cum iucunditate sentie-
 mus. Quos ipsos etiā, ne hoc quidē libro, quo nobis, omnis
 illa inter nos & ipsos vtcumq. explicata est religionis dif-
 fensio, acerbius compellare vnquam voluimus, sed aut rem
 tantum ipsam simpliciter notare contenti fuimus, à perso-
 nis abstinuimus, aut si quid, tum illos potius admonendos
 esse existimauius, qui docere ipsi diuersum à religione
 Catholica, dogma ausi essent, quàm eos, qui se id doceri ab
 aliis paterentur, aut si quid deniq. tum verò in eos solos,
 vehementiores fortè extitimus, qui studio, non qui casu;
 qui vitio, non qui naturæ fragilitate; qui inflatione animi,

non

non qui rei ignoratione, qui denique confundendi & euer-
tendi omnia voluntate, nō qui animo experiundi, huic sese
disciplinæ tradidissent. Postremò autem eos vel maximè
styli nostri acumine, si quod est, petere voluimus, qui sum-
ma illa & præcipua, ac simul cum religione ipsa Christiana
nata, fidei nostræ capita, ab imo conuellere institissent;
quique cū in diuinam ipsam maiestatem, ac reliqua fidei
nostræ archana sacramenta & sacrificia contumeliosè in-
uadere, tum mores ipsos castos & pudicos, vitamque adeò
sobriam & honestam, temulenter admodum tollere è me-
dio non dubitauissent Monstra & portenta hominum, non
homines, qui neque fide profectò sua, tecta ipsa ædium su-
perant, quoties volunt cœlum conscendere, neque, cū
ipsi è cœlo videri volunt ad nos descendere, aliquid adfe-
runt, quod non scelestam potius quàm cœlestem eorum
religionem testari videatur. Hi sunt soli potissimū, quos
tristiori fortassis interdum sermone isto nostro appellan-
dos nobis esse existimauius. Quod quidem eiusmodi fa-
ctum institutumque nostrum, sicuti cum bona bonorum
omnium venia à nobis acceptū iri confidimus, ita sanè vt
accipiat, etiam atque etiam petimus. Non enim profectò
quenquam hominum lædere, sed vicem tantū ecclesiæ
& religionis vehementius fortassis aliquanto, pro animi
nostri infirmitate, dolere voluimus. Quæ res, si vberiores
interdum lachrymas excussit nobis, si vehementiorem in-
terdum gemitum in nobis excitauit, si acerbiorē fortè
vspiam expressit vocem, quæ molestiam vllam creare cui-
quam potuisse videatur, nā ille ignoscere potius debet im-
becillitati nostræ, qui in causa omniū indignissima, & sem-
piterni doloris ac mœroris plenissima, nō & queri, & dole-
re, & mœrere, & eiulare, & diuū præterea ac hominū fi-
dem implorare, & de deniq. ipsius summam iniuriam ver-
bis accommodatis exponere non potuimus; quàm vt vetet,
extremo nos hoc vti consolationis genere, quod nobis so-
lilibz

lum, in hoc ipso extremæ calamitatis nostræ tempore restare videbatur. Quid enim aliud faceremus, in tanto tantarum rerum incendio communi excitato? præsertim cum eius ipsius denunciandi, & ad concurrendum homines inuitandi, nonnullæ etiam meæ partes esse viderentur; quem Deus, ultra mea merita, ad eorum hominum consortium volens aggregavit, quibus dictum est olim per Apostolū, depositū hoc fidei & religionis diligēter ut custodirent; per ipsum autē Apostolorū dominū, ut constituti super familiā domini, suam cuique tritici, non zizaniorum, mensuram, opportunè partirentur. Alioqui, quod ad nostrum quidem ingenium attinet, nullos vnquam aduersarios deponoscimus, ac ne nunc quidem deponoscimus: omnibus potius honestis hominibus, bene omnia atque prosperè euenire cupimus; hos ipsos adeò à religione nostra dissentientes homines, & tulimus semper, quoad maximè potuimus, & nunc etiam vsque adeò omnibus officiis nostris prosequi auemus, ut eos & quàm diutissimè viuere, & magnis incrementis resipiscere, & tum ad deum ipsum reuerti, tum ecclesiam pariter & rempub. ipsam complecti, tum omnibus denique vtriusque honoribus & commodis ex æquo planè nobiscum frui, maximè cupiamus: eundemque prorsus omnium nostrum erga illos sensum esse, ex animo desideremus. Neque enim profectò æquum esse arbitramur, ut cum ne nos quidem ipsi radicem portemus, sed radix nos, efferamur aliquo modo præ istis, altūmue, ut loquitur Apostolus, sapiamus; sed potius animaduersa & perpensa, in eos quidem qui ceciderunt, seueritate Dei, in nos autem summa bonitate, existimemus id quod est, potentē esse Deum, iterum eodem inferere illos vnde exciderunt; si modò non permanserint in incredulitate, & si spiritum ipsum sanctum noluerint de industria contristare: qui profectò intercedit semper pro nobis gemitibus inenarrabilibus, ut possessionem filiorum Dei possimus primo quoque tempore adipisci.

adipisci. Quid enim quæso? an verò non duodecim horæ diei sunt? Tum autem, an verò non septies, atque haud scio an septuagies septies, in die cadit iustus? Cadit autem. Nimirum etiam videlicet toties resurgit. Et si iustus toties cadit, quomodo non cadet is qui non est iustus? Quis est autem ex nobis, qui se iustum possit profiteri, dum hic viuit? aut qui possit verè illud dicere: Mundum est cor meum, purus sum à peccato? Nimirum nemo est alius, qui possit facere mundum de immundo conceptum semine, nisi deus ipse æternus & immortalis, qui solus est, quiq̃ue solus, cum volet, poterit nos hyssopo illo suo aspersos emundare, & ultra niuis etiam candorem nitidos reddere. Quæ cum ita se habeant, & cum totum hoc opus & fidei, & conuersionis nostræ à studiis & doctrinis prauis, opus diuinum sit, & vt ab initio statim eius sermonis nostri monere nos meminimus, ad deum solum auctorem referendum, equidē danda est nobis opera, vt ad orationis præsidium identidem confugiamus, & tum pro illis, qui in diuersas factiones volentes nolentes sunt abrepti, tum pro nobis etiam ipsis, qui in grege dominico ipso hætenus permansimus, & omnino pro vniuersa ipsa ecclesia, quæ vti permanentes gremio non excludit, ita redeuntibus vicissim ipsis maternum gremium non claudit; in quotidianis, si videtur, sacrificiis ipsis nostris, sic oremus.

Si vlla, ô domine, ecclesiæ tuæ teneris charitate, sicut profectò summa teneri te, & cum nulla adhuc esset ecclesia, eam fabricando, & cum amissa, restaurando, & cum iactata, conseruando declarasti, à te supplices petimus, vt quæ se nunc suis ipsa dissidiis conficit, diuino tuo munere, ad pacem & concordiam reuocata, possit respirare. Per dominum nostrum Iesum Christum filium tuum.

Valeat apud te clementissime Pater, illa pro nobis moribundi nati tui, sub ipsam statim panis & vini, ab ipso, secundum ordinem Melchisedechi representatam oblationem facta

nem facta deprecatio. Pater sancte, serua eos in nomine tuo, quos dedisti mihi; ut sint vnum, sicut & nos. Ut hac nostra aliquando in hunc terrarum orbem reducta vnitatem, simul & nos recentibus his malis liberes, & sermonis filii tui, domini nostri Iesu Christi confirmes veritatem, de ea, qua tecum in spiritu sancto viuit & regnat Deus vnitatem.

Salutarem nobis, domine, religionis consensum, fructum communicationis mysteriorum filii tui, in ecclesia tua benignus restitue; ut quos de iisdem sacramentis participare voluisti, eos ad vnum ouile reductos, & vni pastori commendatos, tua facias pietate concordare. Per eundem dominum nostrum Iesum Christum filium tuum, qui tecum viuit & regnat in vnitatem Spiritus sancti

Deus, per omnia secula seculorum,

A M E N.

C R A C O V I A E

In officina Lazari. Anno Domini,

M. D. LXXIII.


Idib. Maii.

*Adm. & L. Paulus Lupatierius Praepos. Xenodochij
S. Nicolai ac Comend. Ecclae Praepos. Sacerdos legauit
Gua. Eadem Ecclae Sacerdos Anno 1682*





1949. XVI n. 6 folio



A
D
Exch

in ratuſa ot
or m. s. d. i. o. w. a. s. n.

37
C
ziny
af
rek
C
Eiey

102
at

02

pxp
pax

gratulo. d. i. c. m. o. h. d. i.
o. i. t. a. r. i. a. h. i. l. i. d. / o.
o. d. u. m. i. t. e. o. q. d. e. s. i.
i. n. q. o. r. i. s. a. l. i. d.
m. a. r. o. n.